

1741  
JOURNAL  
CONTENANT

TOVT CE QVIS'EST FAIT  
ET PASSE' EN LA COVR DE  
PARLEMENT DE PARIS, TOVTES  
les Chambres Assemblées, fut le suiet  
des affaires du temps present.



A PARIS,  
Chez GERVAIS ALLIOT, Marchand Libraire pro-  
che la Chappelle S. Michel, dans la Cour du Palais.

E T

IACQUES LANGLOIS, Imprimeur ordinaire du Roy,  
au Mont Sainte Genevieve, vis à vis la Fontaine,  
A LA REYNE DE PAIX.

---

M. DC. XXXXVIII.



ROYAL  
CHAMBRES  
ASSEMBLÉES

JOVRNAL

CONTENANT TOUT CE


QUI S'EST FAICT ET PASSES EN

la Cour de Parlement de Paris, toutes les  
Chambres Assemblées, sur les Juries des affaires  
du temps présent.

ARREST DE MONSIEUR LE MARCERDY

Mars 1648

En jour la Cour, toutes les Chambres assemblées, ayant delibere sur le rapport fait par les Consellers, d'icelle, que les  
ce qui a esté dit par les Doyens du grand Conseil, Chambres  
des Comptes & Contables Aydes, touchant le rattachement  
des gages & Declaration du Roy pour le payement du Doyen  
d'icelle. A arresté l'Union & position avec ledict Comptable  
gner, d'icelle au dict Conseller de la Chambre de ladite Cour  
seront lieues pour contenter avec les Doyens d'icelle Compagnies pour  
faict & rapport fait à ladite Cour, estre ordonne ce qu'il appartiendra, &c.  
ordonnant ainsi. A esté fait en l'auditoire, par lequel aucun ne l'est receu &c.  
qui y auctorise, que la continuation des veues de hennier







# IOVRNAL

## CONTENANT TOVT CE QVI S'EST FAICT ET PASSE EN la Cour de Parlement de Paris , toutes les Chambres Assemblées, sur le suiet des affaires du temps present.

### ARREST D'UNION DU MERCREDY *treZiesme May 1648.*



E iour la Cour, toutes les Chambres assemblées, ayant deli-  
beré tant sur le rapport fait par les Conseillers d'icelle, que sur  
ce qui a esté dit par les Deputez du grand Conseil, Chambre  
des Comptes & Cour des Aydes, touchant le retranchement  
des gages, & Declaration du Roy pour le payement du Droit  
Annuel: A arresté l'Vnion & jonction avec lesdites Compa-  
gnies, qu'à cette fin deux Conseillers de chacune Chambre de ladite Cour  
seront deputez pour conferer avec les Deputez d'icelles Compagnies, pour ce  
faict, & rapport faire à ladite Cour, estre ordonné ce qu'il appartiendra; & es-  
pendant suivant l'Arrest fait en l'année 1613. qu'aucun ne sera receu es Offices  
qui vacqueront, que du consentement des veufues & heritiers.

944.03.  
781471



64

ARREST DV CONSEIL D'ESTAT  
du Roy, portant Cassation de l'Arrest d'union  
cy-dessus enoncé.

EXTRAICT DES REGISTRES DU  
*mesme Conseil.*

**C**E iourd'huy dixiesme Iuin, le Roy en son Conseil, la Reyne Regente sa Mere presente, sur ce qui luy auroit esté representé, que par vn Arrest de la Cour du treiziesme May, les quatre Compagnies souveraines de cette ville de Paris se seroient jointes sans autorité ny fondement legitime: sa Majesté a cassé ledit Arrest comme pernicieux à son autorité Royale, & ordonné que le present Arrest sera executé, & que la minute de celuy de la Cour sera tirée des Registres d'icelle pour celuy-cy estre mis en son lieu & place: Et fait sadite Majesté très expresse inhibitions & deffenses ausdites Compagnies de se plus assembler à peine de desobeyssance. Fait au Conseil d'Estat du Roy tenu à Paris le dixiesme Iuin mil six cens quarante huiet.

ARREST DE LA COUR PORTANT  
confirmation de celuy du treiziesme May.

*Du Lundy seiZiesme Juin.*

**C**E jour la Cour toutes les Chambres assemblées, ayant delibéré sur le susdit Arrest du Conseil, & sur ce qui auoit esté dit par Messieurs les gens du Roy de la part dudit Seigneur au dernier iour; Veul ledit Arrest & les Conclusions du Procureur General: A arresté & ordonné qu'en executant l'Arrest du treiziesme May dernier presentement, l'un des Secretaires de ladite Cour ira de la part d'icelle vers les trois Compagnies Souveraines de cette ville les aduertir d'enuoyer leurs Deputez demain à deux heures de releuée en la Salle Saint Louys, pour conferer avec les Deputez de ladite Cour: Que cependant toutes les Chambres demeureront assemblées; & a esté Maistre René Radigues, Secretaire de la Cour chargé d'auertir lesdites Compagnies, ce qu'il auoit executé.

Cet aduis a esté ouuert par monsieur Boucherat Maistre des Requestes, & finy de 97. y ayant eu 66. voix d'aduis de faire des Remonstrances.



5

AVTRE ARREST DV CONSEIL D'ESTAT  
du Roy, portant encores cassation de l'Arrest  
ey-dessus enoncé.

*Extraict des mesmes Registres dudit Conseil d'Estat,  
du quinZiesme Iuin.*

**S**ur ce qui a esté représenté au Roy en son Conseil, la Reyne Regente sa Mere presente, que par Arrest donné en commandement, l'Arresté fait par le Parlement de Paris le 13. May dernier eust esté cassé, avec defense à ladite Cour de l'exécuter, ny se joindre avec les autres Cours Souueraines de la Ville de Paris; Neantmoins ladite Cour, apres que ledit Arrest luy auroit esté représenté par son Procureur General, qui en auoit requis l'exécution & l'enregistrement, auroit par vne entreprise qui n'a point d'exemple sur l'autorité de la Majesté, fait vn Arrest le 15. du present mois; portant qu'ayant delibéré sur ce qui luy auoit esté dit par les Gens du Roy, de la part dudit Seigneur, & sur l'Arrest du Conseil d'Estat du dixiesme Iuin dernier: & veu ledit Arrest, & les conclusions du Procureur General, quelvn des Secretaires de la Cour iroit vers les trois Compagnies Souueraines de cette Ville, les aduertir d'enuoyer les deputez le lendemain en la Salle Saint Louys à deux heures, pour conférer avec les deputez de ladite Cour de Parlement, de chacune Chambre, & cependant toutes les Chambres demeureroient assemblées: Et comme ledit arresté est vne desobeissance pleine de mespris & injurieuse à l'Autorité Royale, & qui ne se peut souffrir, sans la diminution, que des Officiers qui n'ont point d'autre puissance que celle qui leur est donnée par les Roys pour l'exercice dans les regles qui leur sont prescrites, s'en seruent par vne usurpation violente, pour s'opposer aux volontez de leur Roy. & leur Maistre: & ce qui donne encores plus d'estonnement, est, que les graces qu'ils ons receutés de sa Majesté, ayent produit tant de mesconnoissance & d'ingratitude: Il est difficile de juger quelle peut estre leur intention, ny ce qu'ils peuuent esperer de leurs violences, s'ils pensent abatre l'autorité royale, & la soumettre à leurs iniustes desseins: ainsi il est necessaire d'arrester le cours de l'exécution à cet Arresté si contraire aux Ordonnances royaux & Loix de l'Estat, qui ne souffrent aucune assemblée extraordinaire sans l'autorité & la puissance du Roy; au contraire ce seroit establir vne puissance nouvelle, dont les consequences seroient dangereuses & prejudiciables à l'ordre & autorité du gouuernement public, dont les inconueniens pourroient avec le temps degenerer en vne espee de reuolte & de faction: ainsi les ennemis de cette Couronne se preualent de leur procédé, comme d'une sedition, qui seroit par leurs vœux presté d'esclorre dans le Royaume. Ce qu'ayant esté bien considéré, & veu ledit Arrest du 15. du



present mois : Sa Majesté en son Conseil, la Reyne Regente sa mere presente, a cassé & annullé, cassé & annulle ledit Arresté, comme fait par attentat & entreprise sur son autorité; & ordonne que l'Arrest du Conseil du 10. Iuin, sera executé, & que la minutte del' Arrest de ladite Cour du 15. Iuin sera representée par le Greffier d'icelle, & qu'en son lieu & place ledit Arrest, & celuy du 10. Iuin dernier seront enregistrez. Fait Sadite Majesté tres-expresses inhibitions & deffenses à ladite Cour, de faire aucune jonction avec les autres Compagnies Souueraines de cette Ville de Paris, ny de plus s'assembler tant par deputez qu'autrement, à peine de des-obeissance: luy enjoignant de travailler incessamment à l'expedition des affaires, & de rendre la Iustice à ses sujets. Fait au Conseil d'Estat du Roy, sa Majesté y seant, la Reyne Regente sa mere presente, tenu à Paris le 15. Iuin 1648.

Signé,

GVENEGAUD.

Ce mesme iour de releuée, le sieur de Guenegaud Secretaire d'Estat, accompagné du sieur de Carnualer Lieutenant des Gardes du Corps du Roy, & de quelques gardes, seroit allé au Greffe de la Cour, pour prendre & deschirer la fueille où estoit ledit Arrest d'Vnion : dequoy s'estant fait esmotion des Clercs, apres que le Greffier auroit respondu n'auoir pas ladite fueille, ledit sieur de Guenegaud & autres, auroient esté contrainsts de se retirer fort promptement.

### *Du Mardy seiziesme Iuin.*

C E iour toutes les Chambres estant assemblées auroit esté apporté à la Cour vne Lettre de Cachet portant ordre du Roy au Parlement, d'aller par Deputez trouuer sa Majesté, & luy porter lesfueilles où estoient l'Arrest d'Vnion & celuy qui le confirmoit: Surquoy ayant deliberé, ladite Cour auroit arresté d'aller vers le Roy en corps sans porter la fueille, & que leur Arrest seroit executé nonobstant les deffenses du Conseil & cassation d'iceluy.

Ce fait sur les 11. heures du matin Messieurs du Parlement au nombre de plus de cent, allerent à pied au Palais Royal, suivis d'un nombre infini de peuple, les priant d'auoir pitié du pauvre peuple si fort oppressé. Estant arriuez au Palais Royal, monsieur le Tellier Secretaire d'Estat vint demander à monsieur le premier President de luy parler en particulier, ce qu'il luy refusa, disant que la Cour ne se separoit point. Ledit sieur le Tellier demanda pourquoy la fueille n'auoit point esté apportée; à quoy monsieur le premier President respondit que la Cour n'en rendroit raison qu'à la Reyne. Apres que ces Messieurs eurent attendu quelque temps en bas, on les fit monter au Cabinet de la Reyne, où estant entrez, monsieur le Chancelier, apres vn discours qui ne fut pas long, fit lecture de l'Arrest donné au Conseil cy-dessus enoncé. Puis la Reyne commanda que le lendemain on luy apportast le registre pour oster la fueille de l'Arrest d'Vnion, & mettre en son lieu & place, celuy dont monsieur le Chancelier venoit de faire la lecture; deffendit de s'assembler en la Salle Saint Louys, avec les Deputez des autres Compagnies, adjoustant que



les honnestes gens n'auoient point esté d'aduis de l'Arrest d'Vnion, & qu'il y auoit vne douzaine de Conseillers dont elle sçauoit les noms, & desquels elle sçauoit bien se vanger; reperant qu'on ne manquaist pas d'apporter le lendemain le registre.

Ce mesme iour sur les deux heures de releuée, toutes les Cours Souueraines s'assemblerent par Deputez en la Chambre de Saint Louys: il n'y fut rien resolu sinon d'attendre ce que le Parlement, qui estoit assemblé en la grande Chambre, arresteroit sur les deffenses qui auoient esté faites de s'assembler, & ainsi les Deputez se separerent.

*Noms des Conseillers deputez des Compagnies Souueraines,  
pour les assemblées qui se doiuent faire en la Salle  
de Saint Louys.*

<i>Conseillers du Parlement.</i>	<i>Cōseillers des Requestes.</i>	
MESSIEURS,	MESSIEURS,	
Menardeau.	De Griex.	Le Bailly.
Le Preuost.	Fiober.	Dela Grange.
Gilbert.	<i>Grand Conseil.</i>	Lescuyer.
De Machault.	MESSIEURS,	De Longueil.
Pitou.	De Bouqueual.	Falconi.
Aubier.	De Masparault.	Le Fevre.
De Saueuse.	Chénart.	<i>Cour des Aydes.</i>
Bénard.	De Creil.	MESSIEURS,
Ferrand.	De Lescuille.	De Bragelone.
Palluau.	Ioly.	Du Mez.
Le Bret.	<i>Chambre des Comptes.</i>	Le Fevre.
	MESSIEURS,	Le Bel.
		Esmery.
		Baullan.

*Du Mercredy dix-septiesme Iuin.*

Ce iour toutes les Chambres assemblées la Cour auroit deliberé sur les deffenses à elles faites le iour precedét de s'assembler. Il y auroit eu 3. aduis, premierement de passer outre, & s'assembler incessamment nonobstant lesdites deffenses. Le deuxiesme qui fut ouuert par monsieur Viole, President aux Enquestes, estoit bien de passer outre ausdites deffenses, mais d'attēdre encor trois iours, pendant lesquels on feroit parler à la Reyne pour venir à quelque accommodement. Le troisieme aduis fut d'enregistrer l'Arrest du Conseil, & faire des remonstrances. La Deliberation n'ayant pū estre acheuée, l'assemblée fut remise au Samedy suiuant, attendu que le Ieudy estoit Feste de l'Octaue du S. Sacrement, & le Vendredy le Parlement auoit donné le Landy.



### *Le Samedi vingtiesme Iuin.*

**C**E iour toutes les Chambres assemblées ainsi qu'il auoit esté arresté le Mercredy precedent pour continuer la Deliberation commencée, monsieur le premier President auroit dit d'abord qu'il se faisoit quelques propositions d'accommodement, ce que Messieurs les autres Presidents auroient certifié: Quelques-vns de Messieurs les Conseillers auroient dit qu'il falloit sçauoir quelles estoient ces propositions, & deliberer sur icelle; monsieur le premier President respondit qu'elles n'estoient pas encore données, & qu'il n'y auoit qu'une entremise (c'estoit monsieur l'Abbé de la Riviere lequel s'entremettoit de la part de monsieur le Duc d'Orleans, mais personne ne fut nommé) vingt-cinq de Messieurs les Conseillers furent d'aduis de passer outre nonobstant ce discours, & continuer la deliberation commencée, le reste ayant dit qu'il n'y auoit pas beaucoup de temps iusques à Lundy, que rien ne deperiroit si l'on remettoit la deliberation à ce iour-là: à quoy il auroit passé, & la Cour se seroit leuée.

### *Le Dimanche vingt-uniesme Iuin.*

**C**E iour se seroit fait vne assemblée chez monsieur le Duc d'Orleans, où se seroient trouuez Messieurs le Cardinal, le Chancelier, les Presidents au Mortier, vn President, & vn Conseiller de chaque des Enquestes & requestes, en laquelle assemblée on auroit offert à Messieurs du Parlement de remettre leurs gages, leur donner le droit annuel, sans payer aucun prest ny aduance; Que mesme les Maistres des requestes seroient compris, tant à la remise des gages, qu'à l'octroy du droit annuel: mais qu'à l'égard du retablissement desdits Maistres des requestes, interdits de l'entrée du Conseil, & de la suppression des charges nouvellement créées par la Declaration, cela deuoit venir de la bonté de la Reyne, à quoy Messieurs du Parlement respondirent qu'ils en feroient rapport le lendemain à l'Assemblée.

### *Le Lundy vingt-deuxiesme Iuin.*

**C**E iour toutes les Chambres assemblées, monsieur le premier President ayant fait relation de ce qui s'estoit passé le iour precedent au Palais d'Orleans & les offres qui auoient esté faites, & sur ce deliberé, il auroit passé tout d'une voix de ne les point accepter, disant que la Cour ny les autres Compagnies n'agissoient point pour leurs interets particuliers, mais pour le soulagement du peuple, à quoy il falloit s'employer & trauailler puissamment; il passa aussi à remercier monsieur le Duc d'Orleans de la bonté qu'il auoit pour la Compagnie, puis executer incessamment l'Arrest de jonction: il y eut plusieurs d'aduis de faire connoistre à la Reyne qu'elle est mal seruie, que les deniers de France sont dissipés & pillés sans qu'il en soit employé que fort peu aux necessitez de l'Estat, qu'il se fait des leuées sur



sur des Arrests du Conseil qui ne viennent à sa connoissance, contre l'ordre & les Declarations verifiées au Parlement, que dans des villages on faisoit payer les entrées pour le vin comme dans Paris: on fit mesme lecture de l'Arrest du Conseil, qui ordonnoit telles levées, qui auroit fort estonné toute l'Assemblée, laquelle se separa sans acheuer la deliberation remise au lendemain.

*Le Mardy vingt-troisiesme & Iendy vingt-cinquiesme Iuin.*

Ces iours toutes les Chambres assemblées la Cour auroit continué la deliberation, laquelle n'ayant peu estre acheuée fut encor remise au lendemain.

*Le Vendredy vingt-sixiesme Iuin 1648.*

Ce iour toutes les Chambres assemblées, & enuiron vne vingtaine de Messieurs qui restoient à opiner sur la deliberation commencée, ayant dit leur aduis il passa à celuy de monsieur Maynardeau, qui estoit quel l'Arrest de jonction seroit executé, mais auparavant que l'on deputeroit vers la Reyne pour scauoir les intentions de sa Majesté: Cet aduis fuiui de cent quatre Conseillers, n'y en ayant eu que quatre vingt-six de celuy d'executer purement & simplement l'Arrest de jonction; si bien que la Cour auroit arresté qu'on deputeroit presentement vers la Reyne pour luy faire entendre la justice del'Arrest du treiziesme May & du procedé de la Cour; asseurer sa Majesté que rien ne se passera en la Conférence avec les Compagnies Souueraines contre le seruice du Roy, & la supplier tres-humblement de retirer & reuoker les Arrests du Conseil: qu'on deputera aussi vers monsieur le Duc d'Orleans pour le remercier de ses bons offices, & le supplier de les continuer à la Compagnie, laquelle demeurera assemblée; & qu'il sera enuoyé presentement vn Secretaire de la Cour aux Deputez des autres Compagnies pour les aduertir de l'arresté en cette deliberation; & à l'instant Messieurs les Gens du Roy auroient esté mandez pour demander audience à la Reyne, laquelle elle auroit promise au lendemain: comme aussi vn Secretaire de la Cour auroit esté enuoyé aux Compagnies leur donner aduis dudit arresté, apres quoy la Cour se seroit leuée.

La Reyne auoit fait dire à plusieurs qu'elle desiroit cette deputation.

*Du Samedy vingt-septiesme Iuin 1648.*

Ce iour suiuant l'arresté du iour precedent, monsieur le premier President & cinq autres de Messieurs les Presidens, avec trente Conseillers seroient allez vers la Reyne, à laquelle monsieur le premier President au nom du Parlement auroit dit & représenté ce qui suit.



*Harangue de Monsieur le premier President à la Reyne  
Regente, au Palais Cardinal.*

**M**ADAME,

Les Souuerains doiuent plustost se faire obeyr par amour & douceur, que par crainte & violence: la clemence doit estre la principale de leurs vertus, & le but de toutes leurs actions: les Magistrats sont les Mediateurs entre les Edicts des Princes & les supplications des peuples; & comme vne barriere entre cette independante Authorité, & cette extrême foiblesse, la Iustice doit estre le lien & l'adoucisement de ces deux extremittez. Neanmoins, MADAME, l'on void aujourd'huy cette Iustice & ses Magistrats priuez de la puissance & de la liberté de leurs fonctions & de leur ministere, par des mouuements de puissance absoluë, & par des Edicts forcez, qui causent des vexations extraordinaires & si generales, qu'il n'y a aucune partie de la France qui n'en ressentent la rigueur: si bien que l'on peut dire avec verité, que tous les Iuges priuez de l'honneur & de la liberté de leurs fonctions, n'en ont plus que le tiltre honneur; & dans l'impuissance, l'on a tousiours estimé que le temps, qui est le remede des maux les plus grands, le seroit encores de ceux-cy: mais au lieu de les changer & de les adoucir, il les a augmentez, & presque rendu incurables: de sorte qu'il est mesme à craindre, que l'autorité du Roy & le bien de l'Estat ne s'en ressentent, si le Parlement, dont les pensées ne tendent qu'à la conservation, ne s'oppose generalement à tous les desordres. Et c'est la raison pourquoy les auteurs de tous ces conseils auoient entrepris de ruiner son Authorité, parce qu'il estoit le seul obstacle opposé aux desordres dans lesquels l'Authorité Royale alloit tomber. L'on a voulu renuerser leurs desseins & leurs bonnes intentions, en faisant croire à vostre Majesté, qu'il entreprenoit au delà de sa puissance, & qu'il en passoit les limites; Que leurs assemblées estoient illicites & extraordinaires; & qu'en ce mot d'Vnion, dont on les qualifioit, estoit vn terme criminel; Que l'Authorité Royale ne pouuoit souffrir sans atteinte & sans degradation. Ceux qui ont donné à vostre Majesté ces pernicious conseils & ces fausses impressions, scauent bien le contraire de ce qu'ils ont persuadé: mais ils l'ont fait non pour le bien de l'Estat, mais pour leur conservation particuliere; prenoyans bien le mal qui leur en pouuoit arriuer. L'on les a voulu faire passer pour seditieux, & sous ce faux pretexte on a exercé des violences extraordinaires, l'exil & la prison. Malheureuse preuoyance, qui punit les innocens pour les coupables, sans autre raison que celle de leur deffense & de leurs iniustes soupçons: mais leurs accusations meritent mieux cette qualité que les autres, puis qu'ils n'ont iamais eu que du respect & de l'obeyssance pour le Roy, & vne inuiolable fidelité pour l'Estat, qu'ils ont perpetuellement tesmoigné dans toutes les occasions. Il est à craindre que ce coup qui porte contre l'Authorité du Parlement, ne porte son



contre-coup contre l'Autorité Royale. Ils sont obligez de faire entendre à vostre Majesté, que ce sont les mêmes personnes qui luy ont celé l'exemple de mil six cens dix-huit, en laquelle année ils s'estoient assemblez pour le même dessein, pour les rentes des Aydes, & pour les deniers de leur police. D'ailleurs, tous les Registres sont chargez d'exemples pareils, d'Assemblées des Compagnies par l'ordre du Parlement : le Roy voulut alors les empêcher, & apres auoir esprouvé leurs Assemblées & tout ce qui s'y estoit passé, & même recompensé ceux qui en auoient la meilleure partie, ayant bien reconnu, qu'il ne s'y estoit rien passé, que pour le bien de son seruice & le repos de son Estat, il est bien estrange, qu'une même cause, qui a produit autrefois des reconnoissances, ne produise à present que menaces, injures & soupçons, quoy que ceux qui veulent faire cette Assemblée aient le même respect, le même zele, & la même affection au bien de l'Estat : Veritablement quand ils pensent à cette eleuation, dont ils ne se peuuent ressouuenir sans douleur, à ce Theatre, à ce Throsne, & à cette Pompe preparée pour le triomphe de leur innocence, deuant laquelle en la presence de vostre Majesté, des Princes, & des plus grands de ce royaume, le premier Parlement de France a fait vne espede d'amende honorable; leur zele & leur innocence a esté accusée, leurs Arrests des treiziesme May, & quinziesme Iuin y ayant esté casséz par celuy du Conseil, apres y auoir esté publiquement diffamé par des termes injurieux, & comment aprescela la Iustice pourroit estre maintenant considerée? Car comme vne paille qui se rencontre dans le diamant fait qu'on en diminue le prix, puis qu'elle en oste toute la lumiere esclatante: ainsi le peuple ne fera plus de cas du premier Parlement de France, apres tous les desplaisirs qu'il a receus aux yeux des Princes & Grands du royaume, qu'ils s'estoient obligez pour l'honneur de la regence, seule consideration pour laquelle ils l'auoient souffert, de faire entendre à vostre Majesté, qu'ils scauoient bien que cette injure ne procedoit point de vostre part: vostre vertu, pieté, vos inclinations & vn sentiment, sont absolument éloignez de ces violences, ils tiennent pour tout assuré que vostre Majesté sera bien-tost desabusée à l'auantage du Parlement, & qu'elle cognoistra la fausseté de ces mauuais conseils, & le mystere de ces impressions dans la fidelité de leurs seruices, à la honte & à la confusion de ceux qui vous les ont donnez. J'ay charge du Parlement, MADAME, de faire entendre à vostre Majesté la iustice de son amitié, & la supplier tres-humblement de faire supprimer l'Arrest du Conseil du 15. Iuin dernier donné contr'eux; & trouuer bon que leur Arrest subsiste de leurs registres, & en donner vne Declaration à l'innocence du Parlement, iniustement accusé & injurié, & vous assurer qu'ils ne feront rien dans l'Assemblée qui ne soit pour le bien & seruice du Roy, & le repos de son Estat; & le conjurer tres-ardemment de leur conseruer l'honneur de sa bien-veillance, avec protestation qu'ils sont vos tres-humbles, tres-obeyssans & fidelles seruiteurs.

La Reyne ne leur dit autre chose, sinon que le Mardy suiuant elle enuoyroit à la Cour sa volonté.



12

*Du Mardy dernier Iuin 1648.*

Ce iour toutes les Chambres assemblées seroient entrez Messieurs les Gens du Roy, lesquels auroient dit à la Cour que l'intention de la Reyne estoit que l'Assemblée de la Chambre saint Louys se fust incessamment, & que les affaires s'y expédiaissent en peu de temps pour le bien de l'Estat, mais sur tout qu'il y fust aduisé aux moyens d'auoir de l'argent promptement pour la necessité des affaires de la guerre.

*Dudit iour.*

Les Assemblées en la Salle saint Louys auroient commencé ce iour de releuée; il y eut d'abord contestation pour les rangs & ordre de sceance entre le grand Conseil & la Chambre des Comptes; il fut proposé que les Deputés de ces deux Compagnies seroient à la droicte du Parlement, chacun à leur iour alternatiuement; à quoy monsieur de Bouqueual ayant consenti, il fut desaduouié le lendemain par la Compagnie, & arresté que les Deputés d'icelle prendroient vne sceance au Bureau hors de rang, comme elle a pratiqué en d'autres rencontres, apres cette commance des rangs l'Assemblée commença à faire & examiner quelques propositions qui suiuent,

*Deliberations arrestées en l'assemblée des Cours Souueraines tenues & commencées en la Chambre de Saint,*

*Louis le 30. Iuin 1648.*

PREMIERE SEANCE.

Article premier.

Les Intendans de Iustice, & toutes autres commissions extraordinaires non verifiées es Cours Souueraines seront reuocquées dès à present.

Article second.

Les Traitez des tailles, taillon, subsistances & toutes autres leuées seront dès à present reuocquées, & lesdites tailles assises & imposées en la forme ancienne & comme auparauant; lesdits Traitez à la diminution du quart au profit du peuple, attendu que ladite diminution du quart est beaucoup moindre, que ce qu'en profitent les traittans, avec remise de tout ce qui reste deub iusques & compris l'année 1646. pour raison dequoy tous prisonniers detenus es prisons seront eslargis.

Ce faisant les deniers portez en la maniere accoustumée es receptes particulieres, & d'icelles es receptes Generales, & de là à l'Espargne, les charges ordinaires prealablement payées & acquittées; & seront employez à l'entretienement des Maisons Royales & affaires de la guerre, sans pou-



voir estre diuerties pour quelque pretexte que ce soit, non obstant toutes assignations, traittez, prests & autres empeschemens quelconques, à peine de repetition contre les ordonnateurs & parties prenantes, leurs veufues heritiers & biens tenans; deffences aux traittans desdits deniers, de faire aucunes contraintes pour l'exécution de leurs traittez, tant pour les années precedentes 1646. que suiuanes, lesquels traittez, ensemble toutes les assignations données sur lesdits deniers demeureront nulles.

*Deuxiesme seance tenuë en la Chambre saint Louis, le Mercredy premier iour de Iuillet 1648.*

Article troisieme.

**N**E seront faites aucunes impositions & taxes qu'en vertu d'Edicts & Declarations, bien & deuëment verifiées es Cours Souueraines, ausquels la cōnoissance en appartient avec liberté de Suffrages, & que l'exécution desdits Edicts & Declarations sera reseruée ausdites Cours, sans qu'aucun des particuliers Habitans des Villes & Communautéz puisse estre contraint solidairement pour le payement des taxes & droicts imposez sur lesdites Villes & Communautéz.

Deffences à toutes personnes de faire & continuer aucunes leuées de deniers & impositions de taxes qu'en vertu d'Edicts & Declarations verifiées esdites Cours à peine de la vie.

Article quatriesme.

Ne sera fait aucun retranchement de gages, rentes, reuenus des Domaines, Greffes, ny autres droicts alienez & attribuez par Edicts ny aucunes hereditéz & suruiuanes reuouées qu'en vertu d'Edicts & Declarations bien & deuëment verifiées par lesdites Cours avec liberté de suffrage.

Article cinquiesme.

Qu'aucun rachapt de rente sur le Roy, remboursement de finances d'offices & droicts, ne sera fait qu'apres la paix publiée; & que toutes rentes constituées par le Preuost des Marchands & Escheuins de cette Ville de Paris sans Edicts verifiez, seront declarez nuls; deffences ausdits Preuost des Marchands & Escheuins, d'en ordonner le payement, & aux Recoueurs & Payeurs desdites rentes de les payer, à peine de radiation en leur propres & priuez noms, sauf leurs recours contre les parties prenantes.

Et d'autant que cy-deuant plusieurs remboursemens ont esté faits au preiudice des finances du Roy, destinées pour l'entretienement des armées, ce qui a donné lieu à plusieurs prests & aduances qui ont consommé les finances du Roy iusques en l'année 1651. que tous ceux de quelque qualité & condition qu'ils soient qui ont esté Propriétaires desdites rêtes, droicts & offices nouveaux, & ausquels lesdites rentes, droicts & offices, ont esté rachaptez & remboursez par le Roy, depuis le commencement de la guerre, montant à plus de trente millions, seront contraints de remettre aux coffres du Roy les deniers par eux receus pour lesdits rachapts & rembour-



fement, desquels leur sera passé par lesdits Preuosts des Marchands & Escheuins de cette Ville de Paris, nouveaux Contrac̃ts de constitutions de rente, à raison du denier quatorze sur le mesme fonds qu'estoient assignées lesdites rentes, offices & droic̃ts, pour estre les deniers prouenans desdites restitutions employez aux frais de la guerre; & d'autant que par mauuaise foy aucuns se sont fait rembourser au denier dix huit au lieu du denier quatorze, qui estoit leur premiere finance, seront tenus à la restitution du quadruple de ce qu'ils auront receu, & aux interets du simple, suiuant les Ordonnances.

Article six.

Qu'aucun des suiets du Roy, de quelque qualité & condition qu'il soit ne pourra estre detenu prisonnier passé vingt-quatre heures, sans estre interrogé, suiuant les Ordonnances, & rendu à son Iuge naturel, à peine d'en resp̃dre par les Geolliers, Capitaines, & tous autres qui les detiendront en leurs propres & priuez ñs, & que ceux qui sont de present detenus sans forme ny figure de procez, seront mis en liberté, & remis en l'exercice de leurs charges, & possesiōs de leurs biēs; & qu'aucun Officier ne pourra estre troublé en la fonction & exercice de sa charge par lettres de cachet, portant deffenses d'entrer en leurs Compagnies, relegation en leurs maisons ou es Villes & Chasteaux du Royaume, arrest & detention de leurs personnes, ou autrement, mais seulement en informant contre les Officiers, & faisant leur procez suiuant les ordonnances.

*Troisiesme seance tenuë en la Chambre saint Louis le Iendy  
deuxiesme Iuillet.*

Article sept.

Q V'il sera estably vne Chambre de Iustice, composée des Officiers des quatre Cours Souueraines par icelle nommez, pour connoistre & iuger des abus & maluersations commises en l'administration & manie-  
ment des Finances du Roy, & exaction des deniers sur les suiets du Roy, mesme des prests vsuraires & simulez, sans que ladite Chambre puisse estre reuocquée par aucune composition, ny que don puisse estre fait des confiscations & condamnations qui seront ordonnees en icelle; & les deniers en prouenans portez à l'Espargne, pour estre employez sans aucun diuertissement aux affaires du Roy.

*Quatriesme Seance tenuë en la Chambre saint Louis le Ven-  
dredy troisesme Iuillet.*

Article huietiesme.

S Eront tous adiudicataires, Fermiers de Gabelles, Aydes des cinq gros-  
ses Fermes, & de toutes autres Fermes du Roy, sans exception, con-



trains de porter à l'Espargne toutes charges prealablement payees & acquittées, les deniers du pris de leurs Fermes du quartier d'Auril dernier 1648. & de ceux qui escherront cy apres, suiuant leurs baux; comme aussi seront tous traittez, prests & aduances faits par les Tresoriers de l'Espargne, parties cauelles, ordinaire & extraordinaire de la guerre, sur les gages, & droicts retranschez à tous les Officiers de Finances, & sur les rentes de quelque nature & condition qu'elles soient; mesmes sur les ventes des bois, tant ordinaires qu'extraordinaires, declarez nuls quant à present, non-obstant toutes pretenduës aduances, prests & assignations sur iceux, sans qu'aucune Quittance, Mandemens, Rescriptions, ou Recepissez del'Espargne cy deuât expediez sur les deniers dudit quartier d'Auril, & suiua's, puissent valider en quelque sorte & maniere que ce soit, ains dès à present sont declarez nuls, & de nul effet, sauf leur estre pourueu pour leur remboursement & interests legitimes, en temps & lieu, & connoissance de cause.

### Article 9.

Attendant que par le reestablissement de la paix generale les affaires du Roy puissent permettre que les rentes soient bien payées des quatre quartiers de l'année suiuant leurs constitutions, qu'il sera laissé fonds chacun an dans les Estats des deux quartiers & demy pour les rentes sur le sel, Aydes, huitiesme & vingtiesme de Paris & Clergé, de deux quartiers, sur les huit millions des tailles, receptes generales & prouinciales & petites tailles, rentes des Aydes, gabelles de Lyonnois, & cinq grosses Fermes, dont le payement sera fait par preference à toutes charges, mesmes à la partie de l'Espargne. Et pour remedier aux abus que commettent ordinairement les payeurs desdites rentes, au grand prejudice des particuliers rentiers; que dorelnauant les deniers destinez pour le payement desdites rentes, seront par chacune semaine des Bureaux des Fermiers & comptables sur lesquelles elles ont esté assignées, portés par les Receueurs & payeurs desdites rentes en presence d'un notable Bourgeois qui sera commis pour veiller au recouurement & payement desdites rentes, suiuant la nature d'icelles, par deux Conseillers des quatre Compagnies Souueraines de ceste ville de Paris, avec le Preuost des Marchands & Escheuins en l'Hôtel de ladite Ville, & mis dans les coffres d'icelle, avec les bordereaux des especes paraphez des Commis des Fermes & receptes, lesquels coffres fermeront à deux clefs, dont l'une sera gardee par le Receueur, l'autre par le notable Bourgeois nommé, pour estre lesdits deniers distribuez chacun iour du bureau par lesdits Receueurs & payeurs en presence de leurs Controleurs, d'un des Escheuins, & dudit notable Bourgeois aux particuliers rentiers, aux mesmes especes qu'ils aurôt esté receus; & assistera ledit notable Bourgeois; & lors que desdits payeurs feront leurs fueilles pour empêcher que lesdits payeurs ne mettent sur la fueille du quartier courant les vieux arrerages des quartiers passez, & prendront un iour extraordinaire



pour payer lesdits vieux arrerages des quartiers passez, sans que lesdits Receueurs & payeurs desdites rentes, & Contrôleurs puissent recevoir leurs gages & droits, sinon par concurrence & proportion, pour autant de temps que les rentiers & non plus; & compteront lesdits Receueurs & Payeurs par chaque année suivant le fonds qui sera laissé comme est cy-deuant dit par l'estat du Roy & d'icelle année conformément à l'Arrest de la Chambre des Comptes du premier Aoust mil six cens quarante six, & submission desdits Receueurs portées par leur Requête présentée à ladite Chambre le dix-huictiesme Septembre mil six cens quarante sept, nonobstant la Declaration du Roy du 28. Feurier 1648. qui sera reuouquée; & pourra ledit notable Bourgeois estre changé tous les trois mois par les Commissaires deputez desdites quatre Cours Souueraines, lesquels s'assembleront pour cet effet aux premiers iours de chacun quartier en la salle Saint Louys, pour y trauailler & faire que lesdites rentes soient entierement payées ausdits rentiers, & seront tous dons des debets des quittances, declarez nuls, & toutes commissions pour ce expediees, mesme celle de Besson reuouquées, pour les deniers prouenant desdits debets estre portez esdits coffres de ladite ville, & distribuez aux rentiers selon qu'il sera ordonné par lesdits Commissaires.

*Cinquiesme sceance du Samedi quatriesme Iuillet tenue en la salle saint Louys.*

Article 10.

**Q**ue toutes les commissions extraordinaires demeureront reuouquées, toutes les Ordonnances ou jugemens rendus par les Intendans de Iustice cassez & annullez. Deffenses aux sujets du Roy de les connoistre pour Iuges, ny se pouruoir deuant eux, à peine de dix mille liures d'amande; qu'à la diligence du Procureur General du Roy il sera informé des distractions; & diuertissemens des deniers de sa Majesté par des Conseillers de la Cour, qui à cet effet se transporteront dans les Prouinces, monitoires publiez dans toutes les Parroisses; que l'Arrest sera leu dans toutes les Mareschaussées ou Seneschaussées, & que tous les Thresoriers de France & Esleus feront leurs charges.

Article vnziiesme.

Sera l'Edit du mois de Septembre 1645. concernant l'abonnement du domaine reuocqué, & main leuée de toutes saisies faites en consequence, avec deffenses de faire aucunes poursuittes pour raison d'icelles.

Attendu la notoriété du refus des encheres, & que l'on a obligé les adjudicataires à faire des auances immenses pour destourner les encherisseurs, sera de nouveau procedé à la publication desdites Fermes du Roy, à la maniere accoustumée, au plus offrant & dernier encherisseur.

Et



Et pour faire connoistre que si les Finances auoient esté administrées, avec ordre sans diuertissement, le reuenu du Roy seroit suffisant pour supporter toutes les despeses ordinaires de l'Estat & de la guerre; il se voit par le compte de l'Espargne de l'année 1643. que la recepte monte à six vingts quatre millions deux cens soixante seize mil huit cens sept liures, quoy que les impositions pour la taille, Subsistance & Espargne, ne monte qu'à cinquante huit millions trois cens mil vnze liures, les Fermes dix-huit millions de liures, l'ordinaire des parties casuelles, vente des bois, dons gratuits des pays, d'estats, trois millions sept cens mil liures, reuenant lefdites trois sommes à quatre vingt millions: si bien que lefdits quarante quatre millions soixante dix mil sept cens liures restans, ont esté payez par anticipation, pour auoir esté auparauant employez au rachapt des rentes, remboursement de nouveaux Officiers, cy-deuant faictz; sur laquelle somme de quatre vingt-millions, ne se trouue en despenſe effectiue, sans y comprendre les remises faictes à l'Espargne, montant à vnze millions 647872. liures: & pour la somme de soixante quatre millions, cinq mil quarante liures; & y adioustant cinq millions dix-neuf mil cent quarante liures, ainsi resteroit de bon desdits quatre vingt millions, cent quatre mil huit cens cinquante neuf liures remis à l'Espargne: ce qui fait voir que lefdites aduances ne sont necessaires, & que c'est mauuais ménage de faire des remises, payer de grands interests, puis que mesme partie de la dite recepte a esté portée es mains des anciens Thresoriers de l'Espargne; & ce qui a donné lieu à cette grande recepte est la remise faite du quart de la dite recepte de quinze pour cent, que l'on fait monter suiuant les certifications des comptans employez ausdits Comptes quarante huit millions deux cens soixante vnze mil cent vingt-cinq liures neuf sols, quoy que toute la recepte dudit compte, la remise du quart & de quinze pour cent de tout autre quart à quoy ont monté les promesses qui ont esté faites de presté, ne reuient qu'à quarante-huit millions vingt-cinq mil cinq cens soixante & quatorze liures; partant on peut dire qu'il a esté diuertý cinq millions quatre cens quarante cinq mil cinq cens cinquante mille liures douze sols six deniers sur toutes les sommes dont est fait recepte, sur lesquelles n'a esté fait prest ny remise qui y soient comprises.

#### Article douziésme.

Qu'attendu la notoriété du refus des encheres sur les Fermes du Roy, il sera de nouueau procedé à la publication desdites Fermes en la maniere accoustumée suiuant les Ordonnances.

#### Article treiziésme.

Les Arrests du Conseil concernant le Thoísé des maisons, seront reuocquez, & en consequence mainleuée de toutes les saisies faites, avec desſences de faire aucunes poursuittes pour raison d'icelle.



*Sixiesme sceance tenuë en la Salle saint Louys, le Lundy  
sixiesme Iuillet.*

Article quatorziesme.

**L**E Roy sera supplié de faire fonds pour le payement de l'Infanterie de huit monstres, les gens d'armes & Cavaliers de dix, & faire payer les soldats par prest de dix iours en dix iours, avec leur pain de monition; & lors qu'ils marcheront faire fournir les Estapes: avec deffence sur peine de la vie de quitter leur route, & seront conduits par les Officiers ordinaires; & demeureront les Chefs & Officiers responsables des desordres: & en cas de plainte, les Iuges des Preuosts des Mareschaux en connoistront suiuant les Ordonnances.

Article quinzième.

Seront les Officiers des Bureaux des Finances, Secretaires du Roy, Prefidiaux, Commissaires, & Controллеurs des Guerres, Tresoriers & Payeurs de la gendarmerie, Tresoriers Prouvinciaux, Officiers des Mareschaussées, Bailliages, Preuostez, Eauës & Forests, Traictés Forraines, Traictés d'Anjou, Elections, Greniers à sel, & autres Officiers tant de Iudicature que de Finance reestablis en la fonction & exercice de leurs charges, & en la iouissance de leurs gages & droicts, nonobstant tous Traictéz, Prests, aduances & assignations faites sur iceux, lesquels demeureront nuls dès à present.

Article seiziesme.

Que toutes creations d'Offices, augmentation des taxes & droicts qui se leuent sur tous les Sceaux des grandes & petites Chancelleries, que pour le controolle general de toutes expeditions de finance & garde-rolles qui ne seront verifiez es Cours Souuerainés, seront dès à present reuocquez, & deffences aux grands Audianciers, Controллеurs & tous autres Officiers du Sceau & leurs Commis, d'en faire aucune leuée à peine de concussion, & d'en respondre en leurs propres & prieuz noms, & que des Arrests & Commissions donnez pour les Coll:cteurs & Communautéz pour le faict des tailles, ne sera payé qu'un sceau.

*Septiesme sceance tenuë en la Salle saint Louys, le Mardy  
septiesme Iuillet 1648.*

Article 17.

Seront les articles 91. 92. 97. 98. & 99. de l'Ordonnance de Blois executez, ce faisant toutes affaires qui gisent en matiere contentieuse seront renuoyées au Parlement & autres Cours Souueraines, ausquelles la connoissance en appartient par les Ordonnances, sans que par commissions particulieres elles leur puissent estre ostées, toutes Commissions contraires



& extraordinaires, mesmes éuocations generales & particulieres, accordées aux Fermiers ou traittans par leurs Baux ou Contrac̃ts dès à present reuocquées, & les procez pendans es Conseils du Roy, de la connoissance desdites Cours, dès à present renuoyez en icelles: deffenses aux Parties de se pouruoir au Conseil, pour raison de ce, à peine de nullité, & demeureront les Parties y assignées deschargées des assignations qui leur seront données; & que les Arrests qui seront donnez esdites Cours, ne pourront estre cassez, reuocquez ny surcis, sinon par les voyes de droict permises par les Ordonnances: & les Maistres des Requestes ne pourront iuger en dernier ressort, quelque attribution qui leur en puisse estre faite par Lettres, Arrests ou autrement: & ou les Parties voudroient faire plainte des Lettres d'Estat, comme subreptices, la connoissance en appartiendra aux Iuges, pardeuant lesquels les Procez seront pendans.

*Huittiesme sceance tenuë en la Salle saint Louys, le Mercredy huictiesme Iuillet 1648.*

Article 18.

**Q**Ve le Sur-Intendant general des Postes & Relais de France, Messagers ou Maistre des Postes & Coches, apporteront au Greffe de la Cour, les reglemens concernant les ports de lettres & paquets, & cependant deffences au Fermiers, Commis, & Distributeurs, de rayer, ny augmenter la taxe desdits ports, à peine de six mil liures d'amende, & de punition corporelle; & en cas de contrauention permis d'en informer: & que les Messageries non supprimées par l'Edict de 1610. demeureront en leur ancienne liberté, sans qu'ils puissent rehausser leurs taxes.

Article 19.

Qu'il ne pourra à l'aduenir estre faite aucune creation d'Office, tant de Iudicature que de Finance, que par Edicts verifiez es Cours Souueraines, avec la liberté entiere des suffrages pour quelque cause, occasion, & sous quelque pretexte que ce soit; & que l'establissement ancien desdites Compagnies Souueraines ne pourra estre changé ny alteré, soit par augmentation d'Officiers & des Chambres, establissement de Semestre, ou par démembrement du ressort desdites Compagnies, pour en créer & establir de nouuelles.

Que le mesme ordre sera gardé pour les Tresoriers de France, Presidiaux, & autres Iuges subalternes: deffences à toutes personnes de faire & aduancer telles propositions pernicieuses tendantes à la ruine desdites Compagnies, à l'aneantissement de la Iustice & subuersion du Royaume, à peine d'estre punis exemplairement, comme perturbateurs du repos public.



Sera la Reyne suppliée de reuoquer le Parlement d'Aix, la Cour des Aydes de Xainctes, & l'Edict portant creation de douze offices de Maistres des Requestes.

Article 20.

Afin que la Iustice soit administrée avec l'honneur & l'integrité requise, qu'à l'aduenir il ne pourra plus estre receu dans les Cours Souueraines aucuns Traictans, Partisans, Cautions, Associez, & Interessez avec eux, ny leurs enfans & gendres; & que ceux qui sont à present receus en aucunes desdites Compagnies ne pourront estre admis en d'autres, quelques dispenses qui pourroient estre par eux obtenues.

*Neufuiesme sceance du Ieudy neufuiesme Iuillet.*

Article 21.

**L**Es Officiers des quatre Cours Souueraines, Payeurs des corps & Lamanes d'icelles, seront payez par chacun an des gages à eux attribuez, & augmentation d'iceux, sans aucun retardement; & que d'oresnauant le fonds n'en sera plus employé dans les Estats du Roy, ains receu dans les greniers qui leur ont esté ou seront assignez des mains du peuple par les Commis qui seront par eux proposez à chaque ouuerture des greniers suiuant les Edicts & Declarations des années 1594. 97. 99. & 38.

Article 22.

Afin que sa Majesté & les creanciers des Fermiers, Traictans & Partisans, leurs cautions, associez & interessez, ne puissent estre frustrez de leur deub, comme il est souuent aduenu, tous les biens de quelque nature que ce soit, donnez à leurs enfans en faueur du mariage, ou autrement, mesme les Offices qui se trouueront leur appartenir, mis sous noms empruntez & donnez à leurs enfans, depuis qu'ils sont entrez dans les Traittez, Fermes, & Partis de sadite Majesté, & à leurs creanciers, & toutes separations de biens entr'eux & leurs femmes, depuis ledit temps, demeureront nuls; & que les acquisitions qui seront faictes par eux sous le nom de leurs femmes, demeureront affectées à sadite Majesté & à leurs creanciers, dérogeans à cet effet à toutes coustumes à ce contraires.

*Neufuiesme sceance tenuë en la Salle S. Louys le Ieudy  
neufuiesme Iuillet.*

Article 23.

**E**Ncores que le Domaine de la Couronne ne puisse estre aliené que par l'appanage des enfans de France pour le dot & douaire des Reynes, & pour les vrgentes affaires de la guerre, neantmoins par vn abus insupportable, on a depuis quelques années employé toutes sortes de moyens pour en oster au Roy la possession à perpetuité, soit par des es-



changes abusifs & frauduleux, par ventes nouvelles de certaines terres & Seigneuries, & par dons excessifs; soit par augmentation des anciennes finances aux Domaines desia engagez, sous pretexte des encheres doublement & tiercement: ce qui est arriué à tel excès, que la recepte faite dans les comptes depuis l'année 1630. pour vente & reuente des Domaines en fonds de terre monte à plus de quinze millions de liures, dont il se peut verifier que la sixiesme partie n'est point entrée actuellement aux coffres du Roy, le surplus ayant esté payé en mauuaises & faulces debtes & arrearages de pensions, en dons, gratifications & recompenses, & autres choses feintes & supposées contre les Ordonnances: & d'autant que la preuue de cet abus ne peut estre tirée que du menu des comprans, la Reyne est tres-humblement suppliée de les faire représenter pardeuant tels Conseillers qu'il luy plaira choisir, & ladite verification ordonnée; ou que les engagistes payeront en deniers comptans à l'Espargne lesdites sommes qui s'y trouueront employées sous leur nom, ou pour eux; & que pour la fraude commise lesdits domaines serót reunis à la Couronne; ce qui sera pareillement executé pour les domaines vendus sans Edits verifiez, & pour les bois, esquels le Roy auoit droit de tiers, d'auger, gruyrie, grayrie, parage ou autre part & portion.

#### Article 24.

Pour restablis & faciliter la liberté du commerce, tous dons & concessions accordées à toutes personnes de quelque qualité & condition qu'ils soient à tiltre onereux ou autrement pour achepter & vendre seuls à l'exclusion des sujets du Roy, quelque sorte de marchandise que ce puisse estre, seront dès à present declarez nuls & reuoquez; deffenses à toutes personnes qui voudront s'opposer à cet article de troubler ceux qui voudront s'en remettre au commerce desdites marchandises.

#### Article 25.

D'autant que les Draperies de laine & de soye de toutes sortes de fabriques ne se façonnent plus en ce Royaume comme elles souloient, à cause de celles que les Marchands Holandois & Anglois y apportent, ce qui a reduit vn nombre infiny de petit peuple qui estoit employé à la manufacture desdites draperies à mendicité, ou obligez de transporter leurs domiciles aux pais estrangers, outre le transport de sommes immenses; Sa Maieité fera tres-humblement suppliee d'ordonner que deffences seront faites à tous negotians, d'apporter ou faire apporter en ce Royaume desdites draperies de laine & de soye manufacturées desdits pais d'Angleterre & de Hollande, à peine de confiscation & d'amende arbitraire. Côme aussi deffences seront faites à tous negotians d'apporter en France des passemens de Flandre & poincts d'Espagne, de Gennes, Rome & Venise, & à tous les sujets du Roy d'en achepter, & d'en porter à peine pareillement de confiscation, & de quinze cens liures d'amende contre les contreuenans.

#### Article 26.

Pour remedier aux abus qui se commettent à la vente & distribution des denrées qui se debitent sur l'eau, & sur les estappes de la ville de Paris, mes-



me regler les nouveaux droits qui se leuent sur lesdites denrées & marchandises, les vns par Edits non verifiez, où il appartient, les autres sans Edits: il se tiendra trois ou quatre iours apres, chacune promotion d'un Preuost des Marchands, vne assemblée de police generale en la chambre S. Louys, en laquelle assisteront les Officiers des Cours Souueraines, les Preuosts des Marchands & Escheuins, le Lieutenant Civil, & aucuns des principaux Bourgeois, Marchands de la ville, pour connoistre les abus & regler le prix desdites denrées.

#### Article 27.

Seront les Officiers créez, & taxes faites sur les maisons pour le nettoyement de la ville de Paris, supprimez & reuoeuez, & le nettoyement de ladite ville tenu entre les mains des Bourgeois, & pour cét effet l'ancien droit restably, deffenses de le diuertir à l'aduenir; & à cét effect pour le departement des quartiers, assemblée de ville sera faicte.

*Fin des articles proposez & arrestez es Assemblies de quatre Cours Souueraines tenuës en la salle saint Louys.*

#### *Du Mercredi premier Iuillet 1648.*

Ce iour toutes les Chambres assemblées, la Cour delibera sur la premiere des propositions faites en la salle de saint Louis, qui estoit de reuoeuer les Intendans de Iustice & autres commissions extraordinaires, &c. Il y eut des aduis à informer contre les Intendans de iustice qui ont entré dans les partis, & qui ont donné des Ordonnances à la foule du peuple, & maluerse en leurs Commissions, la deliberation ne fut point acheuée.

Monsieur Pitou Conseiller en la Cour fut comis pour informer cõtre le Sieur Picard Conseiller des parties casuelles, qui auoit dit en quelques compagnies que tous les Conseillers du Parlement estoient pensionnaires du Roy d'Espagne, & tenu d'autres discours au desauantage du Parlement.

#### *Du Iendy 2. Iuillet.*

Ce iour toutes les Chambres assemblées, la Cour continua la deliberation commencée du iour precedent, où il ne se passa rien de considerable.

#### *Du vendredi troiesme Iuillet.*

Ce iour toutes les Chambres assemblées à l'ordinaire, la susdite deliberation fut continuée, & la conclusion d'icelle remise au lendemain.

Ce mesme iour furent restablis au Conseil, Messieurs les Maistres des Requestes: ce fut Monsieur le Duc d'Orleans qui les ayant mandez en son Palais, leur annonça cette bonne nouuelle, ce restablissement auoir esté pratiqué, & fait en la maniere qui ensuit.



## *Restablissement de Messieurs les Maistres des Requestes.*

**L**E Mardy trentiesme du passé, Monsieur Fouquet Maistre des Requestes ayant proposé en la Compagnie, que si elle vouloit deputer vers Monsieur le Chancelier, pour demander leur restablissement, il auoit quelque parole de l'obtenir, & qu'il y pouuoit quasi engager son honneur. Cette proposition fut rejetée d'un commun consentement par cette seule raison, que le Parlement à leur priere en ayant fait instance auprès de la Reyne, la Compagnie ne pouuoit s'adresser ailleurs: mais qu'en cas que sa Majesté commandast de seruir dans les Conseils, on obeiroit. Cette responce fut cause que Monsieur le Tellier mesnageast par son beau frere Monsieur du Gay Maistre des Requestes, d'en gagner cinq autres de son quartier, qui est celui de Iuillet, pour aller en la maniere accoustumée, au commencement de chaque quartier saluer Monseigneur le Duc d'Orleans, ce qu'ils firent, sçauoir, Messieurs Courtin, la Bereliere, Chomel, Champigny, du Gué & Voisin, lesquels allerent le Ieudy sans en parler à la Compagnie au Palais d'Orleans; où estans, ils dirent à son Altesse, qu'encores qu'ils fussent interdits de l'entrée des Conseils, neantmoins ils ne le croyoient pas estre de luy aller rendre leurs deuoirs, & luy demander la continuation de sa protection; & adjousterent ainsi qu'il auoit esté concerté avec Monsieur le Tellier, qu'ils le prioient de procurer leur restablissement auprès de la Reyne, ce que M. leur promist de faire: adjoustant que si plustost on se fust adressé à luy, il auroit esté obtenu, & qu'il leur feroit sçauoir sa réponse. Et de fait, le lendemain Vendredy, Messieurs les Maistres des Requestes estans assemblez tous les quartiers, vn Gentil-homme vint prier Monsieur le Doyen d'aller à midy chez son Altesse, avec quatre deputez, vn de chaque quartier, ce qui fust arresté; & que la Compagnie s'assembleroit l'apresdinée, pour entendre la relation, ce qui fut fait; & la Compagnie estant assemblée, Monsieur de Chaillou dit, que Monsieur le Duc d'Orleans leur auoit dit, qu'il l'auoit demandé à la Reyne, & obtenu le restablissement de la Compagnie, comme leurs confreres l'auoient demandé; & adjousta quelques ciuilités, auxquelles Monsieur de Chaillou auoit respondu, avec le respect qu'il deuoit à son Altesse Royale: il fut arresté que le lendemain le Parlement en seroit informé par les deputez. Monsieur Foulé portant la parole de la verité de ce qui s'estoit passé touchant le restablissement, & qu'il insinueroit au Parlement comme il auoit esté désiré de la part des Ministres, & negocié sans aucun concert ny consentement de la Compagnie, ce qui fut fait; & en suite Messieurs les Maistres des Requestes deputerent vers la Reyne Monsieur le Duc d'Orleans, Monsieur le Cardinal & Monsieur le Chancelier: ils commencerent par son Altesse, & ont finy hier leurs compliments par la Reyne, qui les receut avec beaucoup de ciuilité, & leur donna de bonnes paroles, qu'ils appliquerent à la reuocation de la dernière création, ainsi que Monsieur le Duc d'Orleans leur a fait esperer apres les deux premiers Conseils.



### *Du Samedi quatriesme Iuillet 1648.*

**C**E iour toutes les Chambres assemblées, la Deliberation fut acheuée; & de l'aduis de Monsieur de Broussel suiuy de la plus grande partie des autres Conseillers, fut dressé vn Arrest en la forme suiuiante.

Ce iour la Cour toutes les Chambres assemblées, delibérant sur le rapport fait par les Deputez par elle commis du contenu au premier article des propositions faites par les Deputez des Compagnies assemblées en la salle saint Louys, suiuiant l'Arrest du 13. May dernier, a fait & fait deffences suiuiant l'Ordonnance aux Intendans de Iustice, Police & Finances du ressort de la Cour, de proceder à leurs commissions, & de faire aucun acte en vertu d'icelles; à peine de concussion de faux, & de nullité, & dautres peines portées par les Ordonnances & iugemens desdits Intendans, & y deferer aucunement sous mesmes peines, & aux sujets du Roy de les connoistre & leur obeyr: deffenses à toutes personnes de quelque qualité & condition qu'elles soient, de se charger cy-apres d'aucunes commissions extraordinaires, si elles ne sont deuëment verifiées en ladite Cour, suiuiant les Ordonnances, & en consequence de ce, les Tresoriers de France, Esleus, & autres Officiers qui ont esté troublez par lesdits Intendans, exerceront leurs charges comme auparauant: Ordonne ladite Cour que commissions seront faites au Procureur General du Roy, adressantes à deux Conseillers d'icelle Cour, pour informer de la mauuaise administration des deniers Royaux; & à cette fin aura monitoire en forme de droit, laquelle sera publiée, tant aux Paroisses de cette ville de Paris, que hors d'icelle ou besoin sera, pour le tout fait rapporté & communiqué au Procureur General du Roy estre ordonné ce qu'il appartiendra; & sera le present Arrest executé à la diligence dudit Procureur General, enuoyé à tous les Baillages, Seneschaussées du ressort de ladite Cour, pour y estre publié & enregistré: & enjoinct aux Substituds de tenir la main à l'execution d'iceluy, & en certifier la Cour dans le mois, à peine d'en répondre en leurs propres & priuez noms.

### *Du Lundy sixiesme Iuillet.*

**C**E iour le Parlement, toutes les Chambres assemblées, sur les huit heures du matin, a esté aduertuy par Monsieur le premier President, que Monsieur le Duc d'Orleans y deuoit venir prendre la seance; & de fait, en mesme temps les Huiffiers ont rapporté qu'il estoit dans la Sainte Chappelle: Surquoy sans en rien deliberer, monsieur le premier President a fait signe aux deux derniers de Messieurs les Presidents, sçauoir, de Longueil & Nonion, & à Messieurs le Meusnier & Preuost Conseillers de la Grand' Chambre, de l'aller receuoir: & pour cet effet ils se sont leuez, & sont allez iusques à la sainte Chappelle au deuant de luy, d'où ils l'ont accompagné iusques dans la Grand' Chambre, son Altesse Royale au milieu des deux Presidents,



& les Conseillers en suite parmy les quatre Ducs & Pairs qui l'accompagnoient, qui estoient Messieurs les Ducs de Joyeuse, d'Elbeuf, Brissac, & de Rets: au deuant de Monsieur, ont marché iusques au parquet des Huissiers, les Suisses avec la hallebarde, & en suite les Gardes, partie avec la carabine, partie avec la pertuisanne. Monsieur est allé à sa place, & a coupé les bureaux: mais on a fait aduertir Messieurs les Ducs & Pairs de passer par la lanterne, & descendre par le petit degré pour se mettre en leur place, qui a esté ioignante, & en suite de monsieur le Duc d'Orleans, qui a marché pour gagner sa place enuiron quatre pas deuant Messieurs les deux Presidens. Les choses estant calmes, Monsieur a pris la parole, & dit, qu'il croyoit que Messieurs les Gens du Roy auoient eu ordre de la Reyne de représenter quelque chose à la Cour; surquoy monsieur le premier President a commandé au Greffier, qu'il les allast querir, ce qui a esté fait, & peu apres ils sont entrez tous trois; & estans à leurs places, ils ont dit par la bouche de monsieur Talon, qu'hier sur les deux heures de releuée monsieur le Chancelier les manda, & l'estant allé trouuer, il leur dit, qu'il auoit eu ordre de leur dire, que la Reyne leur vouloit parler sur les sept heures du soir au Palais Royal, & que s'y estans rendus on les auroit fait entrer dans le petit cabinet de la Reyne, où estoient sa Majesté, monsieur le Duc d'Orleans, monsieur le Cardinal, monsieur le Chancelier, & monsieur de Chauigny; Que là monsieur le Chancelier leur dit, que la Reyne les auoit mandez, pour leur dire qu'elle auoit sceu l'Arrest du Parlement du iour precedent quatriesme; qu'elle leur apprenoit, qu'elle estoit bien informée du desordre des affaires & dereglement des finances; qu'elle desiroit trauailler incessamment à vne bonne reformation, qu'elle connoissoit que le dernier Arrest de la Cour estoit vn des bons moyens pour y paruenir, mais qu'elle prioit la Compagnie de considerer l'Estat present des affaires, & de iuger si ce remede estoit de saison; & que pour cela elle les auoit chargez, de représenter à la Cour les despenes necessaires & inéuitables pour sauuer l'Estat, & les moyens d'y pouuoir paruenir: Premièrement, que l'armée commandée par monsieur le Prince, estoit retranchée sur la frontiere pour faire teste à celle des ennemis, qu'il falloit aux Soldats du pain pour leurs vies, & quelques deniers pour leurs vestemens, & autres menues necessitez, que sans cela tout s'acheuoit de se débander par la faim, n'y ayant rien qui soit plus à craindre que *seditio ventris*, c'est le terme: qu'il falloit soulloyer l'armée de monsieur de Turenne, & payer aux Suedois leur quartier escheu d'Auril, May & Iuin, sans quoy il estoit à craindre qu'ils ne renouiaissent leur traité avec l'Empereur, & que sans leur secours l'armée de monsieur de Turenne n'estoit pas suffisante pour s'opposer aux Imperiaux & Bauarois; Que l'armée d'Herlac estoit encores à soutenir, qu'il falloit aussi maintenir l'armée de Catalogne, à laquelle les Catalans ne fournissent pas vn sol, pas mesmes les vstiles qu'en payant; qu'ainsi faute d'argent, cette armée qui est de dix mil hommes effectifs periroit; & que le Roy d'Espagne n'y trouuant plus d'obstacle pourroit facilement porter les armes dedans le Languedoc: Que les armées d'Italie déperissoient aussi faute d'argent. Qu'il en falloit pour la Marine & pour l'Artillerie; & qu'en vn mot il manquoit par



tout, parce que les moyens qui auoient esté projettez au commencement de l'année manquoient tout à coup; Que les fonds de cette dépense estoient dans les promesses des gens d'affaires mises à l'Espargne, pour estre payées de mois en mois, & dedans leur credit; Que leurs promesses demeureroient inutiles & sans execution, ne pouuant plus recevoir les deniers des receptes ou des fermes, qui leur auoient esté affectées: Que ce cas estoit indubitable sur le seul bruit de la reuocation presente des Intendans, qui sont les preposez à faciliter ces recouuremens; Que la Cour estoit priée de considerer, qu'en la forme qu'ils se font 35. personnes suffisent; qu'en changeant en vn moment cet ordre, & le remettant aux Thresoriers de France & aux Eleus, il faudroit passer par les mains de plus de trois mil Officiers, sçauoir 483. Thresoriers de France, le surplus Eleus, qui en prenant leurs gages & droicts absorberoient, s'ils en auoient la liberté, sur les premiers & plus clairs deniers plus de neuf millions six cens mil liu. Que par ces raisons la Reyne prioit la Compagnie d'examiner s'il estoit à propos d'exerciter dès à present l'Arrest, ou d'en differer pour quelque temps l'execution; Qu'il estoit à craindre que le peuple n'induisit vne descharge entiere des Tailles par les deux clauses de l'Arrest, la reuocation & la recherche des Intendans; Qu'elle ne reseruoit neantmoins rien à la Cour de ce qu'elle iugeroit estre vtile au seruice du Roy & au bien de l'Estat, qu'en leur particulier, ils croyoient que monsieur le Duc d'Orleans auoit ordre d'informer plus precisément la Cour des expediens, qu'ainsi ils ne pourroient que balbutier en sa presence en estant beaucoup mieux instruit, & que la seule priere qu'ils auoient à faire estoit, que, *videat Senatus ne quid detrimenti, capiat Respublica*, & se sont retirez.

Cela fait, monsieur le Duc d'Orleans a pris la parole, & a dit: Messieurs, apres la discretion de Messieurs les Gens du Roy ie n'en ay point à vous faire; seulement ie vous diray que vostre Compagnie m'ayant tesmoigné par vos Deputez, que vous auez trouué bonne la derniere negotiation; i'ay creu pouuoir venir icy, comme ie fais, pour deux choses: l'vne, pour vous proposer vn expedient sur les affaires presentes, l'autre pour vous faire vne priere: l'expedient est vne conference des Deputez de vostre part avec quelques-vns des Messieurs du Conseil chez moy, où ie seray present, afin d'aduiser aux moyens de soulager le peuple, suiuant l'intention de la Reyne & de la vostre, & empescher la perte & la ruine de l'Estat. La priere est de surseoir pour deux iours vostre dernier arresté, pendant lesquels la conference sera acheuée, & ie vous donne ma foy & ma parole que cela se fera avec sincerité. Je n'ay iamais manqué au moindre du monde à luy tenir parole, ie ne commenceray pas par vostre Compagnie, que j'estime: & ie vous demande cela de grace, & vous promets que vous aurez toutes sortes de satisfactions pour le public, & pour vous, & que j'auray beaucoup de ioye de seruir la Compagnie.

A cela monsieur le premier President respondit: Monsieur, La Compagnie a touiours receu des preuues de vostre affection, elle vous prie de les vouloir continuer, & vous asseurer qu'elle vous honore autant qu'elle le peut; & en suite luy dit: Monsieur, vous proposez donc vne conference & vne surseance pour deux iours. Ouy, Messieurs, respondit monsieur le Duc d'Or-



leans, ie ne vous demande que cela, & vous donne ma parole que vous ne serez point trompez. Sur cela monsieur le President de Mesmes dit en ces termes: mais Monsieur, demandez vous pour cette Conference des Deputez des autres Compagnies ou seulement du Parlement. Monsieur leur respondit; Messieurs, ie ne parle qu'à cette Compagnie. En suite monsieur le premier President a demandé à monsieur le Duc d'Orleans, s'il n'auoit plus rien à proposer auant qu'on commençast à deliberer; Monsieur respondit que non, & que Messieurs auoient toute liberté d'opiner. Surquoy monsieur le premier President a pris les voix, & a commencé par monsieur Crespin Doyen de la Cour, qui a esté d'aduis d'accorder la Conference, & surseoir l'arresté pour trois iours; monsieur Cheualier de mesme aduis, monsieur de Broussel auteur de l'aduis de l'Arrest a esté d'aduis d'accorder la surseance, mais ne point surseoir l'execution de l'Arrest: tous Messieurs de la Grand' Chambre furent de l'aduis du Doyen, avec cette difference, que les vns sont d'aduis, que la surseance soit par escrit, les autres seulement mentales: monsieur Laisné de l'aduis de monsieur de Broussel, Messieurs de Bocquemarre & Perrot Presidents, surseance mentale.

*Du Mardy septiesme Iuillet.*

C E iour toutes les Chambres du Parlement estans assemblées, les mesmes aux mesmes seances du iour precedent; monsieur le Duc d'Orleans a dit, qu'ayant fait reflexion sur les principales difficultez faictes hier par quelques-vns de Messieurs qui procedoient de la crainte de l'inexecution de l'Arrest, si la surseance estoit accordée, il reïteroit la parole que la Conference s'acheueroit en deux iours, & que tout ce qui seroit promis seroit executé, & que la Compagnie auroit toute sorte de satisfaction de son entremise; que iamais il n'auoit trompé ny manqué de foy à personne, & qu'il ne commenceroit pas par cette Compagnie, qu'il estimoit, cherissoit & honoroit extremement. Sur cela monsieur le premier President a commandé au Greffier de lire les aduis, sçauoir celui de monsieur le Doyen, qui estoit d'accorder la surseance, & la Conference demandée par Monsieur, sans en rien escrire sur le Registre, toutes les Chambres demeurant assemblées. Apres cet aduis on a élu monsieur de Broussel, qui s'y est laissé compter, & tous Messieurs qui auoient opiné hier, & ont esté nommez, lesquels en sont demeurez d'accord, excepté monsieur Laisné, qui a persisté en son Auis; monsieur le Clerc, de la grand' Chambre, dit qu'il auoit esté de l'aduis du Doyen; & adjousta que pour la Conference il seroit arresté que deux Deputez de chaque Compagnie y seroient mandez. L'affaire a passé par cet Auis: Monsieur Laisné n'a esté fuiuy que de dix, & à chacun desquels monsieur le Duc d'Orleans a renouvelé sa promesse de terminer dans deux iours la Conference au contentement de la Cour; & la principale contestation a esté, si on arresteroit auoir des Deputez des autres Compagnies. Enfin la Cour ayant connu que le refus de les y appeller pourroit causer quelque des-vnion, a ordonné qu'ils y seroient appelez.



## *Du Mercredi huictiesme Iuillet.*

**C**E iour toutes les Chambres assemblées, on deputa des Conseillers pour se trouuer au Palais d'Orleans sur les quatre heures de releuée. De la grande Chambre furent choisis Messieurs Crespin, Broussel, Hennequin, Ferrand; tous les Presidens au Mortier qui s'y voudroient trouuer, vn President & vn Conseiller de chaque Chambre des Enquestes & Requestes: ayant fait sçauoir aux Compagnies Souueraines de deputer deux de chacune, ainsi qu'il auoit esté arresté le iour precedent, tous se rendirét au Palais d'Orleans à l'heure donnée; Messieurs le Cardinal & Chancelier y arriuerent les premiers, le Parlement le dernier. Monsieur le premier President ayant veu des Conseillers d'Estat en place, dit, qu'ils se deuoient retirer, n'ayant point de seance où est le Parlement; Eux au contraire, soustenant auoir place au Conseil du Roy: mais on les fit retirer, puis chacun se plaça: Messieurs le Cardinal & le Chancelier aux deux costez de son Altesse Royale, les Presidens aussi aux deux costez, tous y estans, horsmis monsieur de Mesme, le reste prit place selon son rang. Monsieur le Chancelier fit l'ouuerture par vn discours de trois quarts d'heure à la loüange du Parlement, de sa fidelité & de son zele au seruice du Roy: il dit, que la Reyne approuuoit toutes leurs assemblées & deliberations, & que ce qu'ils y font alloit au bien del'Estat, auquel elle voyoit bien qu'il y auoit du desordre, & qu'il y falloit remedier, mais qu'elle n'auoit pas crû cela se pouuoir faire à present: Que l'Arrest donné pour la reuocation des Intendans estoit iuste; Que c'est vn mal qui ne luy peut estre imputé, les ayant trouuez establis par le feu Roy en 1635. elle n'auoit osé les reuoker en l'estat present des affaires; & puisque le Parlement auoit donné Arrest elle consentoit à l'execution, pourueu que ce fust par vne Declaration verifiée, afin que l'autorité du Roy ne fust lezée, & que les peuples connussent que c'est sa Majesté qui agit, dequoy ces Messieurs demurerent d'accord. Puis mondit sieur le Chancelier dit, qu'il y auoit des termes en leur Arrest lesquels estoient vn peu rudes, comme (à peine de concussion:) ces Messieurs ayant monstré qu'ils sont au terme de l'Ordonnance, il passa qu'ils demeureroient. Monsieur le Cardinal prenant la parole dist, qu'il estimoit estre bien fascheux d'informer contre des personnes de qualité qui ont exercé des commissions de cette nature, que cela feroit murmurer, & peut-estre souleuer le peuple, lequel auroit sujet de se plaindre, & dire qu'on auroit enuoyé des gens pour le piller & ruiner. A cela monsieur le premier President respondit, que le Roy par ce moyen osterà aux peuples tout sujet de soupçon & de plainte, faisant punir ceux qui auront mal-versé en leurs commissions, & que les gens de bien tireront auantage de telles informations, puisque leur probité sera connuë de tous: cela passa encor, & fut arresté que la Declaration seroit conceüe aux mesmes termes de l'Arrest. Monsieur le Chancelier qui ne demandoit qu'à temporiser & empescher l'execution dudit Arrest de reuocation des Intendans, dit que cette Declaration ne pouuoit pas estre si tost dressée & seellée. Monsieur le President de Nouion dit, qu'il falloit qu'elle



fust enuoyée au Parlement auant Samedy , auquel iour ledit Arrest deuoit estre publié & enuoyé aux Prouinces. M. le Chancelier respondit, que le temps estoit bref, joint que tout le monde seroit surpris d'un si prompt changement: que les tailles ne se leueroient pas , si auparauant on ne donnoit ordre à ce qu'il falloit faire. Monsieur de Nouion repliqua, qu'il le falloit auant Samedy , ou que ce iour l'Arrest seroit publié, & insista si fort sur ce chef, qu'il fut arresté qu'on enuoyeroit le Samedy vne Declaration , & que Vendredy à pareille heure la Conference seroit continuée pour aduiser aux autres chefs d'icelle Declaration. On demanda le rappel des Conseillers du grand Conseil, & Cour des Aydes exiliez : Monsieur le Cardinal promit que dès ce iour les lettres en seroient expedées & enuoyées. Il pria en consequence ces Messieurs de hastier leurs deliberations, & qu'elles fussent toutes expedées dans Mardy prochain , si faire le pouuoient.

Les Tresoriers de France venus pour estre ouys, furent remis au Vendredy. Ils offroient de faire payer la taille si exactement, que tous les mois le Roy auroit en ses coffres quatre millions, ne demandant point la restitution de leurs gages passiez, ny la jouissance d'iceux pour la presente année.

### *Du Iendy 9. Iuillet.*

**C**E iour toutes les Chambres assemblées, il fut fait relation de ce qui auoit esté fait & arresté au Palais d'Orleans le iour precedent. Apres quoy tous ayant dit qu'il n'y auoit rien à faire, qu'apres l'assemblée de Vendredy, & la Declaration apportée au Parlement, on se separa.

Ce iour le sieur d'Emery Sur-Intendant des Finances eut commandement de se retirer en sa maison de Tanlay, & y attendre les ordres du Roy: le Marechal de la Meilleraye fut fait Sur-Intendant, & en presta le serment à l'heure mesme. On luy donna pour Adoints & conseil Messieurs de Morangis, & d'Haligre Conseillers d'Estat. Ce fut monsieur le Tellier Secretaire d'Estat qui porta cette parole au sieur d'Emery qui en fut fort surpris. Il demanda à parler à la Reyne & à M. le Cardinal, ce qui luy fut refusé. Il partit deux heures apres l'ordre receu, & emmena avec luy son fils le President de Toré.

### *Du Vendredy 10. Iuillet.*

**C**E iour toutes les Châbres assemblées, on entendit les Tresoriers de France sur la proposition susdite. On delibera sur la proposition de ne rien leuer qu'il ne soit verifié aux Cours Souueraines. Le President de Mesme estoit d'avis que les Declarations seroient seulement verifiées au Parlement, & non aux autres Cours, contre le pouuoir qu'elles ont de verifier ce qui est de leur Iurisdiction. Cet aduis fut rejezté, comme tendant à des-vnir les Compagnies. Il passa presque d'une voix, que les Declarations seront verifiées premierement au Parlement, en apres aux autres Compagnies où elles doiuent l'estre.

La Conference se fist de releuée au Palais d'Orleans, ainsi qu'il auoit esté arresté le Mercredy; Monsieur de la Meilleraye nouveau Sur-Intendant y eut



30

seance en cette qualité, & Messieurs de Morangis & d'Haligre ses Adjoints. On examina la Declaration, laquelle monsieur le Chancelier apporta, & il ne passa rien de considerable, sinon qu'il y eut quelque contestation à cause que les Intendans de Justice es Prouinces de Lyonnais, Champagne & Picardie, n'estoient exceptez de la reuocation; ce qui se passa, sur ce qu'il fut remonstré qu'ils estoient necessaires en ces Prouinces, à cause du passage des gens de guerre.

*Du Samedi 11. Juillet.*

**C**E iour toutes les Chambres du Parlement estans assemblées sur les huit heures du matin; Monsieur le Duc d'Orleans y estant arriué avec les ceremonies accoustumées, accompagné des mesmes Ducs & Pairs, de Joyeuse, d'Elbeuf, de Brissac & de Rets; si tost qu'il a eu pris sa place, les Gens du Roy sont entrez qui ont dit par la bouche de monsieur Talon, que l'on leur auoit misés mains vne Declaration du Roy, portant reuocation des Intendans de Justice, Police & Finances dans les Prouinces du ressort de la Cour, à la reserve des Prouinces de Champagne, Picardie & Lyon, où le Roy auoit jugé necessaire d'y en laisser, à cause des frequens logemens & passages des gens de guerre, auxquels il estoit necessaire de pouruoir promptement par la voye desdits Intendans, lesquels neantmoins n'auroient aucune Iurisdiction contentieuse, sinon desoldats à Bourgeois, & qu'ils n'auroient point aussi connoissance ny direction des Finances: ils ont aussi adjousté que par la mesme Declaration le Roy faisoit remise au peuple des Tailles, Taillon & subsistances des années 1644. 1645. & 1646. & d'un demy quartier des années 48. & 49. qu'ils auoient pris leurs conclusions par escrit, auxquelles ils persistoient, & n'auoient rien à y adjouster, sinon de faire recit à la Cour de la Conference qu'ils auoient eu avec monsieur de la Meilleraye, nouuellement pourueu de la Sur-Intendance: qu'il leur auoit dit à la leuée de la seance de Messieurs au Palais d'Orleans, qu'il les prioit d'asseurer la Compagnie qu'il tiendrait l'occasion à honneur de recevoir ses bons aduis & de les suivre, & qu'il auoit cette double satisfaction: L'une, qu'il n'auoit aucun parent ny allié engagé dans les affaires; L'autre, qu'il croyoit que personne ne le pourroit tromper pour les despenfes de la guerre, & qu'il soumettoit tousiours tres-volontiers la conduite au iugement de la Compagnie; & qu'il auoit desia fait fonds d'un quartier & demy, pour les gages & droicts des Tresoriers de France & Eleus: Et ce discours finy, les Gens du Roy se sont retirez, mettant la Declaration & leurs conclusions sur le bureau: A quoy M. le Duc d'Orleans a dit, qu'il n'auoit rien à adjouster à ce qui venoit d'estre représenté par Messieurs les Gens du Roy, sinon que ladite Declaration seroit executée de bonne foy & promptement, comme toutes les choses qu'il promettoit à la Compagnie. Et sur ce M. le premier President a pris les aduis, & M. le Doyen a opiné à l'enregistrement de la Declaration; M. Cheualier de mesme aduis, M. de Broussel a esté d'aduis d'executer le dernier Arrest, qui va à la reuocation generale des Intendans, sans reserve d'aucun, à la remise d'un quartier entier des Tailles, & à informer dès à present de tous les



abus commis aux Finances, Messieurs de la Grand' Chambre ont adjousté chacun quelque différente clause à leurs aduis ; les vns, que les conclusions seroient apportées pour estre registrées ; d'autres, qu'il seroit informé ; les autres, de surseoir à informer iusques à ce qu'il y eust des plaintes particulieres ; & à chaque fois qu'il y auoit quelque opinion contre ladite Declaration, Monsieur prenoit le mesme discours qu'il auoit fait à l'entrée, pour en insinuer la verification. Enfin l'aduis est demeuré à monsieur Tellier Maistre des Requestes, & l'Assemblée continuée à Lundy.

### *Dudit iour Samedy au Conseil.*

**C**E iour sur les huit heures du matin, Messieurs du Conseil estans en grand nombre, monsieur le Chancelier y est arriué, & demeura quelque temps à causer debout ; & monsieur le Marechal de la Meilleraye y estant arriué, ils entrèrent eux deux dans le petit cabinet ; où ayant demeuré enuiron vn demy quart d'heure, ils rentrent au Conseil, où monsieur le Chancelier dist tout haut, que la Reyne auoit ordonné que Messieurs d'Haligre & Barillon auroient les cinq & sixiesme chaires de son costé, dont monsieur de Moricq & quelques autres ayans grondé, & dit que deux de Messieurs du Conseil ayant esté mis autrefois dans l'administration des Finances, ils s'estoient tenus en leurs places de Conseillers d'Estat ; M. le Chancelier repliqua, que la Reyne auoit commandé que ces Messieurs prissent cette séance : Ce qui a esté fait à l'instant ; & apres le rapport de quelques Requestes, monsieur le Chancelier prit la parole, & a dit, qu'il estoit bon que le Conseil sceust en quel estat M. de la Meilleraye trouuoit les affaires, qui estoient telles par la supputation qui en auoit esté faite le iour precedent, que le Roy deuoit plus de 150. millions, & qu'il n'y auoit pas vn quart d'escu à l'Espargne, ny assignations ordonnées ; que neantmoins les descharges résolues à la Conference de chez M. le Duc d'Orleans, tant des Restes, que du demy quartier des années 48. & 49. y compris le reestablishement de partie des gages & droits des Officiers, montoient à soixante & douze millions de liures ; & que neantmoins il y auoit lieu d'esperer beaucoup de soulagement de l'administration de monsieur le Marechal de la Meilleraye, lequel ne dist autre chose, sinon qu'il estoit fort nouveau dans les affaires, qu'il n'y auoit ny argent ny assignations à l'Espargne, que neantmoins il feroit du mieux qu'il pourroit pour le seruice du Roy, & contenter vn chacun, & en suite le Conseil a continué iusqu'à dix heures.

### *Du Lundy 13. Iuillet.*

**C**E iour toutes les Chambres du Parlement estans assemblées, sur les huit heures du matin ; monsieur le Duc d'Orleans y est arriué, avec les mesmes ceremonies, & accompagné comme deuant, excepté que monsieur le Duc de Brissac ne s'y est point trouué : & incontinent apres que monsieur le Duc d'Orleans a esté en la place, monsieur le Procureur General & monsieur Bignon sont entrez, qui ont dit, qu'ils auoient receu de la part du Roy & de



la Reyne vne Declaration pour l'establissement d'une Chambre de Justice, pour la recherche des abus, excès, & violences commises en la levée des Tailles, Taillon, & Subsistances, & generally des malversations commises aux Finances du Roy, contre toutes sortes de personnes, de quelque qualité & condition qu'elles puissent estre. Laquelle Chambre seroit composée d'Officiers, tant des Cours Souueraines, que des autres Parlemens du Royaume; & qu'ils auoient pris leurs conclusions par escrit, ausquelles ils persistoient, & ont mis la Declaration avec leurs conclusions sur le bureau, & se sont retirez. Ce fait, Monsieur Doujat Conseiller en la Grand' Chambre en a fait lecture, & en suite Monsieur le Premier President a demandé l'aduis à Monsieur Crespin Doyen de la Cour; Surquoy s'est eleué vn murmure des Enquestes, plusieurs d'entr'eux disans qu'il falloit terminer la deliberation commencée avant qu'opiner sur cette nouvelle Declaration. A quoy Monsieur le Duc d'Orleans a dit, puis que cette nouvelle Declaration pouruoit aux principaux chefs des aduis ouuerts, touchant la commission d'informer contre les Intendans, & touchant les malversations commises aux Finances, qu'il croyoit qu'il falloit redemander de nouveau l'aduis à ceux de Messieurs qui auoient opiné Samedi dernier, afin qu'ils opinassent sur les deux Declarations, ce qui a esté fait: & ledit sieur Crespin a esté d'aduis, conformément aux conclusions des Gens du Roy, d'enregistrer les deux Declarations, & que les trois Intendans de Champagne, Picardie & Lionnois seroient enregistrez au Parlement; Monsieur Cheualier a esté de mesme aduis. Monsieur de Broussel a esté d'aduis de n'excepter aucuns Intendans, mais au contraire, de prier la Reyne de reformer ladite Declaration, en ce qu'elle ne reuoquoit que les Intendans du ressort de la Cour, & d'en enuoyer vne generale qui reuoquast tous les Intendans de toutes les Generalitez de France; & à l'égard de la dernière Declaration, il a esté d'aduis de l'enregistrer, & neantmoins ordonné, conformément au dernier Arrest, qu'il seroit incessamment informé contre les Intendans, & autres, des abus commis au faict des Finances; & que la Reyne seroit suppliée d'accorder les descharges du quart des Tailles, au lieu du demy quartier, puis que les Traitans auoient pareille remise; apres cet aduis Monsieur le Duc d'Orleans a dit, que la Reyne auoit accordé plus que le Parlement sembloit ne pouuoir esperer, qu'ainsi il ne croyoit pas qu'il fallut cōtester avec elle pour si peu de chose; Que les trois Intendans referuez estoient necessaires à cause des frequents passages & logemens des gés de guerre, Que les Intendans qui y estoient n'auroient point de Iurisdiction contentieuse, ny aucune direction des Finances; Que le Conseil auoit eu la pensée de les reuoker comme les autres, sauf d'en enuoyer cy-apres, où Messieurs iugeroient necessaire. Mais qu'en la dernière conference faite chez luy, Messieurs les Deputez auoient iugé plus à propos de limiter dès à present le nombre, ce qui leur auoit esté accordé: pour ce qui estoit de la commission d'informer, il y estoit pourueu amplement par l'establissement de la Chambre de Justice, laquelle il dōnoit parole de faire establir incessamment; & que par ce moyen on pourroit donner les memoires au Procureur General,



Général, pour faire informer; mais de le faire sans plainte ny denonciation, il n'y auoit pas d'apparence apres cela: la pluspart de Messieurs de la Grâd' Chambre ont esté de l'aduis du Doyé, Monsieur Maynardeau y a adiousté la descharge generale des Restes iusques en l'année 1646. inclusiuement: la raison de son aduis, a esté, que la Declaration n'accordoit les restes, sinon des années 1644. 1645. 1646. & qu'ainsi l'on pourroit vexer le peuple pour les restes des années precedentes. Messieurs les quatre Maistres des Requestes, sçauoir, Tillier, du Tremblay, Tallement & Marescot ont esté d'aduis de reuoker tous les Intendants, & d'en abolir le nom comme estant contraire à l'Ordonance & Arrest, Que s'il plaisoit au Roy enuoyer quelqu'un dans les Prouinces, ce seroit Messieurs les Maistres des Requestes, qui dans les visites, auxquelles ils sont destinez par les Ordonnances, pourroient y faire ce que l'on propose d'attribuer à ces Intendants: au surplus ils ont esté d'aduis d'enregistrer la commission de la Châbre de Iustice. Monsieur Laisné a esté d'aduis de reuoker tous les Intédans de Iustice, & d'informer dès à present. Monsieur le Duc d'Orleans a encore pris la parole, pour insinuer ce qu'il auoit desia dit sur ce sujet, Messieurs Bocquemare, Perrot, d'Hodicq, & la Barre, Presidés, ont esté d'aduis des cōclusions. M. Charton a dit, que cette Declaration de la Chambre de Iustice estoit vn moyen pour eluder l'execution de l'Arrest notamment touchant la Commission pour informer. Monsieur le Duc d'Orleans l'a interrôpu, & a dit, qu'il promettoit que sans remise l'on expedieroit la commission, & que l'on y pourroit travailler au premier iour, & continuer sans relasche. Et sur ce que ledit Charton a dit, que cette Chambre se termineroit en taxe comme les precedentes; Monsieur a dit, qu'il asseuroit du contraire, & que la Reyne, & ceux qui luy donnoient conseil, estoient resolu de faire punir non seulement les Financiers & Partisans, mais aussi ceux qui auoient commis des excès, de fordes & violences pour faire les leuées, & ceux qui auoient mal vîs des Finances. Apres quoy ledit Charton a dit, que sur la parole de Monsieur il estoit d'aduis commun. Monsieur Viole President a adjousté, qu'il falloit pouruoir à la seureté de la liberté de la vie des Sujets du Roy: Et pour cét effet, qu'il falloit preuenir contre toutes les commissions extraordinaires generalement quelconques. Monsieur a pris la parole, & a dit, que c'estoit l'intention de la Reyne, & que sans doute c'estoit vne obmission, & qu'il trouuoit fort à propos de prier la Reyne d'adjouter cela dans la Declaration. Apres cela, Messieurs des Enquestes ont pris differents aduis, comme aussi Messieurs les Ducs & Pairs: Monsieur le Duc d'Orleans a esté d'aduis des Conclusions des Gens du Roy, & de faire remonstrances sur toutes les autres ouuertures; Monsieur de Nouion a esté d'aduis de reuoker tous les Intendants, & d'en uoyer dans les Prouinces Messieurs les Maistres des Requestes, conformément aux Ordonnances, & d'enregistrer la Declaration de la Chambre de Iustice, pour estre remplie d'Officiers du Parlement, Chambre des Comptes & Cour des Aydes de Paris seulement. Monsieur de Maison a opiné du Bonnet à l'aduis de Monsieur de Nouion. Monsieur de Bellievre s'est estendu, & a conclud de mesme. Monsieur de Nesmond.



s'est expliqué assez long temps sur les loiianges de Monsieur le Duc d'Orleans, & a conclud aux conclusions. Monsieur le Coigneux a fait aussi vn Panegyrique assez sommaire à la gloire de Monsieur, & a conclud de mesme. Messieurs le Bailleur, de Mesmes, & Monsieur le premier President ont conclud comme Messieurs. Cela fait, quand il a esté question de lire les Aduis, comme il y en auoit plusieurs singuliers qui auoient assez de rapport, Monsieur le premier President en a formé vn de tous, auquel a esté adjoûté quelques mots par plusieurs de Messieurs. Et enfin il a esté arresté que la Reyne seroit tres-humblement suppliée de reuoker tous les Intendans des Generalitez du Royaume, & d'en enuoyer à cét effet les Declarations generales au Parlement, sauf d'en enuoyer des supplicatiōs aux autres Parlements, à la reserue des trois Intendances reseruées par la Declaration, dōt les cōmissions seront presentées à la Cour, pour y estre registrées les Chambres assemblées cette premiere fois seulement; Que les peuples demeureront deschargez des Tailles, Taillon & Subsistāces du passé iusques au dernier Decembre mil six cens quarante-six, inclusiuement: La Reyne suppliée de les descharger d'vn quartier pour les années mil six cens quarante sept, mil six cens quarante-huict, & mil six cens quarante-neuf. Enregistrement de la derniere Declaration, à la charge que la Reyne seroit aussi suppliée de composer la Chambre d'Officiers du Parlement, Chambre des Comptes & Cour des Aydes de Paris, & de ne point conuertir lesdites Chambres en taxes ny compositions, & que les amandes & confiscations qui seront adiugées, ne pourront estre données à qui que ce soit, ains les deniers en prouenant portez à l'Espargne pour estre employez aux despenſes & affaires de l'Estat, sans estre diuertis ailleurs. Cét aduis ayant esté ainsi formé, plusieurs de Messieurs ont eleué leurs voix, disans, qu'il tous estoient de cét Aduis. Monsieur le Duc d'Orleans s'est leué, & Messieurs les Presidents & son Altesse estans desia au Parquet des Huissiers, les Cōseillers ont dit qu'il n'y auoit point d'Arrest; d'autant que l'on n'auoit point leu les aduis; ce qui a donné sujet à Monsieur le premier President d'enuoyer apres son Altesse Royale, iusques à estre obligée de retourner à sa place pour entendre la lecture des aduis, suiuant lesquels l'affaire a passé comme Monsieur le premier President l'auoit redigé.

L'on a remarqué dans la Relation de ce qui estoit passé Samedy au Conseil, qu'incontinent apres le discours de Monsieur le Chancelier au sujet de l'Estat present des Finances, Monsieur d'Orgeual Maistre des Requestes, rapporta vne Requeste pour Madame d'Aiguillon, pour faire casser vn Arrest rendu le iour precedent au Conseil des parties, au raport de Monsieur de Bordeaux; par lequel Monsieur d'Oroy auoit obtenu main leuée de la saisie faite des biens de Madame d'Oroy à la Requeste de madite Dame d'Aiguillon, & sur la Requeste de madite Dame d'Aiguillon, il fust dit que dans quinzaine elle remettrait son procez, qui est vn Reglement de Iuges en estat de iuger la saisie des biens, cependant tenant: & neantmoins on a donné à madite Dame d'Oroy vne prouision de douze mil liures. Monsieur le Chancelier alla souuent à la Chambre pour faire passer l'affaire à ce point,



Monsieur de la Melleraye present à la deliberation. Il est vray qu'il offrit de se retirer, mais Monsieur le Chancelier ne luy respondit rien.

### *Du quatorziesme Iuillet.*

**C**E iour le Parlemēt estāt assemblé sur les sept à huit heures du matin, M. le Duc d'Orléas y est arriué, accōpagné avec les mêmes ceremonies du iour precedēt; & incontīnēt apres Messieurs les Gēs du Roy y sont entrez, qui ont dit qu'on leur auoit apporté vne Declaratiō du Roy, par laquelle deffenses estoiet faites de leuer aucuns droicts aux portes & aux entrees, & autres Bureaux de cette ville, sinō en vertu des Edicts ou Declaratiōs biē & deuēmēt verifiez; sur laquelle Declaratiō ils auoiet pris leurs cōclusiōs par escrit, qu'ils ont mis sur le Bureau avec ladite Declaratiō: & en suite leurs cōclusions ont esté leuës, qui se sont trouuées beaucoup plus estenduës, en ce que par icelles il est porté que deffenses seront faictes de leuer aucuns autres droicts que ceux qui se trouueront auoir esté ordonnez par Edicts ou Declarations bien & deuēmēt verifiez en la Cour, au lieu que la Declaratiō semble ne pouruoir que pour l'aduenir; sur quoy plusieurs voix se sont esleuës, disans que les droicts non verifiez qui se leuent, montent quasi autant que ceux qui le sont; & que pour cette raison il falloit les restraindre; à cela Monsieur le premier President a dit, que Messieurs les Deputez de la Chambre Saint Louys deuoient s'estre fait instruire du détail, afin d'en pouuoir informer la Compagnie; Et sur ce Monsieur le Duc d'Orléans a dit qu'il croyoit qu'il seroit fort à propos de faire encore vne Conference chez luy auioird'huy ou demain, pour examiner tous les droicts qui se leuent; & que pour cēt effect il s'enferoit donner vn memoire par tous les Fermiers. Sur ces expediens Monsieur le premier President a pris les aduis, & a passé d'vn commun consentement à la Conference proposée par son Altesse pour demain; mais cependant tous Messieurs estoient d'aduis de mander sur le champ les Gens du Roy, pour aller prendre l'heure de la Reyne pour apres midy, afin de faire les remonstrances ordonnées hyer au sujet des deux Declarations; mais Monsieur le Duc d'Orléans a prié la Compagnie de luy laisser cete conduite, & que demain il donneroit la response de la Reyne à la Conference; le sujet de cete remise est, qu'il n'a pas encore esté résolu au Conseil d'en haut si on changera lescdites Declarations sur les Remonstrances du Parlement, ou si on les preuiendra, & l'on croit plustost le dernier que le premier.

### *Du Mercredi quinziesme Iuillet.*

**C**E iour le Parlement estant assemblé, Monsieur Maynardéau, l'ancien des Deputez de la Chambre Saint Louys, a fait rapport des propositions faictes hyer de releuée en la Chambre Saint Louys, dont la



premiere a esté vne plainte du grand Conseil, de n'estre pas admis dans la Chambre de Iustice, & la proposition d'y estre adjoustez : Surquoy Monsieur le premier President a dit, que iamais Messieurs du grand Conseil n'y auoient esté admis; & que l'affaire ayant esté deliberée amplement le iour precedent, la Compagnie n'auoit rien à y adjouster. Monsieur le President de Mesmes l'a soustenu dans sa proposition, & plusieurs autres des Messieurs ont adjousté qu'il falloit s'adresser à la Reyne: & l'on n'a point deliberé sur cette proposition, en suite de laquelle Monsieur Maynardeau en a leu vne autre, qui est, qu'il ne sera fait aucun retranchement des gages, droicts, rentes, reuenus, domaines, reuocation d'hereditez & suruiuances, attribuez par Edicts ou Declarations, bien & deuément verifiez, sinon en vertu d'Edicts & Declarations aussi bien & deuément verifiez dans les Cours souueraines, surquoy il s'est meü contestation; sçauoir si on deliberera sur ledit article dès à present, ou si l'on attendroit l'euement de la Conference qui doit se faire de releuée chez Monsieur le Duc d'Orleans, en laquelle on pourroit aussi parler de cet Article avec les autres. Surquoy en deliberation il a passé que l'on diroit à Monsieur le Duc d'Orleans que cet Article auoit esté trouué bon dans la Compagnie, afin qu'il soit compris dans la Declaration qui y doit estre enuoyee pour d'autres Chefs: Faute de quoy la Cour en donnera Arrest suiuant ledit Article.

Pendant ladite Sceance, Monsieur Pitou Conseiller a dit qu'il estoit aduertiy que Monsieur d'Orgeual Maistre des Requestes auoit commencé son quartier par casser vn Arrest de la Cour: il vouloit parler del'Arrest donné Samedy au Conseil des Finances sur la Requeste de Madame la Duchesse d'Aiguillon contre Monsieur & Monsieur d'Oroy, sur quoy il s'est esleué vn grand murmure des Enquestes, qu'ils se doutoient bien que si tost que Messieurs les Maistres des Requestes seroient rétablis qu'ils recommenceroient leurs Cassations. A cela Monsieur Ricoüard qui s'est trouué l'Ancien des quatre, a dit qu'il croyoit que Monsieur d'Orgeual rendroit bon compte à la Compagnie dudit Arrest, & que sans doute il nel'auoit donné qu'aux termes de l'Ordonnance. A cela Messieurs les Presidents ont dit qu'il n'appartient point à Messieurs du Conseil de casser les Arrests de la Cour, & qu'il n'y auoit que deux moyens de se pouruoir à l'encontre, sçauoir la Requeste Ciuille, & la proposition d'erreur; & que s'il en estoit vsé autrement, ils sçauoient bien le maintenir, & vsfer des moyens & des remedes qu'ils auoient en main.

Le mesme iour au Conseil a esté donné Arrest en execution de la Declaration de la descharge des restes des Tailles, par lequel le Roy a ordonné que par les Thresoriers de France & les Esleuz, il seroit procedé à la verification des restes, tant par les Registres des Receueurs que sur les roolles des Collecteurs, afin d'empescher qu'ils n'en profitent en leur particulier, & pour faire porter les deniers qui sont entre leurs mains à l'Espargne.



*Du Iendy seiziesme Iuillet.*

Ce iour le Parlement estant assemblé, Monsieur le Duc d'Orleans y estant arriué aux mesmes ceremonies, & accompagné de Monsieur de Montbascon, outre les quatre Ducs & Pairs qui l'ont cy-deuant accompagné, & estant assis en la place il a dit: Messieurs suiuant ce que vous auez souhaitté de moy, j'ay proposé à la Reyne ce que vous desirez estre adiousté aux deux dernieres Declarations touchant les Intendans de Iustice: à l'égard de la premiere, la Reyne n'a point iugé à propos de vous enuoyer vne autre Declaration portant la reuocation generale des Intendans par toute l'estenduë du Royaume; d'autant que comme vostre ressort n'en compose que le tiers, il est iuste de laisser aux autres Parlements, ce qui les concerne, & dès à present on a donné ordre aux Intendans de reuenir; mesme on a enuoyé au Parlement de Roüen vne pareille Declaration à celle sur laquelle vous auez delibéré. La Reyne n'a pas aussi trouué bon, ny qu'il fust necessaire que les trois Intendances referuées par ladite Declaration dans vostre ressort fussent verifiées; parce qu'ils ne deuoient point auoir aucune iurisdiction contentieuse ny cognoissance des Finances, mais seulement des gens de guerre: il n'est point besoin de verification à l'égard de la remise du quartier entier des Tailles. La Reyne n'a pas iugé aussi à propos, & n'est pas en pouuoir de l'accorder, mais seulement demy quartier. A l'égard de la Declaration touchant l'establissement de la Chambre de Iustice, la Reyne croit qu'il est absolument necessaire d'y appeller avec vous des Officiers des autres Parlements, parce que ayant resolu de chastier tous ceux qui ont commis des excès, violences, abus, & maluerbations dans les leuées par tout le Royaume, il faut que la Chambre soit composée d'Officiers de tous les Parlements, afin d'auoir les memoires de toutes les Prouinces: & il a adiousté qu'il croyoit que la Compagnie estoit satisfaite, & de la Reyne & de son entremise, puis que toutes les choses qu'il auoit promises estoient executées; & qu'aussi il croyoit qu'il ne se trouuoit point de difficulté à verifier presentement lesdites Declarations, & que le temps pressoit extremement; d'autant que pendant toutes lesdites Assemblées les peuples ne payoient rien, & qu'ils se portoient à la sedition; qu'ils auoient receu au Conseil nouuelle des Emotions d'Orleans, Forest & Moulins, & qu'à toute heure on attendoit de pareilles nouuelles; & que pour faire cesser ces desordres, il falloit faire publier promptement lesdites Declarations, & les enuoyer dans les Prouinces, & qu'on les enuoyeroit au premier iour à la Compagnie, laquelle il prioit de les agreer en la forme qu'il les proposoit; Surquoy il s'est eleué vn grand bruit de Messieurs, qui ont dit qu'il les falloit voir & les lire pour y delibérer: & sur ce Monsieur a dit, que l'on y pouuoit delibérer sous ces conditions; ce qui a esté rejetté, disant que la Cour ne deliberoit pas sur ce qu'elle ne voit point. Surquoy Monsieur le premier President a dit, qu'en attendant qu'elles fussent rapportées, on pouuoit delibérer sur la Declaration qui regarde les impositions de Paris,

à ces fins a commandé au Greffier de l'aller querir au Greffe, & cependant il a dit à Monsieur Mesnardeau de lire l'article de la Chambre saint Louys concernant cette matiere pour voir s'il estoit conforme, ce qu'il a fait; & en suite, Monsieur a dit, qu'il auoit iustificié dans la Conference du iour precedent faite chez luy, que tous les droits qui se leuent dans Paris, s'y leuoient en vertu d'Edits ou Declarations verifiées ou peu s'en falloit, & que ainsi cette Declaration ne pouuoit regarder que l'auenir: sur quoy Monsieur le premier President a pris les Auis, & a commencé par Monsieur le Doyen, qui a esté de l'aduis des conclusions, dans la difference d'avec la Declaration qui fut remarquée dans la Relation du iour d'hier; Monsieur Cheualliera esté de mesme aduis: Monsieur de Brussel a adiousté qu'il falloit distinguer les Declarations verifiées dans les Compagnies Souueraines, d'avec celles publiées au sceau; qu'à l'égard des premieres, il estoit d'aduis d'en continuer la leuée pour vn an ou deux, si tant la guerre dure: à l'égard des derniers, qu'il en falloit dès à present arrester le cours, parce que telles publications n'auoient aucune vigueur; qu'autrement Monsieur le Chancelier seroit plus que le Roy, s'il auoit pouuoir de sceller & s'adresser les Edicts & Declarations; que ce desordre estoit si grand que l'on iustificeroit qu'il auoit esté leué deux cens millions en vertu de cette sorte de publications; Qu'il n'estoit point iuste de le dissimuler ny souffrir d'auantage, parce qu'il seroit à craindre que si l'on continuoit à se dispenser des regles & des formes du commandement, que les peuples ne prissent la liberté de se dispenser de l'obeyssance qu'ils ne rendoient volontairement, qu'autant que le commandement estoit conforme aux reigles de l'Estat; Que si l'en vouloit se dispenser des formes, comme le sceau du Roy n'estoit qu'une forme pour sçauoir sa volonté aux peuples, on pourroit luy faire sçauoir par d'autres voyes, & a finy. Monsieur Meusnier a esté de mesme aduis, Monsieur Boulanger s'est fort estendu sur les verifications, & a soustenu que toutes les impositions doiuent estre verifiées au Parlement, & l'exécution portée à la Cour des Aydes: sa principale raison estoit pour eüiter la facilité des verifications, soit par l'enuoy de Messieurs les Princes, soit par le moindre nombre des Officiers des autres Compagnies. Sur quoy Monsieur de Nouion l'a interrompu, disant qu'il n'estoit pas temps de former aucune contestation avec la Cour des Aydes, & que le iour precedent il auoit esté arresté à la Conference de chez Monsieur le Duc d'Orleans, que les Gens du Roy de la Cour des Aydes descendroient au Parquet des Gens du Roy de la Cour, pour terminer ensemble les difficultez qui se pourroient presenter: A cela Monsieur le premier President a dit, qu'il n'auoit pas garde d'interrompre Monsieur Boulanger dans sa proposition, laquelle il croyoit de iustice: & pour la dignité & autorité de la Compagnie, Monsieur de Nouion a repliqué qu'il croyoit son interruption fort raisonnable, puis que la proposition de Monsieur Boulanger alloit à refroidir l'Vnion & l'intelligence des Compagnies: Monsieur Boulanger a repris son mesme discours, qu'il a rebattu plusieurs fois avec chaleur; & dans cette emotion, il dist qu'il falloit songer à la patrie, la-



quelle il falloit parer; c'est à dire qu'il falloit employer pour le Roy & son pays, sa robbe, son bien & sa vie; & qu'il se souuenoit qu'un Ancien disoit autrefois que parer le Temple, c'estoit parer l'Italie, qu'il disoit la mesme chose, & qu'il falloit parer l'Italie; à ce mot vn grand ris s'est émeu: il s'est rescrié plus haut, & a dit que parer l'Italie, c'estoit à dire parer la France; parce que cet Ancien, qui estoit Ciceron, en parlant de l'Italie, il vouloit parler de sa patrie, que c'estoit son explication: Sur cela en vn moment les yeux luy tournerent en la teste, & la palleur s'est espanuë sur son visage, & est mort à sa place, & toute la Compagnie s'est retirée apres l'auoir fait emporter dans la quatriesme Chambre des Enquestes, où on luy fit venir vn Chirurgien qui le trouua mort: Monsieur Hilerin luy donna l'Absolution.

### *Du Vendredy dix-septiesme Iuillet.*

**C**E iour le Parlement estant assemblée à l'heure & à la maniere accoustumée, Monsieur le Duc d'Orleans y est arriué, accompagné comme le iour precedent, & avec les mesmes ceremonies; & si tost qu'il a esté en sa place, Messieurs les Gens du Roy y sont entrez, qui ont dit par la bouche de Monsieur Tallon, qu'ils auoient les deux Declarations du Roy depuis le dernier Arrest de la Cour, qui estoient beaucoup plus estendues que celles sur lesquelles il est interuenu Arrest, & qu'ils n'auoient point pris de nouuelles Conclusions, d'autant qu'ils persistoient aux premieres, & se sont retirez, ayant mis lesdites Declarations sur le Bureau, & aussi-tost lecture en a esté faite par Monsieur Mesnardeau.

Pour cette Declaration, le Roy premierement reuoquoit toutes les Commissions extraordinaires qui pourroient auoir esté expédiées pour quelque cause que ce soit, mesmes les Commissions d'Intendans de Iustice dans toutes les generalitez du Royaume, excepté es Prouinces de Languedoc, Bourgogne, Prouence, Lionnois, Picardie & Champagne, à la charge que les Intendans esdites Prouinces ne se mesleront d'imposition ny leuée de deniers, ny faire aucune fonction de juridiction contentieuse, estant seulement pour assister les Gouverneurs en l'execution de leurs pouuoirs.

Secondement, que les deniers seront cy-apres imposez & leuez par les Officiers pour ce establis, hormis pour cette année, que les impositions des deniers demeureront telles qu'elles ont esté faites par les Intendans, & qu'ils seront neantmoins leuez par les Officiers, & voiturez à l'Espargne à l'exception des gages & droits des Officiers.

Troisiemement, les peuples déchargés de ce qui est deu par eux, pour les Tailles, Taillon & Subsistance des années precedentes, iusques & compris l'année 1646. & ceux qui se trouueront emprisonnez pour ce, estre relargis. Et pour les Tailles, Taillon & Subsistance de 1647. & 1648. qu'il

Ies seront payées sur le pied de l'imposition à la réserve d'un demy quartier de l'an 1648. dont le peuple sera déchargé; à condition que toute la Taille sera payée dans le mois de Ianuier prochain, autrement décheus de ce benefice ceux qui se trouueront n'auoir pas payé dans ledit temps, & pour ce les Tresoriers de France iront dans les Elections tenir la main à l'exécution de ce que dessus, à peine d'en respondre en leur propre & priué nom.

Quartò, Que les Receueurs Generaux feroient leurs charges, excepté ceux qui se trouueront insoluables.

Enfin que les peuples seront déchargez d'un quartier de la Taille, Tail-  
lon & Subsistance en l'année 1649. sur le pied qu'elles se montent à present, à la charge qu'ils payeront de quartier en quartier, & que le tout sera payé à la fin de Feburier 1650.

Il y auoit vne autre Declaration de laquelle lecture fut pareillement faite, c'estoit pour l'establissement d'une Chambre de justice que le Roy vou-  
loit estre composée de nombre d'Officiers des Cours Souueraines, avec pouuoir de proceder à la recherche des exactions, violence, & extorsions qui ont esté commises dans les Prouinces de ce Royaume, tant en l'imposi-  
tion qu'en la leuée des deniers, Tailles, Tail-  
lon, Subsistances & autres, comme aussi des abus, maluersations & dissipations commises aux Finan-  
ces. Qu'il sera fait incessamment recherche des coupables sans faire aucune composition, ny don des Confiscations qui seront ordonnées; Que les  
derniers en prouenans seront portez directement à l'Espagne, pour estre  
employez aux despenfes plus necessaires de l'Estat.

La lecture faite de ces deux Lettres Patentes & Declarations, Monsieur  
le Duc d'Orleans ayant repris la parole a dit, qu'il auoit fait entendre à la  
Reyne, ainsi que Messieurs l'auoient souhaitté, les modifications qu'ils  
auoient estimées raisonnables sur les deux dernieres Declarations, sur les-  
quelles la Reyne a fait toutes les considerations que la Compagnie pouroit  
desirer, & qui estoient au pouuoir de la Reyne dans l'estat present des af-  
faires, comme il paroissoit par les nouuelles Declarations; d'autant qu'elle  
auoit reuoké generalement tous les Intendans du Royaume, à l'exception  
de ceux du Languedoc, Prouence & Bourgongne, outre les trois premieres  
réseruées; Qu'elle auoit accordé la décharge de tous les restes des Tailles,  
iusques & compris l'année mil six cens quarante six, & un demy quart des  
années 1648. & 1649. & qu'elle auoit ordonné le reestablissement de la fon-  
ction des Thresoriers de France & des Esleus, & liberté de leurs charges, &  
d'une partie de leurs gages & droicts; Qu'à l'égard de la Declaration pour  
l'establissement de la Chambre de Justice, la Reyne auoit iugé necessaire  
d'y mettre quelques Officiers des autres Parlemens avec Messieurs des  
Compagnies de Paris, afin d'auoir plus facilement les memoires des abus  
arriuez dans les autres ressorts; & qu'il estoit bien aise d'auoir témoigné  
à Messieurs les soins qu'il prenoit & qu'il prendroit tousiours de faire  
executer les paroles qu'il leur auroit donné: cela fait, Monsieur le pre-  
mier President luy a fait un remerciement au nom de la Compagnie,  
& l'a prié de luy vouloir continuer l'honneur de son affection: Apres  
quoy



quoy Monsieur a dit qu'il auoit vne priere à faire à la Compagnie, & de la part de la Reyne, & en son nom, qui estoit de faire cesser la Chambre de Saint Louys; d'auant qu'encores que les intentions en fussent bonnes, neantmoins les ennemis s'en preuoiroient, supposant dans tout le monde que le Royaume estoit diuisé, & qu'il penchoit à vn soulèvement general: mais cependant qu'il ne croyoit pas que personne fit difficulté à la verification desdites deux Declarations, & qu'il importoit qu'elles fussent publiées deuant les remonstrances: Surquoy plusieurs voix se sont esleuées, qui ont dit qu'elles n'estoient pas conformes à l'Arresté; qu'il n'estoit point fait mention que les Commissions d'Intendances referuées seroient verifiées en la Compagnie, & qu'aussi la remise dudit demy quartier des Tailles, n'estoit pas suffisante pour le soulagement du peuple: à ce-la Monsieur a respondu, que les Intendans ne deuoient point auoir de Iurisdiction contentieuse ny cognoissance des Finances; mais seulement des gens de guerre, & pour demeurer près des gouuerneurs, partant qu'il n'estoit pas besoin d'aucune verification, à l'égard de la décharge du quartier entier des Tailles proposée: que si la Reyne l'eust pû, elle l'auroit accordé, & qu'il auoit employé son credit pour l'obtenir: Mais que la Reyne ayant fait reflexion, & luy aussi sur l'estat present des affaires, qu'ils auoient trouué impossible de faire vne plus grande remise: que neantmoins il pouuoit promettre que si quelque Generalité se trouuoit dans l'impuissance, la Reyne empescheroit qu'il n'y fust vñ de contraintes rigoureuses, & que mesme avec le temps elle leur pourroit remettre le surplus; mais qu'à present il ne se pouuoit faire autre chose: & sur ce monsieur le premier President a pris les aduis, & a commencé par monsieur le Doyen, qui a esté d'avis d'enregistrer & faire publier lesdites Declarations, aux conditions du dernier Arresté, qui estoient que la Reyne seroit suppliée d'augmenter la remise des Tailles iusques à vn quartier, & que les Commissions d'Intendans seroient verifiées au Parlement; & que la Chambre de Iustice seroit composée d'Officiers des trois Cours Souueraines de Paris, à l'exclusion de toutes autres; & toute la Compagnie a esté du mesme aduis. M. Laisné y a adjousté, qu'il falloit bien prendre garde à la clause inferée dans la Declaration qui fait mention des gages & droicts des Officiers, le payement desquels il semble que le Conseil se vueille attribuer; & qu'estans acquis en vertu de bons Edicts & Declarations, ils ne deuoient pas dépendre de la plume d'un Sur-Intendant: C'est pourquoy il estoit d'avis d'adjouter aux precedens articles, celui de prier la Reyne de ne pouruoir au payement desdits gages & droicts, conformément aux Edicts & Declarations bien & deuëment verifiez. Et cette addition d'avis a esté aussi agréée du plus grand nombre d'aduis, & la grande contestation qui s'est meüe, a esté si les Declarations seroient publiées auant ou apres les remonstrances. Enfin apres beaucoup de contestations & de prieres de la part de Monsieur, il a passé que la publication precederoit, & que pour cet effect l'on tiendrait le lendemain vne Audiance extraordinaire, & que les Remonstrances se feroient incessamment: Le fort du discours de Monsieur pour persuader son aduis, a esté, le decrédement des affaires, qui cauçoit le manquement d'argent, auquel s'il n'estoit remedié promptement, l'Estat periroit, & a fait le denombre-

ment de toutes les Armées, & en suite, dit, qu'il seroit bien estrange qu'ayant apporté à chacune de ses entrées au Parlement quelque sujet de satisfaction, il n'en peût pas porter aucune vne seule fois à la Reyne, que cela estant il n'auoit plus rien à negocier; & qu'enfin si l'on persistoit à refuser cette verification & publication, il ne se mesleroit plus de ces affaires, & qu'il ne respondoit plus de ce qui arriueroit, mais qu'ils s'en deschargeoit. Monsieur Hebert Conseiller dit en opinant, qu'il ne falloit point se faire valoir pour insinuer que l'on eust fait rien pour la Compagnie, qu'elle n'agissoit point pour ses interets particuliers, mais seulement pour le seruice du Roy, & le bien du Public & de l'Estat, & qu'ainsi il ne falloit pas trouuer estrange qu'elle conseruast la mesme rigueur & ferueté, agissant tousiours sur les mesmes principes. Enfin monsieur l'empporta de quatre-vingts vnze, contre quatre-vingts sept, que la publication desdites Declarations precederoit les Remonstrances, le tout neantmoins aux termes des Arrestez.

Si bien qu'il y eut arrest portant que lesdites Lettres seront leuës, publiées l'Audiance tenant, & registrées au Greffe d'icelle, pour estre executées selon leur forme & teneur, & coppies d'icelles enuoyées aux Baillages & Senechaussées du ressort, & y estre pareillement leuës, publiées, registrées & executées. Enjoint aux Substitus du Procureur General, d'en certifier à la Cour au mois, à la charge que les Commissions de Lyonnois, Picardie & Champagne, seront apportées à ladite Cour, pour y estre la premiere fois verifiées toutes les Chambres assemblees; & apres en la forme ordinaire en icelle Cour, & suiuant l'Arresté contenu au registre, que le Roy & la Reyne seront tres-humblement suppliez de remettre au peuple, le quart de la Taille, Tallion & Subsistances, pour les années 1647. 1648. & 49. & laisser le fonds pour les gages des Officiers.

### *Du Samedi 18. Iuillet.*

**C**E iour l'Audiance ouuerte à la Grand' Chambre les susdites Declarations furent leuës, publiées & registrées, en la maniere & selon les formes ordinaires.

Et parce que lesdites Declarations estans publiées en l'Audiance, les Arrests ne furent point leus, mais seulement aux charges du Registre; & qu'ainsi les Arrests demeureroient inconnus au peuple. Messieurs des Enquestes se sont assemblez en la Grand' Chambre à la leuee de l'Audiance, & qui n'a esté tenuë que pour ce tre publication; & en deliberation il a esté arresté & ordonné, que les Arrests precedens seroient imprimez conjointement, & à la suite desdites Declarations, pour estre publiez par tout conjointement & en mesme cahier.

En suite dequoy monsieur Mesnardeau a leu vne proposition faite hier à la Chambre S. Louys, qui contient que les biens donnez par les Traictans & gens d'affaires, à leurs enfans masles & femelles, tant en Office qu'autres, natures demeureront hypothequez pour seureté de leurs debtes contractées auparavant lesdites donations, apres laquelle lecture l'heure ayant sonné, la Compagnie s'est separée, & l'Assemblée continuée à Lundy.



*Du Lundy vingtiesme Juillet.*

**C**E iourd'huy le Parlement estant assemblée en la maniere accoustumée, Monsieur le Duc d'Orleansy est arriué avec les mesmes ceremonies, & accompagné comme le iour precedent; & estant à sa place, il adit; Que les affaires du Roy estoient tellement retardées par la longueur des Assemblées, tant de la Chambre S. Louys, que de la Compagnie; qu'il estoit quasi impossible d'en concevoir, ny expliquer la consequence; Que les peuples se souleuoient quasi par tous; & qu'ainsi il estoit à propos pour terminer ces desordres, que la Cours'assemblast matin & apresdinée, afin de deliberer incessamment sur toutes les propositions; & que pour cet effet il croyoit qu'il falloit deliberer presentement sur la Declaration cy-deuant leuë, concernant les impositions sur les denrées: Surquoy M. le President de Mesmes, qui presidoit à cause de l'absence de monsieur le premier President, a commandé au Greffier d'apporter la Declaration pour la lire, ce qu'il a fait; & apres lecture d'icelle, & les conclusions de Messieurs les Gens du Roy; monsieur le President de Mesmes a pris les aduis, & ils'en est trouué sept differens.

M. le Doyen a esté d'avis auant proceder à la verification de cette Declaration, de commettre quatre de ces Messieurs pour s'informer de tous les droicts qui se leuent, tant aux portes, que sur les ports, & examiner les titres en vertu desquels ils se leuent, pour ce fait & rapporté, estre ordonné ce que de raison.

Le second aduis a esté de monsieur de Brusselle, qui a esté d'enregistrer la Declaration, ce faisant faire deffense de faire à l'aduenir aucune nouuelle imposition ny taxe, sinon conformément aux Loix du Royaume, Ordonnances Royaux, & Arrests de la Cour; & au regard des impositions cy-deuant faites, faire deffenses de continuer les leuées de celles qui se font en vertu d'Arrests du Conseil, ou Edicts & Declarations non verifiez és Cours Souueraines, & seulement publiez au sceau; & au regard de celles faites en vertu d'Edicts, ou Declarations verifiées aux autres Cours Souueraines, & non au Parlement, d'en continuer la leuée pour l'année presente 1648. & la suivante seulement, si tant la guerre dure; ausquelles fins pancharte sera faite des droicts exigibles en vertu du present Arrest, laquelle sera leuë, publiée, registrée & imprimée; conjointement avec iceluy & ladite Declaration; & que les Commis donneront quittances desdits droicts, avec les injonctions ordinaires.

Le troisieme aduis a esté de monsieur Seuin, qui a esté conforme à celuy de monsieur de Brusselle, excepté qu'il estoit d'aduis de publier dès à present la Declaration & l'Arrest, sans attendre les nouuelles panchartes, qu'il estoit d'avis de publier à loisir.

Monsieur Mesnard a adjousté à l'avis de M. de Brusselle, de faire des leuées seulement à l'aduenir, sinon en vertu d'Edicts ou Declarations, bien & deuëment verifiées à la Cour, & avec liberté des suffrages: Il a dit que c'estoit la pensée de Messieurs les Deputez de la Chambre de S. Louys;

Le cinquiesme aduis a esté de M. Hennequin, qui a esté de verifier & registrer la Declaration pour l'auenir, & auant pouruoir à la reformation des impositions & leuées faites iusques à ce iour, commettre quatre de Messieurs pour

s'éclaircir des tiltres, en vertu desquels les leuées se font.

Le sixiesme auis a esté proposé par monsieur Blanmesnil, qui a esté d'ordonner que l'Arrest du septiesme Septembre dernier, sera executé; & auant que proceder à la verification de la Declaration, deputer des Commissaires, suivant les precedens aduis. Pour expliquer la premiere partie de cet aduis, il faut scauoir, que le Roy ayant enuoyé le 7. Septembre dernier au Parlement vne Declaration touchant vne imposition sur toutes sortes de denrées & marchandises, avec vn Tarif, il fust verifié avec quelques modifications; & en outre la Cour fist deffenses de faire à l'aduenir aucunes leuées ny taxes nouuelles, sinon en vertu d'Edicts ou Declarations bien & deuëment verifiées à la Cour: de sorte qu'en ordonnant l'execution de cet Arrest, c'estoit faire cesser toutes les leuées faites depuis en vertu d'Edicts & Declarations portées par Messieurs les Princes à la Chambre des Comptes, & à la Cour des Aydes, & d'Arrests du Conseil: joint que c'estoit faire reuiure ledit Arrest du 7. Septembre, cassé depuis par Arrest du Conseil, & par vne Declaration portée par le Roy au Parlement.

Le dernier aduis a esté celuy de M. de Nouion, qui a esté conforme à celuy de M. le Doyen, en y adjoustant, qu'avec les quatre Commissaires de la Cour, deux de la Cour des Aydes y seroient appelez. Enfin, apres auoir examiné les aduis pendant trois heures, l'affaire a passé par l'aduis de M. de Brousselles, & monsieur le Duc d'Orleans, & les autres Ducs & Pairs s'y sont rengez, & ledit aduis a esté de cent, contre quatre-vingt, qui s'estoient rengez à celuy de monsieur de Blanmesnil, & la deliberation n'a finy qu'à midy & demy.

Le lendemain Mardy, il nes'est passé aucune chose remarquable, bien que l'Assemblée ait continué.

Le lendemain Mercredy, feste de la Magdeleine.

### *Du Ieudy 23. Iuillet.*

**C**E iour le Parlement estant assemblé à l'heure ordinaire, M. Mesnardeau par l'ordre de M. le premier President a leu l'article resolu en la Chambre S. Louys; Qui porte que les deniers des Finances, à commencer du quartier d'Avril dernier, seront portez directement à l'Espagne, nonobstant toutes autres assignations données sur icelles, pour remboursemens de prests & aduances, sauf à estre pourueu au remboursement d'icelle en temps & lieu: apres quoy les aduis ont esté pris; & M. le Doyen a esté d'auis de declarer l'article bon, & le comprendre dans les Remonstrances. M. de Brousselles au commencement a esté d'auis dès à present de donner Arrest conforme à l'Article. & sur ce que M. le premier President s'est fort escrié; qu'il n'estimoit pas que la Cour fust en puissance de pouuoir à la direction des Finances, sinon par Remonstrances; Monsieur de Brousselles a esté de l'aduis de monsieur le Doyen, ce qui a esté suiuy de Messieurs, qui ont opiné iusques à monsieur Mesnardeau, qui a esté d'auis de donner presentement Arrest conforme à l'Article. Messieurs de Lafemas & Lamoignon, Maistres des Requestes, & Laisné Conseiller, ont esté de mesme aduis. Monsieur le President de Blanmesnil a dit, qu'auparauant que d'opiner sur l'Article, il estimoit que ceux de Messieurs qui y estoient interessez



se deuoient retirer : & que si l'Ordonnance auoit lieu dans les affaires particulieres, és cas auxquels les Iuges deuoient s'abstenir d'opiner, elle deuoit à plus forte raison s'appliquer pour les affaires du Roy & du public. Qu'il estoit notoire qu'il y auoit dans la Compagnie des fils, gendres, & autres proches parens des Fermiers, & qu'il ne croyoit pas qu'ils voulussent opiner en vne affaire qui les interessoit si fort ; & qu'au cas qu'ils s'y presentassent pour y donner leur aduis, qu'il croyoit que monsieur le premier President, qui auoit la conduite de la Compagnie, les en deuoit aduertir : Qu'il estimoit aussi que si quelqu'un de la Compagnie s'estoit tant oublié que d'entrer dans les prests, qu'ils ne manqueroient pas de s'abstenir d'opiner : que son opinion auoit beaucoup d'exemples dans les Registres, & qu'il n'en coterroit qu'un qui est d'une creation cy-deuant faicte d'un President, & douze Conseillers de la Cour, dont quelques-uns de sa Compagnie ayans donné parole de traiter, & cela ayant esté sceu, il fut arresté qu'à toutes les deliberations qui se feroient touchant cette affaire, ils se retireroient, ce qui fut executé ; & qu'il croyoit que la mesme chose deust estre faite. A cela monsieur le premier President a repliqué, que cette proposition venoit à tard, la deliberation estant si engagée, & que lors de l'exemple rapporté la proposition fut faite auant qu'entrer en deliberation ; monsieur le President de Mesmes l'a secondé, & a adiousté ; que si la loy commune qui se pratique dans les affaires particulieres, qui veut que tous les creanciers des parties s'abstiennent, s'observoit en celle cy, il ne scauoit s'il se trouueroit nombre de Iuges, parce qu'il estoit notoire que tous ceux qui auoient eu de l'argent auoient creu recevoir un bon Office des adiudicataires des Gabelles, quand ils l'ont pris au denier dix-huict ou vingt ; Que cependant les creanciers particuliers auoient autant d'interests que les fermiers, d'empescher le reculement de leurs prests ; parce que par leur reculement leurs debiteurs demeuroient insolubles, ou moins solubles ; & que cela estant il n'estoit pas possible d'acheuer la deliberation, parce que Messieurs ne pouuoient pas scauoir si leurs proches estoient creanciers ou non des fermiers, mais qu'il estimoit qu'en ces affaires generales il falloit presumer que l'interest public preuandroit par dessus l'interest particulier que Messieurs pourroient auoir dans l'affaire : nonobstant quoy plusieurs voix se sont eleuees, qu'il falloit que les interessez sortissent : & monsieur le premier President ayant demandé l'aduis au President Bragelonne qui suiuoit immediatement monsieur de Blanmesnil le dernier, a insisté qu'il falloit opiner sur la proposition auant que passer outre sur l'article. A quoy monsieur le premier President s'est écrié, disant, c'est vostre aduis quand Messieurs auront opiné ; s'ils passent par là, il faudra subir la loy de la Compagnie. Monsieur de Mesmes a adiousté, Que si cette proposition auoit lieu, l'on ne pourroit iamais acheuer vne deliberation, parce qu'il dependroit de celui qui opineroit le dernier de faire vne proposition incidente, qui arresteroit le cours de la premiere proposition ; mais pour accommoder l'affaire, qu'il croyoit que les enfans & gendres des fermiers se retireroient d'eux-mesmes, sans en estre inuitez ; mais qu'en cas qu'ils ne le fissent point, on ne pouoit coter d'Ordonnance qui obligeast ny les Presidents ny la Cour d'enjoindre aux Iuges particuliers de se retirer, nonob-

stant quoy monsieur de-Blannefnil a insisté, & a esté soustenu de monsieur Pitou & plusieurs autres. Ce qui a fait consommer le temps en contestations, pendant lesquelles dix heures ont sonné, & monsieur le premier President s'est leué, & a remis la deliberation au lendemain, quoy qu'à l'entrée il eust proposé d'entrer apres midy.

### *Du Vendredy vingt-quatriesme Iuillet.*

Ce iour les Chambres estans assemblées à l'heure accoustumée, monsieur Perot President aux Enquestes a dit à monsieur le premier President qu'il auoit charge de Messieurs des Enquestes de le prier de trois choses; l'vne de demander presenement les Gens du Roy, pour leur dire d'aller prier la Reyne de la part de la Compagnie, de donner iour & heure pour entendre les Remonstrances ordonnées luy estre faites sur les articles precedens. La seconde, pour la prier d'enuoyer la liste des Iuges dont on veut composer la Chambre de Iustice, afin que la Cour iuge s'il n'y a point de suspects. La 3. de faire publier incessamment à l'Audiance l'Arrest de la Cour suiuant la Declaration des impositions & leuées sur les marchandises & denrees. A cela M. le premier President a répondu, qu'il estoit bien à propos de mander les Gens du Roy pour aller demander iour & heure à la Reyne pour faire les Remonstrances; qu'à l'égard de la liste de la Chambre de Iustice, cela ne regardoit point la Compagnie; Que le choix dependoit du Roy & de la Reyne, & que l'Arrest ne portoit point que les noms seroient presentez au Parlement. Messieurs ont reparu; Qu'il estoit vray, mais que M. le Duc d'Orleans auoit donné sa parole à la Compagnie, que la liste luy seroit enuoyee pour examiner s'il y auoit quelqu'un suspect. Monsieur le premier President & M. de Mesmes ont insisté au contraire; qu'il falloit suivre les termes de l'Arrest. Et M. le premier President a continué que l'on ne pouuoit point publier l'Arrest qu'avec la pancarte, puis qu'il estoit ainsi ordonné en termes exprez, & qu'il falloit y travailler incessamment, d'autant plus, que Messieurs de la Cour des Aydes y travailloient: sur quoy d'un commun consentement il a esté dict; Que le Procureur General prendroit aujourd'huy vne Ordonnance de Messieurs de Brusselles & Ferrand Commissaires deputez pour ladite pancarte, pour faire appeller les fermiers, afin d'apporter les Edicts, Declarations, & autres tiltres, en vertu desquels ils leuent les droicts, pour ce fait & rapporté estre ordonné ce que de raison. Toutes lesquelles contestations ont emporté vne heure de temps. Apres quoy M. le premier President a dit; Qu'il croyoit que tous Messieurs scachans l'Ordonnance s'ils sentoient quelques empeschemens en eux qui les empeschast d'opiner en l'article proposé, ils se retireroient, & qu'ainsi il n'y auoit qu'à continuer la deliberation, & pour cela il a commandé au Greffier de relire l'article & les aduis. Ce que ledit Greffier voulant faire; M. Mesnardeau l'a interrompu, & a dit; Que depuis hier l'on publioit dans les rues vn Arrest du Conseil, qui sembloit donner atteinte à la deliberation; en ce que le Conseil faisoit desenfes aux Comptables & Fermiers de ne rien payer que par les Ordonnances de M. le Marechal de la Meilleraye Sur-Intendant, & de Messieurs d'Alligre & Me-



t'engis directeurs des Finances de France, & que par ce moyen c'estoit leur dō-  
 ner la liberré de faire payer & rembourser les prests, nonobstant les Arrests de  
 la Cour. En suite de ce on a leu cet Arrest imprimé qui contient en substance  
 ce que dessus. Surquoy M. le premier President & M. de Mesmes, & quelques  
 autres, dont l'on n'a pas peu distinguer les voix, ont dict que cet Arrest au lieu  
 de nuire facilitoit l'execution des intentions de la Compagnie, parce qu'il em-  
 peschoit que les assignations tirees du temps de M. d'Emery ne fussent acquit-  
 tees sans nouvelles ordonnances des Sur-Intendans & directeurs des Finances,  
 & que la Compagnie pouuoit continuer la deliberation: ce qui a esté fait, &  
 M. de Blanmesnil n'a plus parlé de la proposition, mais seulement a opiné sur  
 l'article, suivant l'aduis de M. Mesnardeau, auquel il a adjousté; Que la Reyne  
 seroit suppliée de ne faire aucun emprunt qu'il ne fust verifié au Parlemēt, sui-  
 uant plusieurs exemples qu'il a cottez des annees 1543. & 1547. Comme aussi il  
 a adjousté que les remboursemens pretendus par les presteurs ne leur seroient  
 point faits qu'en vertu d'Arrests de la Cour. Apres quoy M. le President de  
 Bragelonne a esté de l'aduis de M. Mesnardeau. En suite enuiron 25. des Enque-  
 stes ont opiné au mesme aduis de M. Mesnardeau, excepté M. Lallemand Con-  
 seiller en la premiere des Requestes; Quatre sols Conseiller son beau frere gen-  
 dre de Brodeau Aduocat & nepueu, presomptifs heritiers de M. Merault, vn  
 des adjudicataires des Gabelles qui ont esté d'aduis auant que passer outre; que  
 les baux des Fermiers seroient rapportez à la Cour. Leur raison a esté, que par  
 leur bail ils ont esté contraincts d'auancer cinq millions de liures sur leur fermes;  
 Que ce bail est verifié en la Cour des Aydes, & qu'ainsi ils ont esté contraincts  
 en vertu d'vn bō tiltre de payer cette somme notable; & qu'à present si la Cour  
 faisoit la banqueroute du Roy contre lesdits Fermiers ils seroient contraincts  
 de faire banqueroute à leurs creanciers particuliers. Ils ont esté interrompus,  
 & suivant ce on leur a dit tout haut qu'ils estoient interessez pour leurs proches:  
 nonobstant quoy M. le President de Mesmes a fort approuué leur distinction,  
 & dit qu'il approuuoit ces aduances forcées par vn bon bail verifié, & qu'il  
 ne pouuoit pas comprendre comme Messieurs se portoient si hardiment à  
 iuger vn procez de cinq millions, sans voir les pieces ny entendre les parties.  
 Monsieur Croissy a fort deffendu cet aduis, monsieur le Clerc a dit que c'es-  
 toit vne vsure qui meritoit chastiment exemplaire; & qu'adjoustant à l'aduis  
 de monsieur Mesnardeau il estoit d'aduis d'informer contre les fermiers &  
 autres qui auoient presté au Roy & en auoient pris des interests vsutaires.  
 Monsieur Pitou a opiné, qui a dit; Que lors que cet article fut proposé à la  
 Chambre Saint Louys, la difficulté proposée fut receuë par Messieurs de la  
 Cour des Aydes qui ont verifié les baux, lesquels appuyerent de cette raison  
 les adjudications des Fermiers; mais les raisons contraires ayans esté repre-  
 sentées par Messieurs les deputez des autres Cours, le tout murement delibe-  
 ré, l'article auoit passé en l'estat qu'il estoit couché. Il a dit aussi en ces termes,  
 que le sieur d'Emery cy-deuant Sur-Intendant des Finances auoit mesnagé le  
 bien du Royaume comme vn marchand de Lyon qui auoit voulu faire ban-  
 queroute six mois apres auoir mesnagé son cabal, en prenant de toutes par-  
 ties & de toutes mains, & ne rendant à aucun, & qu'il ne voyoit point où estoit le

grand esprit dont il se vantoit tant; qu'il ne recognoissoit autre chose sinon la maniere d'agir d'un facteur d'un marchand de Lyon accoustumé à tout prendre & ne rien rendre, Que l'aduis ouuert de confisquer les biens des presteurs estoit fondé dans l'Ordonnance; Que l'vsure des presteurs estoit telle, que Messieurs des Comptes leur auoit fait cognoistre que de cent le Roy perdoit en remise cinquante neuf & demy sur les tailles; sçauoir premierement vingt cinq pour l'article de remise pour les frais de recouurement, & quinze pour cent sur les trois quarts restans qui sont en trois ans trente quatre & demy; & a dit, en regardant le banc de Messieurs les Presidents au Mortier, vis à vis desquels il estoit, qu'il voyoit des Messieurs qui pourroient encore mieux expliquer ce destail que luy, parce qu'ils estoient dans les prests, & finit, se mettant del'aduis de monsieur Mesnardeau, y adjoûtant la commission d'informer contre les presteurs; & parce que l'heure sonnée monsieur le premier President s'est leué, & a remis la deliberation au Mercredy, à cause qu'il est feste demain; & Mardy l'on croit que c'est pour donner temps au Conseil de regler les affaires avec tous les Traictans, & d'en enuoyer vne Declaration au Parlement.

### *Du Mercredy vingt-neufiesme Juillet.*

Ce iour sur les sept à huit heures du matin, monsieur de Rhodes grand Maistre des Ceremonies est entré à la Grande Chumbre; & ayant pris à l'ordinaire sa place au Bureau, il a dit, que le Roy luy auoit commandé de venir inuiter la Cour de la part de sa Majesté de se trouuer ce iourd'huy entre huit & neuf en Corps de Cour avec les robes rouges à Nostre Dame pour assister au *Te Deum* ordonné par sa Majesté en action de graces à Dieu de la prise de Tortose, auquel leurs Majestez assisteroient, & il s'est retiré. Ce fait, monsieur le premier President a dit à deux de Messieurs de la grande Chumbre, d'aller porter cet ordre par les Chambres, & peu de temps avant huit heures Messieurs des Enquestes sont venus prendre leurs places; & estans tous assis, monsieur Perrot President aux Enquestes, qui s'est trouué ancien desdits Presidents, a pris la parole, & a dit à monsieur le premier President, que Messieurs des Enquestes le prioient d'acheuer la deliberation commencee. Surquoy monsieur le premier President a dit, que la Cour ayant ordre de se trouuer entre huit & neuf à Nostre Dame, il n'y auoit pas de temps d'acheuer la deliberation: A quoy monsieur Perrot a repliqué, qu'au moins Messieurs le prioient de continuer l'Assemblée l'apresdinée. Monsieur le President de Mesmes a repliqué, que quand la Cour cesse le matin auant l'heure ordinaire, elle n'entre iamais l'apresdinée, qu'il croyoit estre à propos de mander le Procureur General, pour sçauoir s'il auoit eu l'heure de la Reyne pour entendre les Remonstrances de la Cour. Ce qu'ayant esté approuué, le Procureur General a esté mandé, qui a dit, qu'il n'auoit encores pû auoir l'heure. Surquoy monsieur le premier President du consentement de la Compagnie luy a dit, de prendre auourd'huy le iour & l'heure, & d'en aduertir la Cour demain,



49  
demain, laquelle apres cet ordre s'est leuee pour aller à Nostre-Dame.

*Du Iendy trentiesme Iuillet.*

**C**E iour les Chambres assemblées, sur les sept à huit heures du matin, monsieur le Procureur General est entré en la grande Chambre, qui a dit, que suivant l'ordre de la Compagnie, il estoit allé le iour precedent trouuer la Reyne, pour la prier de la part de la Cour de luy donner iour & heure pour entendre par leurs Majestez les Remonstrances au Parlement; & que sa Majesté luy auoit dit, que le Roy & Elle les entendroit ce iourd'uy à neuf heures precises, & que la Cour s'y trouuast par Deputez, & cela dit s'est retiré; & à l'instant monsieur le premier President a enuoyé monsieur Ferrand Conseiller en la grande Chambre, porter ces ordres aux Chambres, qu'il a conuie de la part de Messieurs de la Grande Chambre d'enuoyer leurs Deputez à huit heures & demie, pour se rendre tous ensemble à neuf heures au Palais Cardinal. Ce qu'ayant esté executé par ledit Ferrand, monsieur le premier President ayant eu aduis que tous Messieurs des Enquestes s'assembloient pour venir prendre leurs places, les a preuenus, & s'est leué par l'aduis de Messieurs les Presidents de Mesmes & le Coigneux huit heures sonnant pour aller à la Beuuerie changer de robes, où il a esté suivi par tous Messieurs de la Grande Chambre, dont les Enquestes ayans eu aduis ont pris leurs places à la grande Chambre, où ils ont deputez Messieurs de la Nauue & du Tillet Conseillers vers Messieurs les Presidents au Mortier, pour les prier de venir presider la Compagnie: & d'autant que monsieur le premier President estoit allé chez luy faire vn tour, & monsieur de Mesmes estoit aussi party du Palais pour retourner en son logis, lesdits leurs Deputez se sont adressez au plus ancien de Messieurs les Presidents au Mortier restans, qui s'est trouué estre monsieur le President Bailleul, qui leur a respondu, qu'il accepteroit volontiers cet honneur, n'estoit que monsieur le premier President deuoit retourner incontinent; & Messieurs les Deputez ayans fait pareille priere à Messieurs les autres Presidents qui ont fait pareille response, ils sont retournez en la grande Chambre en rendre compte à la Compagnie, pendant quoy monsieur de Bernay Conseiller en la Grand' Chambre est allé donner aduis à monsieur le premier President de ce qui se passoit, lequel est reuenu aussitost trouuer Messieurs les Presidents & Conseillers de la Grand' Chambre qui l'attendoient à la Beuuerie, où estant ils ont relaté de prendre leur place à la Grand' Chambre pour empescher la deliberation que Messieurs des Enquestes y vouloient faire; & s'estans assis, Monsieur Perrot, qui s'est trouué l'ancien des Enquestes, a pris la parole, & a dit à monsieur le premier President, que Messieurs des Enquestes s'estoient trouuez fort surpris de voir que Messieurs de la Grand' Chambre fussent leuez auant huit heures, & qu'il auoit charge de tous Messieurs de le prier de faire acheuer la deliberation commencée: A quoy monsieur le premier President a fait response, Que Messieurs scauoient l'ordre qui auoit esté apporté à la Compagnie par ledit Procureur General de se rendre au Palais Royal par Deputez, pour faire Remonstrances au Roy & à la Reyne à neuf



heures preeises, & qu'ainfi il ne pouuoit pas continuer vne deliberation, dont la durée estoit fi incertaine: mais qu'il promettoit de la continuer le lendemain. Surquoy ledit sieur Perrot luy a dit, qu'il scauoit bien qu'il y auroit d'autres choses à faire, puis que fuiuant le bruit commun, le Roy deuoit venir au Parlement; A quoy monsieur le premier President a replequé, qu'il n'en scauoit rien, & que son intention estoit de continuer & acheuer le lendemain la deliberation. Monsieur Perrot a encore insisté, & prié monsieur le premier President d'assembler en tout cas la Compagnie l'apresdinée; ce qui a esté contesté par monsieur le premier President. Surquoy monsieur le President de Nouion, dit; Que Messieurs des Enquestes auoient raison, parce qu'une deliberation de l'importance de celle commencée & venue au point qu'elle est ne peut estre interrompue sous quelque pretexte que ce soit, & qu'ainfi monsieur le premier President pouuoit accorder la priere à Messieurs d'assembler l'apresdinée: monsieur le premier President l'a contredit; Disant, qu'il estoit de l'ordre & discipline de la Compagnie de ne point entrer apres midy lors qu'elle se leue le matin auant dix heures, & sur cela ils s'est leué ayant concerté quelque peu avec Messieurs les Presidents plus proches qui l'ont fuiuy, mesme monsieur de Nouion aussi bien que Messieurs de la Grand' Chambre, & à l'esgard de Messieurs des Enquestes, ils sont demeurez, & ont excité Messieurs Laffemas & Lamoignon Maistres des Requestes de demeurer: mais s'en estans excusés sur la difficulté que l'on leur faisoit de les laisser presider, on les a laissés aller sans murmure; & apres que Messieurs des Enquestes sont demeurez quelque temps assemblez dans la Grand' Chambre, ils ont resolu de se retirer chacun dans leurs Chambres pour deliberer s'ils s'assembleroient l'apresdinée; ce qui a esté conclud par la pluralité des Chambres, & ledit iour de releuee plusieurs de Messieurs des Enquestes s'estans trouuez dans leurs Chambres, ont esté aduertis que nombre des autres auoient esté contremandez, & mesme que pas vn de Messieurs de la Grand' Chambre & de la Cinquiesme n'estoit venu au Palais, ce qui a esté cause qu'il n'a esté rien proposé, ny conclud.

*Du Vendredy 31. Iuillet.*

**C**E iour les Gardes ayant esté posées dès le matin dans le Palais, & aux aduenues d'iceluy, & Messieurs les Presidents & Conseillers s'y estant rendus de bonne heure; sur les huit à neuf heures le Roy est entré au Parlement, assisté de la Reyne Regente, de monsieur le Duc d'Orleans, monsieur le Prince de Conty, monsieur le Cardinal, Messieurs les Ducs de Rets, de Montbazon, & de Brissac, & de Messieurs les Marechaux de la Meilleraye & de l'Hospital, monsieur le grand Chambellan aux pieds du Roy, monsieur le Marechal de Villeroy son Gouverneur aussi assis joignant le grand Chambellan, tous deux couuerts; le Marquis de Gesvres Capitaine des Gardes en quartier de bout aupres du Roy decouvert, & Guitaud aux pieds de la Reyne, comme Capitaine de ses gardes; les sieurs Abbé de Palluau & Destrade



aux pieds de monsieur le Cardinal aussi découuerts. Le Conseil, sçauoir Messieurs les Conseillers d'Etat, six maistres des Requestes en robe de foye noire, & le Secrétaire du Conseil, les quatre Secretaires d'Etat, & les Dames de la suite de la Reyne en leurs places ordinaires en tres-grande affluence: Tout le monde estant placé, le Roy a dit; Que monsieur le Chancelier feroit entendre sa volonté; Ce fait, monsieur le Chancelier en la maniere accoustumée est allé prendre l'ordre du Roy avec les ceremonies ordinaires; & est retourné à sa place, il a dit en substance; Que le Roy venoit en son liéd de Iustice pour des considerations bien differentes de celles pour lesquelles ses predecesseurs & luy estoient venus depuis plusieurs années, puis que ce n'auoit esté que pour autoriser par leur presence quelques nouuelles leuees ou creations, au lieu qu'à present sa Majesté n'y paroissoit que pour donner de nouuelles marques à ses subjets de sa bonté & de son amour, & que par cela il auoit accordé le quartier entier de remise des Tailles, à commencer l'année prochaine, avec la descharge de plusieurs impositions & Taxes faites en cette Ville de Paris; Que sa Majesté auoit aussi reuoké & suprimé plusieurs Offices considerables; Que dans peu de iours le Parlement verroit l'establisement de la Chambre de Iustice, pour la recherche & punition des abus commis aux Finances, & le nom des Iuges qui la deuoient composer des quatre Compagnies de Paris; Que sa Majesté ayant aussi considéré la distribution de la Iustice, qui pour la forme des impositions & leuees estoit vn des plus importans moyens de soulager les peuples, auoit fait plusieurs beaux reglemens, qu'elle promettoit faire executer ponctuellement; Que la liberalité du Roy par l'aduis de la Reyne Regente sa mere, & par ses soins estoit d'autant plus considerable, que c'estoit dans vn temps auquel les despesces de son Estat estoient plus grandes que du viuant du feu Roy son pere d'heureuse & glorieuse memoire; parce que sa Majesté estoit obligée d'entretenir vn plus grand nombre d'Armees, & plus puissantes que iamais, afin de contraindre les ennemis par la force de ses armes à consentir à la paix; & que leurs majestez estoient resoluës pour soulager le peuple de retrancher les despesces de leurs maisons; aussi promettoient elles des marques si signalées de leur amour enuers le peuple, que le Parlement iugeroit fort à propos la cassation des Assablées de la Chambre de S. Louys, à cause des funestes effets qu'elle pourroit causer à l'Etat contre la sincerité des intentions du Parlement, dont encores que les bons François ne peussent pas douter, puis que dans les dernieres occasions, comme en toute autre rencontre, le Parlement a rendu des preuues de sa fidelité inuiolable au seruice du Roy; neantmoins les ennemis donneroient vne interpretation fort contraire, pensans en cela fauoriser leurs mauuais desseins pour en tirer leurs aduantages; Qui ainsi le Roy s'asseuroit que le Parlement contribueroit ce qui estoit en luy pour faire éuanouir ces esperances, quoy que friuoles des ennemis, par la cassation des Assablées de la Chambre de S. Louys; & rentrant dans l'exercice ordinaire de la Iustice distributive aux subjets du Roy qui la reclamoient depuis vn si long-temps, come de sa part sa Majesté promettoit de donner toujours à son Parlement des marques tres-assurées de son affection, & a finy. Et en faite monsieur le pre-

mier President, & Messieurs les autres Presidens se sont leuez : & monsieur le premier President prenant la parole a dit en subst<sup>nce</sup>, que le Parlement auoit grande joye de se voir honoré de la presence de son Roy, & de le voir élevé dans des sentimens si iustes & si fauorables pour son peuple ; Qui deuoit le reestablisement de sa felicité aux inclinations si heureuses de sa Majesté, & aux soins de la Reyne, pour son education : Que les charges accordees, & le reestablisement des loix estoient autant de marques de sa Iustice & de sa bonté ; Que les Roys se deuoient à leurs Estats & aux Loix, sous lesquelles ils deuoient estre regis ; & lors qu'elles estoient violees, leurs Couronnes chancelloient : Que par ces considerations le Parlement voyant l'excez du dereglement auoit esté contraint d'y mettre la main pour sauuer le Royaume, & que leurs Majestez auoient eu la bonté d'aggreer leurs soins & leurs seruices, & de defferer à leurs Remonstrances, qui auoient produit le soulagement du peuple affligé & opprimé ; Que le Parlement ne defauidroit iamais à sa fidelité enuers le Roy, qu'aussi il esperoit qu'à l'aduenir on n'imputeroit plus à desobeysance les iustes resistances qu'il apporteroit aux choses qu'il iugeroit preiudiciables au seruice du Roy & au bien de l'Estat ; Que cependant il supplioit le Roy de ne plus souffrir ces prests vsuraires des gens d'affaires, ausquels sa Majesté pouuoit & deuoit faire rendre ces gains illicites & exorbitans, qu'ils auoient fait à ses despens, & du public ; Que quelque restitution qu'on leur fist faire, il leur resteroit tousiours plus de biens qu'ils n'en auoient eu du partage de leur pere, s'ils estoient connus ; Que c'estoit où sa Majesté pouuoit trouuer des thresors immenses, par le secours desquels elle trouueroit de quoy satisfaire à toutes les despenses de l'Estat, & qu'elle reestablirait son Royaume dedans son ancien lustre, & rendroit son regne aussi heureux que le souhaitoient ses tres-humbles, tres-obeyssans & fideles seruiteurs & sujets.

Ce fait le Capitaine des Gardes a commandé qu'on ouurist les portes, ce qu'estant fait, & le bruit appaisé, monsieur du Tillet Greffier de la Cour, a leu la Declaration, qui contient en subst<sup>nce</sup>.

La remise du quart des Tailles, à commencer l'année prochaine ;  
La reuocation de la Chambre du Domaine, des Abonnemens, & des Taxes faites pour le Toisé des maisons de Paris ;

Decharge des vingz sols pour muid de vin, impolez cette année ; reestablisement en faueur des Officiers, ausquels on auoit retransché tous les gages d'un quartier pour l'année courante, vn & demy pour la prochaine, & deux en cinquante, sauf à augmenter apres la paix publiée le payement des rentes suiuant les fonds qui seront laissez dans les Estats, sans dire combien de quartiers ;

La reuocation & suppression des douze maistres des Requestes nouvellement creéz, pareille suppression des nouueaux Officiers creéz dans la Chancellerie, & des droitz y attribuez à condition neantmoins que les droitz ne seront supprimez qu'apres le remboursement actuel de la Finance payée par les nouueaux pourueus ;

L'exécution des Ordonnances de Melun, Orléans & Blois, touchant la distribution de la Iustice & la direction des Finances ;

Deffenses de rembourser aucuns Domaines, ny rente pendant la guerre, à



peine du double contre ceux qui les auront receus. Le reculement des prests, sans dire à quel temps, ny à quelles conditions. Le renouvellement des Ordonnances concernant la prohibition de transporter l'or & l'argent hors le Royaume, à peine de confiscation de corps & de biens, avec Commission au Procureur General d'informer du passé; deffenses de continuer les assemblées de la Chambre de S. Louys, ny d'en faire à l'aduenir aucune, que par l'auis du Parlement & sans autorité du Roy; Injonction au Parlement de rendre la Iustice aux sujets du Roy.

La lecture estant finie, M. Talon a pris la parole, & a dit en substance les mesmes choses que M. le premier President; mais par d'autres pensées qu'il a fort estenduës par des comparaïsons d'Astrologie, & a parlé beaucoup plus longtemps que Messieurs le Chancelier & premier President n'auoient fait, en joignant leurs discours ensemble, & a conclud à l'enregistrement. Apres quoy monsieur le Chancelier est allé prendre les aduis, & au premier Conseil ont esté le Roy, la Reyne, monsieur le Duc d'Orleans, monsieur le Prince de Conty, & monsieur le Cardinal: delà il est descendu, & a prts l'aduis de Messieurs les Presidens au Mortier; en suite il est remonté à Messieurs les Ducs & Pairs, & Marechaux de France: puis il est descendu à Messieurs les Maistres des Requestes, & a suiuy tous les bancs de Messieurs du Parlement; auxquels il a demandé s'ils n'estoient pas d'auis des conclusions, & tous ont opiné d'un signe de teste. Les aduis ayans esté pris, il est retourné au Roy en la maniere accoustumée, prendre l'ordre de sa Majesté pour la prononciation. On a remarqué que toutes les fois que monsieur le Chancelier est allé à l'ordre du Roy, Monsieur le Cardinal s'en est tousiours approché, ce qui a paru nouueau; & estant descendu à sa place, il a prononcé l'Arrest conforme aux Conclusions; & ce fait il s'est leué pour saluer le Roy, duquel monsieur le Cardinal s'estant approché, comme la Reyne, monsieur le Duc d'Orleans, & monsieur le Prince de Conty, monsieur le Chancelier y a esté appelé, auquel on a donné ordre de parler encore au Parlement; & estant descendu en sa place, il a dit; *Que le Roy voulant resinoigner au Parlement son affection, auoit resolu de luy donner le droit annuel, aux anciennes conditions, & à sa consideration; aux autres Compagnies de Paris seulement, aux mesmes conditions: & pour cet effect sa Majesté luy auoit commandé en sceller ce jourd'huy la Declaration, & la faire publier au sceau, & ce fait leurs Majestez se sont leuées, & se sont retirées avec toute la Cour, & en suite le Parlement.*

*Du Samedi premier iour d'Aoust.*

**C**E iour sur les huit heures du matin, les Enquestes sont allez prendre leurs places en la Grand'Chambre; à la referue de ceux qui seruoient à la Tournelle & à l'Edict, qui sont demeurez esdites Chambres; & estant tous en leurs places, M. Perrot qui s'est trouué l'ancien des Presidens aux Enquestes, pria M. le premier President de cōtinuer la deliberation du dernier iour, pour en suite faire lire la Declaration apportée hier par le Roy, suiuant l'usage ordinaire. A quoy M. le premier President a dit, qu'à l'égard de la deliberation commencée

elle se trouuoit conformée, le sujet d'icelle estant compris dans la Declaration verifiée le iour d'hier; Qu'à l'esgard de la lecture d'icelle, Messieurs deuoient demander l'Assemblée, & non pas prendre leurs places de leur autorité priuée: A quoy Messieurs des Enquestes ont dit confusement, qu'ils s'assembloient pour continuer leurs deliberations, au moyen dequoy ils n'auoient pas besoin de demander l'Assemblée, puis qu'elle auoit esté ordonnée par tous les Arrests; monsieur le premier President a insisté que la venue du Roy auoit fait changer les affaires de face, & que par ce moyen ils deuoient demander l'Assemblée; monsieur de Mesmes l'a secondé dans sa proposition. Enfin ils ont dit que Lundy on auiseroit ce qu'on auroit à faire; les Enquestes ont insisté à deliberer presentement. Monsieur le President le Cogneux, a exhorté Messieurs des Enquestes à se retirer, & leur a dit; Que sans aucune remise on delibereroit Lundy. Monsieur le premier President l'a interpellé, s'il pretendoit auoir autorité de faire deliberer. Il a dit qu'il ne le pretendoit point par autorité, mais bien par la raison; & qu'il pouuoit donner cette assurance, par ce qu'il estimoit que chacun feroit ce qu'il deuoit. Messieurs des Enquestes se sont esmeus de nouveau, mais en vain: car il n'a esté deliberé rien, & l'heure ayant sonné la Compagnie s'est retirée; & Messieurs des Enquestes ont dit tout haut, qu'ils viendroient Lundy prendre leurs places. Cependant Messieurs les Presidents au Mortier, & les Conseillers seruans à la Tournelle & à l'Edict, ne sont point venus dans la Grand'Chambre: ils sont demeurez dans lesdites Chambres à juger des procez, & l'on a fait mettre par monsieur le Greffier du Tillet dès hier au soir, le registrata sur la Declaration; en sorte que dès aujourd'huy on l'a fait imprimer, avec l'Arrest d'enregistrement; & l'on a aussi publié au sceau ce jourd'huy la Declaration du droit annuel pour les quatre Compagnies de Paris.

Le Dimanche deuxiesme iour d'Aoust, Chappelain Intendant de monsieur de Vendosme, a esté pris en l'Hostel de Vendosme, par le Preuost de Lisle, & mené prisonnier à la Bastille; & à vne heure apres midy, le Lieutenant Civil, & Procureur du Roy, ont scellé tous ses papiers qu'ils ont trouué audit Hostel de Vendosme.

### *Du Lundy 3. d'Aoust.*

**C**E iour les trois Chambres: Sçauoir la Grande, la Tournelle & l'Edict, estant assemblées; monsieur le premier President a mis en deliberation, si on assembleroit les Enquestes ou non, pour entendre la lecture de la Declaration, publiée en presence du Roy, & y deliberer; Et pour cet effet a pris les aduis de monsieur le Cheualier, Sous-Doyen du Parlement, monsieur Crespin estant absent, & n'a esté d'auis d'assembler: M. de Broussel a opiné le second, & a dit; Qu'il n'estoit point besoin de deliberer si on assembleroit les Chambres ou non, parce qu'il y auoit Arrest qui ordonnoit, Que le Parlement demeureroit continuellement assemblé pour deliberer sur les propositions de la Chambre de Saint Louys: de sorte que les deliberations n'estans



pas acheuées, & la Declaration publiée en presence du Roy, n'ayant pas pourueu à toutes lesdites propositions; il n'y auoit pas de doute que le Parlement deust demeurer assemblé, suiuant le precedent Arrest; & a adjoutté, que quand il n'y auroit point d'autre sujet, cette dernière Declaration estoit assez importante pour estre leuë en plaine Compagnie, & en suite deliberer: Et apres luy douze de Messieurs ont opiné, & esté d'avis d'assembler les Enquestes; & huit heures estant sonnées, Messieurs des Chambres sont entrez en la Grande, lesquels ayans pris leurs places, monsieur Perrot President aux Enquestes, qui s'est trouué l'ancien, a dit à monsieur le premier President, Que Messieurs des Enquestes le prioient de faire lire la Declaration, apportée par le Roy à la Compagnie; pour en suite voir & deliberer ce qu'il y auroit à faire: Surquoy monsieur le premier President a dit, que Messieurs de la Grand' Chambre estoient aux opinions, pour sçauoir si on assembleroit Messieurs des Enquestes ou non: lors qu'ils sont entrez, & qu'un moment de temps eust terminé cette Deliberation. Surquoy Messieurs des Enquestes ont dit confusément, Qu'il ne falloit point deliberer sur cela, puis qu'il y auoit Arrest; Que la Compagnie demeureroit continuellement assemblée, & depuis ce moment iusques à dix heures la Compagnie est demeurée à se regarder, & l'heure sonnante elle s'est leuée, & Messieurs des Enquestes ont dit, qu'ils prendroient demain matin à six heures leurs places.

Le mesme iour monsieur le Duc d'Orleans est allé de la part du Roy, à la Chambre des Comptes, assisté de monsieur le Marechal de Villeroy, & de Messieurs d'Estampes & de Grimonuille Conseillers d'Etat, où il a porté la mesme Declaration verifiée au Parlement en presence du Roy, laquelle il a fait publier en la Chambre.

Le mesme iour monsieur le Prince de Conty est allé à la Cour des Aydes, assisté de monsieur le Marechal de l'Hospital, & de Messieurs Vertamon, & la Fosse Conseillers d'Etat; auquel lieu son Altesse a fait publier aussi la mesme Declaration.

Ledit iour Messieurs les Maistres des Requestes au nombre de seize, ont esté remercier le Roy & la Reyne, de la reuocation de l'Edict de creation des douze nouveaux, & ont esté tres-bien receus de leurs Majestez; en presence de monsieur le Duc d'Orleans, monsieur le Cardinal, monsieur le Chancelier, & toute la Cour dans le grand Cabinet: monsieur d'Herbellay portoit la parole; il a esté résolu dans leur Compagnie de ne point faire autre remerciement à personne.

### *Du Mardy quatriesme Aoust.*

**E**T le lendemain sur les sept à huit heures du matin, monsieur le premier President a commandé au Greffier d'aller à la Tournelle & l'Edict, aduertir Messieurs les Presidents & Conseillers de la Grand' Chambre d'y venir prendre leurs places, ce qu'ils ont fait: & estans assemblez, monsieur le pre-

mier President a continué la deliberation du iour precedent, pour sçauoir si on assembleroit, ou non, les Enquestes; & tous Messieurs ont opiné du bonnet, à les assembler, sans dire aucune chose, sinon monsieur de Nemond, qui a dit qu'il croyoit que ce ne seroit que pour entendre la lecture de la Declaration; & en cas qu'il y eust quelque article qui le requist, ordonner des Remonstrances. Cette Deliberation estant finie, monsieur le premier President a dit, que monsieur le Duc d'Orleans venoit de luy mander, qu'il entreroit ce matin au Parlement, & qu'ainsi il croyoit estre à propos de l'attendre. Cependant il a commandé aux Greffiers d'aller aduertir Messieurs des Enquestes, de venir prendre leurs places, ce qu'ils ont fait, comme ils estoient resolu de faire, sans attendre le mandement de monsieur le premier President; & la Compagnie assemblée a esté aduertie que monsieur le Duc d'Orleans estoit à la Sainte Chappelle: & aussi-tost la Cour a député deux Presidents, & quatre Conseillers au deuant de luy, qui l'ont esté receuoir, & l'ont accompagné dans la Grand'Chambre à la maniere accoustumée; il estoit accompagné de Messieurs les Ducs de Joyeuse, d'Elbeuf, & de Rets: le bruit estant cessé, monsieur le premier President a dit à monsieur Mesnardeau, qui s'est trouué au Bureau, delire la Declaration, qui s'est trouuée moulée, & non en original; ce qui a formé quelque murmure, lequel neantmoins a cessé; & de fait monsieur de Champré a fait ladite lecture sur l'imprimé: laquelle estant finie, monsieur le premier President a dit, qu'il croyoit qu'il n'y auoit rien autre chose à deliberer, sinon s'il y auoit quelques articles qui meritaissent que la Cour fit des Remonstrances: à quoy s'est esleué bruit, que Messieurs diroient l'un apres l'autre leurs sentimens: Surquoy monsieur le premier President a insisté qu'il n'y auoit rien autre chose à faire, que ce qu'il auoit proposé; & sur cela il a pris l'avis de monsieur Crespin, qui a esté de deputer des Commissaires pour examiner la Declaration, & en suite en faire rapport à la Compagnie. Monsieur Cheualier a esté de mesme aduis, adjoustant que sur leur rapport, la Cour pourroit faire des Remonstrances. Monsieur de Brussel a esté d'avis de commettre quatre Commissaires pour examiner la Declaration, & en faire rapport à la Compagnie; cependant donner commission au Procureur General, pour informer des mal-versations commises aux Finances, suivant l'Arrest du 4. Iuillet. A cela monsieur le Duc d'Orleans s'est escrié, & dit: Que ce seroit contreuenir à la Declaration du Roy, & choquer directement son autorité, & faire contre le seruice qui est deub à sa Majesté; Parce que sa Majesté auoit promis d'establir la Chambre de Iustice, qui seroit destinee à cet employ, & qu'au plustost l'establissement s'en feroit; monsieur de Brussel luy a respondu, que depuis cinquante ans qu'il y a qu'il est Officier, il ne se trouuera pas qu'il ait rien fait, ny dit, contre le seruice du Roy; Que tout ce qu'il dit est selon les Ordonnances, selon les formes, & selon les bons principes: Et a persisté en son aduis, disant; Que quand les informations en seroient faites, elles pourroient estre remises à la Chambre de Iustice; & que cependant les preuues pourroient estre diuerties, & qu'elles periroient, s'il n'estoit informé, que c'estoit son aduis, côme aussi que le Parlement demeurast assemblé pour deliberer sur les propositions de la Chambre S. Louys, non decidees par ladite Declaration.

Monsieur



Monsieur le Duc d'Orleans s'est encores escrié, disant que c'estoit vne contrauention manifeste à la Declaration, & que l'intention du Roy estoit, que le Parlement rendist iustice aux particuliers, & ne s'assembloit plus. Il s'est esleué vne voix confuse de Messieurs des Enquestes, qui ont dit, qu'il n'y auoit point de deffences au Parlement de s'assembler, mais seulement aux Deputez de la Chambre Saint Louys, d'y continuer leurs Assemblées; & Monsieur de Brussel a persisté aux trois chefs de son aduis: Monsieur le Nain a esté de l'aduis de Monsieur le Doyen: Monsieur le Meusnier a esté des premier & dernier aduis de Monsieur de Brussel qu'il a fortement soustenu; plusieurs des Messieurs de la grande Chambre ont esté de mesme aduis. Entr'autres Monsieur Laisné qui a dit qu'il estoit plus raisonnable de faire iustice au public, qui l'attendoit du Parlement, que d'expedier les particuliers. Monsieur le Duc d'Orleans l'a interrompu, demadant ce que l'on pouuoit desirer de plus pour le public, que ce que l'on auoit obtenu de la Reyne; Qu'il luy sembloit qu'apres ce que la Reyne auoit fait pour le Parlement, & tous les soins qu'il y auoit apporté, il croyoit que la Compagnie deuoit demeurer satisfaite, & trauailler aux affaires des parties; parce que les longueurs & les Assemblées du Parlement causoient tous les desordres qui arriuoient dans les Prouinces du Royaume: & que si on ne se tenoit à la Declaratiō, & ne se contentoit de faire des remonstrances, qu'il sembleroit que le Parlement seroit dans la desobeyssance. Monsieur Laisné a confirmé son aduis, & dit que le Parlement n'agissoit que pour le seruice du Roy & le bien du public; Que si cette Declaration Verifiée en la forme qu'elle a esté, arrestoit les deliberations commencées, il falloit abolir le Parlement; Qu'il laissoit à Messieurs de Iuger de la consequence: Et que pour luy en la conscience il estoit d'aduis de deputer quatre Commissaires pour examiner la Declaration, & en faire rapport au plustost à la Compagnie, pour en deliberer: & cependant qu'elle demeurast continuellement assemblée pour deliberer sur les propositions de la Chambre Saint Louis, sur lesquelles il n'a point esté pourueu par la Declaration. A cela Monsieur a dit, que le Roy y auoit suffisamment pourueu par la regle d'assembler des Notables, pour remedier aux desordres de l'Estat, sur lesquels il ne pouuoit estre pourueu particulierement par ladite Declaration: & qu'autrement la longueur & la frequence des Assemblées du Parlement acheueroient de ruiner l'Estat. Monsieur le premier President a appuyé cette mesme proposition; surquoy Monsieur de Saucuse Conseiller d'Eglise a pris la parole, qu'il a addressée à Monsieur le premier President, & luy a dit, que Messieurs auoient continuellement demandé & poursuiuy l'Assemblée des Chambres pour terminer promptement les affaires, & que luy seul l'auoit empeschée. A quoy Monsieur le premier President n'a rien respondu, & a continué de demander les aduis. Monsieur Dorual a opiné comme le Doyen, Monsieur Meliand de mesme; Monsieur Bocquemard President des Requestes a esté de l'aduis de Monsieur le Meusnier; Monsieur Perrot du Doyen, Monsieur d'Hodic a fait vn preambule pour demander à Monsieur le Duc d'Orleans s'il y auoit liberté à Messieurs d'opiner en leurs consciences: à quoy

Monsieur a dit, que rien ne l'en empeschoit, mais que ce discours estoit fort inutile: en suite dequoy monsieur d'Hodic a prouvé par diueres raisons, que rien ne dispensoit la Compagnie de deliberer, & qu'en sa conscience il croyoit estre du seruice du Roy de le faire, & a conclud à l'aduis de Monsieur le Musnier: Monsieur de la Bare del'aduis du Doyen, monsieur le Feron Preuost des Marchands, monsieur Molé, monsieur Cauigny de mesme aduis; Monsieur Chartron del'aduis de M. le Musnier, & à fort harcelé M. le premier President sur son refus d'assembler. M. du Tillet a esté de l'aduis de M. de Brussel, ce faisant donner commission au Procureur General d'informer des abus des Finances. M. s'est encore escrié que c'estoit choquer la Declaration; monsieur Viole a dit que pour rendre au Roy le respect, qu'il desiroit faire neantmoins le deub de sa conscience, & qu'il estoit d'aduis que la Cour vacquast le matin à l'expeditiō des parties: Pour cét effect quel'on tint les Audiances publiques; M. de Thou a esté de mesme aduis: M. de Blannefnil a commencé d'opiner, & a dit qu'il croyoit que la deliberation sur cette Declaration pouuoit estre terminée en vne Seance, & que pour cela il distinguoit les Articles en trois classes: La premiere de ceux qui ne pressoient pas tant, & meritoient des Remonstrances par escrit; La seconde de ceux qui pressoient & meritoient des Remonstrances verballes; La troisieme de ceux qui estoient de la discipline, Police, ou Iurisdiction de la Compagnie. Comme il acheuoit cette diuision, dix heures sont sonnées, & a demandé à monsieur le premier President, s'il luy plaisoit d'acheuer la deliberation, lequel luy a respondu qu'il pouuoit s'il luy plaisoit acheuer son aduis, apres quoy la Cour se leueroit: à quoy il a dit qu'il seroit plus à propos de remettre son aduis au lendemain, & la Cour s'est leuée.

### *Du Mercredi cinquiesme Aoust.*

**C**E iour sur les neuf heures du matin, les Chambres estant assemblées, monsieur le Duc d'Orleans est entré dans la Grand'Chambre avec les ceremonies accoustumées; & estant à sa place il a dit, Qu'il auoit recogneu hier par les auis qui courroient, que la pluspart de Messieurs pretendoient que le Roy auoit laissé à la Compagnie la liberté de continuer les Assemblées, parce qu'il n'auoit deffendu que les Assemblées de la Chambre saint Louys par la Declaration; & qu'encores qu'il eust représenté à Messieurs, que les deffences de s'assembler estoient sous-entendues par l'intention de travailler à l'expedition des parties; neantmoins il auoit voulu prédre l'ordre du Roy, & de la Reyne, pour sçauoir leurs intentions, afin de les rapporter à la Cōpagnie; & qu'il auoit ordre du Roy, de dire que son intention & sa volonté estoit, que le Parlemēt cessast toutes les Assemblées quāt à present, & trauillast à l'expeditiō des parties; & que pour cét effect les Audiances publiques fussent ouuertes; qu'en son particulier il auoit souuentefois fait cognoistre au Parlemēt les desordres que les Assemblées causoient dans l'Estat; qu'elles estoient continuées & augmentées à tel point, que si les Prouinces n'estoient entierement souleuées, elles estoient dans vne dif-



position entiere à la reuolte. Que le peuple ne payoit pas vn teston; Que les Bureaux des Receptes auoient esté jettez dans les riuieres, ou bruslez. Que faute d'argent les alleez estoient prest de rompre avec nous. Que les ennemis comptoient pour rien toutes les pertes qu'ils auoient faites en Flandre, Allemagne, Italie, & Espagne, parce qu'ils esperoient gagner plus en vn moment par la reuolte du Royaume, qu'ils n'auoient perdu depuis tant d'années. Qu'il s'asseuroit que Messieurs feroient reflexion sur ces considerations, pour donner au Roy & à la Reyne la satisfaction qu'ils desiroient, & dont en son particulier il les prioit. Que toutefois la Reyne trouuoit bon qu'ils deputassent des Commissaires pour examiner la Declaration, afin que sur le rapport que la Cour peust faire des remonstrances sur les articles qu'elle iugeroit meriter quelque explication plus precise. Le Roy trouuoit bon que la Compagnie prononçast aux articles proposez à la Chambre Saint Louys, non demandez par la Declaration qui estoient de la Police ou discipline du Parlement, pourueu que l'Assemblée en fust retardée de quinze iours, & a finy, en disant qu'il ne croyoit pas que personne voulust contredire la volonté du Roy, apres'estre expliqué, comme il venoit de faire. En suite dequoy Monsieur le premier President a dit, qu'il ne doutoit point qu'apres tous les soins qu'il auoit pris, & qu'il continuoit pour le seruice du Roy, le bien de l'Estat, & l'honneur de la Compagnie, elle ne se disposast à luy donner toute la satisfaction qu'il en pouuoit desirer. En suite, a proposé qu'il pouuoit quasi promettre à la Compagnie, qu'il auroit vn bon succez de ses remonstrances : & que comme le Roy & la Reyne auoient accordé au Parlement au delà, de ce qu'il pouuoit attendre, aussi deuoit-il esperer beaucoup plus sur ce qui estoit à faire par les remonstrances, que par d'autres moyens desagreables au Roy. Il a adjousté de faire opiner de nouveau sur la proposition de Monsieur le Duc d'Orleans.

Surquoy Messieurs se sont éleuez, disans qu'il falloit relire les aduis d'hyer, & que si quelqu'un en chageoit, il le pourroit declarer; suiuant quoy Boylleau Greffier a leu les aduis proposez hyer, ausquels tous ceux qui auoient opiné, ont persisté, nonobstant que Monsieur le Duc d'Orleans les interpellast, s'ils ne changeoient point; & en suite M. de B'annefnil a opiné longuement, & a conclud de faire remonstrance verballe sur les articles plus pressans de la Declaration; Remonstrances par escrit sur les moins pressés, & faire Arrest sur les articles qui regardent la Police & discipline de la Compagnie, & entr'autres sur les deffences de receuoir les Traictés, enfans, & gendres, & aussi d'assujettir leurs biens aux hypotheques de leurs creanciers; il a adiousté de remercier la Reyne du droit annuel, & la supplier de l'accorder aux Officiers subalternes, aux conditions anciennes & sans prests, & a finy. Monsieur Catinal a esté d'aduis, que le rapport des Commissaires qui seroient deputez pour examiner la Declaration, & les articles de la Chambre Saint Louys, ne se fist qu'apres la Saint Martin, & de remettre les articles qui sont de la discipline & Police de la Compagnie à vne mercuriale, duquel aduis ont esté huit ou dix des Enquestes.

Enfin quand l'aduis est venu à Monsieur le Duc d'Orleans, il a dit, que ce seroit en vain qu'il diroit son aduis, puisque nonobstant l'intention du Roy qu'il auoit si nettement expliquée, que ses longueurs, & la continuation des Assemblées caufoient des desordres dedans & dehors le Royaume; le plus grand nombre des aduis estoit de resister opiniastrement à la volonté du Roy, & à son autorité. Qu'il n'entendoit pas toutesfois blâmer vniuersellement tous les aduis, parce qu'il y en auoit eu beaucoup qui estoient & iudicieux & respectueux, & que le Roy les sçauoit bien distinguer: mais cependant voyant que le plus grand nombre estoit contraire, & tenant le rang & la place qu'il a dans l'Estat, il estoit obligé de contribuer son possible pour le maintien de l'autorité du Roy; & que la Deliberation y estant si contraire, il ne pouuoit ny ne vouloit l'autoriser par son aduis, ny sa presence, & que pour cela il se retiroit, & de fait s'est leué pour sortir: Surquoy monsieur le premier President, les Presidens au Mortier, & plusieurs autres de Messieurs l'ont prié de demeurer, & se rasseoir, & qu'il y auoit apparence que la Compagnie luy donneroit la satisfaction qu'il desiroit: & on l'a prié de former son aduis. D'autre-part Monsieur d'Elbeuf luy a dit, qu'estans au Parlement comme Ducs & Pairs, ayans dit leur aduis, ils ne pouuoient pas y quitter leurs places, ny le suiure, si Messieurs les Presidens au Mortier ne se leuoient & retiroient; surquoy il a dit, qu'en verité il ne sçauoit à quoy attribuer l'obstinatiō de Messieurs: Qu'il croyoit biē leurs intentions fort bonnes, mais qu'il auoit cognoissance des effets tous contraires, & que son aduis estoit de donner des Commissaires pour examiner la Declaration, afin de faire des Remonstrances sur les Articles qui le requerroient; comme aussi, que dans quinzaine la Compagnie s'assemblast pour deliberer sur les Articles proposez à la Chambre Saint Louys, de la discipline de la Compagnie, & cependant que Messieurs trouuassent dans leurs Chambres, & que les Audiences fussent ouuertes. Messieurs les Presidens au Mortier ont esté tous de l'aduis de Monsieur Catinal, excepté Monsieur de Nouion, qui a esté d'auis que les Commissaires dressassent leurs memoires & leurs aduis apostillez pour les rapporter à la Compagnie; ce fait, on a receu les aduis. Monsieur le premier President après beaucoup de contentions a esté de l'aduis du Doyen, de deputer quatre Commissaires pour examiner la Declaration, & les Articles de la Chambre Saint Louys, & en faire rapport à la Compagnie, les Chambres assemblées le lendemain de la My-Aoust, pour y deliberer en suite incessamment. Monsieur le musnier a reformé son aduis à celuy cy-dessus, y adjoustant pour y deliberer incessamment, matin & pres-disnée. Monsieur de Brussel a persisté en son aduis, duquel ont esté cinquante de messieurs, tous les autres petits aduis se sont reduits à l'un des trois: & comme celuy de monsieur musnier couroit fortune d'estre moindre que celuy de monsieur de Brussel, & qu'il y eust eu peril que messieurs n'eussent retourné à celuy de monsieur de Brussel, on a excité quelques vns de celuy de monsieur le Doyen d'y retourner: & monsieur le premier President a dit, que celuy de monsieur de Brussel estoit le moindre des trois;



de sorte qu'il a fallu reuenir à celui de monsieur le Doyen, ou de monsieur Musnier; monsieur Musnier est retourné à celui du Doyen, la pluspart des autres de son aduis ont retourné à celui de monsieur Musnier, qui s'est trouué par ce moyen le plus grand; ainsi la deliberation s'est terminée à l'aduis de monsieur Musnier, en y adioustant du consentement de toute la Compagnie; Que le Roy & la Reyne seroient tres-humblement remerciez du droit annuel qu'il leur a pleu accorder, & que leurs Majestez seroient aussi tres-humblement suppliées de l'accorder aux Officiers subalternes aux conditions anciennes & sans prests.

Le mesme iour auant l'Assemblée des Chambres, monsieur de Brussel a rapporté vne Requête pour la femme du sieur Chapelain, Intendant de monsieur de Vandosme, Qui remonstroit que Dimanche dernier sur les dix à onze heures du matin, plusieurs personnes à elle incogneies estoient venuës à l'Hostel de Vandosme, où son mary & elle font leur demeure, & qu'ils auroient enleué son mary, & iceluy amené prisonnier à la Bastille, comme elle a depuis appris, & qu'elle a recogneu entre ceux qui l'auoient enleué vn homme qui auoit vn baston de Commandement: Qu'en suite de de ce, le mesme iour vne heure de releuée, les Lieutenant Ciuil, & Procureur du Roy, s'estoient venus saisir de tous les papiers de son mary, lesquels ils auroient enleué sans en faire aucun inuentaie, ny luy en dire le sujet, que seulement ils luy auroient voulu signer ce qu'ils auoient voulu: partant requeroit qu'il pleust à la Cour la receuoir appellante de toute cette procedure, & de l'enleuement & emprisonnement de son mary; luy permettre d'intimer sur l'appel qui bon luy semblera: ordonner que sur ces appellations les parties auront Audiance au premier iour, & cependant ordonner que son mary sera élargy, & mis hors des prisons, à ce faire les detempteurs de sa personne contraints par corps; Sur cette Requête il a esté ordonné qu'elle seroit monstrée au Procureur General.

### *Du Lundy dix-septiesme Aoust.*

**C**E iour; suiuant l'Arrest du Parlement du quatriesme du present mois & an, toutes les Chambres ont esté assemblées sur les huit heures, par l'ordre de monsieur le premier President, qui a fait lire toutes lesdites propositions cy-deuant faises en la Chambre Saint Louys; & en suite la Declaration du Roy, verifiée & publiée en sa presence le dernier Iuillet: & parce que le premier article d'icelle porte que cinq articles de l'Ordonnance seront obseruées à l'aduenir, par lesquelles il est dit, que le Conseil ne cognoistra d'aucune affaire de Iurisdiction contentieuse, que les affaires pendantes en iceluy seront renuoyées aux Iuges dont elles estoient euoquées, qu'il ne sera expédié aucune euocation generale ny particuliere en commandement, lesquelles seront rapportées & iugées en cognoissance de cause par les Maistres des Requestes en quartier; & que lesdits Maistres des Requestes ne iugeront rien Souuerainement, & en dernier ressort aux Requestes de l'Hostel, quelques attributions qu'ils en puissent auoir:

& que neantmoins ces articles ne sont pas expliquez par la Declaration; mais seulement dattez.

Monsieur le premier President a fait apporter le tome des Ordonnances, & on a leu les articles; apres quoy monsieur le premier President a pris les aduis, & a commencé par les quatre Commissaires qui auoient examiné lesdites Declarations & propositions de la Chambre Saint Louys, qui estoient Messieurs de Bernay, le Nain, Coquelay, & le Musnier, qui ont esté d'avis de supplier le Roy & la Reyne d'enuoyer vne nouuelle Declaration d'interpretation de la premiere, par laquelle les mesmes termes des cinq articles des Ordonnances seroient repetez. Monsieur le Nain neantmoins a dit, qu'il y auoit des cas ausquels Messieurs les Maistres des Requestes pouuoient iuger souuerainement, & a cotté entr'autres les faussetez commises au sceau. Monsieur le premier President s'est escrié, que l'Ordonnance ne reseruoit rien pour ce regard: & sur ce que monsieur le Nain a insisté, monsieur le premier President a dit, qu'il sçauoit bien que la possession de Messieurs les Maistres des Requestes estoit contraire: mais qu'il s'estonnoit que monsieur le Nain se voulust faire la guerre à luy-mesme. Monsieur Courtin maistre des Requestes, qui s'est trouué l'ancien des quatre qui estoient de iour, a voulu soutenir monsieur le Nain. Monsieur le premier President qui a esté soutenu par monsieur le President de mesmes, a continué sa pointe de dire, qu'anciennement messieurs les maistres des Requestes ne pouuoient iuger souuerainement. Tous messieurs de la Grand Chambre qui ont opiné, ont esté de mesme aduis, & d'en demander vne Declaration, excepté monsieur de Broussel, qui a esté d'aduis d'en faire Arrest en consequence de la Declaration, sans en demander de nouuelle: il a encore adiousté que les Arrests de la Compagnie demeuroient sans execution, notamment concernant l'establissement de la Chambre de Iustice; & qu'il estimoit qu'il falloit commettre de messieurs pour faire les informations. Monsieur de Champigny maistre des Requestes, a dit, qu'à la verité il pouuoit y auoir quelques abus dans le Conseil, & aux Requestes de l'Hostel, & notamment touchant les euocations de plain pouuoir, mais qu'il se pouuoit dire que le Parlement y auoit contribué, parce qu'il auoit tousiours enregistré sans y faire aucun doute les euocations generales qui leur auoient esté adressées; & a conclud qu'il ne falloit point demander de nouuelle Declaration, mais faire obseruer les Ordonnances, & que par là il se reformeroit aussi beaucoup de choses au Parlement: Les trois autres maistres des Requestes, sçauoir Courtin, Montescot, la Marquerie ont esté du grand aduis. Monsieur le President Bocquemare a opiné de mesme, & a adiousté, que Messieurs des Requestes du Palais auoient grand sujet de se plaindre de Messieurs de la Grand' Chambre, qui contre l'Ordonnance euoquoient sans cesse les affaires des premiers Iuges, pour au lieu de les iuger à l'Audience, comme ils doiuent, les appointent & en font des procez parescrit. Monsieur le premier President luy a dit, que ce n'estoit pas le temps de faire cette remonstrance, & que la Compagnie y pouruoiroit en temps & lieu, & a continué à en demander les aduis à Messieurs les Presi-



dens des Enquestes, qui ont esté de l'aduis commun, excepté monsieur Charton, qui a esté d'aduis de faire Arrest. Monsieur de Thou a adiousté, que le Roy & la Reyne seront suppliez, d'accorder lettre de remission des procez criminels, iugez par Commissaires, adressantes aux Cours Souueraines, dans le ressort desquelles les jugemens auoient esté donnez; & d'arrester, qu'en cas de retardement de les expedier, il y seroit procedé sans Lettres, attendu l'incompetance des Iuges. Monsieur de Blanmesnil a esté du plus grand aduis, & dix-heures ont sonné, sur quoy la Compagnie s'est leuée pour rentrer de releuée.

Et ledit iour de releuée les Chambres se sont assemblées, & là deliberation a esté continuée; & les aduis ayans esté releus, il a esté arresté, que le Roy & la Reyne seroient tres-humblement suppliez d'enuoyer vne nouuelle Declaration, dans laquelle tous les articles des Ordonnances qui auoient esté leus le matin, seroient repetez mot à mot.

### *Le Mardy dix-huictiesme Aoust.*

**C**E iour les Chambres se sont assemblées sur les huit heures du matin en la maniere accoustumée, où la Compagnie a deliberé sur le second article de la Declaration, contenant la décharge d'un quart des Tailles, Taillon, & Subsistances; les charges ordinaires assignées sur icelles prealablement deduites, à commencer au premier Iuin 1649. & apres longue deliberation du matin & de l'apresdinée, il fut arresté que le Roy & la Reyne seroient tres-humblement suppliez d'accorder la décharge du quartier entier, à commencer du premier Ianuier 1649. & de ne point augmenter les impositions en l'année prochaine ny les suivantes au delà de ce à quoy elles montent l'année prochaine.

### *Du Mercredi dix-neufuiesme d'Aoust 1648.*

**C**E iour les Chambres estans assemblées, la Compagnie a deliberé sur le troisieme article de ladite Declaration, lequel est contraire aux Arrests du Parlement, en ce que par iceux il estoit ordonné, que les impositions faites sur les denrées & marchandises verifiées au Parlement continueroient indefiniment, sans en prescrire la durée. Celles faites en vertu d'Edits ou Declarations verifiez en la Chambre des Comptes & Cour des Aydes, qu'elles continueroient l'année presente & la suivante, si tant la guerre dure; & à l'égard de celles faites en vertu d'Arrests du Conseil, ou Lettres Patentes publiées seulement au sceau, & non verifiées dans les Cours Souueraines, que les leuées en cesseront dès à present, au lieu que par la Declaration publiée au Parlement, le Roy y seant, il est ordonné, que toutes les impositions faites cy-deuant & qui se leuent à present, seront continuées iusqu'à ce que l'estat des affaires en puisse permettre la diminution; comme aussi par les Arrests du Parlement il auoit esté arresté, que pour connoistre les droits dont la leuée seroit continuée, qu'il en seroit fait tarif pardeuât deux

Conseillers de ladite Cour, sçauoir Messieurs de Brussel & Ferrand, & en suite pancharte dressée pour estre attachée aux Bureaux, & par tout où besoin sera; & par la Declaration il est dit, que le tout en sera fait au Conseil. Surquoy en delibération il a esté arresté, que ladite Declaration sera exécutée aux termes des Arrests de la Cour de Parlement.

*Du Ieudy vingtiesme Aoust.*

**C**E iour sur les huit heures du matin les Chambres estans assemblées, le premier Huissier a aduertty la Cour que monsieur le Duc d'Orleans estoit à la Sainte Chappelle, & qu'il venoit prendre sa place. Surquoy la Compagnie a deputé deux Presidens & deux Conseillers en la forme ordinaire, & Monsieur est entré avec les ceremonies accoustumées accompagné comme deuant; & ayant pris sa place, & Messieurs ayant fait silence, il a dit, Que le Roy & la Reyne luy auoient donné charge de dire à la Cour, qu'ils s'estonnoient fort de l'Arrest qu'elle auoit donné hier au preiudice de la Declaration verifiée en leur presence; & apres auoir receu tant de témoignages de leur bonté & affection, qu'en son particulier il croyoit qu'apres les soins qu'il auoit pris pour faire accorder à la Compagnie ce qu'elle auoit désiré, il croyoit qu'elle pouuoit & deuoit l'aduertir pour venir prendre sa place pour delibérer en vne affaire si importante; & qu'il estimoit que pour la terminer il estoit à propos de faire vne conference chez luy pour regler le tarif, qu'il auoit la volonté de faire executer; ce qui seroit résolu en sa presence, & qu'il en auoit le pouuoir, & qu'il commanderait à vn Intendant des Finances de se trouuer à la Conference pour éclaircir la Compagnie: & sur ce qu'il s'est esleué vn grand tumulte sur la proposition de faire trouuer vn Intendant, monsieur a dit que ce n'estoit que pour verifier plus exactement les droicts verifiez dans les Cours Souueraines, parce que par l'instruction que les Intendans en auoient des Fermiers, ils feroient en deux heures ce qu'ils ne pouuoient faire sans eux qu'en plusieurs seances.

Apres quoy monsieur le premier President a dit, Que la Compagnie ne sçauoit pas que la Reyne deuoit estre surprise, ni trouuer mauuais l'Arrest du iour precedent, parce que les Arrests de la Cour portoient & estoient intitulez du nom du Roi, & qu'ainsi ils estoient tousiours réputez auoir esté donnez sous son bon plaisir. Et en suite a pris les aduis des quatre Commissaires, dont monsieur de Bernay estant l'ancien a opiné & esté d'aduis, que pour l'exécution de l'Arrest d'hier de commettre aucuns de Messieurs pour aller chez monsieur le Duc afin de proceder au Tarif: Toute la Compagnie a esté du mesme aduis, & que ce fust pour le lendemain de releuée. Monsieur le President de mesme a adiousté, Qu'il estimoit tres à propos d'adiouster à l'Arrest du iour precedent, sur le bon plaisir du Roy: Sur ce mot, l'on s'émeut. Il a repris la parole & dit, Que s'il disoit son aduis de luy seul, il ne trouueroit pas mauuais que l'on le reprist dans la ciuilité que Messieurs se doiuent respectiuellement, & non en tumulte, mais qu'il ne sçauoit



ſçauoit pas comment l'on pouuoit rejeter ſa propoſition, puis qu'elle eſtoit conforme aux Arreſts de la Compagnie, & notamment à vn du mois de Ianuier dernier, par lequel la Cour auroit déclaré, que les modifications qu'elle auoit apportez, & qu'elle pourroit apporter cy-apres aux Edits verifiez, le Roy ſeant au Parlement, n'eſtoit que ſous ſon bon plaſir. A cela pluſieurs ont commencé leur huée à tel poinct, qu'il a eſté contraint de finir ſon aduis. En ſuitte dequoy monsieur le Duc d'Orleans a pris la parole, & a inſiſté à faire mettre ſous le bon plaſir du Roy, ce qu'il luy a eſté reſuſé. Ces aduis ayans eſté rejettez, il a eſté accordé que l'Arreſt du iour precedent ſeroit executé, & pour cet effect les quatre Commiſſaires ſ'asſembleroient le lendemain de releuée chez monsieur le Duc d'Orleans, avec Meſſieurs les Preſidens, pour proceder au tarif, & drefſer procez verbal, pour iceluy veu & rapporté à la Cour eſtre ordonné ce que de raiſon; & qu'il ſeroit fait regiſtre à part des paroles dites par monsieur le Duc d'Orleans de la part du Roy, & de la réponſe de Monsieur le premier Preſident: & a eſté accordé, Que la Compagnie ne ſ'asſembleroit pas l'apreſdinée, mais ſeulement le lendemain.

### *Du Vendredy vingt-vnieſme Aouſt.*

**C**E iour la Cour, toutes les Chambres aſſemblées, a delibéré ſur le quatrieſme article de la Declaration, qui eſt contraire à la propoſition de la Chambre ſainct Louys, en ce que par icelle il eſtoit dit; Que les fermes ſeroient de nouveau miſes aux encheres, publiées & adiugées ſuiuant les formes portées par les Ordonnances, attendu les refus notoires des encheres faites ſur leſdites fermes; au lieu que par la Declaration on ſe contente de dire en termes generaux, qu'à l'aduenir les fermes ſeront adiugées ſuiuant les Ordonnances: De ſorte qu'apres meure delibération, il a eſté reſolu tout d'vne voix; Que remonſtrances ſeroit faites au Roy & à la Reyne touchant ledit article, pour faire proceder à nouueaux baux: Et les Gens du Roy ont eſté chargez d'aller demander Audiance à la Reyne pour faire leſdites remonſtrances. Et l'Asſemblée a eſté continuée au lendemain.

### *Du Samedi vingt-deuxieſme Aouſt.*

**C**E iour, les Chambres eſtans aſſemblées au matin en la maniere accouſtumée, Meſſieurs de Bruſſel & Ferrand ont rapporté par la bouche de monsieur de Bruſſel, ce qui ſ'eſtoit paſſé en la Conference chez monsieur le Duc d'Orleans, comme il enſuit.

Que ſ'eſtant rendus hier au Palais d'Orleans ſur les deux heures de releuée, ils furent conduits dans le cabinet de monsieur le Duc d'Orleans, où eſtans y arriuerent peu apres monsieur le Chancelier, monsieur le Mareſchal de la Meilleraye & monsieur Tubeuf; & que peu apres monsieur le Duc d'Orleans y arriua, lequels'aslit dans vn fauteuil au bout de la table, monsieur le Chancelier à la droite, monsieur de la Meilleraye au deſſus de monsieur le Chancelier, Meſſieurs de Bruſſel & Ferrand au deſſous de

monfieur de la Meilleraye, monfieur Tubeuf & nuls autres du Conseil: les places eftans ainfi prifes, monfieur le Duc d'Orleans commanda à monfieur Tubeuf de donner les inftructions fur la propofition du Tarif, fuiuant quoy ledit Tubeuf mit fur la table plufieurs Edits, Declarations & Attefts imprimez, en vertu defquels les droits fe leuent fur les denrées & marchandifes; apres laquelle propofition, Meflieurs de Bruffel & Ferrand reprefenterent qu'ils ne pouuoient trauailler fur des fimples papiers, & prierent monfieur le Duc d'Orleans qu'on leur mift entre leurs mains les pieces en bonne & deuë forme, afin qu'ils peuffent faire l'extraict pour le rapporter au Parlement, ce qui fut refolu. Et incontinent apres ladite relation, monfieur le premier Prefident a fait lire le cinquiefme article de la Declaration du Roy verifiée en fa prefence au Parlement, par lequel il eft dit, qu'à l'aduenir les Officiers auxquels les gages & droicts ont esté entierement retranchez, iouyffent & foient payez d'un quartier de l'année prefente; d'un & demy de la prochaine, & de deux en l'année 1650. attendant quel'efat des affaires permettent d'en faire payer dauantage. En fuite duquel article monfieur le premier Prefident a fait lire l'article de la Chambre faint Louys, concernant les gages & droicts, par lequel il eft dit, que le Roy fera tres-humblement fupplié de reftablir tous les gages & droicts des Officiers. En fuite de quoy en deliberation, il a esté conclud, que remonftrance feroit faite au Roy pour le reftabliffement entier defdits gages & droicts; dès à prefent a esté arrefté qu'aucun retranchement n'en pourroit eſtre fait à l'aduenir, finon en vertu d'Edicts ou Declarations bien & deuëment verifiez, & qu'il feroit informé contre Catelan, Tabouret & le Fevre, & autres qui ont traitté ou fait des preſts fur le retranchement defdits gages & droicts, duquel aduis monfieur Charton Prefident aux Requeſtes auoit fait l'ouuerture.

### *Du Mercredi vingt-fixiefme Aouſt.*

#### *Baricades.*

C'E iour Meflieurs de la grand'Chambre y eftans assemblez en la maniere accouſtumée, monfieur de Rhodes, grand Maiftre des Ceremonies y eſt entré, qui a dit; Que le Roy & la Reyne luy auoient commandé de venir aduertir la Cour de ſe trouuer en robes Rouges fur les neuf heures à Noſtre-Dame, pour aſſiſter au *Te Deum*, que leurs Majeſtez auoient ordonné eſtre chanté en action de grace de la victoire qu'il auoit plu à Dieu leur donner fur leurs ennemis ſous le commandement de monfieur le Prince: & a prefenté vne lettre de cachet du Roy, qui contient en ſommaire les principales marques de la victoire; laquelle ayant eſté leuë par l'un de Meflieurs qui eſtoit au-Bureau, monfieur le premier Prefident a fait reſponſe à monfieur de Rhodes, que la Cour ſatisferoit à l'ordre de leurs Majeſtez, & il s'eſt retiré; Et à l'inſtant monfieur le premier Prefident a enuoyé la lettre aux Chambres des Enqueſtes pour en aduertir meflieurs, afin qu'ils enuoyaf-



sent querir leurs robes Rouges: Et peu apres monsieur le premier President s'est leué avec Messieurs de la grand' Chambre, & sont allez à la Baucette pour euitier que Messieurs des Enquestes ne vinssent pour deliberer sur la suite de la Declaration, ou du moins n'arrestassent d'entrer l'apresdinnée: Et sur les huit heures & demie ils sont rentrez en la grand' Chambre avec leurs robes Rouges, où estans ils ont trouué beaucoup de Messieurs des Enquestes: & la Compagnie estant toute assemblée, quelques-vns de Messieurs se sont plaints de ce qu'on n'employoit pas le temps iusques à dix heures pour continuer ladite deliberation sur ladite Declaration, dont monsieur le premier President s'est excusé sur l'ordre arriué le matin d'aller au *Te Deum*: En suite dequoy quelques-vns des Enquestes ayant proposé des s'assembler l'apresdinnée, monsieur le premier President & monsieur le President de Melmes ont dit, Que cela dependoit del'heure que la Ceremonie finiroit: Et sur ce ils se sont leuez & sont partis pour aller à Nostre-Dame, où ils sont arriuez sur les neuf heures, & leurs Majesté entre onze & douze, & ont marché avec l'appareil & la magnificence Royale digne de l'action, & contenuë dans l'Extraordinaire qui en a esté pour ce fait & dressé; & à l'issuë de la Ceremonie qui a finy entre midy & vne heure, monsieur de Comminge Lieutenant des Gardes de la Reyne, suiuy de dix Gardes, est entré au logis de monsieur de Brussel seize rue Sainct Landry près Nostre-Dame, & l'ayant trouué dans vne petite sale avec sa famille prest de se mettre à table pour disner, luy a fait commandement de le suiure, sans luy donner temps de prendre ny manteau ny soulliers, ny de baiser ses enfans; & l'a fait entrer dans vn carosse qui estoit à la porte, que l'on a fait marcher en diligence, dont le peuple de son voisinage estant aduert, s'est escrié d'une voix confuse Aux armes, & que l'on emmenoit monsieur de Brussel prisonnier: ce qui accreut promptement tant par la capture de monsieur le President de Blanmesnil, & la perquisition faite chez monsieur le President Charton, qu'en peu de temps les boutiques ont esté fermées, & les armes prises par les Bourgeois des Ponts Nostre-Dame, sainct Michel, aux Changes, des rues sainct Denys, & des Halles; dont ayant esté donné aduis au Palais Royal, les Regimens des Gardes & Suisses qui estoient demeurez en bataille & sous les armes, depuis le Palais Royal iusques audit lieu apres la Ceremonie finie, pour favoriser lescdites captures, ont eu ordre de marcher au Pont au Change, Pont-neuf, & des Thuilleries pour s'en saisir, & empescher la communication des quartiers, comme ils ont fait pendant quel que temps; mais le peuple s'estant grossi & armé, les Gardes ont esté forcez de se rallier vers le Pont des Thuilleries, & ont esté mis en bataille depuis ledit lieu par derriere la grande Escurie, iusques enuiron cent pas au delà de la grande porte du Palais Royal tirant du costé de la barriere sainct Honoré.

Cependant monsieur le Coadjuteur estant aduert de ce desordre, est venu sur le Pont-neuf, vestu de son Camail & bonnet en teste, où estoit le plus grand bruit, & a exhorté le peuple de dessus le parapet, où il s'est mis, de s'appaiser & retirer: à quoy luy ayant esté dit tout d'une voix,

que l'on n'en feroit rien que l'on n'eust monsieur de Brusselles & les autres Messieurs du Parlement, il promit au peuple qu'il en alloit supplier la Reyne, & est allé pour cet effet au Palais Royal, où ayant fait entendre à sa Majesté ce qu'il venoit de voir, & l'ayant suppliée tres-humblement de rendre lesdits prisonniers, il en fut refusé; ce qui fut cause que n'ayant point de bonne parole à porter au peuple, il retourna chez luy par vn autre chemin qu'il n'estoit venu. Cependant estant venu alarme que le peuple approchoit tousiours vers la porte du Palais Royal, & que le mal croissoit vers les pilliers des halles, monsieur de la Meilleraye monta à cheual dans le Palais Royal, d'où il sortit avec quelques Officiers pour essayer d'empescher l'émotion, mais il en fut repoussé à coups de pierre, & fut blessé legerement dans le bras; comme aussi qu'en se retirant il lascha vn coup de pistolet duquel malheureusement vn crocheteur chargé fut tué. Le bruit causa l'émotion plus forte qu' auparauant, & de fait les chaines furent tenduës par tout, & barricades faites en plusieurs endroits de la ville, & corps de gardes posez, qui demurerent toute la nuit avec des décharges continuelles.

Et le lendemain dès le grand matin Messieurs du Parlement se sont assemblez directement à la grand' Chambre, sans aller dans celle des Enquestes; & la Compagnie estant assemblée plainement sur les huit heures, monsieur de Boucherat Maistre des Requestes, & monsieur de Brusselles Conseiller aux Requestes du Palais, neveu de monsieur de Brusselles, ont dit par la bouche de monsieur Boucherat, qu'ils auoient estimé dans la famille deuoir informer la Cour de ce qui estoit arriué en la personne de monsieur de Brusselles: & pour cet effet il a fait la relation de la maniere en laquelle il auoit esté arresté, & a finy, disant: Qu'il demandoit iustice à la Cour, & se remettant à sa prudence d'y pouruoir. A quoy monsieur le premier President a reparty, Que la Cour estoit assemblée pour en deliberer, & se sont retirez. Cela fait monsieur le premier President a commandé à Boisleau qu'il s'en allast querir les Gens du Roy, lesquels estans entrez, monsieur le premier President leur a dit; Que la Cour les auoit mandez sur le sujet de l'estat present de la ville, pour sçauoir ce qu'ils auoient à y dire. A quoy ils ont dit par la bouche de monsieur Talon, qu'ils n'auoient point de parole pour exprimer leur douleur; & que n'ayant pas encore concerté entr'eux ce qu'ils iugeroient necessaire pour le seruice du Roy, la seurreté de la ville, & le bien de la Compagnie, la liberté & le re-establishement de Messieurs, ils suplioient la Cour leur permettre de se retirer au Greffe pour en deliberer entr'eux, ce qui leur a esté accordé; & peu apres sont rentrez, & ont requis que la Reyne fust tres-humblement suppliée presentement de rendre la liberté à Messieurs qui estoient arrestez ou exiliez, & que la Cour demeurast assemblée pour pouruoir aux vrgentes affaires de la ville, se remettant tousiours à la prudence de la Cour, & se sont retirez. Et peu apres monsieur de Berniere est entré tout esmeu & hors d'haleine, qui a dit; Que le peuple s'estoit emparé de l'Hostel d'O, où monsieur le Chancelier s'estoit retiré; Que le peuple le cherchoit pour le massacrer, que l'on pilloit la maison, & que Picot Lieutenant



du grand Preuost seruant près la personne de monsieur le Chancelier auoit esté tué près de luy, dequoy la Compagnie n'a fait aucun estat, & ledit sieur de Berniere s'est retiré: & aussi-tost Messieurs ont pressé monsieur le premier President de faire deliberer, ce qu'il a fait. Monsieur Crespin a esté d'aduis d'aller presentement à la Reyne luy demander Messieurs, & en cas de refus, luy remettre les robes & les bonnets: Il a esté seul de son aduis. Apres luy plusieurs aduis ont esté ouuerts, l'un d'aller en corps de Cour au Palais Royal demander Messieurs, & faire entendre à la Reyne l'estat de la ville, & retourner au Palais pour deliberer sur la responce: L'autre aduis, de deputer trente de Messieurs vers la Reyne aux mesmes fins, le reste de la Compagnie demeurant assemblé. Le troisieme aduis, d'en deputer cinquante aux mesmes cōditions: monsieur le President Violle a adiousté, qu'il estoit d'aduis d'informer contre ceux qui auoient donné le Conseil à la Reyne, comme perturbateurs du repos public, & dès à present decreter cōtre ceux qui auoient arresté Messieurs, & qui estoient allez chez les autres: cet aduis a esté suivi de beaucoup. Monsieur de Choisy a esté d'aduis, en cōsequence del'vnion faite avec les autres Compagnies, de les aduertir de ce qui se passoit: beaucoup ont esté de mesme aduis: enfin il a passé que la Cour iroit en corps au Palais Royal demander à la Reyne Messieurs les absens: Que Monsieur le premier President luy feroit entendre l'estat de la ville, & que la Compagnie retourneroit au Palais deliberer sur la responce. Le sentiment de Compagnie estoit d'abord pour embrasser les aduis de monsieur Viole & de Choisy. Ce fait Messieurs sont allez à pied avec leurs robes & bonnets, & ont passé pardeuant l'horloge du Palais, tourné sur le Quay qui va gagner le Pont-neuf, d'où ils ont suivi par la rue de l'arbre sec & la rue saint Honoré iusques au Palais Royal, dans lequel chemin ils ont trouué nombre de chaines tendues & des Barricades, & yn nombre infiny de Bourgeois en armes, qui tous leur ont dit qu'ils auoient les armes pour le seruice du Parlement, qu'il n'auoit qu'à commander, & qu'il seroit obey ponctuellement, qu'ils vouloient auoir Monsieur de Bruxelles, & ont crié par tout Viue le Roy & le Parlement; & en beaucoup de lieux viue le Roy & Monsieur de Bruxelles. Enfin, Messieurs estans arriues au Palais Royal, ont esté introduits dans la salle des Ambassadeurs, qui est vis à vis la Chambre du Capitaine des Gardes en quartier, où apres auoir attendu enuiron vn demy quart-d'heure, on les est venu querir, & ont esté conduits en la maniere accoustumée dans le grand Cabinet de la Reyne, où estoient le Roy & la Reyne dans leurs chaires; à la droicte du Roy Monsieur le Duc d'Orleans & Monsieur de Longueuille debout, à la gauche du costé de la Reyne Monsieur le Cardinal, Monsieur le Chancelier, & Monsieur de la Meilleraye, les Secretaires d'Etat, & plusieurs personnes de la Cour. Monsieur le premier President s'estant approché a fait entendre à la Reyne qu'il n'estoit plus temps de dissimuler l'estat auquel estoit Paris, puis qu'il mettoit la personne du Roy & la sienne en peril, si sa Majesté par sa bonté n'y donnoit ordre presentement; Qu'il luy estoit bien facile

puisqu'il ne dependoit que de rendre la liberté à des personnes qui n'a-  
 uoient rien demerité; Que la Iustice le vouloit, Que sa bonté luy conuie,  
 & que ses tres-humbles supplications luy demandoient. A quoy la Rey-  
 ne a respondu, Que voyant que le Parlement auoit si souuent contreuenu  
 à ses commandemens, elle auoit resolu dans son Conseil de faire ce qu'elle  
 a fait, & qu'elle ne veut point changer sa resolution; Qu'elle estoit bien  
 informée que l'emotion n'estoit pas si grande qu'ils ne la pussent appai-  
 ser, & qu'es'il en mesarriuoit ils en respondroient vn iour de leurs testes  
 au Roy son fils qui s'en vengeroit: Que quand on auoit arresté feu Mon-  
 sieur le Prince le peuple ne s'en estoit point esmeu, & qu'elle ne souffriroit  
 point qu'il s'armast pour auoir emprisonné vn Conseiller: Qu'encore vne  
 fois le Parlement en respondroit. Monsieur le premier President a repris la  
 parole, & dit, Qu'il voyoit bien que sa Majesté n'estoit pas bien informée  
 del'estat de la Ville, & croyoit que quand les forces du Roy & les soins  
 du Parlement seroient vnis ensemble, il seroit impossible à present d'arre-  
 ster la sedition, à moins de contenter le peuple, qui ne le pouuoit estre  
 qu'en voyant messieurs leurs Confreres qui auoient esté emprisonnez:  
 Qu'il supplioit la Reyne de se laisser vaincre aux prieres du Parlement, à sa  
 iustice, à sa bonté; & enfin qu'elle considerast que cent mil hommes luy  
 faisoient cette demande les armes à la main. La Reyne a demeuré ferme  
 dans la negatiue, & a dit qu'elle n'en feroit rien; les a congediez, & s'est le-  
 uée, & a passé dans sa Chambre: Et Messieurs du Parlement se sont mis en  
 estat de sortir. Neantmoins monsieur le premier President ayant concer-  
 ré avec monsieur Crespin, & quelques-vns de Messieurs qui estoient plus  
 proches de luy, & ayant consideré que ce refus causeroit vray-semblable-  
 ment la desolation entiere de Paris, se sont resolus de retourner encore à  
 la charge: & n'ayant plus trouué la Reyne, plusieurs Conferences & paro-  
 les ont esté portées de part & d'autre. Enfin la derniere fut, Que la Reyne  
 rendroit les prisonniers, rappelleroit les exilez, pourueu que le Parlement  
 cessast ses Assemblies iusques apres la sainct Martin. A quoy monsieur le  
 premier President a respondu, Que la Compagnie ne pouuoit rien répon-  
 dre sur cette condition, qu'apres en auoir deliberé; & monsieur le Cardi-  
 nal luy ayant proposé de deliberer presentement, il fist response que cela ne  
 se pouuoit faire ailleurs que dans la grande salle; neantmoins monsieur le  
 President de Mesme, & quelques-vns de Messieurs qui estoient plus pro-  
 ches de monsieur le premier President, luy ayant dict qu'ils croyoient que  
 la Compagnie pouuoit deliberer dans quelque lieu du Palais Royal, atten-  
 du l'estat present des affaires. Et Monsieur le Cardinal ayant encores appuyé  
 cette proposition, l'on fit passer la Compagnie dans l'une des salles proche  
 la chambre de la Reyne. Mais M. le premier President ayant trouué grande  
 difficulté dans les esprits de la plupart de la Compagnie de deliberer ail-  
 leurs qu'au Palais, il dist à monsieur le Cardinal que la Compagnie ne le  
 pouuoit faire. Ce qui fut cause que monsieur le Cardinal leur dist qu'ils  
 pouuoient donc y aller, & faire ce qu'il leur plairoit, & se retira, comme de



la part le Parlement fortit pour retourner au Palais; & ayant desia marché  
 iusques vis à vis la ruë de Prud'homme, il trouua vne barricade, laquelle  
 fut ouuerte par les Bourgeois pour faire passage, pèdant quoy, s'esleua vne  
 voix tumultuoire demandant à voir monsieur de Brusselles, laquelle fut  
 suiuië iusques à la seconde baricade qui estoit à la Croix du Tiroir, où es-  
 tans au lieu par les Bourgeois de liurer passage au Parlement, ils dirent  
 tous qu'il falloit auoir Monsieur de Brusselles, & plusieurs vinrent les ar-  
 mes baissées, tant pour faire large au Parlement, que pour les arrester &  
 empescher le passage. Enfin aucuns d'entre le peuple s'auancerēt vers Mon-  
 sieur le premier President qui le saisirent au bras, les vns disans qu'il le  
 falloit garder pour ostage, iusques à ce qu'on eust rendu les prisonniers; les  
 autres qu'il falloit qu'il retournast au Palais Royal avec le Parlement pour  
 demander lesdits prisonniers, en telle sorte qu'ils les ramenassent, & leur fis-  
 sent voir. Enfin la derniere proposition fut executée, & le Parlemēt retour-  
 na pesle mesle, ceux qui estoient à la queuë se trouuans à la teste, iusques  
 dans le Palais Royal, pendant laquelle meslée cinq de Messieurs les Presidés  
 au morrier se perdirent sans retourner au Palais Royal; sçauoir messieurs le  
 Bailleul, de Nemond, Bellievre, de Maisons, & de Nouion, & plusieurs Cō-  
 seillers qui se deguiferent comme ils peurent pour se sauuer; & le surplus  
 s'estant rendu au Palais Royal, ils monterēt droict au Cabiner de la Reyne,  
 où apres plusieurs allées & venuës, enfin Messieurs du Parlement passerent  
 dans la grande Galerie du Roy, dans laquelle on auoit mis des bancs & sie-  
 ges au mesme ordre de seance qu'au Palais; & auant prendre place, mon-  
 sieur l'Abbé de la Riuiere vint demander à Messieurs les Presidens, quelle  
 place ils entendoient donner à M. le Duc d'Orleans; à quoy ils luy dirent,  
 qu'ils ne croyoient pas qu'il pretendit autre place que celle qu'il prenoit au  
 Palais, puis que c'estoit le mesme Parlement: à quoy monsieur l'Abbé de la  
 Riuiere n'insista point dauantage, & ce fait Messieurs prirent leurs places;  
 sçauoir Messieurs les Presidens sur vn banc à part qui trauersoit, & Mon-  
 sieur le Chancelier se mit en teste avec sa robbe de Conseiller & son chap-  
 peau, s'excusant n'auoir d'autres habits: sur le banc à la droicte Monsei-  
 gneur le Duc d'Orleans se mit en teste, & au deffous de luy se mirent les  
 Ducs d'Elbeuf & de Rets, en suite trois maistres des Requestes, le quatries-  
 me s'estant perdu à la Croix du Tiroir, & en suite Messieurs de la Grande  
 Châbre, & derriere sur des bancs Messieurs des Enquestes. Messieurs estans  
 assis Monsieur le Chancelier sur la contestation qui s'estoit meü de de-  
 liberer audit lieu ou non, a commencé par mettre cette question en deli-  
 beration, & de six vingts quatre opinions à ladite deliberation, il y en a eu  
 cinquante d'aduis à ne point deliberer ailleurs qu'au Palais, le surplus de  
 deliberer presentement, attendu l'estat des affaires, & l'impossibilité de re-  
 tourner au Palais; & en suite on a deliberé sur la condition que la Reyne a-  
 uoit apportée de redre les prisonniers & exilez, pourueu que le Parlement  
 cessast ses Assemblées iusques à la S. Martin: enfin cinquante ont esté d'aduis de  
 ne point cesser, le surplus de sursoir, sans toutesfois en faire d'Arrest, & de-  
 liberer sur les articles restés de la derniere Declaratiō, & des propositions de

la Chambre Saint Louis iusques à la Saint Martin ; sauf pour le Tarif & pour les rentes de l'Hostel de Ville, sur lesquelles il seroit incessamment delibéré, & sans prejudice aussi de l'execution des Arrests de la Cour, les aduis des cinquante furent ouuerts les deux fois par Monsieur Regnard Conseiller. l'on remarqua deux aduis singuliers, l'un de Monsieur de Machaud Conseiller aux Requestes, qui a opiné de dōner quelques-vns de Messieurs pour ostage au peuple, iusques au retour de Messieurs de Brussel & Blanmenil: cēt aduis fut rejezté de commune voix, parce qu'il eust dependu de Messieurs les Ministres d'exposer les ostages, ne rendant pas les prisonniers: l'autre aduis singulier fust proposē par monsieur Martineau, qui dit, qu'il estoit d'auis d'accorder au peuple ce qu'il desiroit, puis qu'il le demandoit de si bonne grace les armes à la main. Monsieur le premier President le pria de se moderer vn peu. Monsieur le Chancelier dit, que cette parole n'auoit point deub estre dite: Monsieur le Duc d'Orleans appuya de mesme: ledit sieur Martineau sans s'estonner dauantage, dist: que si son discours bleissoit l'autorité Royale, il en estoit tres-marry: mais cependant il auoit leu que Cesar auoit demandé le Consulat de certe sorte, & qu'il l'auoit obtenu, & a finy son aduis sans aucune replique. La deliberation estant finie, la Reine & Monsieur le Cardinal en ayant esté informez, en ont tesmoigné satisfaction, & l'on a commandé d'apprester deux carrosses, l'un du Roy, & l'autre de la Reyne, pour aller querir Messieurs de Brussel & Blanmenil: l'on a expedie aussi des Lettres de cachet pour leur retour, & pour le rappel des autres Messieurs: sçauoir, monsieur Charton, que l'on auoit esté pour arrester prisonnier, & Messieurs Laisné & Loisel, qui auoient les Lettres l'un pour aller à Mante, l'autre à Senlis; & Messieurs du Parlement ne sont point sortis qu'apres auoir receu toutes lesdites Lettres de Cachet, dont monsieur le premier President a chargé, sçauoir, pour monsieur de Brussel, Monsieur Boucherat le Conseiller son neveu, & Monsieur de Thou, pour monsieur Blanmenil; & l'on les fist entrer dans les carrosses, que l'on fist trauffer la Ville, pour asseurer le peuple du prompt retour de ces Messieurs: & en suite, le Parlement s'est retiré chacun chez soy comme il a peu; nonobstant quoy, le peuple est demeuré barricadé & armé toute la nuit.

### *Du Vendredy vingt-huictiesme Aoust.*

**C**E iour, sur les huit heures du matin, Messieurs de la Grande Chambre estans assemblez en icelle, Messieurs les Gens du Roy y sont entrez, qui ont dit, que les Preuost des Marchands & Escheuins, estoient au parquet, qui demandoiēt à entrer, pour rendre compte à la Cour de ce qui s'estoit passé, & de ce qui se passoit. Surquoy, monsieur le premier President a dit au Greffier Boilleau, de les faire entrer; ce qu'il a fait: & ayans pris leurs places derriere le premier barreau, ils ont dit par la bouche du Preuost des Marchands: Que n'ayāt peu informer plustost la Cour de leurs cōduites au sujet du tumulte arriué dans la Ville, à cause des differēds endroits où ils auoient



auoient esté obligez de marcher, ils venoient presentement en rendre compte, & faire leur rapport de l'estat auquel elles estoient encore à present, pour recevoir les ordres; & on dit que Mercredy dernier de releuée, ayant appris l'emotion suruenüe sur les Ponts Nostre-Dame, Saint Michel, aux Changes, Pont-neuf, rue Saint Honoré & Saint Denis, ils y auoient enuoyé leurs mandemens pour arrester le desordre; lesquels ils n'auoient peu faire executer, à cause de la grande affluence du peuple qui s'y estoit assemblé, & armé: Que la crainte qu'ils eurent que le mal ne se resspandist dans les autres quartiers, les obligea d'y enuoyer leurs mandemens, tant aux Colonels que Quarteniers, pour y faire tendre leurs chaisnes, & y faire des corps de gardes; qu'en quelques quartiers ils auoient esté obeïs, aux autres non: Que le lendemain ils s'estoient dispersez dès le matin pour essayer à faire poser les armes, & que desia les artisans auoient commencé en quelques endroits d'ouurer les boutiques; quand vn nouveau rencontre, (voulant parler de ce qui arriua à monsieur le Chancelier, & aux gens de sa suite,) esmeut le peuple plus qu' auparauant, & excita vne nouvelle alarme, qui se resspandit presque par toute la ville, & qui fut suiui de grand nombre de barricades: ce qui les obligea de renoueller leurs mandemens pour faire poser des corps de gardes aux lieux qu'ils jugerent necessaires, & ou le mal n'estoit pas si grand qu'ils n'y peussent estre obeïs. Que sur les huit heures du soir ayant sceu ce qui s'estoit passé au Palais Royal, & aux enuiron; & l'ordre donné par leurs Majestez, d'enuoyer querir Messieurs qui auoient esté arrestez, & de faire reuenir Messieurs qui auoient esté exilz; ils en donnerent aduis le soir mesme par de nouueaux mandemens, pour en informer, & satisfaire le peuple qui continuoit à les demander, & qui auoit publié qu'il ne poseroit point les armes qu'ils ne les vissent; Que presentement ils venoient de plusieurs quartiers pour exciter la Bourgeoisie à faire abatre les chaisnes & barricades, & à poser les armes, leur ayant fait entendre de viue voix ce qu'ils auoient fait par leurs mandemens: & mesme dit, Que monsieur de Blanmesnil estoit de retour, & que par tout on leur auoit dit qu'on n'en feroit rien qu'on eust veu monsieur de Brussel: puis qu'il n'estoit pas encore arriué, qu'ils supplioient la Cour de leur donner les ordres qu'elle jugeroit necessaire pour le seruice du Roy, & la seureté de la ville, & qu'ils les executeroient ponctuellement, & ont finy: pendant lequel discours, Messieurs des Enquestes sont entrez, & pris leurs places; ausquels monsieur le premier President a dit d'abord, qu'il ne scauoit pas pourquoy ils se donnoient cette peine, n'ayant rien à deliberer presentement; & Messieurs estans venus à la Grand'Chambre plustost pour se reuoir que pour y traualier & vacquer à aucune affaire: à quoy Messieurs des Enquestes ont respondu, Que voyant les Preuost des Marchands & Escheuins, ils auoient interest & droit d'entendre ce qu'ils disoient, attendu l'estat present des affaires, qui pouuoit bien meriter l'Assemblée des Chambres. Et sur cela monsieur le premier President a commandé à Boileau d'aller aduertir Messieurs de la Tournelle, & de l'Edit, de venir prendre leurs places, ce qu'ils ont fait; pendant quoy monsieur le premier President a dit, aux Preuost des Marchands & Elche-

uins de se retirer, & que la Cour leur feroit sçauoir sa resolution, & ils se sont retirez; & tous Messieurs estans assemblez, les Gens du Roy, lesquels n'estoient point sortis pendant que Messieurs s'assembloient, se sont leuez, & ont dit, par la bouche de monsieur Tallon Aduocat General; Que comme ils auoient tesmoigné hier à la Cour leurs desplaisirs extrêmes des detentions, & éloignemens injustes de quelques-vns de Messieurs; ils ne pouuoient aussi assez exprimer leur joye du bon succez, que la prudence & sage conduite de la Cour, auoit eu hier au Palais Royal, & de voir seoir monsieur de Blamemefnil, l'un d'entr'eux, sur les fleurs de lys, & que leur satisfaction seroit accomplie, quand ils y verroient Monsieur de Brussel, & les autres Messieurs qui n'auoient peu encore estre de retour, mais qu'il y auoit apparence qu'ils le seroient dans aujourd'huy: cependant qu'ils estimoient estre de la prudence de la Cour de pouruoir à deux choses, pour la seureté de la ville de Paris, capitale du Royaume, siege de la Royauté, & qui donnoit l'exemple & le brantle à toutes les autres villes; Qu'en premier lieu il estoit à craindre que les Bourgeois & autres Marchands des denrées necessaires à la subsistance de Paris, s'abstinsent de venir demain, par la crainte que le desordre & le tumulte ne continuast; & que pour remedier à ce desordre, il leur estoit loisible de donner leurs Conclusions: Qu'ils croyoient qu'il estoit à propos d'enuoyer des Officiers du Chastelet, par toutes les villes & lieux, d'où les Boulangers ont accoustumé d'apporter du pain, & autres d'enrées pour les faire venir demain. En second lieu qu'ils croyoient estre necessaire pour le seruice du Roy, & le repos de la Ville; Que la Cour par Arrest enjoignist aux Bourgeois & Artisans d'ouurir les boutiques, rompre les barricades, baïsser les chaînes, & poser les armes; Que neantmoins ils remettoient le tout à la prudence de la Cour, & sur ce ils se sont retirez: Et comme ils sortoient du Barreau, le Greffier Boisleau a aduertie la Cour; Que Messieurs les Deputez de la Cour des Aydes demandoient d'entrer, & qu'ils auoient quelque chose à dire de la part de leur Compagnie: Surquoy monsieur le premier President a commandé à Boisleau de les faire entrer, & a fait laisser vuide la premiere place du banc, qui est vis à vis celui ou se mettent Messieurs les Princes du Sang, Ducs & Pairs, & Messieurs des Requestes, & la moitié du banc, vis à vis Messieurs les Presidents au Mortier: Ce qui a esté cause que Messieurs de la Grand'Chambre qui occupoient leurs places ont esté obligez de monter aux sieges hauts; ou se mettent à l'Audiance Messieurs les Conseillers Clercs; les places estans ainsi disposées, ils sont entrez: Sçauoir monsieur le Noir, President en ladite Cour des Aydes, accompagné de Messieurs de Bragelone, Sanguin, Clement, Baufflan, & deux autres derniers: tous lesquels ayans pris leurs places, monsieur le Noir a pris la parole, & a dit; Que la Cour des Aydes n'ayant peu tesmoigner le iour d'hier, à cette Compagnie, à cause de son absence au Palais Royal, la part qu'elle prenoit dans l'oppression qui luy auoit esté faite en la personne de quelques-vns de Messieurs, pour auoir fait iustice, n'auoit pû differer plus long-temps, à luy enuoyer des assurances de la joye, qu'ils auoient receus de la liberté qui leur auoit esté rendue, par les soins & la sage conduite de cette Compagnie; Que



pour cela la Cour des Aydes les auoit deputez vers la Cour ; & pour leur protester que leurs Compagnies estant vnies au point qu'elles estoient, elle prenoit part à tous ses intersts : & qu'elle n'en auroit iamais de separez des leurs, & a finy : Et à mesme temps, monsieur le premier President a fait responce, & leur a dit ; Que la Compagnie leur estoit tres-obligée du soin qu'ils auoient, de luy donner des marques de la part qu'ils prenoient dedans ses intersts ; Qu'aussi la Cour des Aydes se pouuoit asseurer qu'en toutes occasions, la Cour luy en tesmoigneroit ressentiment, & a finy ; & Messieurs de la Cour des Aydes se sont retirez : & à l'instant monsieur le premier President a proposé de donner Arrest, sur les Conclusions des Gens du Roy, sans y deliberer dauantage : Surquoy s'est emeu vn grand murmure, pour s'esclaircir duquel, monsieur le premier President a dit ; Qu'il ne sçauoit ce que Messieurs desiroient, & s'est tourné vers monsieur du Tillet Saint Leu, qui estoit en face de luy, pour sçauoir ce que Messieurs demandoient, lequel luy a dit ; Que Messieurs desiroient voir la feuille de ce qui s'estoit passé au Palais Royal : à quoy monsieur le premier President a reply ; Qu'il n'y en auoit encores aucune de faite, parce qu'il n'y auoit point de Greffier ; & à mesme temps monsieur Neuelet a dit, Qu'il seroit à propos que monsieur le premier President fist la relation, parce que plusieurs des Messieurs n'y auoient point assisté. Surquoy s'est éléué vne voix confuse de plusieurs de Messieurs qui ont dit, Qu'il n'auoit tenu qu'à eux d'y estre, & que s'ils ne se fussent point retirez, ils y eussent deliberé comme eux. Et neantmoins sur l'instance de sçauoir ce qui s'estoit passé, monsieur le premier President en a fait vne relation sommaire ; laquelle estant finie, ledit sieur premier President a encores proposé de donner Arrest, suiuant les Conclusions des Gens du Roy : à quoy s'estant fait vn nouveau tumulte des Enquestes, monsieur le premier President a repris la parole, apres en auoir concerté avec les Presidents de Mesmes & le Bailleur, & a dit ; Qu'à la verité les Conclusions estoient toutes bonnes ; mais qu'il estoit à craindre que le peuple ne se desarmast point qu'il n'eust veu monsieur de Brussel, quelque Arrest que la Cour en donnast, & qu'ainsi il falloit bien prendre garde de ne point hazarder son autorité, puis qu'il n'y auoit plus que cette barriere pour arrester la sedition : mais qu'il croyoit que l'on pouuoit donner charge aux Gens du Roy, d'enuoyer querir les Officiers du Chastellet pour leur donner les ordres d'enuoyer aux lieux circonuoisins, pour faire venir demain au Marché le Pain, & les autres denrées necessaires pour les provisions de Paris. Ce dernier expedient a esté approuué de toute la Compagnie, & les Gens du Roy ont esté mandez, auxquels cet ordre a esté donné, & se sont retirez ; & à l'instant sont rentrez, pour dire que Messieurs du Grand Conseil venoient parler à la Cour de la part de leur Compagnie : sçauoir vn de Messieurs les Presidents, & quatre Conseillers, & qu'ils prioient qu'on leur laissast les places au Bureau. Ce qui a esté fait ; & à l'instant ils sont entrez : Sçauoir monsieur le President Machaut & Messieurs Bouqueual, Aubry, Turquan & Villeuauzé Conseillers : lesquels ayant pris places, monsieur de Machaut a dit en substance : Messieurs, le Grand Conseil

n'ayant peu hier deputer vers la Cour, à cause d'une discipline de nostre Compagnie, qui ne permet pas de deputer sinon les Semestres assemblez; comme il eust désiré pour témoigner la part qu'il prenoit, dans le mauvais traitement qui auoit esté fait injustement à Messieurs vos confreres, qui sont les nostres: Maintenant que les affaires ont changé de face, Nous a député vers vous pour vous protester, Messieurs, de la satisfaction qu'il a du bon succez que vostre sage conduite a causé à cette affaire, & vous assurer qu'en cette occasion & en toute autre, la Cour trouuera dans nostre Compagnie, tous les Conseils & assistances qu'elle peut attendre d'une Compagnie, qui est unie à la vostre au point qu'elle est, & a finy; Et en suite monsieur le premier President luy a fait la mesme réponse qu'à la Cour des Aydes, & se sont retirez. En suite dequoy le murmure estant appaisé, le President de Mesmes a proposé qu'il seroit à propos en attendant le retour de M. de Brussel, & que l'on peust donner Arrest, que tous Messieurs s'en retournant à pied exhortassent les Bourgeois dans les corps de gardes, de poser les armes, & qu'ils témoignassent estre assurez du retour de monsieur de Brussel; & mesme a proposé de prier monsieur de Blanmesnil de se faire voir en plus d'endroits qu'il pourroit. Mais cét aduis, a esté rejetté; & enfin sur ce qu'il est venu un bruit que monsieur de Brussel estoit arriué, monsieur le premier President par l'avis de la Compagnie, a commandé à Guyet Greffier de la Cour, d'aller voir chez ledit sieur de Brussel s'il estoit arriué; pendant quoy les Gens du Roy sont entrez, qui ont dit, Que le Lieutenant Civil estoit au Parquet, & qu'il leur venoit de dire, que dès hier au soir il auoit enuoyé les Commissaires aux lieux & villes circonuoisins de Paris, pour faire venir demain le Pain, & autres provisions dans les marchez, & qu'il en auoit escrit aux Iuges des lieux; & que si la Cour le vouloit entendre ou luy prescrire quelque chose de nouveau, il estoit à la porte, avec les Officiers du Chastellet; à quoy monsieur le premier President a répondu, que la Cour n'auoit point d'autre ordre à leur donner, & qu'ils pouuoient les assurer que la Cour estoit satisfaite de leur conduite, & ne les a point fait entrer: Comme aussi les Gens du Roy ont dit, Que les Preuost & Escheuins attendoient tousiours les ordres de la Cour: à quoy monsieur le premier President a dit, Qu'ils pouuoient se retirer, & que la Cour leur feroit sçauoir sa résolution; & ce fait les Gens du Roy sont sortis; & pendant que Guyet est allé chez monsieur de Brussel, Messieurs ont ouy de la Grand'Chambre une grande Escoupererie, & il est venu allarme que les Compagnies des Gardes estoient aux mains contre les Bourgeois, & que le peuple estoit allarmé de l'avis qu'il auoit eu qu'il y auoit des troupes dans le Bois de Boulogne: à l'esgard du premier, il s'est trouué que c'estoit un salve & descharge de resiouissance de l'arriué de M. de Brussel: à quoy monsieur le premier President a dit tout hault, que monsieur de Brussel meriroit beaucoup; mais qu'il en falloit neuf autres avec luy pour donner Arrest: au regard du second, Messieurs ont jugé que cette allarme estoit mal fondée, puisque la Cauallerie n'estoit point à craindre dans Paris, estant barricadé: comme il estoit; & aussi tost M. de Brussel Conseiller aux Requestes du Palais, nepeu du Conseiller de la Grand'Chambre est venu avec Guyet, qui a dit, Que



monſieur ſon oncle venoit d'arriuer, & eſtoit à Noſtre-Dame où il remercioit Dieu. Mais que ſi la Cour le mandoit qu'il ne manqueroit pas de ſe rendre à la Compagnie au pluſtoſt; & Gayet a adjouſté que le peuple diſoit, qu'il le vouloit voir auant que de poſer les armes. Surquoy monſieur le premier Preſident a commandé de l'aller querir de la part de la Cour; ce qu'il a faiſt, pendant quoy monſieur le Preſident de Meſmes a encores propoſé pour aduancer l'affaire de donner l'Arreſt, ce qui a eſté rejetté, & monſieur de Bruſſel eſt arriué dans la Grand' Chambre, ayant eſté eſcorté par tout le peuple, & ſalué des Corps de gardes depuis ſon logis juſques dans la grande Salle du Palais au bruit d'une excouppeterie continuelle; & meſmes pluſieurs des Bourgeois armez de mouſquets & autres armes, l'ont accompagné juſques dans la Grande Chambre d'où ils ſont ſortis apres l'auoir conduit; & ayant pris ſa place, monſieur le premier Preſident luy a dit; Que la Cour n'auoit point voulu deliberer ſur l'Eſtat preſent des affaires, qu'il n'aſſiſtaſt à la deliberation; qu'elle luy auoit voulu teſmoigner par là l'eſtime & la conſideration qu'elle faiſoit de luy; Que pour ces cauſes il les trouueroit dans ſon merite, & dans la connoiſſance qu'il le prioit auoir de luy-meſme. A cela monſieur de Bruſſel a reparty, qu'il ſe recognoiſſoit tres-ſenſiblement obligé aux ſoins de la Compagnie; Que comme il recognoiſſoit ne les auoir point merité, l'obligation luy en reſteroit plus grande: ſur cela monſieur le premier Preſident a faiſt mine de ſe leuer, monſieur le Preſident de Meſmes & monſieur le Coigneux luy ont fait ſigne qu'il ne diſoit rien à monſieur de Blanmeſnil; ce qu'il l'a fait retourner vers luy, pour luy dire qu'il prendroit s'il luy plaift part au teſmoignage d'affection & d'eſtime qu'il venoit de rendre de la part de la Cour à monſieur de Bruſſel, parce qu'il eſtoit commun pour tous les deux. Monſieur de Blanmeſnil a faiſt vn pareil compliment que monſieur de Bruſſel, & a ſeulement adjouſté que ſi pluſtoſt il euſt eu la bouche ouuerte, pluſtoſt il auroit remercié la Cour de l'honneur qu'elle luy auoit fait de luy donner ſa protection: en ſuite de quoy monſieur le premier Preſident s'eſt leué pour ſortir, mais tous Meſſieurs ont dit qu'il falloit donner Arreſt: Surquoy il s'eſt raiſſé & a pris les aduis, & a paſſé tout d'une voix de donner Arreſt, portant que les Barricades ſeront deſſaiſtes, les chaiſnes deſtenduës & les armes poſées, & que l'Arreſt ſera publié à ſon de trompe, ce qui a eſté executé au bout de demie heure: en ſorte que les carroſſes ont roulé par tout l'apreſdinee, les Compagnies des gardes Françoises & Suiſſes ont eſté renuoyées chacun dans leurs quartiers; à la reſerue de celles qui eſtoient de la garde ordinaire que l'on a doublé: & neantmoins ſur les huit heures du ſoir il s'eſt eſmeu vne nouuelle allarme qui a commencé en la rue Saint Antoine, & qui s'eſt reſpandue en peu de temps par toute la ville, ſur ce que l'on auoit faiſt ſortir de l'Arcenal quelque charrette de poudre & autres munitions de guerre, & ſur vn nouuel aduis qui eſt venu que la Caualerie eſtoit encores dans le bois de Boulongne; comme auſſi il s'eſt reſpandu vn faux-bruict qu'il venoit quelque Infanterie du coſté de Lagny, ce qui a eſté cauſé que l'allarme ſ'eſt miſe generallyment dans toute la ville, & que les Bourgeois ont pris les armes en pluſieurs quartiers, meſme refaiſt pluſieurs Barricades en quelques cantons, dont les Officiers du Chaſtellet & de la ville.

ayant esté aduertis ils ont marché vne partie de la nuit pour rassurer le peuple, ce qui a tres-bien reüssi; Que le Samedy matin les rues ont esté libres, les armes posées, les boutiques ouuertes, & les marchez remplis de pain & autres prouisions necessaires. Les Preuost des Marchands & Escheuins en sont venus rendre compte sur les huit heures au Parlement, les Chambres étant Assemblées, & se sont retirez: en suite dequoy monsieur le premier President a demandé à monsieur de Brussel en quel estat estoit le Tarif, à quoy il a fait response; Que mardy de releuée monsieur le Chancelier auoit enuoyé le Sieur Picot & vn des siens chez luy pour le prier de se tenir prest le lendemain de releuée pour conferer chez monsieur le Duc d'Orleans sur ledit Tarif, ce qu'il auoit promis; & que le lendemain sur le midy monsieur des Fontaines Bouer Secetaire du Conseil en quartier, avec vn des domestiques de monsieur le Chancelier l'estoit venu prier de ne point manquer à se trouuer l'apresdinee au Palais d'Orleans, pour y trauailler, ce qu'il auoit encores promis; & qu'il luy auoit demandé les Edits, Declarations & Arrests qui luy auoient esté portez auparauant par ledit sieur des Fontaines, luy disant que monsieur le Chancelier desiroit aussi les reuoir, & qu'il luy auoit rendu; & que ce qui estoit suruenü depuis ledit iour auoit empesché qu'il n'eust trauaillé dauantage à cette affaire: surquoy tous d'une voix sans autrement deliberer, ont dit qu'il falloit donner ordre que l'on rapportast à monsieur de Brussel lesdits papiers, afin de luy en rafraischir la memoire pour y trauailler au premier iour; & on a adjousté, qu'il falloit cependant trauailler à l'article des rentes, & faire trouuer Lundy matin dans l'assemblée des Chambres les Preuost des Marchands & Escheuins pour donner les esclarcissements necessaires à la Compagnie: Ce qui a esté arresté, & en suite la Compagnie a dit à monsieur le premier President d'une voix confuse, qu'il falloit commettre de Messieurs pour faire l'information ordonnée Samedy dernier contre Cathelan, Thabouret, le Fevre, & autres, ce qui a esté fait; & Messieurs Crespin & Cheuallier Doyen & sous Doyen de la Cour ont esté commis.

### *Du Samedy vingt-neufiesme Aoust.*

**C**E iour les Chambres assemblées Messieurs Crespin & Cheualier ont esté commis pour l'execution del' Arrest contre Catelan, à informer; ce qui espouuanta les Partisans; de plus Messieurs enuoyerent prier monsieur le Chancelier de donner les memoires pour trauailler au Tarif, lesquels il auoit retirez de chez monsieur de Brussel commis pour cette affaire.

### *Du Lundy trente-vniesme Aoust.*

**C**E iour la Cour toutes les Chambres assemblées, trauailla au Tarif, la Reyne enuoya querir de Messieurs du Parlement, pour leur dire d'aduertir le peuple qu'il ne s'effroyast point si le lendemain on voyoit entrer de la Cauallerie à Paris, parce qu'on y deuoit ammener les Chefs faits prisonniers à la bataille de Lens.



## *Du Mardy premiere Septembre.*

**C**E iour la delibération a esté continuée le matin & l'apresdinee; enfin il a esté resolu que quatre de Messieurs de la Grand' Chambre & vn de chascun autre des Enquestes s'assembleroient le lendemain à la Chambre saint Louys, pour avec le Preuoist des Marchands & Escheuins examiner les différentes natures de rentes, & en suite en faire rapport à la Compagnie; pendant le cours de cét aduis, il y a eu quarante-sept voix à informer contre la Railliere, Doublet, & autres Fermiers, qui ont fait des Arrests sur les retranchemens des Rentes assignées sur les Fermes, mais il y en a eu soixante-huit à ne point informer.

## *Du deuxiesme Septembre.*

**M**ercredy deuxiesme Septembre, Messieurs de la Grand' Chambre ont trauaillé iusques sur les neuf heures, sans interruption des Enquestes, à cause que Messieurs de Brussel & Ferrand Commissaires du Tarif, n'estoient pas arriuez, dont monsieur le premier President a fait aduertir les Enquestes pour les empêcher d'entrer: & entre autres affaires iugées à la Grand' Chambre, ils s'en est iugé vne assez considerable, qui est que monsieur d'Espernon qui estoit Partie en vn Procez, auoit fait signifier des Lettres d'Estat par luy obtenues, fondées sur le commandement expres à luy fait de demeurer en Guyenne, nonobstant lesquelles on a iugé son Procez, lequel il a perdu; & sur les neuf heures Boisleu a aduerty monsieur le premier President que Messieurs des Enquestes venoient prendre leurs places, ce qui l'a obligé de luy commander de les aller querir, & à mesme temps ils sont entrez: & ayans pris leurs places, monsieur le premier President a demandé à monsieur de Brussel, & à monsieur Ferrand, s'ils auoient acheué leur Procez Verbal concernant le Tarif, lesquels luy ont dit, qu'ils y auoient trauaillé hier iusques à huit heures du soir, & qu'ils acheueroient ledit iour. Surquoy, monsieur le premier President les a exhortez d'acheuer ledit iour; & en suite, a proposé à Messieurs des Enquestes de se retirer, n'ayant rien à faire quant à present.

Sur ce, plusieurs ont dit d'une voix commune, qu'il falloit sçauoir des Gens du Roy, s'ils auoient iour de la Reyne pour entendre les Remonstrances; & en quel estat estoit l'Information contre Cathelan, Thabouret & le Febvre, comme aussi l'estat de la Chambre de Iustice. Acela, monsieur le premier President a dit; Que l'information ne pouuoit estre si-tost faite, parce que les Monitoires ne pouuoient estre publiez que le Dimanche; & à l'égard de la Chambre de Iustice, que bien-tost la Compagnie en verroit la Commission: Et neantmoins sur l'instance des Enquestes, il a mandé le Procureur General, lequel estant entré, a dit; Qu'il auoit veu hier monsieur le Chancelier, pour auoir l'Audience de la Reyne, lequel auoit promis de la demander, & leur faire sçauoir: à l'égard de l'Information il a dit la mesme excuse qu'auoit dit

monsieur le premier President: pour ce qui est de la Chambre de Iustice, il n'en a point parlé, & s'est retiré. Cela fait, monsieur le premier President a proposé à Messieurs de rechef de se retirer. Surquoy s'est esleué vne voix confuse, qui a dit, qu'il falloit deliberer si l'on continueroit le Parlement pendant les vacations.

Surquoy, monsieur le premier President s'est escrié; Que cette proposition estoit contraire aux résolutions de la Compagnie; & sur ce que le bruit a redoublé, monsieur le President de Mesmes a dit; Que l'opposition en ayant esté faite hier, & ayant passé au contraire, c'estoit contre la discipline de la Compagnie, de remettre en deliberation vne chose iugée; les Enquestes ont hue monsieur de Mesmes, & ont dit qu'il n'auoit point esté deliberé sur ladite proposition, & qu'il y falloit deliberer.

Pendant ces contestations monsieur le Coigneux Bachaulmont s'est escrié qu'il falloit parler de Chapelain, Intendant de monsieur de Vendosme, qui auoit esté transferé de la Bastille au bois de Vincennes, & qu'il falloit sçauoir du Procureur General, pourquoy il ne donnoit point de conclusions sur la Requeste cy deuant présentée par sa femme.

Monsieur le premier President a dit; Que l'affaire ne regardoit point les Enquestes, mais seulement la Grand' Chambre, & que la femme ne continuant point sa poursuite, ce n'estoit pas aux Iuges d'aller au deuant.

Monsieur Coulon Conseiller a pris la parole, & dit qu'il falloit trauailler à la seureté des sujets du Roy, tant Officiers que tous autres, & qu'il n'estoit point iuste que l'on peust enleuer à discretion les sujets du Roy contre l'autorité de Iustice.

Sur ce dix heures ont sonné, monsieur le premier President s'est leué, & l'Assemblée continuée au lendemain.

### *Du Iendy troisieme Septembre.*

Ce iour Messieurs du Parlement se sont assemblez à la Grand' Chambre sur les huit heures du matin, ou estans, Messieurs les Gens du Roy y sont entrez, qui ont dit par la bouche de monsieur Talon; Que la Reyne les auoit mandez le iour precedent, pour leur dire qu'elle attendroit aujourd'huy à cinq heures de releuee les députez de la Cour, pour entendre ses Remonstrances, & qu'ils auoient eu ordre de sa Majesté de faire sçauoir à la Compagnie ce qu'ils faisoient, & se sont retirez.

Et aussi-tost il a esté arresté que l'on satisferoit à cet ordre; apres quoy il a esté deliberé sur le reglement proposé pour la distribution des rentes assignees sur l'Hostel de Ville, & la deliberation n'estant pas finie à dix heures, la Cour s'est leuée, & l'assemblée remise au lendemain.

Ledit iour de releuee, la Cour est allée sur les cinq heures au Palais Royal par deputez, sçauoir, monsieur le premier President, Messieurs les Presidents de Bailleul & Nesmond, quatre Conseillers de la Grand' Chambre, & deux de chaque Chambre des Enquestes: où estans arriuez, ils ont esté re-

ceus



ceus & conduits en la maniere accoustumee dans le cabinet de la Reyne, ou estoient,

Leurs Majestez dans leurs chaires.

Monseigneur le Duc d'Orleans.

Monseigneur de Longueville debout d'un costé.

Monseigneur le Cardinal.

Monseigneur le Chancelier.

Et Monseigneur de la Meilleraye de l'autre.

Les Secretaires d'Estat, & plusieurs autres personnes de la Cour.

Et Monseigneur le premier President s'estant approché pour complimenter leurs Majestez sur les heureux succez de leurs armes, a protesté que le Parlement y prenoit tres-grande part : en suite a supplié leurs Majestez d'accorder aux Officiers subalternes le droict annuel sans faire aucun prest ; de restablir les gages des Officiers, du moins pour la moitié à ceux à qui ils auoient esté tous retranchez ; & restablir aussi les rentes sur la Ville, du moins de deux quartiers & demy sur les gabelles, & deux quartiers sur toutes les autres natures ; & finalement d'accorder la descharge du quart entier de la taille au peuple, à commencer en l'annee mil six cens quarante sept, au lieu que par la Declaration publiee au Parlement en presence du Roy, il n'y auoit qu'un demy quartier de remise, à commencer en 1648. seulement.

### *Du Vendredy quatriesme Septembre.*

**C**E iour sur les huit heures du matin, monsieur de Brussel a rapporté vne Requeste pour vn Sergent cy-deuant employé par Catelan & Thabouret, au recouurement de quelques taxes, lequel demandoit, & s'est rendu denonciateur contre eux, d'auoir fait des recouuremens sur de faux Roolles ; & d'auoir desrobé plus de deux millions de liures dont il a esté informé, & sur l'information decreté adjournement personel, contre Catelan & Thabouret ; & de ce, non content, le denonciateur a demandé, qu'il luy fut permis de saisir & arrester leurs effets comme de gens fugitifs, & qu'ils receloient en des maisons particulieres, que le denonciateur offroit d'indiquer : Sur cette Requeste a esté donné Arrest, par lequel il a esté ordonné ; Que le denonciateur nommeroit à monsieur de Brussel Rapporteur, les maisons où il pretend lesdits Catelan & Thabouret auoir recelé leurs effets, pour à discretion dudit Commissaire y estre saisis & arrestez, & en faire rapport à la Cour ainsi qu'il le iugeroit à propos ; & l'instruction verbale a esté, que si l'on nommoit des maisons de Messieurs les Princes, ministres ou Officiers de Iudicature, le Commissaire en fera rapport à la Cour pour receuoir ses ordres.

Si au contraire, on nommoit quelque maison de Partisans, traittans ou apparemment interessé dans les affaires des accusez, le Commissaire iroit directement saisir & y mettre le scelé.

En suite de cette affaire, huit heures ayant sonné, monsieur le premier President leur a fait la relation cy-dessus, de ce qui s'estoit passé le iour precedent au Palais Royal, laquelle estant finie, Messieurs ont dit qu'il falloit travailler au Tarif; Monsieur le premier President a dit, qu'il luy sembloit plus à propos d'acheuer la deliberation commencée pour le reglement du payement des rentes, & qu'après la Compagnie travailleroit au Tarif: de sorte que la deliberation a esté continuée, & a esté arresté que les deniers destinez pour le payement des rentes, seroient portez directement à l'Hostel de Ville, par les Fermiers & autres, sur ce qu'elles sont assignées, sans passer par les mains des Payeurs; Que les deniers seroient mis dans vn coffre fort audit Hostel de Ville, qui auroit trois serrures, autant de clefs differentes, pour estre gardées: l'une par le Preuost des Marchans: l'autre, par le Payeur: & la troisieme, par le Controlleur. Et parce que les Payeurs ont leué les Offices des Controlleurs, il a esté ordonné que dans six mois, ils resigneroient l'un ou l'autre desdits Offices, autrement qu'il y seroit commis par la Cour.

Il a esté encores arresté quelques autres articles pour empescher les abus en la distribution desdites rentes qui ont emporté tout: Et l'heure ayant sonné, l'Assemblée a esté continuée au lendemain pour le Tarif.

### *Du Samedi cinquiesme iour de Septembre.*

**C**E iour, Messieurs de la Grand' Chambre, estans assemblez sur les huit heures du matin, monsieur de Brussel y est entré, auquel monsieur le premier President a demandé s'il auoit acheué son Procez Verbal, touchant le Tarif, lequel a respondu, qu'il y auoit travaillé le iour precedent iusques à la nuit, mais qu'il en auoit encores da moins pour huit iours.

Surquoy Monsieur le premier President a dit, qu'il estoit donc inutile d'assembler les Chambres, n'y ayant plus rien à deliberer. Surquoy monsieur de Brussel a dit, qu'il se trouueroit assez de choses à faire: & entr'autres, à deliberer sur la Commission de la Chambre de Iustice. A quoy monsieur le premier President a dit, qu'il n'y auoit plus à deliberer sur ce sujet, d'autant que la Declaration qui en ordonneroit l'establisement estoit verifiée, & que la commission n'en feroit que l'exécution. Monsieur de Brussel a reparty, qu'il falloit examiner si les Iuges ne seroient point suspects, d'autant qu'il sembloit que telle auoit esté la resolution de la Compagnie, lors de l'enregistrement de ladite Declaration, après lesquels discours l'on a travaillé à quelques affaires des parties iusques sur les huit heures & demie, que Messieurs des Enquestes sont entrez, & ont pris leurs places, ausquels monsieur le premier President a dit, Que s'il y eust eu quelque deliberation à prendre, il les eust assemblez; mais que monsieur de Brussel ayant dit qu'il n'estoit pas encore prest, il n'y auoit rien à faire.

Monsieur Perrot President aux Enquestes qui s'est trouué l'ancien,



a dit qu'il estoit donc à propos de deliberer quand on s'assembleroit pour trauailler au Tarif sur le rapport dudit sieur de Brussel, attendu la fin prochaine du Parlement. Monsieur le premier President a pris la parole, & a dit la mesme chose qu'auparauant l'assemblée des Chambres, & qu'il ne scauoit pas quand il auroit acheué son Procez Verbal, auant que la Cour deliberast sur la proposition des Enquestes, veu principalement la disposition où paroïssoit le peuple d'emotion qui seroit mieue retenu par le menu.

Cela a esté suiuy d'acclamation vniuerselle, monsieur le premier President neantmoins ne faisoit point deliberer. Monsieur Viole President aux Enquestes, luy a dit, qu'il ne falloit point marchander, & que messieurs desiroient opiner sur la continuation ou cessation du Parlement. Apres quelques instances de monsieur le premier President, il s'est tourné vers Monsieur Crespin Doyen de la Compagnie, qui a dit, qu'il estoit d'aduis de cesser le Parlement à l'ordinaire: & sur ce, qu'il auoit entendu quelque voix qui auoient dit, qu'apres les dernieres violences l'on en pouuoit craindre de nouuelles; il a dit, Que si quelqu'un s'en plaignoit il pouuoit en donner sa Requête, & a finy.

Monsieur de Brussel a opiné sur ce qu'il a creu que monsieur Crespin l'auoit designé; il a commencé par dire, qu'il auoit oublié la violence qui luy auoit esté faite, mais neantmoins qu'il conserueroit tousiours sa mesme resolution, de seruir le Roy & la Compagnie sans rien apprehender, & en suite a esté d'aduis de continuer le Parlement; Monsieur le premier President s'est écrié, si c'estoit sans en demander des Lettres à la Reyne: il a dit, qu'il y auoit quantité d'exemples; Que le Parlement s'estoit continué en vacations sans aucunes Lettres: Monsieur le premier President luy a dit, qu'il n'en auoit leu aucun exemple dans les Registres. Monsieur de Brussel a replyqué; Que Messieurs plus anciens que luy en cottoient. Monsieur le premier President luy a remonstré, qu'il seroit mal seant à la Compagnie de s'assembler, n'ayans rien à faire. Monsieur de Brussel a dit; Que souuent on faisoit plus en ne rien faisant que faisant.

Monsieur le premier President s'est escrié avec estonnement, & luy a demandé, s'il estoit d'aduis de continuer sans en parler à la Reyne: il a finy, qu'il estoit d'aduis que la Cour resolut de continuer, & de prier la Reyne de l'aggreer: enfin, de deux cens, tous ont esté de cét aduis, adjoustant que la Reyne seroit priée d'enuoyer des Lettres Patentes, & que ce ne seroit que pour deliberer sur l'execution des choses resoluës le Ieudy au Palais Royal, neantmoins estoient d'aduis de n'en point parler à la Reyne, dont monsieur Coulon estoit Chef. Monsieur Viole a leu l'Extrait de plus de vingt exemples tirés des Registres du Parlement, datte par datte iustificatiue, qu'à diuerses fois le Parlement a continué en vacations sans Lettres du Roy: la plupart de Messieurs, ont aussi tesmoigné qu'ils ne souffriroient point l'establissement ou publication de la Chambre de Iustice qu'apres que la Commission aura esté verifiée en Parlement. En fin dix heures ayant sonné, la Cour a mandé les Gens du Roy, auxquels le premier President a donné charge d'aller trouuer la Reyne apres midy, pour luy faire entendre l'Arrest, & la prier d'en-

uoyer ses Lettres de Continuation Lundy aux termes susdits, & a esté arresté que la Compagnie s'assembleroit ledit iour de bonne heure.

*Du Lundy septiesme Septembre.*

**C**E iour Messieurs estans assemblez, les Gens du Roy ont esté mandez, lesquels par la bouche de monsieur Talon ont dit à la Cour; Que suiuant son ordre, ils auoient veu la Reyne, & l'auoient suppliée d'accorder les lettres de continuation; Que la Compagnie demandoit ce qu'elle leur auoit accordé par la bouche de monsieur le Chancelier en sa presence, iusques au 20. du present mois, sauf à prolonger, si la Compagnie le iugeoit à propos: & que sa Majesté leur auoit ordonné des Remonstrances à la Cour; Que certains estrangers mal affectionnez au seruice du Roy, & au repos de Paris, où ils sont en grand nombre, semoient de faux bruits dans les esprits des habitans, pour les engager au souleuement: & entre autres que sa Majesté auoit dessein de retirer le Roy & le Parlement de sa bonne ville de Paris, à quoy elle n'auoit iamais pensé; Que monsieur le Prince reuenoit avec six mille hommes de Caualerie au tour de ceste ville, sous pretexte que l'on y auoit veu arriuer vne partie de son bagage; ce qui estoit faux: Que l'on auoit fait rompre quelques chaînes exprez pour fauoriser ceste Caualerie, & plusieurs autres inuentions suscitées par les ennemis de l'Estat, dequoy le Roy desiroit qu'il fut informé. Comme aussi sa majesté adjoûta, que les mesmes seditieux faisoient courir le bruit que les Almanachs auoient pronostiqué vne esmotion generale en ladite ville le 22. 25. & 28. qui deuoient estre suiues de beaucoup d'autres: & Messieurs les Gens du Roy estans sortis apres auoir mis sur le bureau ceste Declaration pour la continuation du Parlement, elle a esté enregistree, & remis, neantmoins les Assemblies à huitaine; parce que monsieur de Brussela dit, qu'il ne pouuoit auoir fait son procez Verbal du Tarif plustost qu'en ce temps-là.

Il est encores suruenue vne difficulté touchant la Chambre de Iustice, sçauoir si les noms des Commissaires seroient apportez au Parlement. Messieurs les Presidens au Mortier estans d'aduis que non, & les Enquestes au contraire, il a passé que la commission seroit seulement veuë à la Compagnie; afin que s'il y en auoit aucuns des Commissaires interessez directement ou indirectement, la Reyne fust suppliee de les changer.

Lelendemain 18. Septembre monsieur de Chauigny fut emprisonné au Donjon du Chasteau de Vincennes, Messieurs de Chasteau-neuf & Goulas exilez.

*Du Mardy vingt-deuxiesme Septembre.*

**C**E iour monsieur le Procureur General ayant apporté à la Compagnie vne lettre de cachet portant prolongation du Parlement iusques à la S. Michel, & injonction de travailler incessamment, toutes choses cessantes



au Tarif: Monsieur le President de Mesmes presenta à la Cour la commission de la Chambre de Iustice, & dit; Que quoy qu'il n'eust pas creu qu'elle fust sujette à verification, neantmoins qu'il auoit voulu rendre cet honneur à la Compagnie en estant premier President, laquelle il supplioit pendant son absence vouloir conseruer ses interets & son honneur, aux occasions qui se pourroient presenter, laquelle commission fut mise es mains du Greffier.

En suite, monsieur le premier President ayant demandé à monsieur de Brussel, si le procez verbal du Tarif estoit acheué; monsieur le President Violle se leua, & dit; Qu'il y auoit des affaires de bien plus grande consequence à mettre en deliberation: ce qui estonna d'autant plus mondit Seigneur le premier President, qui ne s'attendoit à rien moins qu'à cela, & qui n'auoit pas ordre de mettre en deliberation, que le procez verbal du Tarif: toutesfois apres plusieurs excuses, il fut obligé d'acheuer, & d'entendre les propositions de cette affaire de consequence, qui furent

Le peu d'assurance qu'on pouuoit & deuoit auoir à la parole de la Reyne.

L'esloignement, ou plustost la subtraction du Roy de sa bonne ville de Paris.

L'approche des gens de guerre aux enuirs de Paris.

Le manquement de parole, en ce que contre les assurances qu'elle auoit donnée au Parlement, de ne consentir pendant sa Regence à aucun éloignement, encore moins à aucun emprisonnement, le contraire auoit paru en la personne des sieurs de Chasteauneuf, Chauigny, Goulas, Marquis de la Vieuille, & autres; & qu'il estoit tres-certain qu'il s'estoit tenu des Conseils tres-pernicieux contre le Parlement & la ville; l'éloignement du Roy qui auoit esté fait à six heures du matin, sans trompette, comme dit le prouerbe, sans garde & cheuaux legers; mais seulement accompagné du Cardinal, & du Marechal de Villeroy, & auparauint mesme d'auoir entendu la Messe, contre l'ordinaire de nos Roys, & qui n'entreprennent iamais rien sans cela, & sans aduertir les Compagnies Souueraines.

Et quant aux gens de guerre, que leurs approches de cette ville, & les violences par eux commises; estoit vn indice qui ne promettoit rien de bon à l'Estat, particulièrement au Parlement.

Surquoy monsieur le President de Blanmesnil, ayant pris la parole, a dit, Qu'il falloit aller iusques à la source du mal pour le guerir; Que tous les malheurs qui estoient arriuez venoient de la mauuaise administration du Cardinal Mazarin, qui estant Estranger, & portant peu d'affection à la France, ne se soucioit pas de tout perdre, pourueu qu'il vint à bout de tous ses desseins, & qu'il se sauuaist: & que pour luy, il croyoit en sa conscience, qu'il y falloit donner remede. Et pour cet effet, de renouueller l'Arrest de 1617. qui interdit le Ministere du Royaume aux Estrangers, sur peine de la vie; Qu'il estoit d'auis de prier la Reyne de ramener le Roy en sa bonne Ville de Paris, & esloigner de ses conseils & de sa personne, le Cardinal Mazarin.

Plusieurs de Messieurs furent de cet aduis, particulièrement monsieur le President de Nouion, qui l'appuya fort contre le Cardinal, l'appellant la cause immediate de tous nos maux; disant, Qu'il estoit estrange de se voir ainsi maltraiter par vn Estranger, que la fortune plustost que son extraction auoit mis

au dessus de la rouë ; Que la France estoit assez remplie de grands hommes, sans appeller des gens inconnus de son estoife, & qui n'a pour confidens que des Senneterres, des Bottus, & autres manieres de gens qui meritoient la corde, suiuant la notoriété publique.

Ces paroles donnerent lieu à plusieurs de leuer le masque, & de declamer contre la source des desordres du temps, qu'ils attribuent au peu d'experience, & au peu d'affection dudit Cardinal Mazarin ; & sur cela il fut arresté que l'on iroit par Deputez inuiter Messieurs les Princes de se trouuer le lendemain au Parlement, pour estre presens à la deliberation qui s'y deuoit faire touchant la seureté de l'Estat, & à Ruel supplier la Reyne de ramener le Roy à Paris, & d'esloigner les Troupes qui sont encores aux enuirs.

Messieurs les Deputez executant l'Arrest de la Compagnie, furent à Ruel y trouuer la Reyne, à laquelle monsieur le premier President fit entendre l'arresté de la Compagnie cy-dessus enoncé : laquelle leur fit response, qu'il n'estoit pas extraordinaire au Roy, d'aller à la Campagne en ce temps icy pour y prendre l'air, qu'elle n'auoit point de ressentiment de tout ce qui s'estoit passé, & qu'elle les en asseuroit, encores qu'ils n'auoient point de sujet de craindre.

Monsieur le Duc d'Orleans, & monsieur le Prince leur firent response qu'ils ne pouuoient aller au Parlement sans blesser l'autorité du Roy, quoy que monsieur le Duc d'Orleans leur auoit promis auparauant qu'ils parlassent à la Reyne, qu'il s'y trouueroit infailliblement.

Le Conseil du Roy estoit composé du Roy, de la Reyne, de monsieur le Duc d'Orleans, de Messieurs les Princes de Condé, & de Conty, de Longueuille, & de monsieur le Chancelier.

Derriere eux estoit le Cardinal Mazarin, le Marechal de la Meilleraye, & Madame de Senecé debout, qui ne dirent iamais mot.

### *Du Mercredi 23. Septembre.*

**C**E iour Relation faite à la Compagnie de ce qui s'estoit passé à Ruel le iour precedent, les Gens du Roy ont porté vn Arrest du Conseil d'enhaut, portant cassation de l'Arrest du Parlement mentionné cy-dessus; lequel estant leu, & les conclusions des Gens du Roy données, il fut arresté que tres-humbles Remonstrances seroient faites par écrit au Roy pour iustifier les intentions de la Compagnie, & que cependant on continueroit ladite deliberation contre les desordres de l'Estat. Enjoint aux Gouverneurs des villes de tenir la main aux passages des viures : au Preuost des Marchands de parcourir la campagne, & de pouruoir à la seureté de la ville de Paris : & deffenses à Messieurs du Parlement de se dessemparer.

### *Dudit iour.*

**L**E mesme iour le Preuost des Marchands & Escheuins, ont esté par ordre de la Cour à Ruel, ou la Reyne leur a dit, Qu'il falloit empescher ceux qui faisoient des discours pernicieux contr'elle, ainsi qu'elle auoit pris : à quoy ils



deuoient tenir la main, & qu'elle ne vouloit auoir aucune vengeance contre les habitans de la ville de Paris, & qu'elle deuoit partir pour Saint Germain, d'où leurs Majestez ne bougeroient.

Le lendemain la Cour assemblée à l'ordinaire pour continuer leur premiere Deliberation, Monsieur de Choisi Chancelier de monsieur le Duc d'Orleans, & le Cheualier de la Riuere, apporterent au Parlement deux Lettres fort ciuiles, de la part de Messieurs le Duc d'Orleans, & Prince de Condé, dont voicy la teneur.

LETTRES DE MONSIEGNEVR LE DVC  
d'Orleans, & de Monsieur le Prince, A Messieurs  
du Parlement.

*A MESSIEVRS DE LA COVR DE PARLEMENT DV ROY  
Monsieigneur & Nepueu, à Paris.*

**M**ESSIEVRS, Vous sçaez les soins que i'ay pris pour accommoder les affaires presentes, & y apporter tout le tempe-  
rament que le seruice du Roy Monseigneur & Nepueu, & la satisfaction de  
vostre Compagnie ont pû desirer: Et comme i'ay jugé que dans l'estat ou el-  
les se trouuent vne Conference seroit tres-vtile pour regler toutes choses, j'ay  
bien voulu vous faire encore cette Lettre, pour vous prier de deputer quel-  
ques-vns de vostre Corps, pour se trouuer au lieu où sera la Reyne, & aduiser  
aux moyens qui seront conuenables pour l'accomplissement des volonte-  
z de leurs Majestez, & pour le repos public. Je veux croire que vous concourrez  
auec moy dans ce bon dessein, & que vous aurez la mesme creance à ce que  
le sieur de Choisi mon Chancelier vous dira sur ce sujet, que vous l'aurez à  
moy mesme, qui suis,

MESSIEVRS,

Vostre affectionné amy,  
GASTON.

*De Ruel ce 23. Septembre 1648.*

LETTRE DE MONSIEVR LE PRINCE,  
A MESSIEVRS DE LA COVR DE PARLEMENT,  
à Paris.

MESSIEVRS, Ne pouuant aller au Parlement, ainfi que m'auiez tefmoigné le fouhaitter par vofre Deputation d'hier, & prouoyant les inconueniens qui pourroient arriuer fi vous continuiez vofre deliberation fans que j'eusse eu le bien de vous voir auparauint, j'ay creu vous deuoir inuiter, comme monsieur le Duc d'Orleans à Saint Germain, à vne Conference, où nous puiffions traicter des defordres qui peuuent estre presentement dans l'Estat, & tafcher d'y remedier. Le zele que i'ay pour le feruice du Roy, & l'affection particuliere que i'ay pour vofre Compagnie, m'obligent à vous proposer cét expedient pour remedier à des maux auxquels vous & moy, ne pourrions peut-estre plus donner ordre si vous laissez perdre cette occasion. La Reyne est dans tous les sentimens de bonté que vofre Compagnie peut attendre d'elle; monsieur le Duc d'Orleans vous tefmoigne assez les fiens, par les soins qu'il a pris iufques à cette heure, & par la lettre qu'il vous escrit: & moy ie n'ay point de plus forte passion, apres celle que j'ay pour le bien de l'Estat, & pour le maintien de l'authorité Royale, que celle de vous feruir. Faites donc paroistre en cette occasion, cette affection que vous auez tousiours tefmoignée, en contribuant tout ce qui est en vous pour l'accommodement des affaires. Donnez-moy lieu par les feruices que ie vous rendray aupres de fa Majesté, de vous tefmoigner que ie fuis,

MESSIEVRS,

Vofre tres-humble & tres-  
affectionné feruiteur,  
LOVYS DE BOVRBON.

De Ruel, ce 23. Septembre 1648.  
Apportée par le Cheualier de Riuiere.



*Le Ieudy vingt-quatriefme Septembre.*

**C**E iour le Parlement estant assemblé en la maniere accoustumée pour continuer la deliberation, le sieur de Choisi Chancelier de Monsieur le Duc d'Orleans, & le Cheualier de la Riviere, apporterēt lettres de la part de ces deux Princes ci-deuant inserées: Inuitant par icelles le Parlement à vne Conference pour essayer d'accommoder les affaires. Il passa tout d'une voix à la Conference, mais plusieurs furent d'avis qu'elle se fist à Paris, & de prier les Princes, comme l'on auoit desia fait, de venir prendre leurs places au Parlement; neantmoins il passa que l'on deputeroit le lendemain vers les Princes, & on nomma ceux qui y deuoient aller; Et à cause qu'en vne seule Conference les affaires ne pourroient pas estre terminées, & qu'il seroit besoin d'y retourner, il fut resolu que le Parlement ne s'assembleroit point iusques au Mercredi suiuant dernier de Septembre.

*Le Vendredy 25. Septembre.*

**L**E premier President & le President de Longueil deputez, vn President & vn Conseiller de chaque Chambre, tant des Enquestes que des Requestes, avec quatre Conseillers de la grande Chambre, partirent dès le matin pour se rendre à S. Germain à vne heure apres midy, ainsi qu'on leur auoit fait sçauoir. Il n'y eut que Monsieur le Duc d'Orleans, Monsieur le Prince, Monsieur le Prince de Conty, & Monsieur de Longueuille, Messieurs du Parlement n'ayant pas souhaité que Messieurs le Cardinal, le Chancelier ny pas vn de la Cour y assistassent. Monsieur le premier President demanda quatre choses, sçauoir le retour du Roy à Paris, l'élargissement du sieur de Chauigny, ( qui auoit esté emprisonné au Chasteau de Vincènes le 18. du present mois de Septembre ) & de quantité d'autres personnes que l'on tenoit dans les prisons depuis quatre ans, ou qu'on les renouoyast à leurs Iuges pour leur faire leur proces. Ils demanderent en 3. lieu la seureté publique, & enfin la continuation du Parlement iusques à la S. Martin pour les affaires du Roy seulement. Il ne fut rien resolu ce iour-là, & l'Assemblée fut remise au Dimanche suiuant. Monsieur le Duc d'Orleans se formalisa fort de la demande qu'on faisoit de Monsieur de Chauigny, & du bruit que l'on faisoit de son emprisonnement, veu que personne ne s'estoit remué quand il auoit esté tourmenté & chassé hors du Royaume par le Cardinal de Richelieu.

*Le Dimanche 27. Septembre.*

**L**Es mesmes retournerent à S. Germain, le Chancelier assista à cette Assemblée. La liberté fut refusée pour le sieur de Chauigny. M. le Duc d'Orleans ayant dit & soustenu que quand vn Ministre d'Estat auoit commis quelque faute contre l'Estat, ou contre son deuoir, que le Parlement

n'en pouuoit pretendre la cognoissance, à cause que telles fautes ne se peuvent diuulguer sans descouurir les secrets de l'Estat, joint qu'il peuty auoir des intrigues avec les estrangers dont on n'a pas souuent assez de preuues pour faire le procès à vn homme, & qu'il est bon pour en arrester l'effect de s'asseurer de ceux sur lesquels on a deffiance. Messieurs du Parlement demanderent dix millions de rabais sur le total de la taille; on en promit six, dont ces Messieurs promirent faire rapport le Mercredy à la Compagnie, & le Ieudy retourner à saint Germain.

---

CONFERENCES TENUES A SAINT GERMAIN  
en Laye entre Messieurs les Princes, & Messieurs les  
Deputez du Parlement.

*Du Mercredy 30. Septembre.*

C E iour la Cour, toutes les Chambres assemblées, Monsieur le premier President a dict, que suiuant les ordres de la Compagnie il partit le Vendredy sur les dix heures avec Monsieur le President de Longueil, Messieurs Viole, Ferrand, le Musnier & Menardeau Conseillers de la grande Chambre, & Messieurs les Deputez des Enquestes & Requestes; & les Gens du Roy arriuerent à Saint Germain à midy; & aussi tost Monsieur le Tellier Secretaire d'Estat les vint aduertir que la Reyne les attendoit. Ils furent la trouuer dans le vieil Chasteau où le Roy & la Reyne estoient assis; Monsieur le Duc d'Orleans d'un costé, Mademoiselle de l'autre, la chambre estoit toute pleine. Il luy dist que ce seroit manquer à tout deuoir si arriuant ils ne luy donnoient les assurances de la fidelité de toute la Compagnie. Qu'ils ne doutoient point que la Conference à laquelle ils auoient esté commis n'eust esté resoluë par son aduis, & qu'ainfi luy rendoient l'obeyssance à laquelle ils estoient tenus; la supplioient d'honorer le Parlement de la continuation de sa bien-veillance, & qu'il rendroit tousiours des preuues de sa passion inuiolable au bien du seruice de son Prince. La Reyne leur dist, qu'elle estoit contente de voir la Compagnie, qu'elle auoit sceu la Conference, & qu'elle se promettoit que tout s'y passeroit bien, puis qu'elle n'auoit intention que de bien faire à tous, & soulager le peuple autant qu'il se pourra. Monsieur le premier President luy dist, que c'estoit grand aduantage, & qu'au milieu de cette puissance qu'elle exerceoit, & qui estoit respectée par tout le monde, l'euement ne pouuoit estre qu'aduantageux, puis qu'elle auoit le pouuoir de commander, & eux n'estoient en esprit de ne demander que choses iustes, & de luy obeir en tout, comme on est obligé. Ils se retirerent dans la maison que l'on appelle la Capitainerie, où la Reyne auoit comandé qu'on apprestast le dîner: le Maistre d'Hostel en quartier, l'Anmosnier & tous les



Officiers du Roy seruirent. Et incontinent apres disner allerent au Chateau neuf, où Monsieur le Duc d'Orleans a son departement, & le trouuerent en vne chambre proche la salle, & luy dirent, qu'ayans esté commis de venir conferer par la lettre qu'il leur auoit escriue, la Compagnie satisfaisant à ses vœux, & deferant à son ordre, le Parlement l'estoit venu trouuer par ses Deputez: Qu'il sçauoit combien il estoit honoré, & qu'il continueroit tousiours à luy rendre toute sorte de respect. Il les receut avec toutes les ciuilitéz possibles, qui font bien cognoistre l'estime particuliere qu'il fait de la Compagnie, & les fist entrer dans vne salle, où la table estoit preparée, à laquelle il y auoit vne chaire à bras pour luy, & tous les sieges ployans pour les autres. Monsieur le Prince arriua aussi tost avec Monsieur le Prince de Conty, & Monsieur le Duc de Longueuille, & l'on prist place. Monsieur le Duc d'Orleans commença à dire que la Compagnie sçauoit ses intentions pour le bien de l'Estat & pour le soulagement du peuple; qu'il s'estoit assez déclaré quand il y estoit entré, & qu'il y auoit donné ses suffrages; mais qu'il auoit fait plus, qu'il auoit obtenu plusieurs Declarations pour soulager le peuple & pour uoir aux desordres; qu'il auoit fait executer ce qu'il auoit promis, & que l'estat des affaires, à l'extrémité à laquelle elles alloient se reduire, l'auoient encore obligé, continuant en ce mesme esprit, de conferer maintenant, afin qu'ensemble on peust trouuer les moyens que chacun peut desirer, & que c'estoit l'intention de la Reyne, à laquelle illa fortifioit de iour en iour. Qu'en conseruant l'autorité du Roy, il estoit temps d'auiſer aux moyens pour soustenir la gloire de la Couronne, & de mettre vne derniere main; & qu'il peut assureur que de ses momens dépend la paix generale, à laquelle toutes choses sont disposées, & en attendent les nouuelles de iour en iour. Luy premier President dict qu'ils auoient tant d'assurance de sa bonne volonté, & qu'ils en auoient reconnu tant d'effects, qu'ils ne pouuoient douter de l'euement de cette Conference. Qu'il estoit temps, plus que iamais, de preferer les effects aux paroles. Qu'ils luy auoient dict desia assez souuent que l'extrémité des desordres auoit obligé la Compagnie à s'assembler. Que la bonté de la Reyne auoit esté telle qu'elle auoit preuenu les vœux de la Compagnie; & sans attendre les resolutions, enuoyé des Lettres Patentes qui auoient esté verifiees en sa presence: & comme il restoit encore quelques propositions à refoudre au milieu des deliberations, on ſçait ce qui s'est passé, & qui a excité tel bruit, que la Compagnie aura tousiours regret que le mouuement aye aduancé ce que l'on pouuoit esperer, & recevoir de la Iustice que la Reyne doit, que le resultat de l'Arrest donné au Palais Royal porte que le reste des propositions seront remises à deliberer à la Saint Martin, & que toutes choses demeureroient en estat, à l'exception des rentes & du tarif, & l'execution de ce qui a esté cy deuant arresté; & neantmoins ne gardant point cette parole, on auoit veu depuis des exils & des enprisonnemens. En quoy il semble que la ſeureté publique ait esté violée, & que cette contrauention a donné ſubiet nouveau de deliberer, d'autât qu'à ſeure les articles des propositions il y en auoit vn.

qui regardoit les emprisonnemens si frequens & ordinaires; & qu'estant remis à traiter apres la S. Martin, & que tout demeureroit au mesme estat, il n'y deuoit estre cōtreuenue; Qu'il estoit temps de rechercher des remedes pour donner les assurances necessaires. Qu'en suite on auoit veu ce partement si prompt de cette ville capitale, tant du Roy que de tous les grands, & de tant d'autres familles, les enleuemens de tous les meubles; & qu'ainsi les maisons estoient demeurees, les gardes du Roy retirez des Fauxbourgs contre l'usage accoustumé: les aduis de toutes parts de la colere contre la ville, comme si elle deuoit estre affamee & exposee à la ruine prompte, & qu'elle deust souffrir des peines extraordinaires: Que cela auoit donné telle peur dans les esprits des peuples, qu'ils estoient en continuelle crainte. Mais deuant que d'entrer au particulier, auoient charge de demander la continuation du Parlement, & s'il se peut le retour du Roy pour rendre la seureté à Paris; & que la Cōference ne pouuant estre aujourd'huy acheuée, qu'elle soit remise à Paris, où leur presence feroit cesser tous les mauuais bruits, & rassureiroit les esprits, c'est ce qui se peut pour la seureté de Paris. Quant à celle des subjets du Roy, qu'elle ne pouuoit estre establie que par la liberté de Monsieur de Chauigny qui est maintenant traduit par la France comme vn criminel; & si la fidelité de ses seruices, le choix de sa personne en tant d'emplois, l'honneur d'estre Conseiller de la Regence & Ministre d'Estat, ne peuuent donner assurance à quelqu'un, en quelle part de la France trouuera-on la seureté; Qu'il importe donc de faire la loy conforme à l'article des propositions, & que l'on donne telle parole qu'elle ne puisse estre violee pour le soulagement du peuple qui a esté le premier esprit du Parlement; Que la descharge du quart des Tailles soit accordée, le payement des gages & des rentes, & qu'il en soit dressé Declaration, comme des cinq articles de l'Ordonnance de Blois touchant les entreprises du Conseil sur le Parlement, & la descharge du prest sur les Officiers Royaux & subalternes; & pour tous les autres articles des propositions qui auoient esté remises à vn Conseil, qu'il soit tenu si tost que l'on puisse voir vne Declaration conforme, afin que par ce moyen chacun puisse estre satisfait, tant en public qu'en particulier. Monsieur le Duc d'Orleans proposa, que si la Compagnie pouuoit deputer tels qu'il luy plairoit, & leur donner pouuoir de terminer tout, qu'ils le prendroient aussi de la Reyne, & qu'en peu l'on y mettroit vne fin assurée. Le pria luy premier President de n'insister pas en cette proposition, & que cela ne se pouuoit attendre de la Compagnie. Apres il passa à la continuation du Parlement, qu'il se promettoit que la Reyne n'y feroit difficulté: Que pour le retour du Roy si promptement, qu'il sembloit qu'il eust beaucoup de sujet de n'y retourner pas si tost, & que le peuple feroit tousiours assuré en la bonne volonté de la Reyne & en son amour pour tous les peuples; & que si les apparences de diuision cessoient, & qu'elle ne fust plus excitée, l'on verroit bien tost Paris iouyr d'un calme profond, qu'il luy en parleroit & rendroit response. Quant à la Conference pour l'acheuer à Paris qu'il



33  
souhaitteroit que sa santé luy peust permettre, & l'accouchement qu'il attend de Madame, & son deuoir est de ne pas quitter la Reyne, à laquelle il se tient obligé de donner des Conseils, necessaires en tous momens qui suruiennent. Quant à la liberté de monsieur de Chauigny, qu'il n'estoit point Officier de la Compagnie, qu'elle n'y deuoit prendre aucune part, que ce seroit vn déchet d'autorité, si les Roys estans desseruis n'auoient le pouuoir de les faire arrester, qu'en tous les siecles on en auoit ainsi vsé, & les Roys manqueroient d'autorité: mais pour la décharge du peuple qu'il la souhaittoit autant qu'aucun autre, qu'il est impossible de l'establir sans auoir cogneu l'estat de la recepte & de la dépence necessaire, & que la Reyne trouuoit bon que l'on le communiquast, afin que par les aduis de la Compagnie on diminuast tellement la despense qu'il y peust auoir moyen de décharger le peuple de beaucoup d'impôts; Que le principal soin & qui doit estre commis à tous, consiste à regler tellement les fonds qu'il y en aye assez pour faire subsister l'Estat, & cela n'estant point donneroit trop d'aduantage aux ennemis. Monsieur le Prince prist la parole, & dist qu'il y auoit beaucoup de choses desquelles on ne pouuoit rendre responce, sans sçauoir la volonté de la Reyne; mais que la proposition que Monsieur venoit de faire estoit si honorable pour la Compagnie, & si necessaire pour la resolution, qu'il importoit de l'executer au plustost; qu'il peut asseurer que les affaires estoient en tel estat, que s'il n'y est bien-tost pourueu, le mal fera sans remede: que l'on ne paye plus dans les Prouinces tous les impôts, estans certains qu'à Paris mesme il ne paye qui ne veut, puis que l'on ne les peut contraindre sans crainte de tumulte: que les armées deperiront en tel point que les ennemis prendront aisement leurs aduantages: que les Suisses sont venus encor declarer, que si l'on ne leur donnoit leur payement, qu'à la fin de ce mois ils se retireroient du seruice: que deux Regimens qui auoient esté tenus qui estoient de quinze à seize cens hommes au débarquement estoient reduits à trois cent: que la Compagnie auoit trop d'amour pour l'Estat de n'essayer pas de mettre fin à tout au plustost: qu'il n'y auoit point d'autre moyen que de cognoistre l'estat de la recepte & de despense; & lors on prendroit resolution des remedes où tout le monde se portera tres-fauorablement. Respondit luy premier President, qu'ils attendoient la responce des premieres propositions, apres qu'ils auront sceu la volonté de la Reyne; & pour la liberté de Monsieur de Chauigny, quoy qu'il ne fust Officier, il estoit de l'autorité du Parlement de pouruoir à la feureté de tous les sujets du Roy; Que les innocens pourroient patir pour les coupables: Que ce crime d'Estat s'impute à ceux qui n'ont point failly: Que les exemples mauuais ne doiuent pas faire vne loy qui seroit trop de consequence, mais que d'entrer en la cognoissance de la verité de la recepte & despense, ce seroit beaucoup de longueur; & que Messieurs des Finances ayans desia fait ce travail pouuoient bien dès à present declarer quelle remise on pouuoit esperer: Que voulant croire que l'estat qu'ils ont fait est tres-veritable, sans entrer en la cognoissance particuliere, on pouuoit dès maintenant décharger le peuple de quelque partie, & ce faisant l'intention

de la Reyne seroit suiuite, & le dessein du Parlement executé. Et quelques vns de Messieurs les Deputez ayant voulu prendre la parole, le temps s'est passé en beaucoup de redites que l'on ne peut pas expliquer. La Conference fut remise au Dimanche suiuant.

Que Dimanche dernier Messieurs les Deputez ayant pris la peine de se trouuer au logis de monsieur le premier President, ils partirent & arriuerent à saint Germain sur le midy; & incontinent apres le dîné au mesme ordre se rendirent chez monsieur le Duc d'Orleans, qui les receut avec les mesmes ciuilitéz, la table comme aux autres Conferences. Monsieur le Prince de Conty, monsieur de Longueuille vinrent incontinent apres. Monsieur le Chancelier & monsieur le Marechal de la Meilleraye, ont pris place au mesme ordre. Monsieur le Duc d'Orleans prit la parole, & dit qu'il auoit sçeu la volonté de la Reyne, sur ce qui s'estoit proposé Vendredy dernier; qu'elle commanderoit l'expedition de la continuation du Parlement: Que pour le retour du Roy qu'il passeroit encore quelque temps à saint Germain: que pour continuer la Conference à Paris, que l'estat des affaires ne luy pouuoit permettre de demeurer éloigné de la Reyne. Quant à la Declaration sur l'article des emprisonnemens & la liberté de monsieur de Chauigny, qu'en traittant de l'un on traitteroit de l'autre, & qu'en attendant la Reyne donnoit parole de la seureté de tous, & pouuoit assurer qu'elle seroit gardée inuiolablement. Monsieur le Prince donna aussi la mesme parole. Quant à la Declaration sur les cinq articles de l'Ordonnance de Blois, monsieur le Chancelier en parleroit. Et pour la décharge du peuple, qu'il estoit necessaire deuant que de la pouuoir faire d'auoir cognoissance de la recepte & de la despence, & que monsieur le Marechal de la Meilleraye Sur-Intendant declareroit le tout. Luy premier President prit la parole, que l'intention de la Compagnie consistoit en deux choses, & principalement à rendre cette seureté publique par la loy, par la parole & par vn effort present à la liberté demandée, & à la décharge du peuple: Que l'on tiendroient volontiers cette recepte & despence pour veritable; mais comme on auoit calculé le tout, qu'il importoit de sçauoir quelle décharge on vouloit faire, sans laquelle il sembleroit que ce seroit perdre le fruit de cette Conference: qu'elle estoit sceüe par toute la France, & dont chacun attendoit vn euenement fauorable: Que cette décharge regardoit le quart de la Taille demandée tant de fois, les gages des Officiers, les rentes & la grace pour les Officiers subalternes. Monsieur le Chancelier prit la parole par la Declaration sur les cinq articles de l'Ordonnance de Blois accordé, & pour Lettres d'Estat, de Remission & d'Abolition, de six millions de remises sur la Taille; d'un million en la Generalité d'Orleans, & d'un million seulement pour les charges: Qu'il estoit accordé aux Thresoriers de France trois quartiers de leurs gages pour quarante neuf, deux quartiers aux Esleus des gages & droicts, & les Officiers Royaux subalternes déchargez du prest, & le reste des articles de la Chambre saint Louys deuoient estre examinez. Monsieur le Marechal de la Meilleraye par l'ordre que monsieur le Duc d'Orleans luy donna, com-



mença à lire vn estat qu'il tenoit en main de toute la despense à faire à l'aduenir; Qu'il ne parloit point du passé, mais qu'il se promettoit d'y apporter tant de fidelité, qu'il n'y aura plus sujet de plainte; commença par les dépenses de la maison du Roy & de Monsieur le Duc d'Orleans, de Madame, de la Reyne d'Angleterre; l'estat des armées, Ambassadeurs, voyages, marines, artillerie, pensions, entretenement des garnisons de toutes les places de France, & de celles conquises, tant en Flandres, Allemagne, Lorraine, Catalogne, Italie, & par tout ailleurs, & a fait monter le tout à cent quatre millions, la recepte aussi à quatre vingt douze millions, composée des Tailles, Fermes, dons gratuits, Bois, parties casuelles; & qu'ainsi la dépense excédant de douze millions, il essayeroit de diminuer cette dépense pour y trouuer le compte suffisant pour soustenir la gloire de la France. Monsieur le Duc d'Orleans reprit la parole, dit qu'il restoit de travailler sur les articles des propositions de la Chambre saint Louys, & que leudy apres disner l'on reuint, & qu'il se promettoit vne issue fauorable de cette Conference. Il fut arresté que le lendemain on retourneroit, ainsi qu'il auoit desiré & fait promettre son Altesse Royale.

Ce iour Madame de Vendosme fut à l'entrée de Messieurs, les solliciter sur vne Requête qu'elle deuoit presenter au Parlement, par laquelle elle demandoit que Monsieur de Vendosme son mary, & Monsieur de Beaufort son fils eussent la liberté de se venir rendre à la Conciergerie, pour leur procez estre fait s'ils se trouuoient coupables, ou les absoudre s'ils estoient innocens. Elle demandoit aussi permission d'informer des degradations & violences commises par des gens de guerre qui ont logé sur ses terres. Monsieur Laisné estoit chargé de cette requête. Mais monsieur le premier President ayant dit que monsieur Cheualier estoit cy-deuant commis & auoit desia travaillé à l'affaire de Monsieur de Beaufort, qu'on ne pouoit commettre vn autre; & il passa quela requête luy seroit donnée pour en faire le rapport.

### *Du Ieudy premier Octobre.*

**I**L y eut Conference à saint Germain, ainsi qu'il auoit esté arresté. Plusieurs des Presidents au Mortier y allerent ce iour-là; & comme tous estoient sur leur depart, monsieur Vedeau Conseiller de la Cour leur vint dire qu'il auoit aduis certain qu'on denoit arrester le President Viole, & monsieur Menardeau: ce qui estonna fort l'Assemblée. Plusieurs estoient d'aduis que ces deux deuoient demeurer. Monsieur Viole dit qu'il iroit. Monsieur le President de Bellièvre le mena en son carrosse, assurant qu'il le rameneroit. Monsieur le Prince donna à disner à toute la Compagnie, qui les autres iours auoit esté traitée aux despens du Roy. Apres le disner on parla d'affaire, on promit la diminution d'un quart de la Taille sans charge, & de laisser acheuer le Tarif commencé par monsieur de Brussel & autres commis. On donna quelque esperance sur l'élargissement des prison-

niers, mesme de ceux qui estoient à la Bastille il y auoit quatre ans. Si bien que de cette Conference laquelle on craignoit le plus, ces Messieurs retournerent assez satisfaits.

On proposa vn expedient pour terminer toutes Assemblées, tant à saint Germain qu'au Parlement; sçauoir est, au lieu de continuer vn Tarif de toutes les Marchandises en particulier, de diminuer vn tiers ou vn quart de toutes les leuées qui se font, qui fut trouué fort bon; mais il y eut cette difficulté, sçauoir si les impôts verifiez à la Chambre & Cour des Aydes, passeroient pour verifiez au Parlement, & qu'il falloit deliberer de cela en Parlement.

### *Du Vendredy deuxiesme Octobre.*

Ce iour la Cour, toutes les Chambres assemblées, monsieur le premier President a dit, que Messieurs & luy partirent hier sur les neuf heures & demie; monsieur le President de Nemond, Messieurs Viole, Ferrand, le Meusnier, Menardeau de la grande Chambre, & les autres Deputez des Enquestes & Requestes, & arriuerent à saint Germain sur le midy, où trouuerent monsieur le President de Longueil, de Bellievre, & monsieur le President Potier. On trouua encore le dîner prest par les ordres de la Reyne, & furent seruis par les Maistre d'Hostel, & les autres Officiers entrans en quartier; & incontinent apres furent au Chasteau-neuf, trouuerent monsieur le Duc d'Orleans qui les receut avec la ciuilité accoustumée; monsieur le Prince, monsieur le Prince de Conty, & monsieur de Longueville y estoient aussi; & monsieur le Chancelier y arriua & prist place; & monsieur le Duc d'Orleans dist, que monsieur le Chancelier auoit les Arrests suiuant les propositions, & qu'il les expliqueroit, & que la Reyne auoit eu la bonté de les faire examiner en sa presence. Luy premier President dist, que deuant d'entrer sur les propositions de la salle de S. Louys, il y auoit l'article qui regarde la seureté publique qui auoit esté ébranlée par les exils & emprisonnemens, & de la loy qu'ils attendoient response. Monsieur le Chancelier fist vn discours du pouuoir des Roys, & leur obligation de maintenir leur authorité; Que la Reyne durant sa Régence la conserueroit en son entier; & que si la loy quel'on demandoit estoit accordée, cela preiudicieroit à sa puissance: Que ce seroit ouurir le chemin d'entreprendre tout ce quel'on voudroit sans crainte: Que la Reyne auoit donné charge de dire, qu'estant loy toute nouuelle, & n'y en ayant encore de semblable, qu'elle n'estoit pas conseillée del'ordonner, mais qu'elle donneroit toutes assurances: Que monsieur le Duc d'Orleans & monsieur le Prince engageroient la parole de la Reyne, & y adiousteroient toutes les autres assurances possibles au gré mesme de la Compagnie: Qu'elle ne se souuiendra à present ny à l'aduenir en aucune façon des choses passées, & sous quelque pretexte que ce soit ne sera fait aucun mauuais traitement ny au general ny au particulier, ny à aucun: Que l'on ne donnera point de Commissaire à qui que ce soit à l'aduenir, pour quelque crime que ce puisse estre; & si

on



ont fait le procez à ceux qui auront esté arrestez par les ordres de sa Majesté, les fera renvoyer à leurs Iuges naturels, comme auoit fait le Roy Louys II. apres auoir osté les charges, creut qu'il deuoit satisfaire le public par la loy qu'il fist, par laquelle nul Officier ne pourroit estre priué de sa charge que par forfaiture iugée iuridiquement par les Iuges auxquels la connoissance en appartient, & que c'estoit le seul remede que l'on attend de la bonté de la Reyne, & de l'entremise de monsieur le Duc d'Orleans & de monsieur le Prince. Luy premier President dist, que ce n'estoit pas le lieu de toucher les theses du pouuoir des Rois: Que la Compagnie estant obligée de la conseruer, n'y manqueroit iamais: que puisque il plaisoit à la Reyne de donner quelques ordres pour l'assurance desirée, qu'il semble qu'il ne deust point auoir de differend entre la parole & l'escrit, puisque c'estoit sa volonté: que les exemples trop ordinaires de tant d'emprisonnemens obligeroient à rechercher nouuelle seureté: que s'il y auoit quelque exemple, cela estoit si rare, & le mal se passoit si tost, que le remede estoit aussi prompt que le mal. Du temps du Roy Henry le Grand en 1597. il y auoit vn exemple, & encor ne dura il que deux iours, & le commandement de se retirer en sa maison fut aussi tost reuoké. En 1561. il y auoit encor vn exemple, mais que maintenant ce desordre passé en Coustume, & ainsi il est necessaire d'y trouuer assurance & de la donner par la loy, par les paroles, & par la liberté à monsieur de Chauigny emprisonné. Monsieur le Duc d'Orleans a pris la parole, & dit qu'il scauoit le preiudice que cette nouuelle loy apporteroit à l'autorité du Roy, & qu'il auroit peine de conseiller à la Reyne vne autre resolution. M. le Prince aussi a dit, que le mal qui arriueroit seroit extrême, par la liberté qu'un chacun pourroit prendre de l'impunité, comme assurée: Que s'il n'y auoit que les Officiers dans l'assurance de leur fidelité, le remede seroit aisé, mais qu'à la Cour on scait les esprits. Et ayant esté pressé par Messieurs les Presidents & quelques-uns de Messieurs des Enquestes, il dist qu'il scauroit de la Reyne sa derniere resolution, veu l'instance que la Compagnie faisoit, tant sur la loy que sur la liberté; & aussi-tost les articles des propositions furent lûes, & les resolutions que la Reyne y a pris, suiuant lesquelles il seroit dressé Declaration; & apres que mettant fin à tout on pouuoit esperer de la bonté de la Reyne, le quart pour mil six cens quarante-huict, & que le Tarif fait remise encore en faueur du peuple, & iour a esté donné à Samedy pour tenir la Conference; & ayant deliberé ce qu'il y auoit à faire, il fut resolu que l'on retourneroit le lendemain à S. Germain pour le resultat de toutes les affaires, & que le Lundy le Parlement s'assembleroit pour terminer toutes les affaires, arresta que demain passé on ne retourneroit plus à Saint Germain.

L'apresdinée de ce iour le Parlement s'assembla sur le tarif, il osta 40. sols d'impot sur chaque bœuf, & cinq sols sur mouton. Il ordonna que le Lieutenant Ciuil seroit mandé pour faire tenir la main à l'exécution de cet Arrest, & que les Bouchers amendassent la viande. On voulut parler des impots du vin, monsieur de Brussel n'estoit pas encor préparé.

*Le Samedi troisieme Octobre.*

**L**es Deputez du Parlement allerent à la Conference. Il n'y eut de President que le premier. On croyoit que ce deust estre la dernière Conference, & il auoit esté ainsi arresté le Vendredy au Parlement. Mais vne chose pensa rompre tout, & faire perdre le fruit de tant d'allées & de venues. On se formalisa, & trouua fort mauuais à la Cour l'Arrest rendu le Vendredy touchant la diminution des 40. sols pour bœuf, contre la parole qu'auoit donnée le Parlement. Monsieur le premier President dist que cela ne deuoit point arrester vn bon accord; que l'affaire estoit facile à accommoder, il n'y auoit qu'à faire entrer dans le total de la diminution que la Reyne feroit, ce à quoy l'on croyoit pouuoir monter la diminution desdits 40. sols par chacun an. Sur ce il fallut aller à la Reyne, sçauoir son intention. A quoy il se passa beaucoup de temps. Il y eut encor vne autre difficulté sur la seureté publique. Le Parlement demandoit que si quelqu'un estoit emprisonné par ordre de la Cour, il fust interrogé dans les vingt-quatre heures, & renuoyé à son Iuge: la Reyne le promettoit, en donnoit la parole du Roy, certifiée sur celle des Princes, mais ne vouloit pas qu'il en fust rien escrit. Le Parlement demandoit qu'il fust inferé en la Declaration, quel'on promettoit, & disoit, si sa Majesté a dessein de tenir cette parole, elle ne doit pas faire difficulté de la donner autentique & par escrit; La refusant, on a raison de douter qu'elle aye intention de la tenir; cela pensa faire tout rompre. Neantmoins M. le Duc d'Orleans promit de faire consentir la Reyne, si ces Messieurs vouloient reuenir Lundy. A quoy ils respondirent qu'ils ne pouuoient, à cause que le resultat de la Compagnie estoit de s'assembler ce iour-là, & terminer toutes affaires, & que si son Altesse le desiroit, ils retourneroient le lendemain. A quoy son Altesse consentit, & promit de faire accorder à la Reyne ce qu'ils demandoient. De vingt-quatre propositions faites en la Chambre S. Louys, il n'en restoit que celle de la seureté publique, & vne autre, qui ne fussent accordées.

Ce iour monsieur le premier President eut grande prise avec monsieur le Chancelier, touchant les droits qui se leuent au sceau, que le premier President dit n'estre que fripponneries & volleries. M. le Chancelier croyant que ce discours le regardoit, dit, Vous voulez donc inferer de là que ie suis vn voleur. Non, répartit le premier President, mais vous souffrez & autorisez ces volleries. Le Chancelier le voulut attaquer en sa personne & en son honneur, mais le premier President luy respondit, ma vie est sans tache & sans reproche, ie suis tout prest de porter ma teste à la Reyne & par tout ailleurs pour répondre de mes actions, vous n'oseriez le faire. Monsieur le Duc d'Orleans les appaisa, & ainsi se separa la Compagnie.

*Le Dimanche quatrieme d'Octobre.*

**L**es susdits Deputez allerent à S. Germain apres auoir dîné, n'estant plus resolu de se faire traiter aux despens du Roy, ainsi qu'ils auoient tousiours fait, hormis le iour que monsieur le Prince les traita. Les propo-



sitions faites en la Chambre S. Louys furent toutes accordées, la seureté fut accordée aux Cours Souueraines telle qu'on la demandoit; & pour les autres personnes de quelque qualité ou condition qu'ils puissent estre, il fut arresté que l'on les interrogeroit trois iours apres leur detention. On remit vn quart de la Taille, on accorda la suppression des droits du Sceau qui se leuent depuis 1631. non verifiez. Et de tout cela, arresté que l'on en donneroit vne Declaration, laquelle le Parlement fut prié de dresser, afin qu'il n'y eust point de contestation, d'allée & venuë, & que tout fust terminé en bref.

*Le Lundy cinquiesme d'Octobre.*

C E iour la Cour, toutes les Chambres assemblées, monsieur le premier President a dit, que Samedy dernier Messieurs les Deputez avec luy partirent encor pour aller à S. Germain, où ils arriuerent sur le midy, & incontinent apres disner allerent au Chasteau-neuf; monsieur le Duc d'Orleans les y receut avec toutes les ciuilitéz ordinaires; monsieur le Prince, monsieur le Prince de Conty, monsieur de Longueuille, monsieur le Chancelier, monsieur le Marechal de la Meilleraye Sur-Interdant des Finances arriuez, on prist place, & monsieur le Duc d'Orleans dist, que deuant que rendre responce, monsieur le Chancelier auoit charge de la Reyne qu'il expliqueroit. Monsieur le Chancelier dit, qu'il auoit charge de la Reyne de se plaindre, qu'au milieu de la Conference, au preiudice de la parole, & contre les termes de l'Arrest de la Cour, donné en presence de monsieur le Duc d'Orleans, on auoit fait imprimer & publier vn Arrest, portant defences de leuer quarante sols sur le pied fourché. Monsieur le premier President prit la parole; que c'estoit le plus grand honneur qu'il pouuoit receuoir, que d'auoir sujet de donner compte des actions de la Compagnie: Qu'il auoit pleû à la Reyne de commander tant de fois qu'on trauaillast au Tarif, que l'on s'estoit assemblé Vendredy apres disner, que l'on auoit examiné trois articles du bail des Aydes: le premier qui regarde le droit qui se prend sur les Cabaretiers, qui auoit esté iugé bon: le deuxiesme impost sur les

& s'y estant trouué quelque difficulté sur la verification faite en presence de monsieur le Comte de Soissons, on auoit passé au troisieme qui touche 40. sols pour boeuf, & autres choses: dit que ce droit auoit esté estably par l'Edict du sol pour liure, mais qu'il a esté reuocé par Arrest, à la reserue desdits 40. sols, & autres droits, lequel Arrest n'a esté enregistré, & ainsi que c'est vne leuée en vertu d'un Arrest du Conseil, ce qui est defendu par Arrest de la Cour, & ainsi on l'a executé, tant s'en faut que l'on y aye contreuenue. Que lors de l'Edict l'on auoit promis à la communauté des Bouchers de ne le leuer plus apres le premier bail: qu'ils auoient présenté Requête pour obtenir des defences, que ce droit ne se paye que par force, & les Fermiers n'en recoiuent rien: que c'est pour exciter bruit, qu'il faut euitier, & qu'ainsi que l'on a fait defences. Apres cela monsieur le Duc d'Orleans a dit, qu'il auoit représenté à la Reyne l'instance que la Compagnie auoit faite pour obtenir vne loy d'assurance pour tous, & que la Reyne ne s'estoit peu resoudre à accorder cette loy nouuelle, com-

me preiudiciable à son autorité. Témoigna luy premier President le regret qu'il resteroit à la Compagnie, que ses iustes sentimens n'auroient peu vaincre l'esprit de la Reyne: que cette loy estoit necessaire pour l'assurance publique, s'il falloit laisser la fortune de tous à l'incertain exposée aux faux bruits & calomnies; qu'il y auoit bien plus de preiudice à la faire qu'à l'establir: puis qu'il plaisoit à la Reyne donner seureté, on pouuoit oster la difficulté de la mettre plustost par escrit, que de la donner de parole: & si son autorité n'estoit pas blessée par la parole, elle ne le pouuoit estre par la loy escrite & publiée: ayant charge de tirer réponse certaine. Monsieur le Duc d'Orleans se leua, & monsieur le Prince, monsieur le Prince de Conty, monsieur de Longueuille, monsieur le Chancelier & monsieur de la Meilleraye, & parlerent ensemble en vn coin de la salle: & monsieur le Chancelier s'en alla trouuer la Reyne, & monsieur de la Meilleraye aussi; apres monsieur le Duc d'Orleans, monsieur le Prince, monsieur le Prince de Conty, monsieur de Longueuille, furent aussi trouuer la Reyne; & estans demeurez long-temps, voulurent nous prier avec tant d'instance de reuenir, l'affaire estant assez importante pour prendre le temps d'y penser, & qu'il se promettoit que l'on ne luy refuseroit. Nous luy dismes que nous nous y rendrions le lendemain, ce qui a esté executé; arriuez sur les deux heures, & estans allez sur les trois heures chez monsieur le Duc d'Orleans, il a dit que monsieur le Chancelier declareroit la resolution que la Reyne auoit prise. Il a exposé encore les difficultez qui se pouuoient rencontrer en l'establissement de cette loy nouuelle, neantmoins qu'enfin la Reyne s'estoit resoluë d'en faire vne suiuant l'escrit qu'il tenoit, qu'il a leu & laissé pour le faire voir à la Compagnie, & apres en dresser la loy pour l'assurance de tous, & de trois mois au lieu de six; & pres a parlé du quart de la Taille pour 1647. qu'elle estoit receüe, & les sommes assignées pour la dépense de la maison du Roy & de la guerre pour 1648. l'accordoit, les charges deduites qui seront expliquées, afin qu'on peult scauoir ce que chacun iouyroit de décharge pour 1648. que l'on n'en pourroit douter, d'autant que le breuet de la Taille le porteroit. On a proposé pour la somme à diminuer sur les especes contenues au Tarif, qu'ayant desia esté osté 26. sols sur le vin, & 40. sols sur le bœuf, & des autres à proportion, que tout ce que l'on pouuoit obtenir estoit d'oster le petit Tarif qui se leue aux portes, & sur l'eau, qui montoit pour vn nouveau bail à cinq ou six cens mil liures, ou diminuer autant sur les especes, comme la Compagnie le trouueroit bon. Et apres on a parlé de la liberté de monsieur de Chauigny, laquelle estant accordée declareroit la volonté de la Reyne en l'exécution de cette loy. Monsieur le Duc d'Orleans a dit, qu'il estoit compris dans le temps de la loy. Luy premier President respondit, qu'apres ce temps c'estoit necessité d'y satisfaire, & que l'on se promettoit la grace presente, il a respondu n'auoir autre parole, & qu'il falloit esperer qu'on n'attendroit pas le temps. On a leu apres ce qui auoit esté remarqué sur chacun des articles des propositions, comme pour les gages des Presidiaux, les droicts du Sceau, Lettres de respy & taxes par



les Collecteurs, reuocation des priuileges de vendre des marchandises, & le tout a esté accordé, & que la Compagnie prist la peine d'en faire dresser la Declaration, de l'enuoyer par les Gens du Roy ou autres, qu'elle seroit expedice selon l'intention de la Compagnie. Et estant près de six heures auoier eux Deputez pris congé & remercié Monsieur le Duc d'Orleans. Et ainsi la Conference a finy. Monsieur le Duc d'Orleans & monsieur le Prince ont témoigné l'intention de la Reyne, de mettre fin au plustost à toutes ces affaires qui retardoient tous les desseins, ne se receuant rien du tout, & que l'on auoit trop d'interest à la conseruation de l'Estat, pour n'y contribuer pas en ce qui estoit en nostre pouuoir.

Ce iour la Cour, toutes les Chambres assemblées, delibérant sur le recit fait par Monsieur le premier President de ce qui luy a esté dict, & à Messieurs les Deputez en la Conference tenuë à Saint-Germain en Laye, a esté arresté & ordonné que lesdits sieurs Deputez s'assembleront dès aujourd'huy pour concerter les articles qui restent à examiner, en faire rapport à ladite Cour mercredy prochain, & delibérer.

### *Le Mercredy 7. Octobre.*

**L**E Parlement assemblé on y leut toutes les propositions. Monsieur de Laffemas eut prise avec le President de Mesme, pour auoir dict en opinant sur le fait des rentes sur le Roy, que l'on a remboursees, qu'il ne falloit pas renuoyer cela à la Chambre de Iustice, comme pretendoit le President de Mesme, d'autant que ladite Chambre estoit composee de personnes choisies, non pour rendre Iustice, mais pour faire ce qu'il plaira à la Cour. Monsieur de Mesme dit, qu'estant premier President de cette Chambre cela le regardoit, qu'elle estoit composee de personnes choisies pour rendre la Iustice; que c'estoient tous Iuges de probité & vertu. Apres qu'il eut dit ce qu'il voulut, Monsieur de Laffemas poursuit son discours, & dit qu'il estoit d'auis que le Parlement retint la cognoissance de cette affaire pour en rendre meilleure iustice.

### *Le Ieudy 8. Octobre.*

**L**E Parlement assemblé ordonna que ceux qui ont achepté des rentes ou droicts sur le Roy, & s'en sont fait rembourser, ou les ont donnees en payement au Roy au denier quatorze, remettront en ses coffres les deniers qu'ils ont touchez, & reprendront des contrats pour iouyr des rentes, ainsi qu'ils faisoient auparauant, ou ceux dont ils auoient acheté les droicts.

Ce mesme iour apres disner il y eut autre Arrest, par lequel les veufues & enfans des partisans & leurs heritiers, furent rendus responsables de leurs debtes, tant enuers le Roy que particuliers, nonobstant toutes separations de biens, ou renonciations aux Communautés ou aux successions.

*Le Samedi 10. Octobre.*

**I**l y eut Arrest portant cassation de tous les Officiers de la Chancellerie, & droicts leuez sur le sceau non verifiez depuis l'année 1631. & que ceux qui en auront au precedent rapporteront leurs tiltres.

Ce iour on supprima la Jurisdiction souveraine des Requestes del'Hostel, excepté ce qui seruira à l'instruction des affaires du Conseil. On supprima aussi tous les Officiers Triennaux & Quatriennaux.

On trauailla l'apresdinée aux imposts sur le vin pour lesquels les trois derniers iours il y auoit eu grand monde & grand bruit au Palais, tous les Cabaretiers & Marchands de vin s'estans plaints qu'on arrestoit les bateaux sur la riuere, attendant ce qui seroit ordonné par le Parlement sur les entrees, & autres droicts du vin.

*Lundy douziesme Octobre.*

**L**E Parlement assemblé matin & de releuée trauailla ausdits imposts du vin, & comme c'estoit vne affaire difficile ne fut pas acheuée. Ce iour là les marchands de vin & cabaretiers en grande troupe dans le Palais voulurent arrester le President le Feron Preuost des Marchands, à cause qu'il n'auoit pas esté d'auis de remettre les cinquante-huict sols que d'autres Conseillers propoisoient de remettre, voulant expliquer ledit impost. Ils le soubçonnoient outre ce d'auoir pris de l'argent pour passer à la ville plusieurs Offices qui ont esté créés pour lesdits imposts, il eust esté mal-traité s'il ne se fust sauué. On luy prist les coussinets de son carosse qui luy furent rendus le lendemain.

*Le Mardy treiziesme Octobre.*

**L**E Parlement assemblé continua cette deliberation, il eut lettre de cachet pour aller l'apresdinée à S. Germain, ce qu'il fit par deputez, deux de chaque Chambre. La Reyne leur dit qu'elle desiroit que toutes affaires fussent terminees dans peu de iours; & pour leur donner subject de les diligenter au lieu de cinq cent mille liures qu'elle offroit de remettre sur tout ce qui se leue es entrées de Paris, elle promettoit de remettre iusqu'à douze cent mille liures, ayant fait tres-bon accueil à tous ces Messieurs tant en general qu'en particulier.

*Du Mercredi quatorziesme Octobre.*

**L**E Parlement assemblé delibera sur ce qui auoit esté dit & promis par la Reine le iour precedent, sans parler de l'entrée du vin; si bien que les Cabaretiers & Marchands assemblez en grand nombre, ayant appris qu'il n'y auoit point encor d'Arrest, jetterent sur les Presidens comme ils sor-



tirent. Le premier President se sauua chez luy, le President de Nesmond eut sa robbe deschirée, & tous les autres fort poussez & secotiez, ayans eu peine à se sauuer chez le premier President.

L'apresdinee ils enuoyerent querir le Lieutenant Criminel, Preuosts & Archers pour se faire escorter à l'entrée, & empescher la furie des Marchands en grand nombre; ils leur donnerent Arrest de cinquante-huit sols de diminution d'entrée sur chaque muid de vin & d'autres droicts portez en la Declaration cy-apres. Auant que sortir ils le firent publier au Palais, ce qui donna vne grande joye, chacun criant, Viue le Roy.

### *Le Iendy quinZiesme Octobre.*

**L**E Parlement assemblée passa la matinée à reuifer l'Arrest du iour precedent, auquel il y auoit difficulté sur ce qui se paye aux iurez vendeurs & Controoleurs, qui est vn escu sur chaque muid de vin, lequel se payoit plusieurs fois par la vollerie desdits iurez vendeurs qui exigeoient ledit droit autant de fois que le vin se vendoit & reuendoit.

Il fut arresté que la Reine seroit suppliée de remetre sur toutes les entrées iusques à deux millions, quoy faisant toutes assemblées cesseroient. Ils deputerent les Gens du Roy vers sa Majesté qui allerent le iour mesme à S. Germain, où ils furent bien receus; la Reine leur accorda ce qu'ils demandoient, à la charge que toutes assemblées cesseroient.

### *Le Vendredy seiziesme Octobre.*

**L**E Parlement ayant appris des Gens du Roy la remise desdits deux millions, trouuailla à regaler cette somme sur toutes les marchandises, en sorte que le peuple en fust soulagé. Ils trouuaillerent encor le Lundy 19. le Mardy 20. & le Mercredy 21. comme aussi à la Declaration, encor que l'ordre soit au Conseil de la dresser, & l'enuoyer au Parlement toute dressée & scellée.

### *Le Iendy vingt-deuZiesme Octobre.*

**M**essieurs du Parlement allerent par deputez à saint Germain remercier la Reine de la remise desdits deux millions, & luy porter la Declaration, laquelle ils laisserent pour estre examinée au Conseil d'en haut. Ils furent tres bien receus & regalez par Monsieur le Duc d'Orleans d'une magnifique collation. La Reyne leur témoigna beaucoup de satisfaction de ce que tout estoit accommodé.

### *Du Vendredy vingt-troiziesme Octobre.*

**L**E sieur Saintot rapporta dès le matin ladite Declaration scellée, sans qu'il y eust rien esté adjousté ou diminué. Messieurs arresterent que le lendemain l'Audience tenant elle seroit publiée & enregistrée, afin de ne

tenir plus le peuple en suspens. Pour ce on fit publier l'Audience pour le lendemain à l'heure ordinaire.

Madame de Vendosme alla au Parlement pressant l'enterinement de sa requeste, on luy donna le soit monstre.

### *Le Samedi vingt-quatriesme Octobre.*

**S**ur les huit heures du matin Messieurs les Presidens & Conseillers de la grande Chambre estans entrez, & ayans pris leur place, on fit ouvrir les portes pour l'Audience comme en plein Parlement, la Declaration y fut leüe, publiée & registrée, elle fut bien receüe, d'autant qu'elle alloit fort au soulagement du peuple.

Elle portoit diminution d'un cinquiesme des Tailles, Taillon & subsistances sur le pied de cinquante millions pour les années de 1648. & 1649.

Item, suppression du droit de Maubouge & du petit tarif estably en 1646. à la reserue de l'ancien barrage qui demeure pour quatre vingt mille liures, le payement des gages des Officiers, defences de recevoir aucun remboursement des rentes deuës par sa Majesté qu'apres la paix publiée; suppression des Comptans, sinon es affaires secrettes & importantes de l'Estat.

Qu'il ne sera fait aucune creation d'Officiers de Finances & de Iudicatures pendant les quatre années prochaines.

Que tous les biens de ceux qui ont pris les fermes & traité avec le Roy, de leurs cautions, associez & interessez, & ce qui a esté donné par eux en faueur de mariage à leurs enfans ou autrement, mesmes les offices dont ils auront esté pourueus, demeureront affectez & hypotequez au Roy, & à tous leurs creanciers; & que les separations de biens d'entr'eux & leurs femmes iugées depuis leur traité seront & demeureront nulles.

Que les Maistres des Requestes ne pourront instruire & iuger en leur Auditoire autres matieres que celles dont la cognoissance leur appartient par les Edicts & Ordonnances, ny iuger en dernier ressort & souuerainement aucun procez.

Que les Officiers des Cours souueraines & autres ne pourrōt estre troublez en l'exercice & fonction de leurs charges par lettre de cachet ou autrement, le tout ainsi qu'il se peut voir plus amplement en la Declaration, laquelle ayant esté publiée & registrée en la maniere accoustumée, on appella & plaida vne cause seulement pour la forme, apres laquelle le Parlement finit, n'y demeurant que ce qu'il falloit pour acheuer le temps en la Chambre des vacations, iusques à la veille S. Simeon, auquel iour tout finit.

Dans toutes les Conferences lors que la Reine estoit suppliée de ramener le Roy, elle resmognoit qu'il n'estoit sorty que pour se promener comme il auoit coustume de faire en cette saison-là, & qu'elle le rameneroit à Paris lors que le mauuais temps ne luy permettroit plus d'estre à la campagne; si bien que ces Messieur n'insistant pas dauantage laisserent à la Reine de donner cette satisfaction à tout le monde quand il luy plairoit.

Enfin le dernier iour d'Octobre Paris eut le bon-heur de reuoir son Roy, dont l'absenceluy auoit causé beaucoup de déplaisir.





# SVITTE DV IOVRNAL

*Commençant au Ieudy 12. du mois de Novembre,  
de l'année 1648. iour de l'ouuerture du Parlement.*



E Ieudy 12. Novembre l'ouuerture du Parlement estant faite à l'ordinaire, quelque temps apres Messieurs recommencerent leurs Assemblées, au sujet des troupes que l'on faisoit venir de tous costez aux enuiron de Paris, au prejudice de la parole qui auoit esté donnée qu'elles n'en approcheroient de vingt lieues; & aussi que Messieurs du Conseil taschoient en quelque façon d'empescher l'exécution de la Declaration, verifiée le vingt-quatriesme Octobre dernier.

*Du Vendredy 27. Novembre.*

**L**A quelle Declaration ayant esté portée en la Chambre des Comptes, auroit esté ce iour verifiée les Semestres assemblez avec plusieurs modifications, clauses & conditions, attendu les oppositions de plusieurs Officiers qui y estoient interessez, ainsi qu'il se peut voir en l'Arrest de verification.

Messieurs de la Cour des Aydes ausquels on auoit porté cette mesme Declaration, dans ce mois de Novembre pour la verifier, y auroient apposé aussi plusieurs modifications, entr'autres auroient fait desfenses à toutes personnes de faire aucun traité sur les Tailles, à peine de confiscation de corps & de biens; ce qui commença à faire grand bruit, d'autant que les sieurs Bonneau & Marin, auoient desia traité desdites Tailles, dont Messieurs du Parlement se feroient aussi emeus.

*Du Mercredy 16. Decembre.*

**L'**Inexécution de la Declaration susdite paroissant de plus en plus, Messieurs du Parlement se feroient assemblez ce iour, où se feroient trouuez

par ordre de la Reyne, monsieur le Duc d'Orleans, & monsieur le Prince, assistez de plusieurs Ducs & Pairs ; & auroit esté dit par monsieur le Duc d'Orleans, que la Reyne ayant esté bien informée, que Messieurs du Parlement recommençoient à s'assembler, sur la plainte qu'ils faisoient que cette Declaration n'estoit point executée ; neantmoins croyant auoir donné tout contentement, & son intention n'estant autre que l'observation exacte de ladite Declaration, elle trouuoit mauuais que tout le Parlement s'assemblast derechef, ains vouloit que ce fut seulement par Deputez, qui verifiroient icelle d'article en article ; & au cas qu'il se trouuast qu'il y eust changement ou inexecution en quelques-vns, elle y apporteroit remede. Sur ce Messieurs auroient fait vn grand bruit, demandans ce que l'on auoit fait de quatorze ou quinze millions qui auoient esté leuez, depuis que monsieur le Marechal de la Meilleraye auoit le maniement des Finances, veu que l'on n'a fait aucun payement aux gens de guerre, & que les Officiers & Rentiers n'ont receu ny gages ny rentes, mesmes que la table du Roy a manqué vn iour : D'ailleurs que les troupes approchoient de Paris, & gastoient tous les lieux par où elles passoient. Là dessus les opinions ayant esté prises, monsieur le Prince les auroit voulu interrompre, & soustenir en termes aigres & remplis de menaces, ce qui auoit esté fait par Messieurs du Conseil, dont quelques-vns de Messieurs ayant tesmoigné du mescontentement, & qu'il n'y auoit aucune liberté aux suffrages, l'heure aussi ayant sonné, on se seroit leué, & l'affaire remise au lendemain.

### *Du Iendy 17. Decembre.*

**C**E iour Messieurs le Duc d'Orleans & le Prince, assistez de plusieurs Ducs & Pairs, seroient retournez au Parlement, ou les Chambres assemblées, monsieur le Duc d'Orleans auroit parlé avec grande ciuilité, & monsieur le Prince avec plus de douceur que le iour precedent ; de sorte que la Cour delibérant sur les propositions faites le iour d'hier par monsieur le Duc d'Orleans, auroit ordonné, Qu'assemblée seroit faite par Deputez chez monsieur le premier President pour verifier ladite Declaration d'article en article, & corré ceux ausquels se trouueroit auoir esté contreuenue, pour le tout rapporté à la Cour, estre ordonné ce que de raison.

Ce mesme iour monsieur le Procureur General ayant fait plainte que les Capitaines, Soldats, & gens de guerre exerçoient plusieurs violences, outrages & exactions en tous lieux, mesmes aux enuirs de Paris, en sorte qu'il y auoit peril que les Villages & les Bourgs ne fussent abandonnés ; requerant que la Cour, par sa prudence accoustumée y pourueut, en sorte que la seureté publique fut toute entiere, & les sujets du Roy soulagez : L'affaire mise en deliberation, la Cour auroit arresté que Commission seroit deliurée au Procureur General, pour informer des faits contenus en sa plainte, pour les informations faites, rapportées, & à luy communiquées estre procedé ainsi que



de raison ; Et auroit fait inhibitions & deffenses à tous Gentils-hommes, Capitaines & autres, de commettre aucunes exactions, voyes de fait & violences, à l'endroit des sujets du Roy, à peine de la vie ; leur enjoignant de viure & se contenir, suivant les ordonnances, & se retirer en leurs garnisons ; & en y allant deffenses de séjourner plus d'une nuit en mesme lieu, sans demeurer au plat pays : Et que la Reyne seroit tres-humblement suppliée de ne permettre que les passages, par ou les viures & commoditez arriuent journellement à Paris, fussent tenus par les gens de guerre.

Pendant ce temps le Parlement estant occupé à rendre la Iustice au peuple, courut vn bruit qu'à la Messé de My-nuit, lors qu'un chacun seroit aux Eglises à ses deuotions, se deuoit faire vn grand tumulte dans Paris, par les Soldats qu'on y auoit fait entrer.

On disoit aussi que le Cardinal Mazarin auoit dessein d'enleuer le Roy, & le mener ou à Blois ou à Tours ; d'autres disoient à Lion ou à Dijon ; ce qui fut tellement secret, que personne ne pût qu'en juger.

*Du Lundy 21. Decembre, 1648.*

**C**E iour à cause des modifications apposées par Messieurs de la Cour des Aydes à la Declaration susdite, & deffenses par eux faictes à toutes personnes de faire aucun traicté sur les Tailles à peine de la vie, ils auroient esté mandez au Palais Royal, ou en presence de la Reyne, de monsieur le Duc d'Orleans, de plusieurs Ministres & Officiers de la Couronne ; Monsieur le Chancelier auroit dit aux deputez de cette Compagnie, Que le Roy par l'auis de la Reyne sa Mere ayant remis à son peuple trente cinq millions par an, elle auoit crû que les Compagnies faciliteroient les leuées du reste dans les necessitez presentes qu'il y auoit d'entretenir les troupes, & d'attirer celles que l'on alloit licentier en Allemagne ; qu'autrement les ennemis de l'Estat en tireroient aduantage, & grossiroient si fort leurs armées, qu'il seroit impossible de leur resister : Que les deniers des Tailles n'estoit pas vn argent prest, qui ne pourroit estre perçu que neuf mois apres l'imposition, ce qui estoit impossible d'attendre sans mettre les affaires en vn extrême danger : à quoy l'on pouuoit seulement remedier en faisant des traictez sur lesdites Tailles, comme auparauant ; & que pour cet effet la Reyne desiroit que l'on ostant de l'Arrest, ces mots *de confiscation de corps & biens.*

Monsieur Amelot premier President de la Cour des Aydes, auroit sur ce fait vne belle Harangue à la Reyne, & l'auroit remercié de la remise faite par sa Majesté, & representé les necessitez de l'Estat, les incomueniens qu'il y auoit de mettre les Tailles en party, & tous les desordres dont on se plaignoit dans le temps present ; demandé la reuocation de tous les traitez des Tailles, de tous les partis, & de tous les Edits qui vont à la foule du peuple, particulièrement de ceux qui n'ont pas esté verifiez dans vne entiere liberté de suffrages, l'éloignement des troupes vers la frontieré, avec la punition de leurs excez

& la liberté des prisonniers d'Estat, le rapel des absens, & le reſtaſſement des Officiers interdits; en vn mot l'exécution entière de la dernière Declaration.

Sur cela monsieur le Chancelier auroit repris la parole; & dit, Que n'y ayant point de reuenu plus clair que les Tailles, il estoit beſoin de faire des aduances sur les deniers qui en prouieroient, afin d'auoir vn fonds pour les neceſſitez vrgentes de l'Eſtat, & qu'ainſi leur Compagnie deuoit expliquer ſon intention, & les modifications appoſées sur cet article; en ſorte que ceux qui voudroient faire quelques aduances sur les Tailles le peuſſent faire avec ſeureté, & ſans crainte d'eſtre recherchez à l'aduenir.

*Du Mardy 29. Decembre.*

**M**effieurs du Parlement ayant eu aduis que Meſſieurs de la Cour des Aydes, apres leur deputation au Palais Royal, auoient donné Arreſt, par lequel ils permettoient de faire des preſts & aduances sur les Tailles pour ſix mois, ſe ſeroient assemblez ce iour lendemain des feſtes de Noël, tant sur cet Arreſt qui contreuenoit directement à la Declaration du 24. Octobre, que par ce que l'on ſçauoit qu'il y auoit vne autre Declaration à la Chambre des Comptes, qui autorifoit les preſts, non ſeulement pour ſix mois, mais pour tant de temps, & pour telle ſomme que Meſſieurs du Conſeil trouueroient à propos.

*Du Mercredi 30. Decembre.*

**D**e ſorte que ce iour pour remedier à ces deſordres, Meſſieurs du Parlement ſe ſeroient encor assemblez, & auroient enuoyé Radigues à Meſſieurs de la Chambre, les prier d'enuoyer quelqu'un de leur Compagnie, pour leur dire le contenu en icelle Declaration: ſurquoy ils auroient député monsieur le Preſident Aubery, & quatre Maiſtres des Comptes.

*Du Iendy 31. Decembre.*

**L**eſquels ſeroient venus ce iour au Parlement les Chambres eſtans assemblees, & monsieur le premier Preſident ayant déclaré audit ſieur Preſident Aubry le ſujet pour lequel la Cour l'auroit enuoyé prier de venir; il auroit fait reſponſe n'eſtre pas parfaitement inſtruit du contenu en icelle Declaration, n'ayant pas ſceu que la Cour l'auoit mandé pour cela; & que ſi elle le deſiroit, ils'en inſtruiroit & viendroit le Samedi 2. iour de Ianuier 1649. informer la Cour de tout ce qu'elle contient: ce qu'il n'auroit pourtant pas fait, à cauſe que ladite Declaration auroit eſté retirée de la Chambre le lendemain par le ſieur Preſident Tubeuf.



*Du Vendredy premier Ianuier 1649.*

**C**E iour fut retiree par monsieur Tubœuf President en la Chambre des Comptes de la part du Roy, la Declaration qui auoit esté portée à ladite Chambre pour la permission des prests sur les tailles; elle auoit donné sujet à la derniere Assemblée du Parlement le iour de deuant dernier de l'année 1648. auquel le President Aubry & quatre Maistres des Comptes auoient esté priez de venir informer le Parlement du contenu en ceste Declaration; Monsieur le President Aubry ayant fait response n'en estre pas assez bien instruit pour en rendre compte à la Cour, il auoit esté remis au Samedy suiuant, auquel iour il deuoit retourner au Parlement.

On fut en doute quel rang on donneroit au President Aubry, & il luy fut donné la place en laquelle on a de coustume de faire placer les premiers Presidents des autres Parlemens, dont il se contenta.

*Du Samedy 2. Ianuier.*

**C**E iour le Parlement se deuoit assembler, il ne le fut point, à cause que Messieurs de la Chambre enuoyerent Bourlon leur Greffier en chef aduertir le Parlement, que la Declaration estoit retiree; ainsi le sujet de l'Assemblée ayant cessé, elle fut remise au Lundy, du Lundy au Vendredy, auquel iour se deuoient faire beaucoup de propositions sur l'inexecution de la Declaration du mois d'Octobre 1648. à laquelle on contreuenoit à la Cour en tous ses articles, & pour laquelle le Parlement s'estant Assemblé plusieurs fois depuis la sainct Martin, Messieurs le Duc d'Orleans & le Prince auoient esté deux fois au Parlement, ou monsieur le Prince auroit de parole & d'action menacé Messieurs du Parlement sur la plainte qu'ils faisoient qu'on ne leur tenoit, ny au peuple, aucune des paroles qu'on leur auoit donnees.

*Du Lundy quatriesme Ianuier.*

**L**E Roy, la Reyne, le Cardinal Mazarin, & les Princes allerent au Palais d'Orleans, à cause de l'indisposition de monsieur le Duc d'Orleans; on dit que c'estoit pour tenir Conseil de guerre, & que l'on y menoit le Roy pour commencer à l'instruire aux affaires; mais ce fut pour faire consentir son Altesse Royale à la sortie cy apres, à laquelle il n'auoit encor pû se résoudre, & auoit donné sa parole de ne point sortir Paris, quand bien la Cour s'en iroit. Ce fut l'Abbé de la Riviere qui luy fit changer de résolution, incité par la promesse du Cardinal Mazarin, qui l'asséuroit (à ce que l'on disoit) du Chapeau de Cardinal, s'il pouuoit gigner l'esprit de son maistre.

### *Du Mardy cinquiesme Ianuier.*

**C**Hacun ce iour là estoit en resiouyſſance, pendant que la Cour tramoit ce qui arriua la nuit ſuiuante. Le Mareſchal de Grammond donna à ſouper au Roy, il ſe fit vne Royauté contre la couſtume de France de ne point faire Royauté en la maiſon du Roy, ny ou eſt ſa Maieſté; il fit repreſenter la Comedie, apres laquelle on mena coucher le Roy, lequel on ne laiſſa long-temps en repos.

### *Du Mercredi ſixieſme Ianuier.*

**C**E iour ſur les quatre heures du matin, le Roy Louys XIV. âgé de dix ans quatre mois eſt fortý de Paris; la Reyne, monſieur le Duc d'Anjou, & le Cardinal mazarin, alla à ſainct Germain: ceſte ſortie ſe fit en ceſte ſorte. Sur les trois heures du matin, monſieur le Duc d'Orleans qui auoit les gouttes, ſe fit porter en chaire à la porte de la Conference; laquelle ayant fait ouvrir, & pris les clefs d'icelle, il monta en vne chambre pour ſe chauffer: peu de temps apres, Meſſieurs le Prince, le Prince de Conty, Duc d'Anguyen, & le Cardinal Mazarin y arriuerent attendant la Reyne, laquelle ne tarda pas beaucoup apres à ſe rendre à ladite porte, avec le Roy, monſieur le Duc d'Anjou, monſieur de Villeroy, & monſieur de Villequier Capitaine des Gardes du Corps: eſtans tous ſortis du Palais Cardinal par la porte de derriere, quand ils furent tous Aſſemblez, ils s'en allerent iuſqu'au milieu du Cours où ils s'arreſterent, & enuoyerent le ſieur de Cominge faire leuer Mademoiſelle, & luy porter ordre de monſieur le Duc d'Orleans ſon pere, de monter preſentement en caroſſe & les venir trouver. Ils s'en allerent tous à ſainct Germain, le Chancelier, les Secreſſaires d'Eſtat, & les autres Conſeillers & Miniſtres partirent à la pointe du iour auant que perſonne fut aduertý de la ſortie du Roy. Madame la Duchefſe d'Orleans ne partit que ſur les huit heures, avec grand regret, ayant touſiours reſiſté à ce voyage, & tiré parole de monſieur ſon mary, qu'il ne partiroit point de Paris.

Si-toſt qu'il fut iour on ſçeut par toute la ville que l'on auoit enleué le Roy, & tout le Bourgeois en fut eſmeu, & au meſme temps ſe ſaiſit de la porte ſainct Honoré, afin d'empêcher que rien n'en ſortit; ſi bien que pas vn Seigneur ne pût ſortir; Madame de Longueuille demeura ſeule de toutes les Princeſſes.

Au meſme temps les Conſeillers du Parlement allerent chez le premier Preſident, ils ſ'aſſemberent tous en la grande Chambre pour auifer ce qu'il y auoit à faire; on leur donna aduis que le Roy auoit enuoyé vne lettre à meſſieurs le Preuoſt des Marchands & Eſcheuins de la ville de Paris, ſurquoy ils manderent le ſieur Fournier Preſident des Eſleus premier Eſcheuin, pour auoir communication de ceſte lettre; il fit quelque difficulté de leur monſtrer, mais en fin il l'enuoya querir, & la lecture en fut faite, en voicy la teneur.



A NOS TRES-CHERS LES PREVOST DES  
Marchands & Escheuins de nostre bon ne ville de Paris.

DE PAR LE ROY.

**T**Res-chers & bien amez, estant obligé avec vn tres-sensible déplaisir d' partir de nostre bonne ville de Paris ceste nuit mesme, pour ne pas demeurer exposé aux pernicious desleins d'aucuns officiers de nostre Cour de Parlement de Paris, lesquels avans intelligence avec les ennemis declarez de cét Estat, apres avoir attenté contre nostre autorité en diuerfes rencontres, & abusé longuement de nostre bonté, se sont portez iusqu'à conspirer de se saisir de nostre propre personne? Nous auons bien voulu de l'auis de la Reyne Regente nostre tres-honorée Dame & Mere, vous donner part de nostre resolution, & vous ordonner comme nous faisons tres-expreslément, de vous employer de tout ce qui despendra de vous, pour empescher qu'il n'arriue rien en nostredite ville qui puisse en alterer le repos, ny faire prejudice à nostre seruice, vous assurant, comme nous esperons; que tous les Bourgeois & habitans d'icelle continueront avec vous dans le deuoir de bons & fidelles sujets, ainsi qu'ils ont fait iusques à present; aussi ils receuront de nous de bons & fauorables traitemens, nous reseruant de vous faire sçauoir dans peu de iours la suite de nostre resolution, & cependant nous conseruer en vostre fidelité & affection en nostre seruice. Nous ne vous ferons la presente plus longue ny plus expresse. Donnée à Paris le cinquiesme Ianuier 1649. signé L O V Y S, & plus bas DE G V E N E G A V D.

Il y auoit aussi trois Lettres, de la Reyne, de monsieur le Duc d'Orleans, & le Prince de Condé, écrites audit Preuost des Marchands & Escheuins; portans que c'estoient lescdits Princes qui auoient conseillé au Roy sa sortie, & de ceste sorte; surquoy, Messieurs du Parlement, quoy que iour de feste, se seroient assemblez, comme dit est, sur les neuf heures en la Grande Chambre; & ayant deliberé, auroient au nombre de cent & vn donné Attest, portant qu'il seroit pourueu à la seurété de la ville, & à ce qu'elle fut munie de viures; & à cét effet que les portes seroient gardées des corps de Gardes posez, & les chaisnes tenduës si besoin estoit. Enjoint au Lieutenant Ciuil, & autres officiers de tenir la main, à ce qu'il fut apporté des viures en seurété à Paris; au Preuost des Marchands & autres officiers, d'aller à la conduite d'iceux, & de faire retirer les gens de Guerre qui estoient dans les villes & villages à vingt lieues à la ronde de Paris; & deffence ausdites villes de receuoir aucunes garnisons & gens de guerre; & auroient remis au lendemain *ad maius Senatūs Consultum*, à delibérer sur ladite lettre.

Nota qu'il y auoit deux aduis ouuerts, l'un par monsieur de Brussel, l'autre par monsieur Deslandes Payen qui estoient conformes, sinon que monsieur Payen a adjousté les deffences aux villes à vingt-lieues de receuoir garnison.

*Addition.* Monsieur le Coadjuteur de Paris auoit aussi receu vne lettre de

cachet, portant ordre de se rendre auprès la personne du Roy à S. Germain, il tenta de sortir par plusieurs portes, mais elles estoient si bien gardées, & l'ordre y estoit si bien obserué, qu'il n'en pût venir à bout, non plus que plusieurs autres qui firent leur possible pour s'en aller.

*Du Iendy septiesme Ianuier.*

**C**E iour les Chambres assemblées, le sieur de la Sourdiere Lieutenant des Gardes du Corps, auoit apporté au Parquet de Messieurs les Gens du Roy, vne lettre de cachet à eux adressante, & leur a dit qu'il en auoit vne autre adressante à monsieur le premier President, & vn paquet pour le Parlement; & ayant rendu la lettre adressante aux Gens du Roy, portant en substance que le Roy leur mandoit de dire à la Compagnie qu'il leur enjoignoit de se transporter à Montargis, & là estant y attendre les ordres: laquelle leuë ils auroient conduit ledit sieur de la Sourdiere à la Grande Chambre; & ayant fait recit du contenu en ladite Lettre, & laissé le paquet non ouuert, Messieurs ayant deliberé auroient premierement arresté de ne point recevoir ledit paquet, & à l'instant apres auoir mandé le sieur de la Sourdiere & les Gens du Roy, ils luy auroient rendu sans auoir esté ouuert; & en suite ayant deliberé sur les lettres du Roy, de la Reyne & des Princes, receuë le iour précédent, ils auroient ordonné que les Gens du Roy iroient trouuer la Reyne Regente à S. Germain de la part de la Cópagnie, & la supplieroient de leur donner les noms de leurs calomniateurs pour estre procedé contre eux selon la rigueur des loix de l'Estat, & que cependant ils demeureroient tousiours assemblez; & que le lendemain Vendredy de releuée les Compagnies Souueraines seroient mandées & inuitées, M. l'Archeuesque de Paris ou son grand Vicaire, M. le Gouverneur de Paris, Messieurs les Preuosts des Marchands & Escheuins, & les Communautez, pour là estre tenuë police generale pour la seureté de la ville, tant du dedans que du dehors, & pour la seureté des viures: Et le lendemain apres auoir entendu la responce de la Reyne, estre deliberé à fonds.

Il y eût plusieurs de Messieurs, entre autres monsieur de Bruffel, qui ouurirent l'aduis de prier la Reyne d'esloigner & chasser le Cardinal Mazarin. Messieurs Charçon, Viole, Loisel, & autres iusques à douze furent de cét aduis, mais il auoit passé au premier.

Vn autre aduis qui fut celuy de monsieur Deslandes-Payen alloit à informer presentement contre lesdits calomniateurs, & à leur faire leur procez.

Vn autre alloit à faire vne Milice dans Paris, pour sortir à la Campagne, & faire retirer les troupes qui estoient aux enuirs de Paris.

Monsieur Loisel auoit rapporté l'exemple du Cardinal d'Amiens sous Charles V I.

*Dudit iour de releuée.*

**L**E mesme iour Messieurs Talon, Meliand, & Bignon, Aduocats & Procureur General seroient partis à quatre heures de releuée pour aller à saint Germain



Germain en Laye trouuer la Reyne Regente, & luy faire les remonstrances tres-humbles & supplications à eux ordonnées de faire par le Parlement, où ils seroient arriuez à sept heures du soir: & à l'instant de leur arriuee auroient fait aduertir la Reyne de leur arriuee, & demander Audiance pour eux; elle leur auroit esté refusée, & seroient reuenus & retournez à Paris sans voir ladite Dame Reyne.

*Addition.* Messieurs de la Chambre des Comptes eurent aussi vne lettre portant ordre d'aller tenir leur siege à Orleans, surquoy ils arresterent de depu- ter vers la Reyne quatre Presidens & douze Maistres, pour sçauoir de sa Ma- jesté, le sujet de sa sortie, & luy faire les submissions de la part de toute la Com- pagnie.

Le Grand Conseil receut pareillement ordre d'aller à Mantres y faire la fon- ction de leurs charges, sur lequel Messieurs les Presidens & Conseillers ayant delibéré, & attendu que le lieu de leur siege n'est assuré qu'autant de temps qu'il plaist au Roy de ne leur pas commander de fuir, ils arresterent de se rendre audit lieu dans le Lundy dix-huictiesme du mesme mois, auquel iour & lieu l'audiance fut publiée ce iour là mesme; mais quelques iours apres ayant fait leurs efforts pour obtenir des passeports, & ayant esté refusez, ils enuoye- rent à monsieur le Chancelier l'aduertir de leur diligence, & le prier de leur enuoyer ordre de faire exercer à Paris la fonction de leurs charges: ils n'eurent point de response sur ce dernier chef; si bien que dès le iour de ladite lettre le grand Conseil fut en vactation & sans exercice.

### *Du Vendredy 8. Ianuier.*

Ce iour leddits sieurs Gens du Roy ayant fait recit à la Cour les Chambres Assemblées de leur voyage à S. Germain en Laye, & du refus fait par la Reyne deles entendre, auroit donné Arrest, auquel il passa tout d'vne voix, hors- mis monsieur de Bernay qui alloit à renuoyer à la Reyne. Que tres-humbles remonstrances seroient faites au Roy & à la Reyne. Et attendu que le Cardinal Mazarin estoit notoirement auteur des desordres de l'Estat & du mal present; la Cour l'auroit déclaré perturbateur du repos public, ennemy du Roy & de son Estat, luy auroit enjoint de se retirer de la Cour dans ce iour, & du Royau- me dans huictaine, & ledit temps enjoint à tous sujets du Roy de luy courre sus, & deffences à toutes personnes de le recevoir.

Messieurs les Gens du Roy rapporterent aussi qu'arriuant à S. Germain ils trouuerent dès l'entrée ordre de ne passer outre, & que la Reyne ne les vou- loit escouter; & qu'ayant enuoyé à monsieur le Chancelier le prier qu'ils luy pussent parler, on leur enuoya faire commandement de sortir sur l'heure du bourg de saint Germain où ils estoient en vne hostellerie.

*Addition.* Il fut publié à Poissy vn Arrest du Conseil donné le Ieudy, portant deffenses de vendre des bœufs, moutons, ny autres viures aux Marchands de Paris, si bien que les Bouchers retournerent sans amener du bestail.

*Dudit iour huictiesme de releuée.*

**L**A Police generale auroit esté tenuë à deux heures de releuée iusques à quatre heures & demye, par les deputez du Parlement, de la Chambre des Cōptes, & de la Cour des Aydes; Monsieur de Mont-Bazon Gouverneur de Paris, le Preuost des Marchans, & Escheuins, les Communaultez des six corps des Marchands; où il auroit esté arresté que ledit Preuost des Marchans & Escheuins donneroient & deliureroient les Commissions pour leuer des gens de guerre, pour faire venir des viures à Paris en seureté, & les escorter, tant gens de pied que de cheval, & ce par l'aduis de Messieurs Brussel, le Nain, Mesnardet, & Deslandes-Payen Conseillers en ladite Cour.

Ce iour Messieurs Payen & Mesnardet auroient esté faire inuentaie & description dans l'Arsenal, duquel la ville se seroit saisie, & y auroit enuoyé six cens hommes pour le garder, ensemble la riuere de ce costé-là.

Ledit iour la Chambre des Comptes & Cour des Aydes auroient enuoyé leurs Deputez vers la Reyne Regente à saint Germain en Laye, pour asseurer le Roy & elle de leur fidelité & seruice, & pour supplier ladite Dame Reyne de ramener le Roy à Paris; & ce fut le President l'Archer qui auroit fait les Remonstrances de la part de la Chambre, & le sieur Amelot premier President en la Cour des Aydes, fit aussi vn discours plein de force & déloquence qu'on ne peut dérober au public sans crimes. En voicy les propres termes.

**EXTRAICT DES REGISTRES DV CONSEIL**  
de la Cour des Aydes.

*Du 9. Ianvier 1649.*

*Ce iour les Chambres assemblées, Monsieur Amelot premier President faisant son rapport de ce qui se passa le iour d'hier à Saint Germain, au sujet de sa Deputation vers le Roy & la Reyne Regente; A dit, que suiuant l'ordre de la Compagnie il auoit esté avec Messieurs les Deputez à Saint Germain, où ils furent receus à l'ordinaire, & qu'il fit à leurs Majestez la Remonstrance suivante:*

**SIRE,**

Nos visages bien differents de ce qu'ils estoient autrefois, lors que nostre Compagnie venoit témoigner à V. M. la part qu'elle prenoit à la satisfaction publique, & aux heureux effets de la bonne conduite, & de la prosperité de vostre Regne; peuuent faire connoistre que c'est avec beaucoup de regret que



nous nous presentons maintenant à Vostre Majesté pour vne autre occasion.

Il n'est point de bons François, M A D A M E, qui ne voulust auoir vn meilleur objet de ses pensées & de ses discours, que les maux de la France; & si c'estoit assez de les taire, & d'en détourner la veüe pour les étouffer, nous n'aurions garde d'auoir voulu adiouster de nouuelles peines à la foule des soins qui tiennent Vostre Majesté continuellement occupée pour le bien del'Estat: Mais puisque Dieu nous afflige de fieux dont il ne nous deffend pas de chercher le remede; & puisque pour guerir vn mal il est necessaire d'en auoir vne connoissance parfaite; comme Vostre Majesté n'a point de plus grande; ny de plus iuste passion que celle du bien public; elle ne trouuera pas mauuais s'il luy plaist, que nous luy ayons rendu compte ces iours passez des choses dont nous croyons qu'elle n'a pû auoir par autre voye toute l'information qu'il seroit à desirer.

Nous ne doutons point, M A D A M E, que Vostre majesté ne soit dans le sentiment de ces grands Princes; Que l'histoire a remarquez avec Eloge, qui se plaignoient que n'y ayant rien de plus important pour leur conduite, que la verité; il n'y auoit neantmoins dans leur Cour rien de si rare qu'elle; & qu'ainsi Vostre majesté souhaitant la possession de cét aduantage, aussi necessaire qu'il est peu commun, ne nous sçache bon gré d'auoir contribué ce qui a dépendu de nous à luy en faciliter en quelque sorte l'acquisition.

Si nostre interest particulier estoit la regle de nos actions, nous aurions sujet de porter nos iustes plaintes à Vostre Majesté pour beaucoup de choses qui regardent la diminution de nos charges: mais pource que nous auons appris de nos ancestres à n'auoir point d'autre interest que celui du Roy, & del'Estat, pour lequel nous sommes tousiours prests de Sacrifier non seulement les interests de nostre Ordre, mais encore nos biens & nos vies; Nous nous contenterons de supplier tres-humblement Vostre Majesté de vouloir considerer les dangereuses suites que peuuent causer l'esloignement du Roy & de Vostre majesté de la Capitale Ville du Royaume, & l'approche des gens de guerre.

Quand la pieté exemplaire de Vostre majesté & le zele ardent qu'elle a tousiours fait paroistre pour la gloire de Dieu, ne luy donneroient pas de l'horreur, comme ils font sans doute, pour les brigandages, les incendies, les violemens, les massacres, & les sacrileges qu'exercent impunément ces troupes déreglées: il ne se peut que Vostre Majesté ne fust touchée de compassion pour les souffrances de tant d'innocens qui sont les Victimes de leur fureur. Nous n'oserions, M A D A M E, parler deuant Vostre majesté des profanatoins execrables à quoy se sont portez par vn dernier effort d'impiété, quelques-uns de ces gens sans foy & sans religion. La Veneration, qui est hereditiere à vostre Auguste Maison, aussi bien qu'à celle de Sainct Louys, pour le plus saint & le plus redoutable de nos mysteres, ne nous permet pas de l'envoyer d'un recit qui ne pourroit que luy causer vn desplaisir mortel, & dont la seule pensée est capable de faire fremir tous ceux qui ont quelque sentiment du Christianisme.

Nous venons donc supplier tres-humblement Vos majestez de faire

cesser des desordres, & de ne refuser pas à nos souhaits, & à ceux de toute la France, leur retour dans cette commune patrie des François, qui semble auoir esté destinée du Ciel pour estre les delices de nos Roys, aussi bien que pour faire de nos Roys les delices: Assurant Vos Majestez; Qu'elles y trouueront dans tous les Ordres, & sur tout dans nostre Compagnie, vne obeyssance parfaite, & vne inuiolable fidelité. Nostre Compagnie a tasché iusques icy de leur en donner toutes les preuues qui luy ont esté possibles, & ce nous seray vne nouuelle & très-sensible obligation de nous affermir tousiours de plus en plus dans les mesmes sentimens, de continuer nos Vœux au Ciel pour la continuation de ses Graces, sur les personnes de Vos Majestez.

**E**N suite dequoy mondit Sieur premier President a dit; Que monsieur le Chancelier ayant pris la parole par ordre de la Reyne, auoit dit en substance; Qu'elle n'entendoit autre chose que des personnes qui se plaignoient du mal-heur du temps, des desordres du Gouvernement, & des Gens de Guerre; Mais que personne ne parloit de maintenir l'Autorité du Roy au point qu'elle doit estre. Que c'estoit cettel consideration qui auoit porté la Reyne à s'esloigner de Paris avec le Roy, afin de conseruer son Autorité, comme elle s'estime obligée; & afin d'éuiter les mauuais desseins du Parlement, qui estoit dans vne desobeyssance manifeste: Que toutefois sa Majesté auoit tant de bonté, qu'elle pourroit oublier le passé, & pardonner la faute des Officiers de cette Compagnie-là, s'ils se remettoient bien-tost dans leur de- uoir, & qu'en ce cas-là, Sa Majesté se pourroit refoudre à ramener le Roy à Paris.

Surquoy ledit Sieur premier President a dit, qu'il auoit estimé que la correspondance qui a esté iusques icy entre les Compagnies, l'obligeoit à repli- quer quelque chose qui tesmoignast les bonnes intentions du Parlement, & qui pût donner ouuerture à quelque sorte d'accommodement dans la fascheuse conjoncture où nous voyons les affaires publiques, ce qu'il fit peu apres aux termes suivants:

**SIRE,**

Entre toutes les Nations la nostre a tousiours eu cette louange de cherir vni- quement son Prince, & d'auoir pour sa personne sacrée vne veneration appro- chant de celle que l'on rend aux choses diuines. Cela estant, il ne se peut que ce ne soit à tous les bons François; & principalement à tous les Officiers de Vostre Majesté vn déplaisir bien sensible; Que l'on ait soupçonné qu'il soit en- tré dans l'ame de quelques François honorez du Caractere de la Magistrature, & attachez plus particulièrement que les autres à cette veneration, vne pensée si criminelle, que celle que l'on impute à quelques Officiers du Parlement. Cette Grande & Illustre Compagnie a son interest si estroitement vny à celuy du Roy & de l'Estat, & a donné en toutes rencontres de si glorieuses marques du zele qu'elle auoit pour le soustien de l'Autorité Royale, qu'il est difficile



des'imaginer que quelques-vns de ceux qui la composent, soit capable d'oublier le premier & le plus iuste de ses devoirs. Ce zele a paru avec éclat non seulement du temps de nos Peres par ce fameux Arrest, qui, malgré les artifices des Estrangers, rendit à la Loy Salique sa premiere vigueur, & seruit si fort à la conseruation de la Couronne dans l'Auguste Maison des Bourbons; Mais encore de nostre temps, par les soins que cette Compagnie a pris d'affermir durant les Minoritez les Regences de Reines Meres. Et ces mesmes personnes que des Calomniateurs conuaincus de crimes capitaux accusent de crime de Leze-Majestez, ce sont ces coupables qui ont prononcé l'Arrest de Vostre Regence en France, & pour le seruice de Vostre Majesté. Ainsi, MADAME, Nous esperons de celebrer bien-toit la feste de cet heureux Retour de Vos Majestez, si necessaire pour calmer les perilleux orages dont l'Estat est menacé, puis qu'il ne faut, pour obtenir ce grand bien, que l'obeyssance d'une Compagnie qui sans doute sera tousiours tres-disposée d'en donner les marques que l'on exigera d'elle dans les formes prescrites par les Ordonnances.

Monsieur le premier President ayant finy sa replique, monsieur le Chancelier repeta les derniers mots, suiuant les formes prescrites par les Ordonnances d'un ton plus releué que de coustume. Tellement que ledit premier President luy respondit, Ouv monsieur suiuant les formes prescrites par les Ordonnances! Vous auez assez vieilly dans le Parlement pour ne pas ignorer que les Compagnies Souueraines n'ont pint d'obeyssance auengle; ceux qui les composent se sont obligez par serment, d'executer celles qui sont verifiées par liberté de Suffrages, & non d'autorité absoluë; mais parce que vous auez cessé de les practiquer, depuis que vous estes sorty du Parlement, vous les auez oubliees, & il vous en faut resouuenir. A cela monsieur le Chancelier n'estimant pas pouuoir respondre, monsieur le Prince prit la parole, & dit que la maison des Bourbons n'auoit pas besoin du Parlement; ledit premier President voulant y respondre, & la Reyne se mettant en colere, il se retira.

Ce mesme iour le sieur Fournier President des Esleus de Paris premier Escheuin, & vn autre Escheuin avec quatre Conseillers de Ville, auroient aussi esté deputez de la part de laditte Ville vers ladite Reyne, pour l'aller asseurer & clero y son fils de la fidelité de ses bons sujets de ladite ville au seruice de leurs Majestez, & de leur obeyssance, & l'auroient suppliée de vouloir ramener ledit Seigneur Roy son fils en ladite ville, & l'auroient excitée & exhortée à ce faire par les sentimens de tendresse d'humanité, & de religion, mais toutes ces remonstrances n'auroient rien operé; ils firent ce voyage sur vne Lettre de cachet qu'ils auoient eüe le matin à l'Hostel de Ville.

*Addition.* La Reyne leur dit qu'elle ayroit le peuple de Paris, ne luy vouloit point de mal, que le Parlement obeyssant elle retourneroit & rameneroit le Roy son fils en ladite ville; Que le parlement sortant par vne porte elle entreroit par vne autre.

Elle fit le mesme discours aux salsdits Deputez de la Chambre, qui luy dirent que pour eux ils estoient prests d'aller à Orleans, quand il plairoit à sa

Majesté de leur commander : surquoy elle leur respondit qu'elle estoit satisfaite de leur obeyssance, mais que le Parlement estoit rebelle, & qu'elle scauroit bien le chastier. Le Chancelier ayant pris la parole s'estendit fort sur ce mot de rebelle, & parla fort long-temps au des- aduantage du Parlement : le President l'Archer se retira sans autre response avec les autres Deputez.

*Addition.* On ne scauoit point encore alors à saint Germain l'Arrest qui auoit esté rendu le matin, la nouuelle n'en arriua que le soir à neuf heures, portée par le sieur de Nouveau general des Postes, que ces Messieurs rencontrent sur le chemin comme ils reuenoient.

### *Du Samedi neuuiesme Ianuier.*

**C**E iour les Chambres assemblées le matin en la Grande Chambre, monsieur de Mont-Bazon Gouverneur de la ville, & le sieur Fournier, vn autre Escheuin, & les quatre Conseillers de ville seroient venus, & y auroit ledit sieur Fournier fait le recit du voyage qu'il auroit fait à Saint Germain, en consequence de sa deputation vers la Reine, de ce qu'il auroit dit, & comme il n'auoit rien gagné; & auroient lesdits sieurs Gouverneur, Escheuins, & Conseillers de ladite ville, protesté de viure & mourir pour le seruice du Roy, de la ville, & du Parlement, & de ne receuoir autres ordres que de ladite Compagnie, nonobstant la lettre du Roy qu'ils auoient receuë presentement, & ouuerte à l'Hostel de Ville, sur laquelle ils n'auoient pas voulu deliberer auant que de la communiquer à la Cour.

Cette lettre portoit en substance, Que la Roy en suite des deux premieres lettres qu'il auoit enuoyées audit Preuost des Marchands & Escheuins de Paris, touchant la translation du Parlement à Montargis, il leur enjoignoit pour la troisieme fois de le faire obeyr, pour raison de ce, attendu mesme qu'ils auoient les forces de ladite ville en leur puissance, & ce fait lesdits Officiers se seroient retirez.

Surquoy ayant deliberé, & monsieur le premier President ayant voulu représenter à la Compagnie, qu'il estoit raisonnable de donner du temps aux Officiers de ville, pour deliberer sur vne affaire si importante. Monsieur le President le Coigneux auroit pris la parole, & auroit dit au contraire qu'il n'appartenoit qu'à la Cour de deliberer sur telle matiere, & non aux Officiers de la Ville; & à l'instant mesme la Compagnie sans deliberer dauantage sur ladite Lettre, comme estant enuoyée inutilement & sans pouuoir estre effectuée, arresté d'vn commun consentement de faire vn fonds de deniers pour estre employez à leuer des troupes, & des gés de guerre, tât de pied que de cheual, & pour cet effet les vingt-quatre Conseillers du Parlement de la derniere & nouuelle creation, auroient offert cent mille escus entr'eux, à condition qu'ils seroient deputez, & traictez comme les anciens; ce qui auroit esté accordé & arresté : plus tout le corps de la Compagnie auroit offert deux cent mille escus, &



entre ce chacun Conseiller auroit offert le double de la taxe payée lors du siège de Corbie; & à cette fin pour receuoir lesdits deniers, auroient commis monsieur le Preuost, Conseiller, Clerc de la Grand'Chambre.

### *Dudit iour de releuée.*

**L**A Police generale auroit esté tenuë en la Chambre de saint Louys, où les trois Compagnies Souueraines, Messieurs les Gouverneur, Preuost des Marchands, & Escheuins, les six corps des Marchands & les Capitaines des quartiers, auroient iuré & protesté tous ensemble l'union & le secours mutuel & fidelité les vns enuers les autres, pendant lequel temps on auroit travaillé à l'Hostel de Ville à deliurer les Commissions pour les leuées des gens de guerre, & induit l'Assemblée des Chambres au lendemain Dimanche dixiesme du mois à huit heures du matin.

A la sortie de la Grand'Chambre quelque'un de Messieurs ayant dit en grondant & hautement, vne parole assez legere; sçauoir que la ville les vendoit; & cette parole ayant esté entendue & recueillie de quelque'un de la foule du peuple qui estoit dans la sale du Palais, à l'instant mesme se seroit esleué vn grand bruit qu'il falloit noyer le Preuost des Marchands & les Escheuins, & aussi-tost chacun auroit couru dans la Salle, croyant trouuer ledit Preuost des Marchands qui n'y estoit pas, mais à l'Hostel de Ville, où le peuple couroit, voulant entrer par force dans ledit Hostel, où arriua Monsieur le Preuost de Nouion, deuant lequel ledit Preuost des Marchands ayant protesté de sa fidelité, & de ne receuoir ny obeïr à d'autres Ordres qu'à ceux de la Cour, ledit sieur de Nouion auroit assuré ladite Cour, & se seroit rendu caution pour ledit sieur Preuost des Marchands son beau-frere; aussi-tost le sieur Fournier premier Escheuin estant descendu en la place de Greve, auroit dit tout haut & publiquement au peuple, que ledit sieur Preuost des Marchands venoit de prester le serment de fidelité au Parlement, & à l'heure mesme le peuple se seroit apaisé.

*Addition.* Le soir Monsieur d'Elbeuf alla à la ville offrir son seruice, on luy fit responce qu'il falloit s'adresser au Parlement: la nuit Messieurs le Prince de Conty, le Duc de Longueuille, le Marquis de Noirmontier, & le Prince de Marsillac, s'estans presentez à la porte S. Honoré pour entrer, donnerent l'alarme à toute la ville, quoy qu'ils vinssent pour la seruir; on mit des chandelles par tout aux fenestres, on fit des feux aux places, quoy que la verité fût bien-tost reconnue: ces Messieurs demeurèrent long-temps, parce qu'il fallut aller querir les clefs chez monsieur Brussel; on aduertit monsieur le Coadjuteur qui les alla querir en son carrosse, & les conduisit à l'Hostel de Longueuille, où ils allerent se reposer.

Les Allemands se saisirent de Charenton apres auoir pillé Bercy.

### *Du Dimanche 10. Ianuier.*

**C**E iour à huit heures du matin les Chambres assemblées, on auroit ca-  
caduis que monsieur le Prince de Conty, & monsieur le Duc de Longueuille son beau-frere, estoient arriuez de la Cour la nuit precedente, &

descendus à l'Hostel de Longueville. Monsieur le Duc d'Elbeuf accompagné du sieur Comte Drieux son second fils, & du sieur de Brissac beau-frere du sieur Marechal de la Meilleraye, Sur-Intendant des Finances, seroit venu au Parlement, où il auroit pris sa place comme Duc & Pair; & là ayant offert son seruice à la Compagnie & au public, pour resister à la violence, dont les mauvais Conseillers de la Reyne s'estoient seruy pour ruiner l'Estat, il y auroit toutes les Chambres assemblées esté esleu General des armées du Roy sous les ordres du Parlement, dont il auroit esté à l'instant faire le serment à l'Hostel de Ville, où auroient encor esté deliurées plusieurs Commissions pour leuer des gens de guerre pour faire venir viures, & repousser les troupes qui estoient es environs, & à l'entour de Paris; sçauoir à saint Denys & Charenton, où estoient vingt Compagnies de cauallerie de Monsieur le Prince de Condé, qui empeschoient les viures de venir à Paris, à Auberuilliers, au Bourg la Reyne, & à saint Cloud.

### *Dudit iour de releuée.*

**L**Es Chambres s'estant assemblées dans la grande Chambre, Monsieur le Prince de Conty y seroit venu, & asseuré la Compagnie qu'il n'auroit ny Monsieur de Longueville participé aux Conseils violens qui auoient esté tenus pour la sortie du Roy de Paris, ny pour ruiner la ville; & qu'il protestoit de vouloir respendre iusqu'à la derniere goutte de son sang pour le seruice de l'Estat, de la Compagnie, & du public; En suite de quoy Monsieur le Duc d'Elbeuf qui auroit aussi pris sa place, auroit pris la parole, & dit que la Compagnie luy ayant fait l'honneur de luy donner le tiltre & la fonction de General des armes du Roy sous les ordres du Parlement; & en estant en possession, il ne le pouuoit abandonner qu'avec la vie; & que quoy que Monsieur le Prince de Conty Prince du sang & grand Prince, fust maintenant à Paris, que neantmoins il auoit rompu la glace; & auoit offert son seruice le premier, qui auroit esté accepté, & auquel il ne manqueroit iamais, dont il asseuroit encor la Compagnie, & ne croyoit pas qu'elle en doutast; à quoy toute la Compagnie auroit reparti tout hault & en confusion vniuersellement qu'il estoit General esleu des armes du Roy, sous les ordres du Parlement, & que l'on n'en deuoit pas douter: en suite de ce apres auoir donné l'Arrest d'injonction aux troupes qui estoient sorties des garnisons & des places frontieres pour s'approcher de Paris, & le bloquer, de retourner & se retirer au delà de vingt lieues; sinon enjoinct aux habitans des villes & villages & aux Communantez de leur courir sus, la Compagnie se seroit retirée.

Ce mesme iour auroit esté donné Arrest sur la remonstrance de Monsieur Procureur General, par lequel il est ordonné que les prisonniers detenus pour debtes ciuiles & amendes pecuniaries, seroient eslargis pour trois mois, attendu la difficulté de plus donner du pain, ce qui auroit esté executé.



*Du Lundy vnzieſme Ianuier.*

**C**E iour les Chambres aſſemblées, & Monsieur le Prince de Conty, Messieurs les Duc d'Elbeuf, & de Brissac, estant en leurs places dans la grande Chambre, y seroit arriué Monsieur de Longueuille, lequel n'estant point Pair auroit pris place au dessus de Monsieur le Doyen de l'autre costé de Messieurs les Ducs & Pairs, & vis à vis; lequel auroit déclaré à la Compagnie, qu'il seroit venu exprez de la Cour, pour venir offrir son seruice au public & à la Compagnie, avec protestation qu'il n'estoit poussé d'aucun interest particulier, & qu'il n'auoit autre but à prendre les armes que le seruice du Roy, l'appuy de l'Estat, & le bien public, pour lequel il vouloit viure & mourir, dont il asseuroit la Compagnie; & pour gage de sa parole, qu'il offroit pour ostages les deux personnes qui luy estoient les plus cheres, Madame sa femme sœur de Monsieur le Prince de Conty, & mademoiselle sa fille, lesquelles il supplioit la Cour faire conduire à l'Hostel de Ville & les y garder.

Après quoy Monsieur le premier President luy ayant fait remerciement pour toute la Compagnie, ledit sieur de Longueuille auroit reparti, qu'il reiteroit les protestations qu'il venoit de faire à la Compagnie, & que les paroles seroient suiuiues d'effets, & qu'il donnoit assurance de tout son Gouvernement pour le seruice du Roy, de l'estat, du public, & de la Cōpagnie.

*En suite de ce*

**M**onsieur le Duc de Bouillon seroit entré en la grande Chambre, conduit par dessous les bras par deux Gentils-hommes, à cause de son incommodité des gouttes, dont il estoit trauaillé, & se seroit assis au dessous de Monsieur de Longueuille, lequel apres auoir fait pareille protestation de seruice à la Compagnie, & resmoigné que ce n'estoit point son interest particulier ny la pensée de son reſtablissement dans la ville de Sedan qui l'auoit obligé de prendre cette occasion pour venir offrir son seruice à ladite Compagnie, mais le seul motif du seruice du Roy & du bié de l'Estat, pour lequel il vouloit sacrifier sa vie, son honneur & son bien, ne voulant auoir ny posséder de bien que par la grande justice qu'il esperoit du Parlement, que seul il vouloit auoir pour iuge & pour arbitre.

Monsieur le premier President l'auroit pareillement remercié & complimenté fort ciuilement, & remonstré qu'en vne cause si importante il deuoit y auoir entre eux vne correspondance & vnion mutuelle, sans laquelle l'ordre ne pouuoit subsister.

A quoy auroit ledit sieur de Bouillon reparti, qu'elle seroit toute entiere, de sa part, & que trauaillant sous la charge d'un si grand Prince qu'estoit Monsieur le Prince de Conty, il ne manqueroit d'observer inuiolablement tous les ordres qu'il luy donneroit; & que de sa part pour assurance de sa parole qui seroit suiuiue de meilleurs effets, quoy que son corps fust, comme

inutile en l'Estat qu'il estoit lors, il auoit fait venir quatre enfans massés qu'il donnoit pour ostages à la Compagnie, lesquels aussi bien que Madame & Mademoiselle de Longueuille auroient à cet effect esté conduits en l'Hostel de Ville par aucuns de messieurs de la Compagnie.

Monsieur le Duc de Bouillon ayant cessé de parler, Monsieur le Duc d'Elbeuf auroit pris la parole, & réitéré de sa part les protestations de seruices par luy cy-deuant faites à la Compagnie, & dont il esperoit tesmoigner de veritables effets dans la fonction de sa charge de General des armes du Roy sous les ordres du Parlement, dont il auoit plû à la Compagnie de l'honorer, en laquelle il vouloit employer son sang, sa vie, celle de Messieurs ses enfans; & qu'il esperoit en donner des marques assurées avec l'assistance de Monsieur le Duc de Bouillon, qui deuoit commander en chef toute la cavallerie sous ses ordres, & que cela se deuoit faire sous la souveraine autorité du Parlement.

Surquoy estant meu vn bruit à cause du changement arriué en l'ordre & conduite des armées par l'arriué de M. le Duc de Bouillon, d'autant que le soir duiour precedent Messieurs le Prince de Conty, Duc d'Elbeuf & de Longueuille, s'estant veus, ils seroient demeurez d'accord que Monsieur le Prince de Conty seroit Generalissime des armées du Roy sous la conduite du Parlement, que Monsieur le Duc d'Elbeuf seroit son General dans la Ville de Paris, & les 20. lieues à l'entour, & que M. de Longueuille le seroit hors vingt lieues dans toutes les Prouinces du Royaume; & ce changement ayant fait naistre des difficultez & contestations, M. Mesnardeau Conseiller de la grande Chambre auroit remonstré hautement, qu'il falloit vider ces difficultez: à quoy monsieur le premier President ayât dit que ces Messieurs les Princes y pouruoiroient entre eux dans deux ou trois heures, & que l'apresdisnée dudit iour la Compagnie se rassembleroit, & qu'alors il esperoit qu'ils seroient tous bien d'accord ensemble, ce dont il les supplioit de la part de la Compagnie.

Sur quoy monsieur le Preuost Conseiller d'Eglise auroit dit, qu'il ne falloit point desespérer que cette contestation, ne fust terminée; & que si la Compagnie se leuoit pour sortir, il declaroit qu'il abandonnoit la charge qu'elle luy auoit donné (qu'estoit de receuoir les deniers communs pour le secours de la ville) & qu'il ne s'en vouloit plus mesler: En suite de quoy Messieurs ayant crié tous d'une voix qu'il falloit demeurer, & que l'aduis dudit sieur le Preuost estoit tres-raisonnable, ces Messieurs auroient esté inuitez de s'accorder.

Sur ce monsieur le President de Mesme ayant représenté qu'en telles occurrences les affaires de cette qualité & importance n'estoient point ordinairement terminées par ceux qui y estoient interessez, & qu'ils se desmesloient & decidoient plustost par des tierces personnes qui mesnageroient l'accommodement avec facilité, apres auoir examiné les interests de toutes les parties.

A quoy monsieur le President le Coigneux ayant adjousté, que si ces Messieurs les Princes auoient agreable de proposer chacun en particulier leurs



pretentions, difficultez & interests à quelques vns de la Cópagnie, & à cet te fin les vns & les autres trouuoient bon de se separer & retirer dans quel qu'une des Châbres des Enquestes, & quelques vns de Messieurs les Presidets avec eux pour cōferer ensemble & negotier cet accōmodement, qu'il espe roit que cela reüssiroit à la satisfactiō des vns & des autres, & du public: ce qui auroit esté à l'instant executé: Messieurs le Prince de Conty & Duc de Longueuille estans entrez dans la quatriesme des Enquestes, & Messieurs les Presidens le Coigneux & de Nesmōd, M. le Duc de Bouillon estans demeu rēz quelque temps près de la cheminée avec M. le President de Nouion, & M. le Duc d'Elbeuf estant allé dans la deuxiesme Chambre des Enquestes atcompagné de M. le President de Bellieure, auquel sieur Duc d'Elbeuf comme il sortoit de la grande Chambre, Messieurs ayant dit qu'ils le sup plioient de s'accommoder, il auroit respondu, les autres ne me scauroient rien donner, il n'y a que moy qui puis donner. Sur ce M. le Marechal de la Motte-Hodancour seroit entré dans la grande Chambre, & se seroit assis du costé ou estoient lesdits sieurs de Longueuille & de Bouillon au dessus de Messieurs les Conseillers clerks, & là auroit pareillement offert ses serui ces à la Compagnie pour le bien de l'Estat & du public, & tesmoigné qu'il auoit subject de ressentiment du mauuais traitement que luy auoit fait le Cardinal Mazarin, & qu'il ne redroit pas moins de preuues de sa fidelité que de son courage, cōme il auoit tousiours fait aux occasiōs, veu qu'en cel le-cy il s'agissoit du seruice du Roy, de la cōseruation de l'Estat, & du bien public: dont M. le premier President l'auroit remercié pour toute la Com pagnie en termes fort ciuils, le tout avec grande presence d'esprit. En fin a pres diuerfes conferences, allées & venuës, les susdites difficultez se seroient terminées ainsi qu'il auroit esté rapporté par Messieurs le Coigneux & de Bellieure en la maniere qui s'ensuit. Sçauoir est,

Que Monsieur le Prince de Cōty seroit Generalissime des armes du Roy, & qu'il ne bougeroit de Paris, & viendrait prendre sa place à toutes occa sions: Monsieur le Duc de Longueuille ne prendroit aucun titre ny aucune charge, sinon qu'il assisteroit ledit sieur Prince de Conty de ses bons con seils. Que Messieurs les Ducs d'Elbeuf, de Bouillon, & Marechal de la Mo rre seront tous trois Lieutenans Generaux dudit sieur Prince de Conty avec esgalité de commandement chacun son iour, & que monsieur d'Elbeuf commenceroit, & Messieurs les Enfans auroient les premiers emplois, qui continueroient les iours mesmes que commanderoient les deux autres: Que ledit sieur d'Elbeuf auroit la premiere seance au Conseil de guerre qui se tiendroit chez ledit sieur Prince de Conty; en suite dequoy ledit sieur Prince ayant accepté la charge de Generalissime, & en ayant remercié la Compagnie, auroit protesté qu'il ne l'acceptoit que pour l'exercer sous les ordres & l'autorité du Parlement, & qu'il en faisoit ses submissions.

Ce iour la Police generale ne se seroit point tenuē l'apresdinée, à cause qu'il estoit deux heures apres midy quand la Compagnie se rerira.

*Addition.* Messieurs les Presidens & Conseillers du grand Conseil se sont cottisez à cinquante deux mil liures toute la Compagnie.

La Chambre des Comptes s'est aussi taxée, les Maistres à huit cens liures, les Correcteurs & Auditeurs trois cens liures chacun : les Presidens ont donné les vns plus les autres moins.

*Du Mardi douziesme Ianuier au matin.*

Ce iour les Chambres assemblées à l'ordinaire, ou l'on n'auroit fait autre chose que des reglemens pour la Police, tant des gés de guerre que de la ville de Paris, & y auroit esté donné Arrest contenant les retrenchemens pour la seureté de la ville & faux-bourgs, on a proposé de mettre le tault & le prix au bled, lequel auroit esté arresté de regler à quinze sols le meilleur, douze sols le metal, & dix sols le segle, & auroient esté commis monsieur Quelin & Bitault Conseillers, pour se transporter aux Prieuré de Saint Martin des Champs & de Saint Lazare; ou s'estant transportez, ils auroient trouué à Saint Martin des Champs 100. muids de bled, & des armes pour armer 8000. hommes; & à Saint Lazare 150. muids de bled tant en grain que farine, & le tout ordonné estre vendu & distribué au public.

Comme aussi auroient esté commis Messieurs Laisné & le Clerc de Courcelle, Conseillers en la cinquiésme, & Loisel de la premiere, pour aller faire Inuentaire des deniers qui se trouueroient chez les nommez Vanelli, Cantarini, & Serantoni Banquiers du Cardinal Mazarin, pour voir & visiter leurs liures, & en dresser procez verbal.

Auroit aussi esté arresté de permettre la sortie du bagage du Roy & de la Reyne Regente sa Mere, de monsieur le Duc d'Orleans, de Madame sa femme, & de Mademoiselle, & pour cet effet deux de Messieurs commis pour les faire sortir & escorter par des Compagnies de la ville, ce qui auroit esté fait & executé l'apresdisnée.

Il auroit aussi esté proposé d'y donner seance à Monsieur le Coadjuteur, afin de faire voir l'vnion del'Eglise & de la Iustice; mais ceste proposition n'auroit point passé, ayant esté representé par quelques-vns de la Compagnie, & notamment par Monsieur le President de Mesmes, qu'il en falloit parler auparavant à Monsieur l'Archeuesque son Oncle, sçauoir s'il l'agrèeroit.

Le mesme iour on auoit en continuant la batterie dressée contre la Bastille dès le iour precedent, tiré deux coups de canon, qui auroient fait brèche, & le sieur du Tremblay Gouverneur d'icelle, a esté sommé de la rendre, lequel auroit promis qu'au cas que de la Cour on ne luy enuoyast du secours dans le Ieudy quatorziesme dudit mois à midy, il la rendroit, en suite dequoy on auroit continué de la battre.

Messieurs Ridet & Pinon Tresoriers de France à Paris, ont offert au nom de leur Compagnie de payer 350. liures pour chaque Tresorier dudit bureau, lesquelles offres ont esté receuës.



*Ledit iour de releuée,*

**L'**On auroit tenu la police generale à l'ordinaire, & ce pour regler le prix des armes & de la poudre que l'on suruendoit aux Bourgeois & soldats.

*Addition.* Monsieur le Prince deslogea de Charenton, & des enuirs d'iceluy, laissant ce costé-là libre, & alla se poster à saint Denys, ayant pris quatre pieces de canon au chasteau de Vincennes; il mit audit saint Denys partie de ses troupes commandées par le Marechal du Plessis, ayant laissé l'autre partie à saint Cloud & es enuirs, dont il donna le commandement au Marechal de Grammont, & au sieur de Palluau son Lieutenant General.

*Du Mercredi treiziesme Ianuier.*

**L**es Chambres se seroient assemblées à l'ordinaire, & y auroit esté arresté de donner 20000. liures à la Reyne d'Angleterre, & de les deliurer à son Tresorier, attendu le besoin qu'elle en auoit, n'ayant esté payée depuis six mois de ses pensions, ce qui auroit esté le iour mesme executé.

Auroit aussi esté donné Arrest, par lequel auroit esté ordonné que tous les biens, meubles, & immeubles du Cardinal Mazarin seroient saisis à la Requête du Procureur General, à la diligence de ses Substituts.

Monsieur Laisné auroit en suite fait rapport de son procez verbal, de ce qu'il auoit fait chez Vanelli, Cantarini, & Serantoni, chez lesquels il se seroit transporté avec les deux autres Conseillers commis, & dit à la Cour n'auoir trouué chez eux aucuns deniers, ny mesme leurs liures qu'ils auoient diuertis & transportez.

Après lequel rapport sur la proposition qui auroit esté faite par aucuns de Messieurs, il auroit esté donné Arrest, portant que quelques-vns d'entr'eux se transporteroient par les dixaines, & donneroient ordre aux Dixainiers de voir & visiter les maisons de ceux qui pourroient donner de l'argent, & regler leurs taxes.

Les Medecins ont offert à la Cour 3000. liures, & ont demandé d'estre déchargé de toute autre taxe, ce qui leur a esté promis par Monsieur le premier President.

*En suite dequoy*

**M**onsieur le Prince de Conty estant venu, & pris sa place dans la Compagnie, ayant parlé de la continuation de la batterie de la Bastille, & qu'elle n'estoit pas encore renduë; mais qu'elle ne pouuoit pas encor tenir long-temps; Monsieur le premier President luy auroit dit de la part de la Compagnie, qu'elle le prioit de mettre vn Conseiller de la Cour dedans pour en auoir soin; à quoy ledit sieur Prince auroit reparty, qu'aussi tost

qu'elle seroit prise, ladite Cour y mettroit tel qu'il luy plairoit, & en auroit l'entiere disposition, estant resolu de luy obeir absolument, apres quoy la Cour se seroit releuée.

Et aussi-tost la Cour leuée seroit venu l'aduis que la Bastille seroit renduë à midy, ce qui se seroit trouué veritable, & en seroit sorty le sieur du Tremblay Gouverneur, & vingt deux soldats, ausquels on auroit donné escorte pour sortir, & les conduire hors de la ville, & y seroit entré en garnison deux Compagnies de la ville, sçauoir celle de Messieurs Portail, & le Fevre, & enuiron la mesme heure seroit arriué Monsieur le Duc de Beaufort en cette ville de Paris à cheual, luy troisieme, & auroit descendu chez les Prudhommes Estuistes.

### *Dudit iour de releuée.*

**L'**On'auroit tenu la police à l'ordinaire en la Chambre saint Louys, & au Conseil de la ville, où estoient les Princes & Generaux, Messieurs du Parlement, entre lesquels y a assisté Monsieur le President de Mesme, ensemble les Deputez des autres Compagnies Souueraines, & les Officiers de la ville; Monsieur le Prince de Conty y auroit proposé Monsieur de Brussel Conseiller en la grande Chambre, pour Gouverneur de la Bastille, & le sieur de Louuiere son fils pour son Lieutenant; & auroit encore prié ledit sieur de Brussel d'accepter ledit Gouvernement, à quoy la modestie dudit sieur de Brussel auroit resisté quelque temps, neantmoins son zele & sa grande affection au seruice du Roy luy auroit fait consentir, pourueu que sa Compagnie le trouuast bon.

### *Le Ieudi quatorzieme Ianuier.*

**L**es Chambres s'estans assemblées à l'ordinaire, où se seroient trouuez Messieurs le Prince de Conty, Ducs d'Elbeuf, & de Longueville: & Monsieur de Conty ayant fait recit du choix qu'il auoit fait sous l'auede la Compagnie de Monsieur Brussel pour Gouverneur de la Bastille, & du sieur de Louuiere son fils pour son Lieutenant, la Cour l'auroit tres-humblement remercié & approuué ce choix vniuersellement, apres quoy ledit sieur de Brussel auroit rendu graces audit sieur Prince de Conty, & à toute la compagnie; & avec des paroles pleines de modestie & de serueur tout ensemble, auroit donné des assurances certaines de sa fidelité & affection, & zele de luy & de son fils, au veritable seruice du Roy, dont la Cour par la bouche de Monsieur le premier President luy auroit dit qu'elle n'en auoit iamais douté.

Après quoy il se seroit parlé de la taxe qui auroit esté faite aux soldats, sçauoir à chaque caualier quarante sols, & à chacun homme de pied dix sols.

En suite Monsieur le Duc de Beaufort auroit présenté sa Requête à la Cour, afin d'estre receu à se purger & iustifier de l'accusation contre luy intentée par le Cardinal Mazarin, d'auoir conspiré contre sa personne & sa



vic, & demandé qu'il fut passé outre à l'instruction & iugement de son procez: sur laquelle la Cour, les Chambres assemblées ayant ordonné le soit montré à monsieur le Procureur General, ledit sieur auroit déclaré qu'il ne l'empeschoit pour le Roy; & à l'instant ayant esté ladite Requête rapportée à monsieur le Cheualier à la grande Chambre, & monsieur le premier President l'ayant fait prendre par monsieur Ferrand pour en faire lecture, icelle ayant esté faite, & quelques-vns de Messieurs ayant dit qu'il le falloit interroger, monsieur le Bouffs auroit reparti, qu'il n'y auoit point de decret, & qu'il falloit voir les informations auparauint pour voir ce qu'il y auroit à faire, & auroit dit à Messieurs Cheualier & Ferrand de les prendre & les voir.

Et la Cour s'estant leuée, monsieur le Duc de Beaufort seroit venu au Parquet de Messieurs les Gens du Roy, accompagné de Messieurs de la Nauue & Coulon, Conseillers, lesquels monsieur le Procureur General ayant fait seoir aupres de lui, ledit sieur de Beaufort, apres leur auoir fait compliment, les auroit suppliez de lui faire iustice, & lui faire promptement, afin qu'il pût estre en estat de seruir le Roi, l'Estat, & le Parlement: ce que Messieurs les Gens du Roi lui auroient promis.

En suite, monsieur le Duc d'Elbeuf ayant dit qu'il estoit resté des Prisonniers dans la Bastille, dont il auoit pris la liste, laquelle il auoit baillé presentement à monsieur le premier President, la Cour auroit commis Messieurs Ferrand & Doujat, pour s'y transporter avec vn des Substituds de monsieur le Procureur General pour les ouyr & interroger, ce qu'ils auroient fait ledit iour de releuée.

*Addition.* Monsieur le Prince se saisit de Lagny, & en donna le gouuernement au Baron de Persan; il auoit aussi Corbeil, parce que le Gouverneur beaufriere du President de Bailleul, y auoit laissé entrer garnison.

Monsieur le Duc de Luynes, & le Marquis de Vitry arriuerent à Paris, offrir leur seruice au Roi, & pour la liberté publique; contre les efforts du Cardinal Mazarin.

### *Du Vendredy quinzième Ianuier.*

**C**E iour les Chambres assemblées, l'on auroit proposé l'ordre que Messieurs de la grande Chambre deuoient tenir pour emprunter le 50000. liures portez par l'Arrest du neufiesme Ianuier audit an, & arresté que quatre de Messieurs les Presidents au Mortier, & quatre Conseillers de la grande Chambre s'obligeroient tant en leur nom, que comme ayans pouuoir par procuration pour tous les autres.

Apres quoy monsieur le Procureur General ayant enuoyé à ladite grande Chambre les conclusions par luy prises au procez de monsieur de Beaufort, consistant en la seule commission pour luy faire son procez, à la Requête dudit Procureur General, & des charges, informations, & repetitions de tesmoins ouys en icelles, les Conclusions portant qu'il n'empeschoit le procez estre iugé, ainsi que la Cour verroit estre à faire par raison;

& ayant esté deliberé s'il seroit iugé les Chambres assemblées, ou par la grand' Chambre seule, il auroit passé à le iuger en ladite grande Chambre seule; attendu qu'il n'auoit pas encor esté receu, ny presté le serment de Duc & Pair au Parlement: en suite dequoy, Messieurs des Enquestes estans retirés, la grand' Chambre auroit vacqué le reste de la matinée à iuger ledit procez, auquel incidemment ledit sieur de Beaufort ayant présenté Requête à la Cour, afin d'estre receu appellant de la procédure contre luy faite par deux Maistres des Requestes, & opposant à l'exécution de la Cour, qui auoit ordonné cy-deuant la repetition des tesmoins ouys, & informations contre luy faites par lesdits Maistres des Requestes: la Cour auroit donné Arrest, par lequel sans auoir égard à ladite Requête, faisant droit au principal, auroit enuoyé ledit sieur de Beaufort absous de l'accusation contre luy intentée, sauf à luy à se pouruoir pour ses dommages & intersts contre qui, & ainsi qu'il aduiferoit bon estre.

Ce fait Messieurs des Enquestes seroient rentrez dans ladite grande Chambre, ou auroit esté proposé de saisir & d'arrester tous les deniers Royaux estans dans les receptes generales & particulieres, & des parties casuelles & autres, tant de cette ville, que des Prouinces du Royaume; & parce qu'il estoit tard, il auroit esté remis à deliberer.

### *Dudit iour à deux heures de releuée.*

C E iour sur les trois heures les Chambres s'estans assemblées, & quelques-vns de Messieurs les Presidens estans venus fort tard, & la Compagnie estant presté de se leuer sans rien mettre en deliberation, le Bailly de S. Germain auroit demandé d'estre entendu sur quelques aduis qu'il auroit à donner à la Cour, qui estoit qu'il y auoit quantité de coureurs, voleurs & vagabonds, qui voloient es enuiron du Faux-bourg saint Germain, & empeschoient qu'aucuns viures n'y entraissent, & commettoient toutes sortes de brigandages, vols, & violemens de femmes & filles, offrant à la Cour de leur courre sus, & de les aller prendre sans demander ny argent, ny hommes pour cét effet; ains seulement que la Cour eust agreable de luy en donner la commission: Sur quoy monsieur le premier President luy ayant dit, que la Compagnie ne doutoit point de son courage, mais qu'il estoit necessaire qu'il demeurast dans ledit Faux-bourg, afin de pouruoir à sa seureté, & qu'il y auoit du peril à l'abandonner; & quelques-vns des Messieurs ayant neantmoins approuué l'offre dudit Bailly, & dit qu'il falloit l'accepter, & luy donner la Commission qu'il offroit luy-mesme de prendre, puis que c'estoit pour le seruice du public: sur ce Monsieur le premier President & Monsieur le President de Mesmes ayant représenté que ce n'estoit pas de la Compagnie qu'il deuoit prendre cette Commission, & que Messieurs les Generaux & Deputez qui estoient à la ville au Conseil de guerre y pourroient pouruoir, veu mesme qu'y ayant du peril à luy & à ceux qu'il meneroit d'estre repoussez s'il n'estoit escorté & secouru de quelques Compagnies de gens de pied, qu'on lui pourroit donner;



donner; La Cour auroit donné ordre d'aller au Conseil de la ville faire ses offres, & auroit à cette fin député Monsieur le Cocq Conseiller pour le conduire & représenter.

En suite de ce monsieur Violle President de la quatre des Enquestes, ayant dit auoir vne Lettre en ses mains escrite de saint Germain par monsieur le Prince de Condé, adressante à monsieur de Boiillon, lecture en auroit esté faite à la Compagnie, laquelle Lettre portoit en substance, qu'il apprehendoit que la retraite de monsieur le Prince de Contry & Duc de Longueuille ses frere & beau-frere de saint Germain, ne fit croire audit sieur de Boiillon qu'il auoit trempé en ce dessein, faisoit qu'il luy en auoit bien voulu donner aduis par ladite lettre, par laquelle il le prioit de sortir de Paris, pour ne pas s'engager dans le party qu'il auoit pris, & quand il en voudroit separer l'interest du Roy & del'Estat, que le sien y estoit tout entier, & qu'il ne pouuoit l'obliger plus sensiblement, que d'aller à saint Germain, où il trouueroit toutes les affaires faites au point qu'il auoit les souhaitées, le suppliant de lui faire l'honneur de se croire son tres-affectionné seruiteur,

LOVYS DE BOURBON.

Après la lecture de laquelle Lettre, Messieurs de Barresme & André Conseillers au Parlement de Prouence, & Deputez de leur Compagnie, auroient fait demander à la Cour d'y estre entendus; ce que la Compagnie ayant agréé, ils seroient entrez & pris place au Bureau, entre Messieurs le Prestre & Doujat Conseillers de la grande Chambre; & là ledit sieur Barresme comme le plus ancien, auroit porté la parole, & dit à la Cour que leur Compagnie les auoit deputez vers elle pour luy demander son assistance & son secours, & la supplier d'auoir compassion d'une Compagnie de miserables que la violence & le malheur du temps passé & du présent tenoit dans l'oppression; & après auoir supplié la Cour lui permettre de faire le recit sommaire de leurs malheurs, il lui auroit représenté que cette violence auroit commencé par vne Chambre des Requestes, quel'on auroit établi par vn Edict en leur Parlement, lors de la lecture duquel y ayant eu dix-sept des Messieurs de leur Compagnie d'aduis de faire tres-humbles remonstrances au Roy, cet aduis les auroit rendu Criminels, & en auroit fait interdire quarante-cinq de leur Compagnie; de sorte que ces nouueaux Commissaires sans estre pourueus desdits Offices, ains seulement de ces simples Commissions, n'auroient pas laissé de les exercer, & de prendre rang & s'ceance dans la Compagnie; & pour passer des malheurs passés aux miseres presentes, auroit représenté la violence du reestablishement du Semestre en leur Parlement, par vn Edict non verifié, ausquels les anciens Conseillers ayant résisté courageusement, seize d'entr'eux auroient esté exilés avec leurs femmes & enfans depuis treize mois; & voyans qu'il falloit ceder à la violence, & qu'ils ne pouuoient empêcher l'execution de ce Semestre, qu'en se redimant de cette oppression par vne immense somme de deniers, ils auroient enuoyé leurs deputez en Cour, où ayant offert vne somme de 900000. liures qui est la plus grande somme que iamais aucun Roy ait exigé, ils auroient esté receus en leurs offres, moyennant lesquelles on leur auroit promis de

reuoquer ce Semestre : mais tant s'en faut qu'on leur aye tenu parole, qu'au contraire leurs Deputez estans reuenus à la Cour le quatriesme Decembre dernier 1648. pour executer leur Office, l'Audiance leur auroit esté refusée : & le vingt-huictiesme du mesme mois on leur auroit fait signifier vn Arrest du Conseil, portant confirmation de ce Semestre, duquel s'estans plains avec raison, quoy que le peuple, si le Gouverneur de la Prouince en eust esté absent, & eust fait luy-mesme la reuocation, on leur auroit donné parole de ne le point executer s'ils vouloient augmenter la somme par eux promise de 300000. liures, à quoy se voyans forcez par la necessité du temps, & de deuenir eux-mesmes Partisans de leurs malheurs, ils s'y seroient soubmis; & apres toutes ces promesses & assurances données, on leur auroit encor manqué de parole; de sorte qu'ayant eu aduis de la Declaration du mois d'Octobre dernier, par le quinzieme article de laquelle, ils auroient nommément pourueu au restablissement des Officiers deposez : C'est ce qui les auoit obligez d'auoir recours à la Cour, à laquelle ils auoient eu la pensée & le dessein de s'adresser dès le mois de Iuillet dernier; mais ayant eu l'honneur d'en conferer avec quelques-vns de Messieurs du Parlement, qui leur auroit fait connoistre que la iurisdiction de la Compagnie ne s'estendant point hors de son ressort, & dans celui d'un autre Parlement, ils ne pouuoient auoir recours qu'à la souueraine puissance du Roy pour leur estre pourueu; mais maintenant que le Parlement auoit la puissance de secourir les miserables, ils le venoient implorer & supplier d'auoir compassion de leurs miseres, & d'assister vne Compagnie qui en auoit eu vne extrême de celle du Parlement dans ces derniers temps; Qu'apres auoir esté traictez avec tant de violence, apres auoir esté exiliez de leur pays, chassez de leur Compagnie, eux, leurs femmes & enfans, despoüillez de leurs biens, priuez d'honneur, ils esperoient trouuer leur refuge en cette Compagnie, laquelle en les assistant de sa puissance & protection, soulageroit vn peuple des Impositions dont ils estoient surchargez, conserueroient à la Compagnie ses Priuileges, & eux donnoient leur foy & leur parole à la Compagnie, quoy que la Cour ait cy-deuant tesmoigné que sa iurisdiction ne s'estendoit pas hors son ressort, que son Arrest y seroit executé avec autant d'obeyssance & de respect que dans le ressort du Parlement.

Aquoy Monsieur le premier President prenant la parole, ayant reparti que la Compagnie ne leur desniroit iamais l'assistance qui estoit en sa puissance, que cela despendoit de la resolution commune de la Compagnie, laquelle en les conseruant se conserueroit elle-mesme.

*Du Samedi seiziesme Ianuier 1649. au matin.*

**C**E iour la Cour toutes les Chambres assemblées, les Gens du Roy ont dit que les Recteur & Supposts de l'Vniuersité estoient au Parquet des Huissiers, demandoient à parler à la Cour; entrez qu'ils furent, le Recteur portant la parole, parlant en latin, ont dit, Que pour le seruice public ils venoient offrir la somme de dix mille liures pour tous les corps; suploient



la Cour les conferuer en leurs priuileges : Monsieur le premier President leur a respondu aussi en latin ; que la Cour acceptoit leur offre , & qu'ils se pouuoient asseurer qu'elle les conferuera en tout ce qui despendra d'elle.

Ce iour ont esté commis Messieurs Meliand & Doujat Conseillers en ladite Cour , pour visiter les armes qui se trouueront en cette ville avec personnes & gens à ce connoissans , pour sçauoir le iuste prix desdites armes , pour sur le rapport y estre pourueu : ont esté aussi commis Messieurs le Meusnier , Seuin , & Paluan Conseillers , pour faire la mesme chose à l'égard des cheuaux , afin qu'ils ne soient vendus que leur iuste prix.

Ladite Cour delibérant sur plusieurs propositions faites au sujet des affaires presentes , a arresté & ordonné , quel'Assemblée sera faite ce iourd'huy de releuée en la maison de Monsieur le premier President , avec vn des Deputez de chacune Chambre des Enquestes & Requestes , vn Maistre des Requestes , & des deputez de chacune Compagnie Souueraine de la Chambre des Comptes , grand Conseil , & Cour des Aydes , avec deux Tresoriers de France à Paris ; laquelle Assemblée sera faite & continuée par chacun iour à ladite heure pendant huiétaine ; & apres sera de semaine en semaine continuée en la maison de chacun President de ladite Cour , & seront deputez d'autres Conseillers d'icelle qui seront pris de huiétaine en huiétaine , selon l'ordre du tableau , pour tenir Conseil , concerter & auiser par quel moyen l'on pourra faire subsister les Compagnies qui seront leuées ; & de quel fond l'on pourra faire estar , dont sera fait rapport en ladite Cour chacun iour , & par elle ordonner ce qu'il appartiendra.

*Addition.* Le Marechal de l'Hospital qui commandoit dans saint Denys , en partit pour aller en Champagne , l'asseurer au party du Cardinal , & aussi pour y faire des leuées de gens de guerre : le Marechal du Plessis fut mis en sa place pour commander les troupes de ce poste-là , lesquelles pilloient & violioient aux enuirs avec plus de licence , que des Turs ne feroient sur des Chrestiens : la ville de saint Denys mesme ne fut pas exempte de pillage , les Allemans ayant enfin contrainct presque tous les habitans de l'abandonner ; & ainsi les enuirs de Paris iadis si agreables , començoient d'estre semblables aux frontieres si fort aduancées , ou tous les ans les deux armées ennemies ont de coustume de passer.

Les enuirs de la ville de S. Cloud estoient encor aussi mal traictez par les Polonois , commandez par le Marechal de Grammont , & le sieur Paluau ; & il sembloit que ces deux nations Allemans & Polonnois n'estoient en France que pour en piller & ruiner la plus belle & principale partie.

La ville de Lagny fut surprise par le Baron de Persan , qui y mit garnison pour le Cardinal Mazatin : il auoit fait sortir le Maire d'icelle sur sa parole , pour luy parler , & le retint , feignant le vouloir faire mourir si les habitans ne luy liuroient la place , ce qu'ils aymerent mieux , que d'exposer leur Maire à la mercy d'un homme qui n'eust pas fait plus de conscience de le faire mourir , que de fausser sa foy & sa parole , & violer le droit des gens , & ainsi cette ville receut garnison & pareil traitement que les autres.

*Du Dimanche dix-septiesme Ianuier de releuée.*

**C**E iour la Cour toutes les Chambres assemblées, le Duc de Chevreuse estant en sa place a dit à la Cour, qu'il venoit l'asseurer de toute assistance & seruice: Monsieur le premier President l'a remercié pour toute la Compagnie.

Monsieur le premier President a dit à la Cour toutes les Chambres assemblées, que suiuant la deliberation du iour d'hier, auoit esté tenu conseil en sa maison, où se seroient trouuez les deputez de la grande Chambre des Enquestes & Requestes, vn President des Comptes, & quatre Maistres des Comptes des deputez de la Cour des Aydes, & deux Tresoriers de France; Que audit Conseil il auoit exposé la proposition faite en la Cour, que les deputez de la Chambre des Comptes & Cour des Aydes, n'auroient aucune charge de leur Compagnie; qu'ils y feroient entendre ladite proposition, & en donneroient responce pour demain de releuée. Ce fait auroit esté proposé d'écrire au Parlement & aux villes du Royaume, leur faire entendre les iustes raisons par lesquelles le peuple de Paris a esté nécessité de prendre les armes pour la deffence legitime contre le Cardinal Mazarin, & empescher la ruïne de l'Estat, afin d'inciter vn chacun de prendre le mesme interest, & se joindre à ce bon dessein; la matiere mise en deliberation, Surquoy

Ladite Cour a arresté qu'il sera dressé vne lettre & remonstrance, lesquels avec les Arrests de ladite Cour donnez depuis le sixiesme de ce mois, seront à la diligence du Procureur General du Roy enuoyez à tous les Parlemens de France, & à toutes les villes, bourgs, & bourgades, Baillifs, Seneschaux & autres officiers du Royaume.

*Du Lundy dix-huictiesme Ianuier du matin.*

**C**E iour le Duc de Luynes a dit à la Cour, toutes les Chambres assemblées, qu'il venoit asseurer la Cour de toute assistance & seruice. Monsieur le premier President l'a remercié pour toute la Compagnie.

Puis la Cour ayant deliberé sur le rapport fait par l'vn des Conseillers d'icelle, de la proposition faite au Conseil de guerre en l'Hostel de Ville, de prendre tous les Cheuaux estans en cette ville, appartenans à ceux qui sont absens & aux Forains. A arresté que deux Conseillers de ladite Cour les plus anciens en chacun quartier de cette Ville & Faux-bourg, & à la diligence du Quartenier, feront procez verbal de tous les Cheuaux des absens de cette Ville & des Forains, pour lesdits procez Verbaux, veus & raportez, estre par la Cour ordonné ce qu'il appartiendra. Cependant fait deffenses de destourner aucuns Cheuaux, à peine aux contreuenans de confiscation.

Après quoy ont esté leües deux Lettres, l'vne pour enuoyer au Parle-



mens, & l'autre à toutes les Villes, Baillifs, Seneschaux, leurs Lieutenans, Maires, Escheuins, Jurats, Consuls, Capitoux, & autres Officiers; & les Gens du Roy mandez, ont esté chargez de les enuoyer en diligence par toutes les Prouinces du Royaume; sçauoir avec celle escrite aux Parlemens; aiant de la lettre escrite aux Villes, & les deux Arrests de ladite Cour y mentionnez, & avec ceux des Villes & Officiers, autant de la Lettre escrite au Parlement avec lesdits Arrests, desquelles Lettres la teneur ensuit.

**M**ESSIEURS, Nous jugeons bien que vous aurez appris par le bruit commun, ce que les siecles auenir auront peine de croire; que dans le temps, où il y auoit lieu d'esperer quelques bons effets de la Declaration que nous auions procurée pour reestabli l'ordre dans l'Estat, & soulager la misere des Peuples. Le Cardinal Mazarin a enleué le Roy de Paris à trois heures apres minuit, & fait inuestir ladite Ville; ce qui a mis l'estonnement & la crainte dans l'esprit des gens de bien; & pour donner pretexte à vne action si estrange, il a fait escrire vne Lettre au Preuost des Marchands & Escheuins de cette Ville, par laquelle il nous accuse d'auoir eu intelligence avec les Estrangers, pour leur mettre entre les mains la personne du Roy, qui est vne calomnie qui se destruit assez d'elle-mesme, & dont n'auons besoin de nous iustifier, mais de vous informer que le dessein dudit Cardinal Mazarin n'a autre but que d'opprimer & aneantir le Parlement & la Ville de Paris, afin qu'vne oppression commune d'assujettir les autres Prouinces du Royaume, & establi sa tyrannie au poinct de se rendre maistre de ce qui est plus considerable dans l'Estat. Ce qui est tellement injuste & contraire aux Loix de cette Monarchie, & à l'autorité Royale, que nous nous promettons que vous vous employerez de tout vostre pouuoir pour empescher vn si pernicieux dessein. Nous auons pour satisfaire à nostre deuoir donné vn Arrest, par lequel le Cardinal Mazarin est déclaré perturbateur du repos public, ennemy du Roy & de son Estat, afin de detromper les peuples qui se pourroient laisser surprendre, aux ordres qu'il donne sur le nom du Roy, duquel il a abusé depuis plusieurs années. La Ville de Paris a leué des troupes, & monsieur le Prince de Conty, avec beaucoup de Princes, Ducs & Pairs, Officiers de la Couronne, & autres personnes de condition, sont venus au Parlement declarer qu'ils vouloient seruir le Roy avec nous en cette occasion, pour arrester le cours des entreprises dudit Cardinal Mazarin. Nous vous donnons part de ce que nous auons fait iusques à present, & de l'estat ou sont les choses; & comme nous n'auons tous qu'vn mesme interest, & vne mesme intention pour le seruice du Roy, nous esperons, que vos conduites & les nostres se rapporteront, en sorte qu'il paroistra que nous auons desia preparé les moyens pour nous deffendre d'vne telle oppression. Nous ne doutons point que par vos Prudences vous ne pourroyez au plus tost à vostre conseruation & à la nostre, & qu'ainsi tous ensemble agissant d'vn mesme sentiment, nous asseurons celle de l'Estat, empeschans vne guerre Ciuile qui n'auroit pour cause que l'ambition d'vn Estranger. Nous voulons conseruer vne parfaite intelligence avec vous: Et demeurons, Mes-

seurs, vos bons freres & amis les Gens tenant la Cour de Parlement de Paris.

MESSIEURS, Bien que nous ne doutons pas que vous ne soyez affectez des soins que la Cour a pris en toutes rencontres de la conseruation de l'estat, & de la fidelité, enuers le Roy: neantmoins comme le Cardinal Mazarin ennemy du Royaume tasche par toutes sortes de moyens, & par la voye ouuerte des armes d'opprimer l'autorité du Roy, celle de la Cour, & la liberté publique par vne armée avec laquelle il a fait inuestir Paris, apres auoir enleué le Roy à trois heures apres minuit; Nous vous donnons aduis, & vous enuoyons les Arrests, par l'un desquels il est déclaré perturbateur du repos public: par l'autre enjoint aux troupes de se retirer, & à faute de ce faire, aux Communes de courre sus, afin d'empescher le pernicieux dessein dudit Cardinal. Nous vous prions d'aider de viures & de forces à cette grande Ville, dont la ruïne causeroit en suite celle de l'Estat, que nous vous conuions de nous aider & conseruer au Roy, afin qu'il connoisse vn iour ses bons seruiteurs: Nous sommes vos bons amis, les Gens tenant la Cour de Parlement de Paris.

Après quoy monsieur de Beaufort fut receu & presta le serment de Duc & Pair de France, avec le rang & seance du iour de la creation & erection de la terre de Beaufort en Duché & Pairie.

On proposa de receuoir monsieur le Coadjuteur Conseiller honoraire, monsieur l'Archeuesque de Paris y consentât; ce qui fut arresté. Monsieur de Brussel dit qu'il falloit le receuoir sans prester serment, ayant presté au Roy le serment de fidelité: monsieur le premier President dit, qu'en la reception d'un Conseiller on faisoit trois sortes de serment, desquels monsieur le Coadjuteur ne pouuoit se dispenser, ne les ayant pas faits en faisant celuy de fidelité, sçauoir est, rendre Iustice, garder les Ordonnances, & tenir les deliberations de la Compagnie secretes; à quoy monsieur le premier President dit qu'il falloit voir les Registres, & remettre l'affaire au premier iour, ce qui fut arresté.

### *Du Mardy dixneufiesme Ianuier 1649. du matin.*

Ce iour les Chambres assemblées à l'ordinaire, où se seroient trouuez monsieur le Duc de Luynes; quelques-uns de Messieurs ayant representé que l'on se plaignoit de la cherté du pain que les Boulangers auroient enchery, le vendant iusques à trois sols la liure; pour à quoy remedier la Cour auroit commis plusieurs de Messieurs pour se transporter dans les Faux-bourgs de Paris le iour mesme, pour faire entrer du pain dans la ville le lendemain Mercredy iour de marché, & se transporter deux ensemble à chacun marché & place publique, afin de faire distribuer le pain au peuple à prix raisonnable.

Après quoy Monsieur de Brussel ayant mis la proposition d'arrester les deniers publics pour la subsistance necessaire qui auoit esté faite quelques



iours auparavant, & l'affaire ayant esté mise en deliberation par monsieur le premier President; il auroit esté donné Arrest, portant que tous les deniers des receptes generales & particulieres seroient saisis & arrestez, & à cette fin que ceux de dehors & des Prouinces seroient apportez, voiturez & amenez à Paris: & que les villes seroient aduerties de donner escorte pour les conduire, & arresté que l'on cōserueroit fonds suffisant pour payer les rentes des rentiers & les gages des Officiers, & que l'on feroit distraction des rentes deuës à personnes qui auoient suiuy le party contraire, pour estre lesdits deniers employez aux necessitez publiques.

En suite monsieur Deslandes-Payen ayant voulu parler de la Requeste de Monsieur le Duc de Chevreuse & de Madame sa femme, & ayant fait lecture des conclusions de ladite Requeste, prises par monsieur le Procureur General, l'affaire auroit esté remise au lédemain parce qu'il estoit trop tard, & la Cour se seroit leuee apres auoir ouy Burin commis de la poste; auquel ladite Cour auroit enjoint de faire porter toutes les lettres & pacquets avec diligence & fidelité, & de prendre vn soin tres-particulier des pacquets qui luy seront donnez par Messieurs les Generaux, ou par le Procureur General du Roy; comme aussi d'aduertir la Compagnie s'il suruenoit quelque chose d'importance, ce qu'il auroit promis faire, & demandé à la Cour qu'elle eust agreable de luy donner quelqu'un de Messieurs, avec lequel il püst conferer; ce que la Cour luy auroit accordé, & ordonné de s'adresser à monsieur Payen.

Ce mesme iour auroient esté commis Messieurs Doujat & Baron Conseillers en ladite Cour, sur l'aduis qui a esté donné qu'il y auoit vne somme de deniers notable appartenant au Cardinal Mazarin, en vne maison en ceste ville, pour saisir & arrester lesdits deniers.

Monsieur le premier President a dit à la Cour, que le iour d'hier vne personne les vint trouuer de la part de la Reine d'Angleterre, & qui se dit son Chancelier, lequel dit auoir charge de ladite Dame Reine, de faire des remerciemens à la Cour de ce qu'elle auoit fait pour elle.

Puis apres Messieurs deliberant sur le recit fait par monsieur le premier President de ce qui se passa le iour d'hier de releuée avec les Deputez des Compagnies en l'Assemblée tenuë en sa maison, a esté arresté que tous habitants de ceste ville & fauxbours, qui ne se trouueroient des Corps & Communautez, & qui ayant contribué au payement & cottisation ordonnée par l'Arrest du neuuesime de ce mois & an, seront taxez & cottisez en ladite Assemblée; & à ceste fin memoire dressé des officiers par les Quarteniers, & de tous les habitants de leur quartier.

Après quoy deliberant sur les propositions faites au sujet des affaires presentes, la Cour a arresté & ordonné, qu'à la Requeste du Procureur General du Roy, tous les deniers publics qui se trouueront deubs par tous Comptables & Fermiers, en quelque sorte & maniere que ce soit, tant en ceste ville de Paris, qu'autres villes de ce ressort, seront saisis & apportez en ceste ville de Paris, & misés coffres de l'Hostel de ladite ville, pour d'iceux deniers estre ordonné ce qu'il appartiendra; faire deffences à tous lesdits

Comptables, Fermiers, & autres redeuables, depayer aucuns desdits deniers que par ordre de ladite Cour.

Ont esté commis Monsieur du Gué Maistre des Requestes, Messieurs Renouard & de la Nauue Conseillers, sur l'aduis qui a esté donné d'une somme de cent mil liures, estans entre les mains d'un Partisan de ceste ville.

*Du Mercredy 20. Ianuier.*

**C**Eiour les Chambres assemblées à l'ordinaire, Messieurs le Prince de Conty & Ducs presens, sur ce qu'il auroit esté représenté à la Cour que les Gés de guerre qui estoient es enuirs de Paris, & qui le tenoient presque inuesty, continuoient leurs pilleries, volleries, violemens, & tous autres actes d'hostilitez; ladite Cour auroit donné Arrest, par lequel elle auroit enjoint à tous gens de guerre de se retirer selon les Ordonnances & Arrests cy deuant donnez; enjoint aux Officiers de tenir la main tant pour faire retirer leurs troupes, que pour empescher qu'il ne soit commis aucuns desordres ny pilleries, tant es Bourgs & Villages qu'à la Campagne, à peine d'en respondre par lesdits Officiers, en leurs propres & priuez noms, & d'en estre responfables solidairement.

Ce fait, il auroit esté proposé de faire sortir de Paris tous les gueux mendiens, & quelques bouches inutiles, ce qui n'auroit pas passé.

Puis apres quelques-uns des Messieurs s'estans plains à la Cour, que quelque bon ordre quel'on apporte aux portes, pour empescher que personne ne quitte la Ville, on ne peut pas empescher que plusieurs ne sortent trauestis, à quoy il seroit bon de remedier. Surquoy ladite Cour auroit donné Arrest de deffenses à toutes personnes de quelque qualité ou condition qu'ils puissent estre, de changer de nom, se déguiser, ny trauestir pour sortir ladite Ville, à peine de la vie; enjoint aux Capitaines & Officiers qui sont aux portes d'y prendre garde & veiller soigneusement à ce qu'aucun ne sorte sans passeport, des Conseillers à ce commis.

*Addition.* La nuit suivante, Monsieur le Prince de Condé estant allé en personne avec quatre ou cinq cens hommes de ceux que commandoit le sieur de Palluau à S. Cloud, pour se rendre maistre, & mettre en garnison au Chasteau de Meudon, auquel s'estoient retirez quelques payfans, ne croyant pas que l'armée y deust aller; qui à l'abord des troupes de mondit sieur le Prince, ayant fait vne descharge de mousquetairie, & tué quelques Soldats, mesme le sieur Pontier Capitaine aux Gardes, & blessé vn Lieutenant; cela obligea mondit sieur le Prince de les forcer, & commander de faire mair basse, horsmis au Gouverneur, dont la femme & plusieurs autres qui estoient refugiées dans ce Chasteau, s'estans jettées aux pieds de mondit sieur le Prince, sauuerent tout ce qui estoit dedans.

Ce mesme iour monsieur de Longueuille seroit party de Paris auant le iour avec trois cens Cheuaux pour aller en Normandie, dont il est Gouverneur, sur l'aduis à luy donné que le Comte d'Harcour y estoit allé avec provisions,



uisions, & Lettres de cachet au Parlement de Rouën, de le recevoir & reconnoistre pour Gouverneur; si bien qu'il estoit necessaire audit sieur de Longueville d'aller en ladite Prouince, tant pour s'assurer de sondit Gouvernement, que pour y leuer des troupes.

Le soir on eut nouuelles par vn Enuoyé de sa part, qu'il estoit passé sans aucune rencontre iusqu'à dix lieues de cette Ville.

### *Du Ieudy vingt-vniesme Januier, du matin.*

**C**E iour la Cour toutes les Chambres assemblées, Monsieur le Coadjuteur à l'Archeuesché de Paris a fait le serment accoustumé pour auoir entree, seance, & voix deliberatiue en ladite Cour; en l'absence du sieur Archeuesque son Oncle, suiuant l'Arrest du dix-huictiesme de ce mois, & y a esté receu.

Après quoy la Cour deliberant sur les propositions faites au sujet des affaires presentes, a arresté que les Presidens & Conseillers de ladite Cour, commis & deputez pour tenir l'Assemblée avec les deputez des autres Compagnies, proposeront & aduiseront en ladite Assemblée tous moyens necessaires pour auoir promptement des deniers suffisans pour le payement de l'armement & subsistance des gens de guerre, pour la defence de ceste ville: & a ladite Cour donné plein pouuoir ausdits Presidens & Conseillers deputez de faire tout ce que besoin sera, & qu'ils verront bon estre à faire. A ordonné & ordonne que ce qui sera par eux fait, & ordonné, sera executé, nonobstant oppositions ou appellations quelconques, & sans preiudice d'icelles.

Ladite Cour a ordonné & ordonne que les Conseillers demeurans en chacun quartier se transporteront és maisons des Boulangers, marchands, & és maisons des Communautés, & visiteront les bleds qui se trouueront, en feront estat & procez verbal, & ordonneront ce qu'ils verront estre à faire, à ce qu'il y ait du pain cuit suffisamment pour toutes sortes d'habitans de ceste ville & faux-bourgs, & ce qui sera par lesdits Conseillers fait, ordonné, & executé, nonobstant oppositions ou appellations quelconques, sans preiudice d'icelles.

En suite de ce auroient esté leués & examinées les Remonstrances du Parlement, ordonnées estre faites par escrit au Roy & à la Reyne Regente, par Arrest du 8. iour de Januier dernier, sur le refus qui auoit esté fait de receuoir & entendre les Gens du Roy à Saint Germain, lesquelles ayant esté trouuées estre faites & dressées conformement & selon l'intention de la Cour, elle auroit arresté lesdites Remonstrances estre enuoyées à Saint Germain, puis estre imprimées pour faire voir à tout le monde la sincerité du Parlement.

TRES-HVMBLE REMONSTRANCE DV PARLEMENT,  
au Roy , & à la Reyne Regente.

SIRE,

Vostre Parlement outré de douleur , inuesty & pressé par des armes commandées sous vostre Nom , dans la ville capitale du Royaume , exclus de tout accez à vostre Majesté & à la Reyne vostre Mere , vous adresse ceste Remonstrance & Supplication tres-humble , accompagnée des sentimens de tous vos fidelles Sujets.

SIRE, lors que la Prouidence diuine mit la Couronne sur la teste de vostre Majesté, en vn âge auquel vostre personne ne pouuoit contribuer au bien de son Royaume que la qualité de Roy , qui porte l'image viuante de Dieu, & les benedictions qu'il auoit abondamment versees en vostre naissance ; vostre Parlement estima ne vous pouuoir rendre vn seruice plus important , que de joindre ses suffrages à ceux de la Nature, & de toute la France, pour commettre à la Reyne vostre Mere le Gouuernement de vostre Personne & de vostre Estat. Il ne douta point , qu'elle n'eust tousiours pour vous & pour vos Sujets des entraillies de Mere , & en toute sa cōduite vn esprit Royal suiuant son extraction.

Il estima sur tout , que pour maintenir la liberté legitime, qui fait regner les Roys dans le cœur des Peuples, elle ne permettoit iamais qu'aucun particulier s'esleuast en trop grāde puissance au preiudice de la Souueraine ; pource qu'elle scauoit par les lumieres que Dieu donne aux Ames qu'il destine pour regir les États, combien ses establissemens sont contraires aux vrayes regles de bonne police, en toute sorte de Gouuernemens & specialement aux Monarchiques, qui ont pour foy fondamentale, qu'il n'y ait qu'un Maistre en titre & en fonction ; de sorte qu'il est tousiours honteux au Prince & dommageable à ses Sujets , qu'un particulier prenne trop de part ou à son affectiō, ou à son autorité, celle-là deuiant estre cōmuniquée à tous, & celle-cy n'appartenant qu'à luy seul.

D'ailleurs vostre Parlement auoit sujet de croire, que la propre experience de la Reyne vostre Mere luy seroit vne garde fidelle, pour la garantir de cet accident, ayant veu pendant le temps de son mariage en deux notables exemples du Marechal d'Ancre & du Cardinal de Richelieu, combien l'esleuation d'un sujet en trop grande faueur & autorité auoit esté difforme, iusques à quel point elle auoit esté redoutable au Roy , & intolerable à ses Peuples.

Elle auoit veu sous le Gouuernement de ces puissances les plus saintes Loix violées, les Compagnies les plus celebres auilies, les personnes de toutes conditions opprimées, sans respecter les Royales, non pas mesme la sienne & celle de la feuë Reyne vostre Ayeule. Bref il n'y à rien eu de si sacré qu'elle n'ayt veu profaner par leur insolence & leur ambition, ny rien de si cher à l'Estat qu'elle n'ayt veu consacrer à leurs interests.

Toutes ces considerations, MADAME, nous estoient des gages assurez, que pendant vostre Regence nous ne pourrions tomber en de semblables malheurs.



Mais comme c'est le defect ordinaire des Bons ( quelques illuminez qu'ils soient ) de n'auoir pas assez de défiance des meschans, pource que leur interieur est tousiours couuert de bonne apparence, que plus leur poison est dangereux, plus ils le rendent agreable au goust; & que d'ailleurs les Princes entre tous les hommes sont les plus exposez à leurs surprises, ayans plus de bien entre les mains; il est arriué que le Cardinal Mazarin, esleué par le Cardinal de Richelieu, nourry dans ses maximes ambitieuses, & formé dans ses artifices, succedant à son ministere, a succédé pareillement à ses desseins. Il n'a pas plustost eu l'honneur de vostre choix au manimét des affaires, qu'il n'en ait abusé; & qu'oubliant son deuoir & les obligations qu'il auoit à sa Bien-factrice, suiuant l'exemple de celuy qui l'auoit instruit, il n'ayt dressé toute sa conduitte à vsurper la suprefine autorité, dont vous estes la tutrice. De maniere que dès lors iusques à present nous l'auons veu Maistre de la personne du Roy sous le nouueau titre d'Intendant de son education, & disposer sans reserue des charges, des Dignitez, des Places, des Gouuernemens, des Armes & des Finances; conferer toutes les graces, sans vous donner part à la gratitude; ordonner les peines, vous en laissant toute l'enuie; & qu'en effet tous les Sujets du Roy & leurs fortunes particulieres, aussi bien que la fortune publique, sont en sa seule dependance.

De là il est arriué, M A D A M E, que comme les interests de ceux qui entreprennent sur l'autorité souueraine, sont touiours contraires à l'interest du Souuerain, nous auôs veu sous sô ministere vn vsage de Politique estrange & toute opposée à nos mœurs; les vrais interests de l'État abandonnez ou trahis, la continuation de la Guerre, l'esloignement de la Paix, les Peuples épuisez, les Finances dissipées ou destournées, tout ce qu'il y a de considerable dans le Royaume, ou corrompu, ou opprimé, pour assujettir tous les François sous la puissiance d'un seul Estranger. Et finalement l'État au point où il est, à la veille de sa ruïne, si Dieu n'y met puissamment la main.

Qui ne void que le Cardinal Mazarin a tousiours voulu continuer la Guerre, & éloigner la Paix, afin de se rendre plus necessaire & auoir plus de pretexte de leuer de grandes sommes de deniers pour s'enrichir? Qui n'a descouuert qu'en plusieurs occasions il a empesché nos succez, pour faire balancer les affaires? Tesmoin nos armées perduës faute de subsistance deuant Lerida, les foibles secours de Naples enuoyez à contretemps, le siege de Cremona, la perte de Courtray; & autres actions de cette qualité.

Et quant à la negotiation de la Paix, Qui est si grossier qui ne iuge, qu'il n'a iamais voulu donner part au secret de l'affaire qu'à son Confident, quoy que le Duc de Longueuille & les autres Deputez de probité reconnuë ne peussent estre suspects; & qu'il a mieux aymé perdre nos Alliez, que de faire la Paix conjointement avec eux; ce qui seroit vne faute criminelle, quand il n'y auroit point d'infidelité: & si les Declarations vniformes des Nonces sont quelque foy; si la propre confession dudit Cardinal peut seruir à le conuaincre, apres auoit dit tant de fois, qu'il tenoit la paix entre ses mains, outre la voix publique qui le declare par tout, & la chose qui parle d'elle-même; Il n'est que trop euident qu'il a trahy nos vrais interests en cette affaire si importante: Et cette seule preuarcication en vn sujet de cette qualité, ne

meriteroit-elle pas vn supplice, qui égalaist en quelque sorte les miseres & les desolations qu'elle a causées. Mais on peut encore raisonnablement tirer cette induction, de son procedé, qu'il auoit la pensée de partager vn iour la France avec l'Espagnol, & nous sommes peut-estre à la veille de l'esprouuer.

Quant à l'abus & la depredation des Finances, le Cardinal Mazarin oferait-il dire, qu'il y ait eu quelques limites à sa conuioitise. SIRE, les Souuerains, legitimes tuteurs du Peuple, regardent leur bien comme le bien d'autrui, pour en user; & pour le conseruer, ils le considerent comme leur bien propre: de maniere qu'ils n'y mettent iamais la main sans necessité, ny sans mesure. Mais les Vsurpateurs de l'autorité souueraine regardent le bien du Peuple comme leur proye, sont auides de sa substance, & la derniere goutte de son sang est la seule borne de leur cupidité.

Telle a esté celle du Cardinal Mazarin, qui a si fort espuisé le Royaume pour s'enrichir, qu'il y a peu de personnes à la Campagne auxquelles il reste vn liect pour se coucher, moins à qui il ait laissé dequoy auoir du pain suffisamment pour se nourrir avec son traual; & il n'y en a point du tout qui puisse viure sans incommodité. De sorte que si vostre Parlement touché des sentimens de vostre seruice & des motifs de la charité, n'eust arresté le cours de ses insupportables exactions, le moindre mal eust esté, que vos Peuples fussent tombez dans l'impuissance ou dans le desespoir auant la fin de la derniere annee; Et il seroit inutile de marquer toutes les voyes qu'il a tenuës pour faire vne telle depredation. Les seuls fonds immenses qu'il a consummez dans la Marine, dont il a disposé sans en rendre compte, seroient capables d'épuiser vos Finances. Il suffit de dire; Qu'il est le Maistre, Qu'il prend tout ce qu'il peut toucher, comme s'il estoit sien; Qu'il a conserué & augmenté le nombre des Partisans & gens d'affaires, qui sont les sangsuiës qui luy facilitent le moyen pour auoir de l'argent comptant; Qu'il a leué plus de quatre vingts millions de liures par an; Qu'il nous a engagez de cent cinquante; & Que l'on ne trouue plus presque d'or ny de bonne monnoye en France. Iugez de là, SIRE, où il est.

Mais le plus notable interest, le plus criminel & le plus contraire qu'il ait eu à celuy de V.M ç'a esté de vouloir tirer vos Sujets de vostre dependance, pour les mettre en la sienne, ou de leur consentement, ou par force. Dieu sçait ceux qu'il a corrompus, il est assez aisé d'en descouurir quelques-vns dans le nombre de ses Partisans; Et l'occasion presente sera vne pierre de touche, pour marquer ceux qui sont à vous ou à luy.

Ce qui n'est que trop public, sont les violences qu'il a faites pour destruire les vns, & pour intimider les autres. La detention du Duc de Beaufort trouué innocent, fut son coup d'essay, suiu de celle du Marechal de la Motte Houdancour: & en ces derniers temps, des Officiers de vostre Grand Conseil & Cour des Aydes, & d'un grand nombre de prescriptions, d'emprisonnemens, & autres mauuais traitemens plus ou moins inhumains selon que la resistance à sa tyrannie luy estoit plus ou moins nuisible ou odieuse; Et les exemples de cette qualité sont en tel nombre & si notoires, qu'il seroit superflu de les déduire.



Seulement vous supplierons-nous d'observer, SIRE, que comme vostre Parlement est le plus fort rempart pour defendre vostre Authorité, & le plus redoutable Aduersaire de ceux qui la veulent vsurper ; d'ailleurs qu'il est incapable de reconnoistre vn autre Maistre que son Roy legitime : Et quand il s'est trouué des conseils assez pernicious, pour entreprendre de changer l'ordre de la succession à la Couronne, ce Parlement s'y est opposé avec tant de vigueur, qu'il a plustost souffert qu'on le declarast criminel de leze-Majesté, que de relâcher quelque chose de sa resistance, comme il est encore prest de le souffrir pour vn mesme sujet. Le Cardinal Mazarin n'a rien obmis d'artifices & de violences pour abatre cette grande Compagnie.

Ses artifices n'ont pas esté des tentations pour la corrompre, sçachant qu'il n'y eust pas reüssi : Mais les sinistres impressions qu'il a données à vostre Majesté, MADAME, d'une Compagnie si exempté de soupçon, afin de vous induire à commander de rudes executions contre les Particuliers, & des traitemens injurieux contre le Corps. Et en cela sa malice & sa calomnie ont paru grandes, & ses artifices bien surprenans ; qu'ils ont persuadé vostre Majesté, MADAME, contre ses naturelles inclinations à bien faire & à sauuer les hommes, de traiter si estrangement le particulier & le general d'une Compagnie, qui vous a seruit avec tant de zele, & à qui vous auiez donné tant de part à l'honneur de vostre bien-veillance.

A peine le Cardinal Mazarin a-t'il esté dans les affaires, qu'il a commencé par la proscription & l'emprisonnement d'un nombre de Senateurs, pour frapper vne partie du Corps, & imprimer la terreur dans l'autre. Et certes l'emprisonnement du President Barillon conduit dans vne citadelle hors du Royaume, mort peu de mois apres sa detention, laissant le soupçon funeste d'une cause violente de sa fin, qui a esté vne des plus cruelles actions que nous ayons veuës depuis que nous esprouuons la tyrannie des puissans Fauoris, estoit bien capable de faire craindre des courages mediocres. Mais comme il est mal-aisé de soumettre par cette passion vn si grand Corps, qui ne craint que de manquer à son deuoir, ces exemples de violences ne l'ont pas empesché qu'avec l'abus des Compagnies Souueraines ; voyant le Peuple oppressé par des impositions, des leuées, des taxes, & autres telles vexations, qui se commettoient par voye de fait ou par la seule autorité des Arrests du Conseil, il n'ait pour satisfaire aux obligations de sa charge pris connoissance des causes de ce desordre, & n'en ait aucunement arresté le cours. Et nous pouuons dire à vostre Majesté sans exagerer, que si vostre Parlement n'eust interposé vostre Authorité pour empescher ces oppressions, le Peuple eust esté bien-tost ou dans l'impuissance ou dans le murmure. Ce premier mal est la foiblesse des Estats, & le dernier est la disposition aux reuoltes, que les sages Politiques doiuent toujours prevenir, sçachant bien que la patience des hommes est limitée, & que Dieu ne met pas mesme la constance des Iustes à routes espreuues. Les seruices que nous auons rendus à vostre Majesté, SIRE, en soulageant vos Sujets, & vous remettant en possession de vos reuenus, ont empesché ces accidens ; mais ils ont allumé la haine du Cardinal Mazarin contre vostre Parlement, le voyant vn obstacle à sa tyrannie ; Et c'est le sujet qui l'a fait recourir à de nouueaux moyens pour le perdre.

De là est venu le traitement outrageux, qu'il receut publiquement à la face de vos Majestez, de leur Cour, & de toute la France, où cette Compagnie fut traitée de rebelle & de factieuse par la bouche du Chancelier, en vn lieu où la moindre action de dureré blessé la dignité Royale. De là vint en suite la proscription de plusieurs Senateurs, & l'emprisonnement de deux des principaux en vn iour dédié à la ioye publique, & à louer Dieu du succez qu'il luy auoit plu donner à nos Armes; deformité estrange pour ne pas dire impieté sacrilegue, d'auoir meslé vn tel détail dans vne si sainte réjouissance! Conseil noir & cruel, mais d'ailleurs plein d'aucuglement, qui excita aussi-tost les imprecations publiques contre le Cardinal Mazarin, l'Ire de Dieu sur luy, mais sa bonté sur nous, pour les deliurer par vn iugement secret de sa Prouidence, quoy que par vn moyen contraire à nostre intention.

Mais ce premier effort, bien que sans succez & condamné par des marques si visibles de la protection du Ciel en nostre faueur, ne changea ny son dessein ny sa haine. Celle-cy se ralluma plustost dans son cœur, & y demeura plus actiue qu'auparauant; & son dessein fut seulement couuert de dissimulation, afin de prendre mieux son temps & ses mesures, pour le faire reüssir. A cét effet il nous entretenoit par des conferences, qui aboutirent à vne Declaration contenant la reforme des desordres publics, qui pourtant fut aussi-tost enfreinte que publiée; mais cette conduite n'alloit qu'à nous esbloüir par vne apparence de bonne intention, pour faire passer en suite vne autre Declaration adressée à la Chambre des Comptes, qui reestablissoit l'usage des prests & des auances, & le credit des gens d'affaires; afin de tirer d'eux vne grande somme d'argent pour sa derniere main auant que partir, & executer plus puissamment sa resolution.

Cette resolution n'estoit autre que de nous faire perir par vn coup de foudre, & nous enuveloper avec Paris dans vne commune ruïne, abbatre du contre-coup tous les Parlemens & toutes les autres Villes dont Paris est comme le Chef; ce faisant estre en estat de se rendre Maistre d'vn Royaume desolé, ou de le partager avec ceux qui luy sont necessaires pour executer ses entreprises, ou en faire tomber la meilleure partie entre les mains des Estrangers, pour y prendre sa retraite & y trouuer son establissement. Il y a grande apparence qu'il est déjà d'accord avec eux; puis qu'il retire les garnisons de nos frontieres au même téps qu'ils sont puissamment armez, & qu'il met le trouble dans le Royaume qui est tout ce que les Espagnols ont tousiours désiré. Pour peu qu'on ait des sens ne voit-on pas sa trahison à descouuert par sa derniere action, ses circonstances & ses suites. V. M. enleuée par surprise, vostre Personne en son pouuoir, vous ayant osté les Capitaines de vos gardes, gens de condition & de probité, la Lettre enuoyée à l'Hostel de Ville, qui declare que le Parlement a conjuré contre son Prince; vne seconde Lettre qui luy commande de nous traiter comme criminels de Leze-Majesté, ce qui n'alloit pas à moins que de nous faire deschirer par le Peuple, & causer vn massacre general dans Paris, la Ville estant au mesme temps bloquée, les passages saisis, & les desfences faites à tous les lieux circonuoisins d'y porter des viures. Peut-on regarder tout ce procedé qu'on ne voye quand & quand que la conjuration est telle, que nous la representons à vostre Majesté. Conjuration detestable, mais Conseil funeste & bar-



bare, qui ne peut auoir esté pris sans que le Demon qui marche dans les tenebres y ait presidé, & que les Anges tutelaires de la France en aient esté bannis.

SIRE, nous appellons icy tout ce qu'il y a d'Ames vrayment Françoises, pour se joindre à nos sentimens & à nostre conduite, à l'exemple de ces personnes Illustres, qui ont signalé desia leur zele en cette occasion; afin de confondre promptement l'Authéur de tous ces maux, deliurer vostre Personne de ses mains, & retirer vostre Estat de sa ruïne. C'est là l'vnique voye de salut; & si son party subsiste quelque temps, la France est perduë sans ressource.

Si nous estions si malheureux que de succomber, le Cardinal demeureroit Maître d'un estat affoibly, qu'il partageroit avec ceux qui l'ont assisté; si nostre resistance ne fait que balancer les affaires, nous verrons naistre à nostre grand regret vne Guerre Ciuile, qui donnera loisir aux Estrangers d'entrer en France & de se joindre audit Cardinal; les Espagnols estans bien asseurez que nous ne pouuons auoir intelligence avec eux; parce qu'il est impossible que les interests que nous auons à la conseruation de la Monarchie, à cause de nos charges qui en dependent, puissent compatir avec leur dessein. D'où vostre Maiesté peut iuger à quelle extremité le Cardinal Mazarin vous a reduit, vous ayant jetté dans la necessité ou de le perdre bien-tost, pour vous sauuer & la Fortune publique, ou de perdre vos plus fidelles Seruiteurs & vostre Estat conjointement.

SIRE, dans le mouuement perilleux où nous voyons la fortune penchante de vostre Royaume, nous nous trouuons obligez de iustifier nostre conduite à vostre Maiesté, & à toute la France. Nous serions inconsolables, si nous ne croyons auoir satisfait à tout ce que la Iustice & la Prudence desiroient de nous, pour éuiter ou esloigner l'accident où nous sommes tombez; l'un & l'autre nous ont obligez de mettre la main au soulagement de vos Peuples, qui succomboient sous le faix, afin d'empescher leur ruïne ou leur reuolte. Mais à l'égard du Cardinal Mazarin, qui estoit coupable de leurs souffrances; si la Iustice demandoit la punition de sa tyrannie, la Prudence nous portoit à la dissimuler, comme nous auons fait.

Nous scauons bien que le crime d'vsurpation est de la qualité des passions violentes, qui se rendent maistresses des ames qui les recoiuent; & que pour peu qu'il soit consommé, les loix sont trop foibles pour le chastier. Ceux qui entreprennent sur la puissance du Souuerain ne manquent pas d'imiter ce fameux Sculpteur, qui graua si artistement son image dans la statue qu'il destinoit au public, qu'il estoit impossible de l'en oster, sans mettre l'ouurage en pieces. Les Vsurpateurs de l'Authorité du Prince s'attachent si fort à sa personne, & se rendent si necessaires dans ses affaires par leur adresse, qu'il est presque impossible de les en separer, sans causer vne conuulsion tres-perilleuse à l'Estat; & comme ces maux sont presque incurables, quand ils ont pris racine pour peu que ce soit, les Sages en attendent la guerison plustost de la seule Prouidence de Dieu que de leur conduite; Ainsi nous nous sommes veus deliurer deux fois par sa main propice de ces maladies mortelles; & nous eussions attendu vn pareil secours sans agir contre le Cardinal Mazarin, non pas mesme dans ceste occasiō, si nous n'y eussions esté cōtraints pour nostre iustificatiō, & pour vostre seruice.

SIRE, aussi-tost que vostre Parlemēt eut la nouuelle de vostre sortie, qui sembloit plustost vn enleuemēt que le depart d'un Roy de sa Ville Capitale; & que nous eufmes veu la Lettre écrite aux Preuost des Marchāds & Escheuins, où nous

lissions manifestement le nom & le dessein du Cardinal Mazarin, nous ne voulus pas obmettre, bien que vainement, de prendre toutes les voyes qui pouuoient empescher l'esclat qui est suruenu. Pour cela nous deputasmes vers vos Majestez les Aduocats & Procureurs Generaux; personnages d'aage, de probité & de siffisance, qui pouuoient s'il y eust eu lieu, porter les choses à quelque moderation, ayant charge de faire & d'offrir toutes sortes de soumissions à vos Majestez de la part de la Compagnie. Mais leur retour nous fit voir que le Cardinal Mazarin sçait bien pratiquer cette maxime de Politique vitieuse, que qui offense, ne pardonne point; & d'ailleurs que la cruauté est le propre des ames foibles & des animaux timides qui ne demordent point quand ils sont en estat de mal-faire. Apres que les Deputez nous eurent rapporté le traitement qu'ils auoient receu, refusez durement, renuoyez au milieu de la nuict, & qu'ils nous eurent déclaré que la Ville estoit bloquée, vostre Parlement n'auoit plus que l'un de deux Conseils à prendre, ou celuy de souffrir patiemment la violence preparée, ou celui d'armer pour nostre cōmune conseruation. En l'un & en l'autre cas il estoit necessaire pour vostre iustification ou pour la nostre, de declarer le Cardinal Mazarin Ennemy de vostre Majesté & du Public; ce que la prudence nous auoit fait differer iusques alors; si nous auions à perir, toute la Terre deuoit sçauoir que c'estoit par la violence de nostre Ennemy, & non point par celle de nostre Roy, qui n'employe iamais ses forces que pour proteger. Et si nous auions à nous deffendre, il deuoit estre pareillement notoire que c'estoit contre vn Tyran, & non point contre nostre Maître, sous le nom duquel nous nous prosternons, & pour lequel nous n'auons que des sentimens d'obeissance.

Sans cette Declaration, où nostre perte deshonnoroit la reputation de Vostre Majesté, ou nostre deffense nous couuroit à iamais d'une criminelle infamie: Mais si nous n'eussions esté trouuez que de l'intereft de nos fortunes & de nos vies, nos inclinations nous eussent aisément resolu à prendre le party de la souffrance; nous les eussions volontiers immolées & celles de nos Concitoyens, au respect que nous portons à vostre nom & à vostre bras qui frappoit le coup, sans considerer celuy qui faisoit l'injure. La mort quelque terrible qu'elle soit avec ses pompes & ses appareils plus affreux, ne nous pouoit faire tant de peur que le moindre manquement d'obseruation & soumission à tout ce qui porte vostre caractere: Et bien que la Loy naturelle plus ancienne & plus absolue que toutes les autres, nous tende tous moyens legitimes pour conseruer ce qu'elle nous a liberalement donné; si nous eussions pourtant jugé que ce martyr eust esté innocent, & qu'il n'eust point tiré vostre ruine & celle de vostre Estat ineuitablement à sa suite, nous eussions mieux aymé mourir que de nous seruir du priuilege de la Nature, pour nous deffendre contre les armes cōmandées sous le nom de nostre Souuerain. Vostre conseruation, SIRE, & celle du Royaume, est la seule cause de nostre deffense & le motif de nostre Arrest, qui ordonne que Paris prendra les armes; nostre salut particulier n'est pas nostre principal object, en cette occasion nous ne le regardons que comme vn moyen necessaire au vostre.

C'est là, SIRE, où nous referons nos meilleurs souhaits, c'est là où tendent



dent nos armes, hors de là nous n'en voulons iamais d'autres pour vous resister, que les prieres, qui sont les seules armes legitimes, mais bien puissantes, que Dieu a donnees aux Subjects pour flechir les Roys sur la Terre, & pour le forcer luy-mesme iusques dans le Ciel.

Et il importe de faire sçauoir à vos peuples que nous n'auons point de mains pour nous opposer à Vostre Majesté, & qu'elle n'estend iamais les siennes sur nous, que pour nous departir des biens-faits; de sorte qu'on ne luy doit non plus donner de part au dessein cruel que l'on veut executer contre nous; que l'on n'en peut prendre sans crime à ses actions de grace & de clemence.

Receuez donc, s'il vous plaist, nostre resolution de prendre les armes, non pas comme vn acte de rebellion, mais comme vn effect de nostre deuoir: Nous ne nous deffendrons pas en cette extremité si nous le pouuions obmettre sans crime, & sans encourir le reproche de Dieu & des hommes, d'auoir laissé laschement perir nostre Roy par vn faux zele plein d'ignorance; parce que celuy qui nous opprime pour vous perdre en suite, est reuestu de son nom & de son autorité.

SIRE, apres auoir rendu ce compte à Vostre Majesté des motifs de la resolution que nous auons prise, & de l'Arrest que nous auons donné, qui n'a point d'autre fin que vostre salut, il ne nous reste qu'à supplier tres-humblement vos Majestez qu'il leur plaise de les fortifier par leur approbation, & ce faisant condamner le sinistre conseil du Cardinal Mazarin; Et puis qu'il ne s'est pas retiré de vostre Cour le mettre entre les mains de la Iustice, afin d'en faire vn exemple notable qui demeure à la Posterité, pour guarentir à iamais nos Roys d'une vsurpation pareille à celle dont il est coupable.

Vos Majestez mettront le calme dans l'Estat, leurs Personnes & la Fortune publique en seureté, la France hors du peril eminent d'estre enuahye & partagée entre cet Ennemy domestique & les Estrangers; & tous les François d'un esprit vnanime se rallieront pour forcer l'Espagne de cōsentir à la Paix tant desirée de toute la Chrestienté, & si necessaire au bō-heur de vos Peuples.

MADAME, apres cette Remonstrance & cette Supplication tres-humble assistée des suffrages de tous les bons François, si vous reteniez dauantage le Cardinal Mazarin, permettez-nous de dire à vostre Majesté que vous seriez responsable deuant Dieu & deuant les hommes, du depost sacré de la Personne du Roy & de l'Estat, que la France a mis entre vos mains. Et nous ne pouuons douter sans faire tort à Monsieur le Duc d'Orleans, & à Monsieur le Prince de Condé, qu'ils ne vous portēt à cette resolutiō, ny iuger qu'ils ayent eu vn autre esprit en l'occasiō presente, que de prester vne obeïssance au eugle à vos Commandemens, sans s'informer de l'Auteur, ny des raisons du Conseil qui a esté donné, non plus que des auis supposez pour fabriquer l'atroce calomnie contre les Officiers du Parlement. Mesme nous ne iugerions pas sainement d'eux, si nous n'estimions qu'ils ont suiuy vos Majestez, plustost pour les guarentir des entreprises du Cardinal Mazarin, que pour aider ou consentir à ses desseins pernicioeux, ce qui seroit vne action aussi indigne de leur naissance, que nous la croyons contraire à leurs inclinatiōs.

Mais comme nous ne doutons point, que vos Majestez ne donnent à la Justice, à vos vrayz interests, à ceux del'Estat, & à tant de larmes qui sont les voix des miserables, ce que nous leur demandons instammét par nos tres-humbles supplicatiōs; nous les asseurons au nom de tous les gens de bien, que cette action sera suiuite d'applaudissemens, d'acclamations publiques, & des benedictions de Dieu; Et nous protestons, SIRE, qu'aussi tost vostre Parlement, toutes les Compagnies Souueraines & vostre bonne Ville de Paris, se prosterneront à vos pieds, pour vous renouueller les vœux de leur parfaite obeïssance.

Ainsi puissiez vous, MADAME, consommer dignement le grand Ouurage de la conseruation de ce puissant Empire, que Dieu a depose entre vos mains: Ainsi puissiez-vous donner à la France le repos & tous les effects de la Paix bien-heureuse; & que la Posterité regardant vostre Administration loüe à iamais la Regence des bonnes & vertueuses Meres. Ce sont là, SIRE, les vœux de tout ce qui vous est fidele en France, & les supplications des Officiers de vostre Parlement, qui ne scauroient estre autres que vos tres-humbles, tres-obeïssans & tres-fidelles Subjects & Seruiteurs. A Paris en Parlement le 21. Ianuier 1649. Signé, DV TILLET, Greffier en chef de ladite Cour.

### *Du Vendredy 22. Ianuier.*

Ce iour toutes les Chambres assemblées à l'ordinaire, la Cour auroit trouuallé à recouurer de l'argent; & sur ce que quelques-vns auroient proposé de prendre & se seruir des fonds destinez au payement des rentes, & mesmes celuy des consignations, à la charge deles remettre quand la paix seroit faite; Il fut arresté quel'on ne toucheroit ny aux vns ny aux autres de ces deux fonds; d'autant que l'on ne pouuoit retrancher les rentes sans faire vn notable prejudice à la quantité de familles, qui n'ont autre moyé de subsister; que cela feroit crier le peuple, & empescheroit plusieurs de cōtribuer à payer les taxes qui estoient imposées: & à l'esgard des consignations, elles n'estoient la pluspart qu'en papier, que cela feroit grand bruit, & ne donneroit pas vn secours present tel que les affaires le requeroient, si bien qu'il fut iugé plus à propos de faire des taxes sur les gens d'affaires, & sur quelques particuliers qui ne font partie d'aucuns des corps de cette ville, non plus que les gens d'affaires, lesquelles taxes seroient modiques, afin qu'elles fussent plus librement & plus facilement payées: Que lesdites taxes seroiēt signifiées par les Huissiers de la Cour, avec commandement de les payer à iour preñx, à peine d'estre payé le double par ceux qui manqueroient.

Après quoy Monsieur le Doyen auroit demandé passeport pour Madame la Duchesse de Lorraine, qui luy auroit esté accordé, & refusé à quantité d'autres qui le demandoient pour des considerations particulieres. Ce qui auroit donné lieu d'examiner & remedier aux abus qui se commettoient à la demande & obtention des passeports: Surquoy il auroit esté proposé d'assembler en certain lieu, cōme au Louure où au Palais Royal toutes les personnes de condition, sur lesquelles il y auoit quelque soubçon pour s'en



asseurer, ou leur donner des gardes; ce qui auroit esté rejezté, & iugé qu'il n'estoit pas à propos de prendre d'autres assurances, que la parole à laquelle tout homme de condition & d'honneur ne peut mâquer sans infamie; mais que pour euitier aux surprises qui pourroient estre faites par les personnes du commun, & d'autres qui pressoient pour auoir des passeports, il falloit establir vne Châmbre particuliere à laquelle s'adresseroient ceux qui pour cause legitime voudroient sortir & s'en aller; ce qui auroit esté arresté, à condition qu'en vertu des passeports aucun ne sortiroit sinon par les portes saint Jacques & saint Denis. Et Messieurs le Meusnier, Bitault ..... auroient esté commis par la Cour pour deliurer lesdits passeports avec connoissance de cause.

Ce mesme iour la Cour ayant examiné la Requête présentée par les habitans de la ville d'Amiens, pour estre conferuez dans les anciens priuileges à eux octroyez de nommer & eslire vn Premier (ou Maire) & des Escheuins en leur dite ville, au preiudice desquels & en vertu d'Arrest du Cōseil; lesdits Premier & Escheuins depuis quelques années estoient faits sans appeller lesdits habitans, pour auoir leurs suffrages, se plaignans lesdits habitans que ceux qui estoient à present en charge n'y auoient esté mis que par vne lettre de cachet, ny confirmez que par vn Arrest du Conseil du mois de Decembre dernier, qui est vn abus & vne entreprise cōtre les priuileges de toutes les villes de France, & particulieremēt de celle d'Amiēs: Et sur ce deliberé, ladite Cour auoit ordonné quel'Edit de Restablissement de la ville d'Amiens du mois de Nouēbre 1597. verifié en Parlemēt touchant l'eslectiō & nomination desdits Premier & Escheuins, sera executé en sa forme & teneur, & qu'il sera procedé à nouuelle eslection pour la presente année en la forme & maniere accoustumée: Enjoint au Lieutenant General de tenir la main à ce qu'elle soit bien & deuēment faite, de conseruer lesdits habitans en leurs priuileges; faisant ladite Cour inhibitions & deffenses aux pretendus Premier & Escheuins nommez par ladite Lettre de cachet, de s'immiscer en la fonction desdites charges, à peine de faux, confiscation de corps & biens. Ce fait la Cour se seroit leuee.

*Addit.* Messieurs les Maistres des Requestes ayant receu ordre de se rendre au Cōseil prez la personne de M. le Châcelier, & deliberé ce qu'ils auoient à faire, arresterēt que ceux qui sont de seruice aux Requestes de l'Hostel ne doiuent point sortir de Paris; Et que ceux qui ne sont plus en quartier n'y peuuēt estre obligez: mais qu'à l'esgard de ceux qui sont de quartier au Cōseil, lesquels ne peuuēt se dispenser d'aller y faire la fonction de leurs charges quād ils sont mādéz par M. le Chancelier, ils deuoiēt demander passeport du Parlement; ce qui fut fait; ces Messieurs asseurant la Cour qu'estant du Corps du Parlement, les autres demeureront pour assister & prendre leurs places à toutes les deliberations qui s'y feront; & que ceux qui sortiront cōtribueront & tiendront bien fait tout ce qui sera arresté par ceux qui demeureront à Paris: En cela ils obeyrent aux ordres qui leur auoit esté enuoyé: mais ayant demandé passeport, il leur fut refusé, aussi bien qu'il l'auoit esté aux Conseillers du grand Conseil; si bien qu'ils demeurerent,

les passeports ne se donnant qu'avec beaucoup de peine, & tres-grande connoissance de cause; & mesme il fut publié à son de trompe, deffense de se desguiser ny trauestir sur peine de la vie, à cause que l'on scauoit que plusieurs personnes estoient sorties desguisées; quantité aussi, principalement des femmes de condition, ayant esté reconhues aux portes vestues en payannes.

Ce mesme iour sur la plainte qui auoit esté faite à la Cour des Monnoyes, que les Orphevres ne vouloient acheter la vaisselle d'argent qu'au prix devingt-deux ou vingt-trois liures le marc; cette mesme Cour fit publier vn Arrest, par lequel il estoit enjoint au Maistre de la monnoye de cette ville de Paris, de payer & changer toutes les matieres d'or & d'argent, comme aussi la vaisselle d'argent à raison de vingt-six liures dix sols le marc, & pour l'or à raison de 484. liures le marc: faisant deffenses à tous Orphevres & autres d'en acheter à moindre prix: enjoignant aussi audit Maistre de la monnoye de conuertir incessamment lesdites vaisselles en espee d'or & d'argent marquées aux coins de sa Majesté, comme aussi de difformer lesdites vaisselles en la presence de ceux qui les porteront.

### *Du Samedi 23. Januier.*

**C**E iour le Parlemēt assemblé à l'ordinaire, auroit employé son principal soin pour la police du pain, dont on craignoit qu'il n'y eust pas abondance comme on auoit eu par le passé, le marché n'ayant esté si bienourny le Mercredy precedēt qu'à l'ordinaire, plustost par la faute des Boulangers que manque de bled; & neantmoins plusieurs de Messieurs auroiēt dit, que pour plus prompt remede, il falloit sortir & faire effort afin de déboucher quelque passage, s'offrant mesme de marcher à la teste de ceux qui fortiroient; vn entr'autres dit qu'il estoit estrange que Paris fust assiégé par Sainct Denis; au lieu que Sainct Denis pouuoit & deuoit estre assiégé par Paris; ayant delibéré sur cette proposition de sortir, le tout fut remis à la discretion de Messieurs les Generaux.

En suite de cette proposition d'auiser aux moyes de faire venir du bled, on en auroit fait vne autre, scauoir est de faire retirer les pauvres mādians dōt il y auoit si grand nōbre, que toutes les ruēs en estoient pleines; mais cōme elle estoit de tres-grāde consideration, il estoit aussi necessāire de la biē examiner: Il falloit à cette multitude innombrable de mandians, beaucoup de pain pour leur nourriture. M. le Procureur General remonstroit qu'en des necessitez moins pressantes que celle-cy on lesauoit mis hors la ville, leur faisant quelque aumosne pour les conduire vn peu loing de Paris, en lieu où ils trouueroiēt de quoy substister: il dit qu'il estimoit deuoir estre faite distinction entre les mādians valides & forins, dont le nōbre se voyoit augmenter tous les iours, d'avec les pauvres infirmes & inualides de cette ville de Paris; Que les premiers pouuoient estre chassez; Et qu'à l'esgard de ces derniers il les falloit obliger de s'eroller à l'aumosne de leurs Parroisses, pour leur estre subuenu par les Marguilliers d'icelles: Plusieurs de Messieurs auroient



trouué cet expedient fort bon, & même quantité auroient promis de contribuer aux aumosnes à cet effect; d'autres auroient esté d'aduis de surseoir à l'exécution de cette proposition iusques à certain temps, crainte d'allarmer dauantage la ville, comme aussi pour ne pas donner aux aduersaires sujet de croire que Paris estoit tres-incommodé, & leur faire conceuoir la fin prochaine de leurs esperances, qu'ils ne fondonnent que sur la disette de viures qu'ils estimoient estre tres-grande: à quoy il auroit passé.

*Addition.* Il pensa auoir bruit dans les marchez, à cause qu'il n'y vint pas la quantité de pain accoustumée, & qu'il estoit tres-cher; la populace murmurant, & disant que les grands estans fournis de bled & farine vouloient laisser perir le menu peuple: on fit armer les Bourgeois pour empescher la sedition, & appaiser ce bruit qui se dissipa; parce qu'il vint par charroy quantité de bleds & farines, qui donnerent esperance de mieux. Ioinct que ceux qui auoient desia du pain furent priez de ne point enuoyer au marché, & laisser ce qui y estoit aux pauvres. Il y eut vn Arrest donné à la police, que les Preuost des Marchands & Escheuins firent publier, par lequel il fut enjoinct à tous Capitaines, Officiers estant à la garde des portes, de faire conduire aux galleries du Louure tous les bleds que l'on ameneroit à Paris, pour là estre vendus & deliurez aux Boulangers & Patissiers pour faire incessamment du pain: enjoinct ausdits Boulangers de s'y trouuer pour acheter des bleds, comme aussi deffenses de vendre du bled ny de la farine aux Bourgeois sur peine de la vie: Et aux Bourgeois d'en acheter sur peine de 500. liures d'amende.

### *Du Dimanche vingt-quatriesme de Ianuier.*

Ce iour il ne se feroit rien fait au Parlement.

*Addition.* Ce iour Messieurs de Beaufort & la Motte-Houdancour sortirent sur le soir avec vne partie de leurs troupes, & enuiron quatre mille des volontaires Bourgeois que l'on auoit fait aduertir sans forcer personne; le dessein estoit d'aller faire vn effort pour prendre & ouurir le passage de Corbeil, ayant mené du Canon à cet effect: mais ayant esté aduertis à Luuisy que Monsieur le Prince y estoit allé avec quatre mille hommes, ils y passerent la nuict, & le lendemain matin renuoyerent la milice de Paris, estant allez avec leurs gens vers Long-jumeau pour escorter des viures qui venoient de ce costé-là.

Monsieur le Duc d'Elbeuf sortit aussi avec quelques troupes, & alla rompre les Pons de Gournay & de saint Maur, pour empescher à ceux du party contraire, de faire des courses dans la Brie, & laisser aux habitans des villages d'apporter des bleds, lesquels en estoient empeschez par les courses qui se faisoient.

*Du Lundy vingt-cinquiesme Iannier.*

**C**E iour toutes les Chambres assemblées, après que le recit auroit esté fait à la Cour du retour de la Bourgeoisie, sortie le iour precedent du costé de Iuufy, & ce qu'auoit fait Monsieur d'Elbeuf hors la porte saint Antoine, on auroit encore trauaillé à la police touchant la dispensation des bleds qui arriueront à Paris: Surquoy Monsieur le President de Be-lievres'estant offert d'auoir ce soing, il auroit esté prié par la Compagnie de se vouloir donner cette peine. Apres quoy on auroit trauaillé au recou-urement des taxes faites sur les gens d'affaires, & proposé de les contraindre, d'autant qu'ils ne payoient point, & qu'il estoit necessaire d'auoir de l'argent promptement. Monsieur Violle President aux Enquestes, auroit dit & représenté qu'il y auoit du peril d'allarmer les grosses maisons par des contraintes rigoureuses; lesquelles ne produiroient pas pour cela de l'argent comptant dont on auoit grand besoin; qu'il estoit d'aduis de recevoir d'eux ce qu'ils offriroient volontairement, leur donnant, au moyen de ce, prompt payement, esperance de moderation & remise du surplus, à quoy il passa, quelques-vns de Messieurs ayant voulu exciter les autres à diligenter les affaires par toutes sortes de voyes.

Ce mesme iour il auroit esté ordonné, que les payeurs des rentes sur l'Ho-tel de cette Ville de Paris, payeroient les arrerages d'icelles escheus & à eschoir à ceux qui sont presens en cette ville, à l'exclusion des absens: Fai-sant deffenses aux receueurs & payeurs d'en vser autrement, & de contreue-nir à cet Arrest, sans neantmoins tirer à conséquence pour l'aduenir.

La mesme Cour auroit ordonné, que les Chambres du Palais Cardinal se-roient ouuertes en presence d'un Conseiller, du Substitut de Monsieur le Procureur General, & description faite des meubles qui se trouueront en icelles; ausquels le sieur de Luynes Commissaire aux saisies reelles, auoit esté estably Commissaire & gardien par Arrest de ladite Cour.



*Le Mardy vingt-sixiesme Ianuier.*

**C**E iour les Chambres assemblées, Monsieur le Prince de Conty, les Ducs d'Elbeuf, de Beaufort, & le Marechal de la Motte presens, auroit esté donné aduis que le Bourg la Reyne auoit esté pillé le matin, & les villages circonuoisins, par des troupes de Monsieur le Prince, lesquelles estoient à Issy: Surquoy quelques-vns de Messieurs auroient esté d'aduis d'enuoyer sur l'heure apres ces voleurs: Les Generaux auroient dit qu'on ne peut pas empescher que ceux qui sont maistres de la campagne, ne fassent de telles courses; que quand on monteroit à cheual on ne trouueroit plus personne: qu'il n'y auoit point d'autre moyen pour empescher ces desordres, sinon de diligenter les leuées & faire vn fonds de cent mille escus, pour leuer dix mille hommes d'Infanterie à quinze cens liures par Compagnie: Surquoy Monsieur le Marechal de la Motte auroit dit, qu'il sçauoit vn fonds de 280000. liures, de quelque recepte qu'il feroit toucher ce iour, si la Cour luy vouloit donner sur iceluy 80000. liures à luy deubs par l'Espargne, ce qui luy auroit esté promis & arresté, que l'on iroit au lieu où estoit ledit argent; ce qui auroit esté fait, & trouué au Bureau des adiudicataires des gabelles, la somme de 270000. liures cachez & enterrez sous vne pile de 50. charettes de bois.

En suite la Cour auroit donné Arrest, par lequel elle auroit enjoinct aux habitans de Melun, Corbeil, Lagny, Meaux, Nogent, Brie-conte-Robert & autres villes, d'enuoyer & faire conduire incessamment des bleds & autres viures en cette Ville de Paris, nonobstant tous Arrests à ce contraire, & aux Gouverneurs desdites Villes de tenir & prester main forte à l'exécution de cet Arrest.

*Dudit iour de releuée.*

**C**E iour au Conseil ordinaire qui se tient tous les iours chez Monsieur le premier President par les Conseillers à ce deputez, il auroit esté arresté que les deniers publics qui se trouueront & leueront à l'aduenir, seront mis es mains de Formé & Cramoisy Bourgeois de Paris, sous la direction de Monsieur Violle President aux Enquestes, & de la Grange Maistre des Comptes.

*Addition.* La Raillere insigne Partisan, fort connu pour auoir esté auteur de tous les impôts sur le vin, & des taxes d'Aïsez; fut emprisonné à la Bastille par l'ordre de Monsieur le Prince de Conty.

Le sieur Cohon cy-deuant Euesque de Dol, lequel on gardoit dans les Peres de l'Oratoire, soupçonné d'estre icy espion du Cardinal Mazarin, fut mis en liberté, & les gardes à luy ostées.

*Du Mercredi vingt-septiesme Ianuier.*

**C**E iour toutes les Chambres assemblées, auroit esté confirmé par Arrest de la Cour, ce qui auoit esté arresté le iour precedent chez Monsieur le Premier President: & sur ce que Monsieur le Preuost Conseiller, auroit fait plainte que l'on reconnoissoit mal les seruices qu'il a rendus au public

en l'administration des Finances, dont il demandoit rendre compte à la Cour; seulement Monsieur le premier President l'auroit asseuré de la satisfaction que la Cour auoit de ses soins, le priant de les continuer au public; la Commission donnée à Formé & Cramoisy, ne prejudiciant point à celle dont il auoit bien voulu se charger, & mesme qu'il estoit en pouuoir de prendre la place du troisieme Administrateur: Monsieur Violle luy offrit la sienne. Ainsi la somme de 270000. liures trouuées chez les Adjudicataires & Fermes des Gabelles le iour precedent, fut mise entre les mains de ces deux susdits notables Bourgeois, à la reserue de 80000. liures que toucha Monsieur le Marechal de la Motte, asseurant luy estre legitiment deüe par l'Espargne.

*Addition.* Il y eut quantité de pain aux marchez, estant venu force bleds & farines tous les iours passez.

Vn Gentil-homme arriua enuoyé par le Duc de Longueuille, asseurer qu'il y auoit esté bien receu dans Roijen; que tout s'estoit déclaré pour luy, & qu'il s'estoit aussi rendu maistre du Vieux Palais, & qu'il alloit tra-uiller incessamment à leuer des troupes.

On publia à son de trompe, defences de vendre ny imprimer aucuns Libelles sans permission de la Cour de Parlement, & sans que le nom de l'Auteur & de l'Imprimeur fussent aux pieces & Libelles qui se debitoient, sur les peines portées par les Ordonnances.

Le Marquis de la Boulaye aduertit que ceux qui auoient pillé au Bourg la Reyne, estoient es enuiron de Long-jumeau, y alla toute nuict: à son approche les voleurs s'enfuirent, si bien qu'il reprit, & fit rendre tout le butin à qui il appartenoit, puis fit conduire à Paris six cens bœufs, autant de moutons, & plusieurs charrettes & cheuaux chargez de bleds & farines qui attendoient il y auoit quelque temps, que le passage fut libre pour venir.

### *Du Iendy vingt-huictiesme Ianuier.*

C E iour toutes les Chambres assemblées à l'ordinaire, Monsieur le President de Nesmont, lequel estoit de semaine au Conseil de guerre, auroit informé la Compagnie des bons seruices que rendoit au public le Marquis de la Boulaye; & rapporté que la retraite du Marechal du Pleffis-Praslin, deuoit estre attribuée au refus que les Suisses auoient fait de combattre contre les François, sans l'ordre de leur Republique.

En suite dequoy Messieurs Fouquet, de Croissy, & le Febvre, Conseillers en la Cour, auroient esté commis par la Compagnie, pour regler la Police, & rendre la Iustice aux gens de guerre du poste de Charenton & lieux circonuoisins.

Messieurs Tierfaut, Vertamont, Fraguier & ..... auroient esté pareillement commis pour assister aux reueües qui se feroient des gens de guerre & troupes leuées & à leuer; & pour empescher le nombre des passe-volans que les Capitaines pourroient faire passer dans leur Compagnie.

Après



Après ces reglemens ainsi faits, seroient entrez les Deputez du Parlement de Prouence, demandant l'vnyon & assistance de la Cour, à laquelle ils auroient representé, outre & en consequence de ce qu'ils auoient desia dit le 15. du present mois, que depuis ceste année ils auroient esté contraincts de souffrir vne Chambre des Requestes, sans que l'Edit en ait esté verifié: Que les Conseillers de ceste Chambre receus par des Commissaires, auoient eu seance parmy eux: Et que lesdits Conseillers de ceste Chambre des Requestes preuoyant que leur establissement fait par violence & contre les formes n'estoit pas assésuré, auroient proposé d'establir audit Parlement vn Semestre; ce qui auroit esté fait; & les Intendans de Iustice des Prouinces de Dauphiné, de Languedoc & Prouence, avec le Comte d'Alais, Gouverneur de Prouence, auroient esté en faire l'establissement; auquel le Parlement se seroit opposé deslors; & auroient eu recours à la Iustice du Roy, par plusieurs & differentes Deputations, ayant mesme offert au Conseil le remboursement: mais au lieu d'auoir esté escoutez, plusieurs (comme tout le monde a sceu) auroient esté bannis & contraincts de se refugier hors la Prouince: d'autres qui y seroient demeurez, auroient receu & souffert tous les tourmens que peut faire vn Gouverneur; & tant s'en faut qu'ils eussent esperance d'estre soulagez, par leurs soumissions & offres de remboursement, qu'au contraire ledit Semestre auroit encore esté confirmé par Arrest du Conseil, du 28. Decembre dernier; avec deffences aux Anciens de r'entrer; & ordre au Gouverneur d'exiler derechef tous ceux qui estoient de retour en leurs maisons croyant tout appaisé.

Si bien qu'eux & leur Compagnie se voyans hors d'esperance de sortir de leur miseres, auroient estimé & esperé que Messieurs du Parlement de Paris, ne desnieroit pas vn charitable secours à ceux qui ont l'honneur de porter vn mesme caractere, & qui ont mesme passion d'exposer leurs vies pour le seruice du Roy, les prosperitez de l'Estat, & pour le repos & dignité de ceste Cour.

Monsieur le Premier President leur auroit respondu, que la Compagnie auoit entendu avec respect le narré de leurs malheurs, qu'elle souhaitteroit estre assez puissante pour y apporter les remedes, qu'il estoit important d'en deliberer pour la seureté des vns & des autres. Après quoy lesdits Deputez se seroient retirez, & la Cour auroit deliberé.

Et sur ce auroit esté meüe la question à laquelle la Cour auoit desia cy-deuant fait difficulté; sçauoir si le Parlement auoit pouuoir de faire droit sur les demandes desdits Deputez du Parlement de Prouence; plusieurs dirent que le Parlement de Paris, par vne preeminence sur tous les autres, auoit esté tousiours appellé le Parlement de France, & que tous les autres Parlemens & Compagnies Souueraines en deriuoient, comme de leur source, & par consequent que l'establissement d'un nouveau Semestre & autres creations ne pouuoient ny deuoient estre tenuës pour legitimes, sans la verification du Parlement de Paris: Et pour preuue de ce l'on sçait que les Parlemens de Roüen, de Rennes, de Mets & autres, le Grand Conseil, la premiere & seconde Chambre de la Cour des Aydes, y auoir esté verifiez: le Parlement de Pau auoit aussi obtenu pareille grace aprestrois, années de sollicitation, veu



que mesme sans le Parlemēt de Paris, qui est le vray, & cōme le seul protecteur des Loix fondamentales du Royaume, qui sont blessées par le changement qui se fait contre les establissemens des Parlemens, & par la multiplication des Officiers: adjoustant encor que le Parlement d'Aix par ses Deputez se soumettant au Jugement de la Cour; il n'y auoit point lieu de douter, & qu'il falloit leur accorder ce qu'ils demandoient.

D'autres disoient, qu'encor que lesdits Deputez par leurs demandes & conclusions, semblaient donner à cette Cour vne Jurisdiction au de là de son ressort; il estoit plus à propos & digne de la moderation d'icelle, de n'yser en cela de son pouuoir par le respect qu'elle doit à ses Confreres: veu mesme qu'en l'establissement que l'on se seroit autresfois efforcé de faire d'autres Parlemens, & mesmes des Presidiaux, sans le consentement & verification de cette Compagnie, elle n'auroit iamais procedé par autres voyes contre les Officiers nouueaux, sinon en les desauoiant pour Confreres, & les declarant personnes priuées, leur faisant subir l'examen lors qu'ils se presentoient en icelle pour y estre receus; Que cela s'estoit tousiours practiqué, mesme à l'égard du Semestre nouueau de Roüen (quoy que les Officiers eussent esté receus par des Conseillers tirez de cette Compagnie) à cause qu'ils n'auoient point présenté leurs Commissions pour y estre registrées, & par consequent qu'ils n'estimoient pas que la Cour deust casser ledit Semestre de Prouence: mais redonner qu'il y aura Ionction de cette Cour avec ledit Parlement d'Aix: Que tres-humbles Remonstrances seroient faites au Roy & à la Reyne Regente, sur la Creation & establissement dudit Semestre, que la Cour declarera auoir esté fait contre les Loix du Royaume: & qu'elle retiendra ceux qui ont esté admis aux charges dudit nouueau Semestre, que pour personnes priuées: & outre declarera les Conseillers & Officiers des Cours Souueraines qui feront les establissemens de Semestres nouueaux sans Edicts, bien & deuëment verifiez en la Cour, indignes & incapables de tous honneurs & priuileges, & d'entrier es Compagnies Souueraines, à quoy il auroit passé, & la Cour se seroit leuée.

*Addition.* Madame de Longueuille s'estant trouuée mal pour accoucher sur l'heure de minuit, accoucha fort heureusement d'un enfant malle, dont on enuoya donner aduis à monsieur le Duc de Longueuille son mary, par vn Courier quel'on fit partir à la pointe du iour.

*Du Vendredy 29. Ianuier au matin.*

**C**E iour toutes les Chambres assemblées, monsieur Brisart Conseiller en la Cour, qui auoit esté commis pour aller en la maison de la Dame Galland, femme du sieur Galland Secretaire du Conseil, sur ce qu'elle estoit refusante de payer la taxe à elle signifiée, fit rapport que le iour precedent il se seroit transporté au logis de ladite Dame Galland; & que suiuant l'ordre a luy donné par ladite Cour, il auroit fait perquisition en ladite maison, &



trouuée dans vne Cassette, 25000. liures en argent ou deniers comptans, & quelques bagues & pierreries, entr'autres choses vn fort beau fil de perles; & apres auoir fait procez Verbal, il auroit mis garnison dans ledit logis, parce que Monsieur le Coigneux President aux Requestes, se disant creancier dudit Galland, & plusieurs autres auroient formé opposition, & mesmesché que lesdites pierreries, fil de perles & argent ne fussent enleuez, pretendans en qualité de creanciers leur appartenir, ledit sieur Brisart ayant prié la Cour d'en ordonner comme il luy plairoit, apres auoir delibéré (Messieurs le Coigneux pere & fils, & Particelle President en la troisieme des Enquestes, s'estans retirez) il auroit esté dit & arresté que sans auoir égard audit oppositions à l'égard des deniers monnoyers, qu'ils seroient portez à l'Hostel de Ville pour estre employez aux necessitez publiques; & pour ce qui est des pierreries & fil de perles, que le tout demeureroient en dépost iusqu'à ce qu'autrement il en fust ordonné par la Cour, comme aussi pour 7000. liures de vaisselle d'argent. Monsieur le Comte & du Bois Conseillers en la Cour, auroient dit auoir trouué ledit iour d'hyer au logis de Nau Procureur, de la vaisselle d'argent, laquelle il leur auoit dit appartenir au nommé Chabernat, & estre grauée de ses armes.

Monsieur le President de Nesmond auroit dit, qu'un nommé Tilly enuoyé de Gayette par Monsieur de Guise à Madame de Guise sa mere, pour quelques affaires particulieres, seroit arrivé du iour d'hyer, duquel il a appris qu'à Marseille en Prouence, tous les habitans estoient en armes, qu'à la ville d'Aix il auoit veu la mesme chose, que Monsieur le Comte d'Alaix & Madame sa femme y auroient esté arrestez par le peuple, le vingt-quatriesme de ce mois, à cause qu'il vouloit avec deux mille hommes se rendre maistre de la ville, & particulièrement de la place aux Prescheurs qui est la plus forte, que le Duc de Richelieu estoit aussi arresté dans Marseille.

Ce mesme iour Monsieur le Procureur General seroit entré en la grande Chambre, & auroit dit que les remonstrances du Parlement qu'il auoit enuoyées à saint Germain, luy ont esté renuoyées avec vn billet sans adresse, signé du Plessis: la lecture duquel auroit esté faite par ledit sieur Procureur General, dont la teneur s'ensuit. Le porteur dira que l'on n'a pû receuoir le paquet de Monsieur Meliand, en l'estat où sont les affaires.

La Cour ce mesme iour auroit donné Arrest de deffence à ceux qui sont aux portes de Paris, de laisser passer personne que par les portes saint Iacques & saint Denis, avec ordre de laisser passer tout le monde pour la Communication de la ville avec les faux-bourgs, ce fait la Cour se seroit leuée.

*Addition.* Ledit iour à vne heure de releuée, le fils dont Madame de Longueuille estoit accouchée le iour precedent, fut baptisé en l'Eglise de saint Iean en Greue par Monsieur le Coadjuteur de l'Archeuesque de Paris; il eut pour Parrain Monsieur le Feron President en la seconde des Enquestes, & Preuost des Marchands de la ville de Paris; & pour Marraine Madame la



Duchesse de Bouillon; il fut nommé Charle-Paris ( du nom de la Ville ) son furnom d'Oileans Comte de saint Paul.

Le sieur Launay Graué Partisan, fut arresté prisonnier à la Bastille.

Ce iour 300. hommes de pied & 300. chevaux de l'armée de monsieur le Prince, voulant entrer en garnison à Brie-Comte-Robert, furent repoussez par les habitans, qui firent resolution de se deffendre, contre des gens qui pilloient aussi bien ceux qui se rendoient volontairement, comme ceux qui faisoient resistance.

### *Du Samedi trentiesme Ianuier, audit an.*

Ce iour le Parlement toutes les Chambres assemblées, vn de la Compagnie auroit dit auoir aduis certain du lieu où estoit la vaisselle d'argent, les bagues & pierreries du Cardinal Mazarin; & que s'il plaisoit à la Cour commettre quelqu'un de Messieurs, qu'on les trouueroit; & sur cet aduis la Cour auroit commis Messieurs Doujat & Loisel pour se transporter & faire perquisition au lieu qui leur seroit indiqué.

Monsieur Charton President aux Enquestes auroit fait plainte, que monsieur le Duc d'Angoulesme empeschoit qu'on apportast des viures à Paris des enuironz de Grosbois, ayant fait deffences aux habitans des villages circonuoisins d'en apporter. Sur quoy monsieur Godard Conseiller en la quatriesme des Enquestes, dit que monsieur d'Angoulesme luy auroit écrit vne lettre du vingt-huictiesme Ianuier, où il luy auroit mandé n'estre point sorty depuis son depart de Paris, iusques audit iour, & que le lendemain vingt-neufiesme il s'en alloit à saint Germain en Laye par Lagny & par Elcoian, où estant il tascheroit à menager aupres de la Reyne quelque accommodement, qu'il y trauiilleroit puissamment, & s'y emploiroit de tout son pouuoir, s'efforçant de luy faire voir les desordres presens, & l'Estat où sont les affaires, & que par-là la Cour pouuoit connoistre les bonnes intentions dudit sieur Duc d'Angoulesme, n'estant pas croyable qu'il voulust escrire en ces termes, s'il auoit fait les deffences dont on auoit donné aduis audit sieur Charton, ce qui satisfait la Compagnie.

A laquelle monsieur le Febure Conseiller aux Requestes, auroit dit auoir receu vne lettre de monsieur son fils Conseiller en ladite Cour, qui estoit à Charenton, par laquelle il luy auroit mandé estre necessaire de se saisir de tous les postes qui sont aux enuironz de Charenton, & mesme de ceux qui sont plus esloignez, & y enuoyer la garnison qui estoit lors audit lieu de Charenton, au lieu de laquelle on pourroit enuoyer de la milice des habitans de Paris pour le garder, en attendant qu'on y eust enuoyé d'autres troupes. Monsieur Charton se seroit offert de conduire ladite milice, & sur l'heure seroit allé à l'Hostel de Ville, s'offrir de faire cette conduite.



Monsieur de la Moignon Maistre des Requestes, estant venu prendre sa place, auroit dit & fait rapport à la Cour, qu'il auoit veu ce iour-là du pain suffisamment à la Halle, y en estant arriué soixante charrettes au moins, & qu'il estoit à propos d'enuoyer quelques-vns de Messieurs pour le faire distribuer sans confusion, ce qui auroit esté fait.

Monsieur Payen Conseiller en ladite Cour, auroit dit auoir aduis qu'en vn lieu de cette ville il y auoit vne somme tres-notable d'argent, procedant des Receptes, & que cet argent deuoit estre porté à saint Germain, sur quoy la Compagnie l'auroit prié d'accepter la Commission d'aller en ce lieu; & de faire perquisition d'autres deniers publics, dont il auoit aduis, ce qu'il auroit promis de faire.

Sur la plainte aussi qui se fit, que les Clinqualiers suruendoient les armes, la Cour donna Arrest, portant deffences ausdits Clinqualiers, Armuriers, &c. de vendre les mousquets & autres armes, comme aussi la poudre & mesche à plus haut prix que celuy imposé par ladite Cour; sçauoir les mousquets de Hollande & Sedan dix liures, ceux de Liege huit liures, les picques de fresne vingt-quatre sols, la paire d'armes fortes douze liures, les foibles dix liures, les pistolets à fusil dix-huit liures, ceux à roüet seize liures, la poudre à mousquet vingt sols, la fine vingt-quatre sols, la liure de mesche quatre sols.

Autre Arrest par lequel il fut ordonné que les 46000. liures, prouenant de la Recepte generale d'Auuergne, seroient conduits incessamment en cette ville, & mis es coffres de l'Hostel de Ville.

Ce mesme iour Monsieur le President de Nesmond, fit rapport de l'estat des Gens de Guerre que l'on a leuez à Paris, & de ce qui restoit à leuer; sur quoy on fit plusieurs propositions touchant la subsistance de ses Gens de Guerre, tant leuez qu'à leuer: quelques-vns de Messieurs se seroient plaints que plusieurs de la Compagnie n'auoient pas encore payé leur taxe, qu'on n'auoit pas encor receu tous les deniers que doiuent payer les portes cocheres & les petites portes, qu'il y auoit difficulté entre les locataires & les propriétaires; sur quoy il y auroit eu plusieurs aduis, les vns estimans les taxes deuoir estre payées par les propriétaires & non par les locataires, d'autres que cette taxe estât personnelle, elle deuoit estre payée par ceux qui sont demeurans dans les maisons; enfin il auroit passé que les taxes seront personnelles; sçauoir cent cinquante liures, pour ceux qui habitent les portes cocheres, & trente liures pour les petites portes, & condamner les locataires au payement desdites taxes à la discretion des Commissaires, dont la Compagnie auroit nommé deux en chaque quartier pour faire payer lesdites taxes, à l'exception de ceux qui se trouueroient estre dans vn Corps ou Communauté, qui auroient payé le double de Corbie.

La Cour commit pareillement Messieurs Viole de la Grande Chambre & le Doux, de la quatriesme, pour signer les passeports pour les postes, lesquels seroient deliurez & signez par le Greffier Guyet, enjoignant aux Capitaines & Officiers de la ville, de ne point laisser passer autrement.

*Addition.* On faisoit courir vn bruit semé par ceux du Cardinal Mazarin,



que la paix estoit faicte auec le Duc Charles, lequel venoit auec huit mille hommes; ceux qui asseuroient cette nouuelle, disoient que le sieur Hesselin preparoit ce soir-là à souper audit Duc.

Monsieur l'Archeuesque de Toulouse partit auec passeport pour aller à saint Germain, pour ses affaires particulieres, resolu pourtant s'il y auoit lieu de parler à la Reyne de l'estat present des affaires, qui iusqu'à lors ni luy auoit point esté despeint au vray, ceux qui l'approchoient luy en celant la verité.

Monsieur de Vitry estant allé le soir precedent à Brie-Comte-Robert, tant pour mettre garnison dans la ville, que pour amener Madame sa femme de Corbeil à Paris, fit rencontre dans la vallée de Fescan de quelque caualerie du party contraire: cette caualerie à la veuë de celle de monsieur de Vitry, se separa; partie estant allée vers Bagnolet, partie vers le Chasteau de Vincennes: Tancrede de Rohan fils du feu Duc de Rohan, ayant poussé cette caualerie iusqu'aupres dudit Chasteau de Vincennes, pour s'estre trop engagé fut inuesty par la garnison qui en sortit, il y fut blessé & pris, puis mené audit Chasteau où il mourut le lendemain, donnant gain de cause à la Duchesse de Rohan sa sœur, qui luy disputoit sa legitimacion & les biens qu'il pouuoit pretendre en la succession de son pere.

### *Du Dimanche trente-uniesme Ianuier.*

**C**E iour le Parlement ne s'assembla point, monsieur Payen suiuant la Commission à luy donnée par la Cour, se transporta chez le nommé Pauillon, sur l'aduis qu'il eut qu'il y auoit de l'argent de la recepte du Conuoy de Bourdeaux, & y en trouua en effet, comme il se verra cy-apres, au rapport qu'il en fera à la Cour, ensemble de la perquisition par luy faite ce mesme iour au logis de la Pompe du pont-neuf.

